

M. TULLII CICERONIS

DE *W. Wordsworth*

OFFICIIS

LIBRI TRES.

ITEM,

CATO MAJOR, sive de Senectute.

LAELIUS, sive de Amicitia.

PARADOXA.

SOMNIUM SCIPIONIS.

Ad Optimorum Exemplarium fidem recensiti.



L O N D I N I :

Typis J. ROBERTS, Impensis autem
SOCIETATIS STATIONARIORUM.

M DCC XXVI.

R33847

6.
M. TULLII CICERONIS
D E
OFFICIIS,
Ad Marcum Filium.

L I B. I.

ARGUMENTUM per D. Erasmus Roterod.

Ciceronem filium suo hortatur exemplo, nè simplici cuiquam studio sese addicat, sed Græca cum Latinis, & orationis virtutes cum philosophia scientia jungat. Deinde, quò eum reddat attentiores, hanc, quæ de officiis est, philosophia partem, duobus potissimum nominibus commendat, vel quòd usus ejus ad omnem vitæ rationem latissimè pateat, vel quòd hac una sit philosophis omnibus inter se communis. Postremò, testatur se in hac disputatione Stoicos potissimum sequi, quòd hi vel optime boni finem, ad quem officia omnia referuntur, constituerint: cum Epicurus voluptate metiens summum bonum, atque Aristo, Pyrrho, & Herillus, tollentes rerum delectum, officii quoque naturam subverterint.



Uanquam te, Marce fili, annum jam audientem Cratippum, idque Athenis, abundare oportet præceptis institutisque philosophiæ, propter summam & doctoris auctoritatem, & urbis; quorum alter te scientiâ augere potest, altera exemplis: tamen ut ipse ad meam utilitatem

semper cum Græcis Latina conjunxi, neq; id in philosophia solum, sed etiam in dicendi exercitatione feci, idem tibi censeo faciendum, ut par sis in utriusque orationis facultate: quam quidem ad rem, nos (ut videmur) magnum adtulimus adjumentum hominibus nostris, ut non modo Græcarum literarum rudes, sed etiam docti, aliquantum se arbitrentur adeptos, & ad dicendum, & ad judicandum. Quamobrem disces tu quidem à principe hujus ætatis philosophorum, & disces quamdiu voles: tam diu autem velle debebis, quoad te quantum proficias non pœnitebit. Sed tamen nostra leges, non multum à Peripateticis dissidentia (quoniam utriq; & Socratici, & Platonici esse volumus) De rebus ipsis utere tuo judicio; nihil enim impedio: orationem autem Latinam profecto legendis nostris efficies pleniorē. Nec verò arroganter hoc dictum existimari velim. Nam philosophandi scientiam concedens multis; quod est oratoris proprium, apte, distincte, ornatè, dicere (quoniam in eo studio ætatem consumpsi) si id mihi adsumo, videor id meo jure quodammodo vindicare. Quamobrem magnopere te hortor, mi Cicero, ut non solum orationes meas, sed hos etiam de philosophia libros, qui jam illos ferè æquarunt, studiose legas. Vis enim dicendi major est in illis: Sed hoc quoque colendum est æquabile & temperatum orationis genus, & id quidem nemini video Græcorum adhuc contigisse, ut idem utroque in genere laboraret, sequereturque & illud forense dicendi, & hoc quietum disputandi genus: nisi fortè Demetrius Phalereus in hoc numero haberi potest, disputator subtilis, orator parum vehemens, dulcis tamen, ut Theophrasti discipulum possis agnoscere. Nos autem quantum in utroque profecerimus, aliorum sit judicium: utrumque certè secuti sumus. Equidem & Platonem existimo, si genus id forense dicendi tractare voluisset, gravissimè & copiosissimè

simè potuisse dicere : & Demosthenem, si illa quæ à Platone didicerat tenuisset, & pronunciare voluisset, ornatè splendidéque facere potuisse. Eodemque modo de Aristotele & Isocrate judico ; quorum uterq; suo studio delectatus, contempsit alterum. Sed cùm statuissem aliquid hoc tempore ad te scribere, & multa posthac, ab eo ordiri volui maximè, quod & ætati tuæ esset aptissimum, & auctoritati meæ. Nam cùm multa sint in philosophia & gravia & utilia accuratè copioséque à philosophis disputata, latissimè patere videntur ea, quæ de officiis tradita ab illis & præcepta sunt. Nulla enim vitæ pars neque publicis, neque privatis, neque forensibus, neque domesticis in rebus, neque si tecum agas quid, neque si cum altero contrahas, vacare officio potest : in eoque colendo sita est vitæ honestas omnis, & in negligendo turpitudò. Atque hæc quidem quæstio communis est omnium philosophorum. Quis est enim qui nullis officii præceptis tradendis philosophum se audeat dicere ? Sed sunt nonnullæ disciplinæ, quæ propositis bonorum & malorum finibus officium omne pervertunt. Nam qui summum bonum instituit, ut nihil habeat cum virtute conjunctum ; idque suis commodis, non honestate metitur : hic si sibi ipse consentiat, & non interdum naturæ bonitate vincatur, neque amicitiam colere possit, nec justitiam, nec liberalitatem. Fortis verò, dolorem summum malum judicans ; aut temperans, voluptatem summum bonum statuens, esse certè nullo modo potest. Quæ quanquam ita sunt in promptu, ut res disputatione non egeat ; tamen sunt à nobis alio loco disputata. Hæ disciplinæ igitur si sibi consentaneæ esse velint, de officio nihil queant dicere. Neq; ulla officii præcepta firma, stabilia, conjuncta naturæ tradi possunt, nisi aut ab iis qui solam, aut ab iis qui

maximè honestatem propter se dicant expetendam. Itaque propria est ea præceptio Stoicorum, & Academicorum, & Peripateticorum: quoniam Aristonis, Pyrrhonis, Herilli, jampridem explosa sententia est. Qui tamen haberent jus suum disputandi de officio, si rerum aliquem delectum reliquissent, ut ad officii inventionem aditus esset. Sequemur igitur hoc quidem tempore, & hac in quaestione potissimum Stoicos, non ut interpretes, sed, ut solemus, è fontibus eorum, judicio arbitrioque nostro, quantum, quoque modo videbitur, hauriemus.

Placet igitur, quoniam omnis disputatio de officio futura est, antè definire, quid sit officium: quod à Panætio prætermisum esse minor. Omnis enim quæ à ratione suscipitur de aliqua re institutio, debet à definitione proficisci, ut intelligatur quid sit id, de quo disputetur.

Quoniam non est simplex officii vocabulum, neque poterat in genere definiri commodè, divisione explicat duplici quidem verbis, sed re eadem. Facit autem et Stoicorum sententia duo genera officiorum: Alterum quod perfectum vocant, estque cum fine boni conjunctum, neque in quemquam præterquam in sapientem competit: Alterum medium, sive inchoatum, quod per se neque bonum sit, neque malum, sed ad usum aliquem vitæ sumitur: ut rectè depositum reddere, perfecti sit officii; depositum reddere, imperfecti: cui rectè nisi sapiens nemo reddat, reddant autem similes & stulti. Divus autem Ambrosius prioris generis esse putat, quæ secundum consilia fiunt; posterioris, quæ secundum præcepta: ut bene administrare rem, ad inchoatum officium pertineat; erogare in pauperes, ad perfectum.

OMnis de officio duplex est quæstio. Unum genus est, quod pertinet ad finem bonorum : alterum, quod positum est in præceptis, quibus in omnes partes usus vitæ conformari possit. Superioris generis hujusmodi exempla sunt : Omniāne officia perfecta sint : num quod officium aliud alio majus sit : & quæ sunt generis ejusdem. Quorum autem officiorum præcepta traduntur, ea quanquam pertinent ad finem bonorum, tamen id minùs adparet, quia magis ad institutionem vitæ communis spectare videntur : de quibus est nobis his libris explicandum. Atque etiam alia divisio est officii : nam & medium quoddam officium dicitur, & perfectum. Perfectum officium rectum (opinor) vocemus, quod Græci κατόρθωμα : hoc autem commune καὶ ἄκρον vocant. Atque ea sic definiunt, ut rectum quod sit, id perfectum officium esse definiant : medium autem officium id esse dicant, quod cur factum sit, ratio probabilis reddi possit.

Quæ in deligendis rebus deliberandi ratio.

TRiplex igitur est, ut Panætio videtur, consilii capiendi deliberatio. Nam, honestumne factum sit, an turpe, dubitant, id quod in deliberationem cadit : in quo considerando sæpe animi in contrarias sententias distrahuntur. Tum autem aut anquirunt, aut consultant ad vitæ commoditatem, jucunditatemque, ad facultates rerum atq; copias, ad opes, ad potentiam, quibus & se possint juvare, & suos, conducat id necne, de quo deliberant. Quæ deliberatio omnis in rationem utilitatis cadit. Tertium dubitandi genus est, cum pugnare videtur cum honesto id quod videtur esse utile. Cum enim utilitas ad se rapere, honestas contrà revocare ad se videtur, fit ut distrahatur deliberando animus, adferatq; ancipitem curam cogitandi. Hac

divisione, (cùm præterire aliquid, maximum vitium in dividendo sit) duo prætermiffa sunt. Nec enim solum, utrùm honestum an turpe sit, deliberari solet: sed etiam duobus propositis honestis, utrum honestius; itémque, duobus propositis utilibus, utrum utilius. Ità, quam ille triplicem putavit esse rationem, in quinque partes distribui debere reperitur. Primum igitur est de honesto, sed dupliciter; tum pari ratione de utili; post de comparatione eorum differendum.

Ex veteris Academiae & Stoicorum sententia, qui summum bonum à natura proficisci putant, & hoc ipsum esse beatè vivere, secundum naturam vivere, commemorat, quæ semina nobis natura inseverit, quæque adminicula addiderit: quibus accedente industriâ ac usu, ad felicitatem, quo referuntur omnia, proficiamus. Nam primo loco, omni animanti studium tuendi sui indidit, id quod jure natura est homini cum pecudibus commune; vocaturque κατὰ φύσιν ὁρῶντος, id est, secundum naturam primum: consequens est appetitus eorum quæ incolumitati sunt amica, fuga eorum quæ noxia: Verùm homini, quoniam non solum è corpore constabat, sed etiam ex animo, ut totus esse possit incolumis, ratiocinandi vim addidit: unde disciplina omnes, & virtutes illæ morales proficiuntur.

P Rincipio, generi animantium omni est à natura tributum, ut se, vitam corpúsque tueatur; declinetque ea quæ nocitura videantur; omniâque quæcunque ad vivendum sint necessaria, anquirat, & paret; ut pastum, ut latibula, & alia generis ejusdem. Commune autem animantium omnium est conjunctionis adpetitus procreandi causâ, & cura quædam eorum quæ procreata sunt. Sed inter hominem & belluam hoc maximè interest, quòd hæc tantum, quantum sensu movetur, ad id solum quod adest,

adeſt, quódq; præſens eſt, ſe accommodat, paululum admodum ſentiens præteritum, aut futurum: homo autem, quod rationis eſt particeps, per quam conſequentia cernit, cauſas rerum videt, earúmque; progreſſus & quaſi anteceſſiones non ignorat, ſimilitudines comparat, & rebus præſentibus adjungit atque adnectit futuras; facile totius vitæ curſum videt, ad eámque degendam præparat res neceſſarias. Eadémque natura vi rationis hominem conciliat homini, & ad orationis & ad vitæ ſocietatem: ingenerátque; inprimis præcipuum quemdam amorem in eos qui procreati ſunt: impellitque ut hominum cœtus & celebraſiones eſſe & à ſe obiri velit; ob eaſque cauſas ſtudeat parare ea, quæ ſuppeditent & ad cultum & ad victum; nec ſibi ſoli, ſed conjugi, liberis, cæteriſque; quos charos habeat, tuerique debeat. Quæ cura exſuſcitatur etiam animos, & majores ad rem gerendam facit. Imprimisque hominis eſt propria veri inquiſitio atque inveſtigatio. Itaque cum ſumus neceſſariis negotiis curiſque vacui, tum avemus aliquid videre, audire, ac dicere; cognitionémque rerum aut occultarum, aut admirabilium, ad beatè vivendum neceſſarium ducimus. Ex quo intelligitur, quod verum, ſimplex, ſincerúmque; ſit, id eſſe naturæ hominis aptiſſimum. Huic veri videndi cupiditati adjuncta eſt adpetitio quædam principatûs, ut nemini parere animus bene à natura informatus velit, niſi præcipienti, aut docenti, aut utilitatis cauſâ juſtè & legitimè imperanti; ex quo animi magnitudo exiſtit, humanarúmque rerum contemptio. Nec verò illa parva vis naturæ eſt rationiſque, quòd unum hoc animal ſentit quid ſit ordo, quid ſit quod deceat, in factis diſtiſque qui modus. Itaque eorū ipſorum, quæ adſpectu ſentiuntur, nullum aliud animal pulchritudinem, venuſtatem, convenientiam partium ſentit. Quam ſimilitudinem natura ratioque; ab oculis ad animum tranſ-

transferens, multò etiam magis pulchritudinem, constantiam, ordinem in consiliis factisque conservandum putat; cavétq; nè quid indecorè effœminatève faciat; tum in omnibus & opinionibus & factis, ne quid libidinosè aut faciat, aut cogitet. Quibus ex rebus conflatur & efficitur id, quod quærimus, honestum: quod etiam si nobilitatum non sit, tamen honestum sit; quòdque verè dicimus, etiam si à nullo laudetur, naturâ esse laudabile. Formam quidem ipsam, Marce fili, & tanquam faciem honesti vides, quæ si oculis cerneretur, mirabiles amores (ut ait Plato) excitaret sapientiæ.

De quatuor virtutibus, unde omnia vitæ communis officia manant, Prudentia, Jusitia, Fortitudine, & Temperantia; ac de materia singularum.

SED omne quod honestum est, id quatuor partium oritur ex aliqua. Aut enim in perspicientia veri solertiâq; versatur; aut in hominum societate tuenda, tribuendoque suum cuique, & rerum contractarum fide; aut in animi excelsi atq; invicti magnitudine ac robore; aut in omnium quæ fiunt, quæq; dicuntur, ordine & modo, in quo inest modestia & temperantia. Quæ quatuor quamquam inter se colligata atque implicita sunt, tamen ex singulis certa officiorum genera nascuntur: velut ex ea parte, quæ prima descripta est, in qua sapientiam & prudentiam ponimus, inest indagatio, atque inventio veri; ejusque virtutis hoc munus est proprium. Ut enim quisque maximè perspicit quid in re quaque verissimum sit, quisque acutissimè & celerrimè potest & videre & explicare rationem; is prudentissimus & sapientissimus rite haberi solet. Quocirca huic, quasi materia quam tractet & in qua versetur, subjecta est veritas. Reliquis autem tribus virtutibus necessitates propositæ sunt, ad eas res parandas tuendasque, quibus

bus actio vitæ continetur; ut & societas hominum conjunctioque servetur: & animi excellentia magnitudoque cum in augendis opibus, utilitatibusq; & sibi & suis comparandis, tum multò magis in his ipsis despiciendis eluceat. Ordo autem & constantia, & moderatio, & ea quæ sunt his similia, versantur in eo genere, ad quod adhibenda est actio quædam, non solum mentis agitatio. His enim rebus, quæ tractantur in vita, modum quemdam & ordinem adhibentes, & honestatem, & decus conservabimus.

De Prudentia, virtutum omnium principe, & quid in ea fugiendum, quid sequendum.

EX quatuor autem locis, in quos honesti naturam vimq; divisimus, primus ille, qui in veri cognitione consistit, maxime naturam attingit humanam. omnes enim trahimur, & ducimur ad cognitionis & scientiæ cupiditatem, in qua excellere pulchrum putamus: labi autem, errare, nescire, decipi, & malum, & turpe ducimus. In hoc genere, & naturali, & honesto, duo vitia vitanda sunt: Unum, nè incognita pro cognitis habeamus, hisque temerè assentiamus: quod vitium effugere qui volet (omnes autem velle debent) adhibebit ad considerandas res, & tempus, & diligentiam. alterum est vitium, quòd quidam nimis magnum studium, multamq; operam, in res obscuras atq; difficiles conferunt, easdemque non necessarias. Quibus vitiis declinatis, quod in rebus honestis, & cognitione dignis operæ curæq; ponetur, id jure laudabitur: ut in astrologia C. Sulpitium audivimus, in geometria Sex. Pompeium ipsi cognovimus, multos in dialectica, plures in jure civili: quæ omnes artes in veri investigatione versantur; cujus studio à rebus gerundis abduci, contra officium est. Virtutis enim laus omnis in actione consistit: à qua

à qua tamen sæpe fit intermissio, multiq; dantur ad studia reditus. Tum agitatio mentis, quæ nunquam acquiescit, potest nos in studiis cogitationis, etiam sine opera nostra, continere. Omnis autem cogitatio motusque animi, aut in consiliis capiendis de rebus honestis & pertinentibus ad bene beatæque vivendum, aut in studiis scientiæ cognitionisq; versatur. Ac de primo quidem officii fonte diximus.

De Justitia.

DE tribus autem reliquis latissimè patet ea ratio, quâ societas hominum inter ipsos, & vitæ quasi communitas continetur. Cujus partes duæ sunt: justitia, in qua virtutis splendor est maximus, ex qua boni viri nominantur; & huic conjuncta beneficentia, quam eandem vel benignitatem, vel liberalitatem appellari licet. Sed justitiæ primum munus est, ut nè cui quis noceat, nisi laceffitus injuria: deinde, ut communibus utatur pro communibus, privatis ut suis. Sunt autem privata nulla naturâ, sed aut veteri occupatione, ut qui quondam in vacua venerunt; aut victoriâ, ut qui bello potiri sunt; aut lege, pactione, conditione, sorte. Ex quo fit, ut ager Arpinas Arpinatum dicatur; Tusculanus, Tusculanorum. Similisque est privatarum possessionum descriptio. Ex quo, quia suum cujusq; fit eorum, quæ naturâ fuerant communia, quod cuique obtigit, id quisq; teneat: ex quo si quis sibi adpetet, violabit jus humanæ societatis. Sed quoniam (ut præclare scriptum est à Platone) non nobis solum nati sumus, ortusq; nostri partem patria vendicat, partem amici; atq; ut placet Stoicis, quæ in terris gignuntur, ad usum hominum omnia creari, homines autem hominum causâ esse generatos, ut ipsi inter se aliis alii prodesse possent: in hoc natu-

tam debemus ducem sequi, & communes utilitates in medium adferre, mutatione officiorum, dando, accipiendo; tum artibus, tum operâ, tum facultatibus devincire hominum inter homines societatem.

Fides justitiæ fundamentum, ab etymologia.

Fundamentum est autem justitiæ fides, id est, dictorum conventorumq; constantia & veritas: ex quo, quamquam hoc videbitur fortasse cuiuspiam durius, tamen audeamus imitari Stoicos, qui studiōse exquirunt unde verba sint ducta, credamūsque, quia fiat quod dictum est, appellatam fidem.

Duo injustitiæ genera, ut justitiæ: & unde oriantur.

SED injustitiæ genera duo sunt: unum eorum, qui inferunt; alterum eorum, qui ab iis quibus inferuntur, si possint, non propulsant injuriam. Nam qui injustè impetum in quempiam facit, aut irâ, aut aliquâ perturbatione incitatus, is quasi manus adferre videtur socio. Qui autem non defendit, nec obstitit, si potest, injuriæ; tam est in vitio, quàm si parentes, aut amicos, aut patriam deserat. Atq; illæ quidem injuriæ quæ nocendi causâ de industria inferuntur, sæpe à metu proficiuntur: ut cùm is qui nocere alteri cogitat, timet nē, nisi id fecerit, ipse aliquo adficiatur incommodo. Maximam autem partem ad injuriam faciendam aggrediuntur, ut adipiscantur ea quæ concupiverunt: in quo vitio latissimè patet avaritia. Expetuntur autem divitiæ, cùm ad usus vitæ necessarios, tum ad perfruendas voluptates. In quibus autem major est animus, in iis pecuniæ cupiditas spectat ad opes, & ad gratificandi facultatem: ut nuper M. Crassus negabat ullam satis magnam pecuniam esse ei qui in republica princeps vellet esse, cujus fructibus exercitum alere

non

non posset. Delectant etiam magnifici adparatus, vitæq; cultus cum elegantia & copia; quibus rebus effectum est, ut infinita pecuniæ cupiditas esset. Nec verò rei familiaris amplificatio, nemini nocens, vituperanda; sed fugienda semper injuria est. Maximè autem adducuntur plerique, ut eos justitiæ capiat oblivio, cum in imperiorum, honorum, gloriæ cupiditatem inciderunt. Quod enim est apud Ennium, *Nulla sancta societas, nec fides regni est*; id latius pater. Nam quidquid ejusmodi est, in quo non possint plures excellere, in eo fit plerumque tanta contentio, ut difficillimum sit sanctam servare societatem. Declaravit id modo temeritas C. Cæsaris, qui omnia jura divina atque humana pervertit propter eum, quem sibi ipse opinionis errore finxerat, principatum. Est autem in hoc genere molestum, quòd in maximis animis, splendidissimisque ingeniis plerumque existunt honoris, imperii, potentiae, gloriæ cupiditates. Quò magis cavendum est, ne quid in eo genere peccetur.

Injuria alia aliâ levior.

SED in omni injustitia permultum interest, utrùm perturbatione aliquâ animi, quæ plerumque brevis est, & ad tempus; an consultò, & cogitata fiat injuria. Leviora enim sunt, quæ repentino aliquo motu accidunt, quàm ea, quæ meditata & præparata inferuntur. Ac de inferenda quidem injuria satis dictum est.

Causas recenset, unde secundum injustitiæ genus oriatur.

PRætermittendæ autem defensionis, deferendiq; officii plures solent esse causæ. Nam aut inimicitias, aut laborem, aut sumptus suscipere nollunt: aut etiam negligentiam, pigritiam, inertiam, aut

fuis

suis studiis quibusdam, occupationibusve sic impediuntur, ut eos, quos tutari debeant, desertos esse patiantur. Itaque videndum est, ne non satis sit id, quod apud Platonem est in Philosophos dictum; quod in veri investigatione versentur;,, quodque ea, quæ plerique vehementer expetunt, de quibus inter se digladiari solent, contemnant, & pro nihilo ducant, propterea justos esse! Nam alterum justitiæ genus adsequuntur, inferendâ ne cui noceant injuriâ, in alterum incidunt. Discendi enim studio impediti, quos tueri debent, deserunt. Itaque eos ad Rempublicam ne accessurus quidem putant, nisi coactos; æquius autem erat id voluntate fieri. Nam hoc ipsum ita justum est, quod rectè fit, si est voluntarium. Sunt etiam, qui aut studio rei familiaris tuendæ, aut odio quodam hominum, suum se negotium agere dicant, ne facere cuiquam videantur injuriam: qui altero injustitiæ genere vacant, in alterum incurrunt. Deserunt enim vitæ societatem, quia nihil conferunt in eam studii, nihil operæ, nihil facultatum. Quoniam igitur duobus generibus injustitiæ propositis, adjunximus causas utriusque generis, easque res antè constituimus, quibus justitia continetur; facile quod cujusque temporis officium sit, poterimus, nisi nosmetipsos valde amabimus, judicare. Est enim difficilis cura rerum alienarum: quamquam Terentianus ille Chremes *Humani nihil à se alienum putat*. Sed tamen quia magis ea percipimus, atque sentimus, quæ nobis ipsis aut prospera, aut adversa eveniunt, quàm illa quæ cæteris, quæ quasi longo intervallo interjecto videmus: aliter de illis, ac de nobis judicamus. Quocirca bene præcipiunt, qui vetant quidquam agere, quod dubites æquum sit an iniquum: æquitas enim lucet ipsa per se; dubitatio cogitationem significat injuriæ.

Docet officia pro circumstantiis variari, & quod officiosum erat, id contra officium fieri; duobus maxime modis; si aut ab utilitate recedatur, aut minus utile præferatur utiliori: quin interdum præter officium esse, nimum inhaerere juris apicibus.

SED incidunt sæpe tempora, cum ea quæ maxime videntur digna esse justo homine, eoque quem virum bonum dicimus, commutantur, fiuntque contraria: ut, reddere depositum, promissum facere; quæque pertinent ad veritatem, & ad fidem, ea migrare interdum, & non servare, sit justum. Referri enim decet ad ea, quæ proposui in principio, fundamenta justitiæ: primum, ut ne cui noceatur; deinde, ut communi utilitati serviat. Ea cum tempora commutantur, commutatur officium: & non semper est idem. Potest enim accidere promissum aliquod, & conventum, ut id effici sit inutile, vel ei cui promissum sit, vel ei qui promiserit. Nam si (ut in fabulis est) Neptunus quod Theseo promiserat, non fecisset; Theseus filio Hippolyto non esset orbatus. Ex tribus enim optatis (ut scribitur) hoc erat tertium, quod de Hippolyti interitu iratus optavit: quo impetrato, in maximos luctus incidit. Nec promissa igitur servanda sunt ea, quæ sunt iis quibus promiseris inutilia: nec, si plus tibi noceant quam illi prosint cui promiseris. Contra officium est, majus non anteponi minori: ut, si constitueris te cuiquam advocatum in rem præsentem esse venturum, atque interim graviter ægrotare filius cœperit, non sit contra officium, non facere quod dixeris: magisque ille, cui promissum sit, ab officio discedat, si se destitutum queratur. Jam illis promissis non standum esse quis non videt, quæ coactus quis metui, quæ deceptus dolo promiserit? Quæ quidem pleraque jure prætorio liberantur, nonnulla legibus.

*In juridicialibus officiis equitas spectanda, non
verbis inherendum.*

EXsistunt etiam sæpe injuriæ calumniâ quadam,
& nimis callidâ, sed malitiosâ, juris interpreta-
tatione. Ex quo illud, summum jus, summa inju-
ria, factum est jam tritum sermone proverbium.
Quo in genere etiam in repub. multa peccantur:
ut ille, qui, cum triginta dierum essent cum hoste
pactæ induciæ, noctu populabatur agros, quod di-
erum essent pactæ, non noctium induciæ. Nec
noster quidem probandus, si verum est, Q. Fabium
Labeonem, seu quem alium, nihil enim præter au-
ditum habeo, arbitrum Nolanis, & Neapolitanis
de finibus à senatu datum, cum ad locum venisset,
cum utrisque separatim locutum, ne cupidè quid
agerent, ne appetentor; atque ut regredi, quàm
progredi mallent. Id cum utrique fecissent, ali-
quantum agri in medio relictum est. Itaque illo-
rum fines, sicut ipsi dixerant, terminavit: in me-
dio relictum quod erat, populo Romano adjudica-
vit. Decipere hoc quidem est, non judicare;
quocirca in omni re fugienda est talis solertia.
Sunt autem quædam officia etiam adversus eos ser-
vanda, à quibus injuriam acceperis. Est enim ul-
ciscendi & puniendi modus. Atque haud scio, an
satis sit, eum, qui lacefferit, injuriæ suæ pœnitere:
ut & ipse nè quid tale posthac, & ceteri sint ad in-
juriam tardiores.

Sup. committat.

Haftenus de civili justitia, nunc de bellicis officiis.

*Facit autem duo belli genera, quorum utrique
communia sunt hæc: Ut non nisi justis de causis
suscipiantur: nec inferantur nisi rebus repetitis:
nisi solemniter denunciata: ut ritè gerantur, nè
seviatur supra modum in victos: humanius etiam,
qui se dedunt, recipiantur: fides hosti etiam pri-*

B

vatim

vatim præstetur, non modò in conventis solennibus. Propria vero sunt illa, ut cum hoc hostium genere, qui de imperio certant, humaniùs agamus : cum his, qui vitam nostram petunt, severiùs.

ATque in rep. maximè conservanda sunt jura belli. Nam cum sint duo genera decertandi : unum per disceptionem, alterum per vim : cumque illud proprium sit hominis, hoc belluarum : confugiendum est ad posterius, si uti non licet superiore. Quare suscipienda quidem bella sunt ob eam causam, ut sine injuria in pace vivatur. Partâ autem victoriâ, conservandi ii, qui non crudeles in bello, non immanes fuerunt : ut majores nostri Tusculanos, Æquos, Volscos, Sabinos, Hernicos in civitatem etiam acceperunt : at Carthaginem, & Numantiam funditùs sustulerunt. Nollem Corinthum : sed credo aliquid secutos, opportunitatem loci maxime, ne posset aliquando ad bellum faciendum locus ipse adhortari. Meâ quidem sententiâ, paci, quæ nihil habitura sit insidiarum, semper est consulendum. In quo si mihi esset obtemperatum, etsi non optimam, at aliquam Remp. quæ nunc nulla est, haberemus. Et cum iis, quos vi deviceris, consulendum est, tum ii, qui, armis positis, ad imperatorum fidem confugient, quamvis murum aries percusserit, recipiendi sunt. In quo tantopere apud nostros justitia culta est, ut ii, qui civitates, aut nationes devictas bello in fidem recepissent, earum patroni essent, more majorum. Ac belli quidem æquitas sanctissimè feciali populi Romani jure perscripta est. Ex quo intelligi potest, nullum bellum esse justum, nisi quod aut rebus repetitis geratur, aut denuntiatum ante sit & indictum. Poppillius imperator tenebat provinciam ; in cujus exercitu Catonis filius tiro militabat. Cum autem Poppillio videretur unam dimittere legionem, Catonis quoque filium, qui in eadem

dem legione militabat, dimisit. Sed cum amore pugnandi in exercitu remansisset, Cato ad Poppillium scripsit, ut, si eum pateretur in exercitu remanere, secundo eum obligaret militiæ sacramento: quia, priore amisso, jure cum hostibus pugnare non poterat. Adeo summa erat observatio in bello movendo. Marci quidem Catonis senis epistola est ad M. filium, in qua scripsit: se audisse, eum missum factum esse à Consule, cum in Macedonia Persico bello miles esset. Monet igitur, ut caveat, nè prælium ineat. Negat enim jus esse, qui miles non sit, pugnare cum hoste. Equidem illud etiam animadverto, quòd qui proprio nomine perduellis esset, is hostis vocaretur, lenitate verbi tristitiam rei mitigante. Hostis enim apud majores nostros is dicebatur, quem nunc peregrinum dicimus. Indicant duodecim tabulæ: aut status dies cum hoste. Itémque: adversus hostem æterna auctoritas. Quid ad hanc mansuetudinem addi potest? eum, qui cum bella geras, tam molli nomine appellari? Quamquam id nomen durius jam effecit vetustas: à peregrino enim jam recessit & proprie in eo, qui arma contra ferret, remansit. Cum verò de imperio decertatur, belloque quæritur gloria, causas omnino subesse tamen oportet easdem, quas dixi paulò ante justas causas esse bellorum. Sed ea bella, quibus imperii gloria proposita est, minùs acerbè gerenda sunt. Ut enim cum civi aliter contendimus, si est inimicus, aliter, si competitor: cum altero certamen honoris & dignitatis est: cum altero capitis & famæ. Sic cum Celtiberis, cum Cimbris bellum, ut cum inimicis gerebatur, uter esset, non uter imperaret: cum Latinis, Sabinis, Samnitibus, Pœnis, Pyrrho de imperio dimicabatur. Pœni fœdifragi; crudelis Hannibal, reliqui justiores. Pyrrhi quidem de captivis reddendis illa præclara *sententia* sat.

*Nec mi aurum posco, nec mi pretium dederitis,
 Nec cauponantes bellum, sed belligerantes :
 Ferro, non auro vitam cernamus utrique.
 Vosne velit, an me regnare hera ; quidve ferat fors,
 Virtute experiamur : & hoc simul accipe dictum :
 Quorum virtuti belli fortuna pepercit,
 Eorundem me libertati parcere certum est :
 Dono, ducite, doque, volentibus cum magnis diis.*

Regalis sanè & digna Æacidarum genere sententia. Atque etiam, si quid singuli, temporibus adducti, hosti promiserint, est in eo ipso fides conservanda : ut primo Punico bello Regulus captus à Pœnis, cùm de captivis commutandis Romam missus esset, jurassètque se rediturum, primum, ut venit, captivos reddendos in senatu non censuit : deinde, cùm retineretur à propinquis, & ab amicis, ad supplicium redire maluit, quàm fidem hosti datam fallere. [Secundo autem Punico bello post Cannensem pugnam, quos decem Hannibal Romam adstrictos misit jurejurando se redituros esse, nisi de redimendis iis, qui capti erant, impetrassent : eos omnes censores, quoad quisque eorum vixit, qui pejerassent, in arariis reliquerunt : nec minùs illum, qui jurisjurandi fraude culpam invenerat. Cùm enim Hannibalis permissu exisset de castris, rediit, paulò post, quòd se oblitum nescio quid diceret. Deinde egressus è castris, jurejurando se solutum putabat : & erat verbis, re non erat. Semper autem in fide, quid senseris, non quid dixeris, cogitandum. Maximum autem exemplum est justitiæ in hostem à majoribus nostris constitutum. Cùm à Pyrrho perfuga senatui est pollicitus, se venenum regi daturum, & eum necaturum : senatus, & C. Fabricius perfugam Pyrrho dedit. Ità nè hostis quidem, & potentis, & bellum ultrò inferentis, interitum cum scelere approbavit.] Ac de bellicis quidem officiis satis dictum est. Meminerimus autem etiam adversus infimos justitiam esse

esse servandam. Est autem infima conditio & fortuna servorum: quibus, non malè præcipiunt, qui ità jubent uti, ut mercenariis: operam exigendam, iusta præbenda. Cùm autem duobus modis, id est, aut vi, aut fraude fiat injuria; fraus, quasi vulpeculæ, vis leonis videtur: utrumque homine alienissimum: sed fraus, odio digna majore. Totius autem injustitiæ nulla capitalior est, quàm eorum, qui, cùm maximè fallunt, id agunt, ut viri boni esse videantur. De justitia satis dictum est.

De liberalitate, secunda justitiæ parte, quam tamen Aristoteles modestiæ videtur annexere, in qua tria potissimum spectanda docet Cicero. Primum, ne quid demus, quod accipienti sit nociturum; nève, quod aliis largiamur, ab aliis per injuriam auferamus. Secundum, ut pro facultatum modo liberalitatem exerceamus. Tertium, nè demus quibus non oportet. Dandum autem aut virtute commendatis, aut iis qui nos honestâ benevolentiam prosequuntur, aut quibuscum nobis aliquod societatis vinculum intercedit, aut denique qui bene de nobis meriti sunt; quibus & cum fœnore beneficium remetiendum. Postremo, societatis humane gradus à summo fonte repetens, inter se componit, ut, quantum cuique debetur, tantum præstetur. Sed hæc de parte Seneca pluribus libris diligentissimè scripsit.

DEinceps, ut erat propositum, de beneficentia ac liberalitate dicatur, quâ quidem nihil est naturæ hominis accommodatius; sed habet multas cautiones. Videndum est enim primum, ne obsit benignitas, & iis ipsis, quibus benigne videbitur fieri, & ceteris: deinde, nè major benignitas sit, quam facultates: tum ut pro dignitate cuique tribuatur. Id enim est justitiæ fundamentum, ad quam hæc referenda sunt omnia. Nam & qui gratificantur cuiquam, quod obsit illi, cui prodesse velle videantur, non benefici, neque liberales, sed

perniciosa adfentatores judicandi sunt : & qui aliis nocent, ut in alios liberales sint, in eadem sunt injustitia, ut si in suam rem aliena convertant. Sunt autem multi, & quidem cupidi splendoris & gloriæ, qui eripiunt aliis, quod aliis largiantur. Hiq; arbitrantur se beneficos in suos amicos visum iri, si locupletent eos quâcumque ratione. Id autem tantum abest officio, ut nihil magis officio possit esse contrarium. Videndum est igitur, ut eâ liberalitate utamur, quæ profit amicis, noceat nemini. Quare L. Sullæ, & C. Cæsaris pecuniarum translatio à justis dominis ad alienos, non debet liberalis videri. Nihil est enim liberale, quod non idem justum. Alter erat locus cautionis, nè benignitas major esset, quàm facultates : quòd, qui benigniores volunt esse, quàm res patitur, primum in eo peccant, quòd injuriosi sunt in proximos : quas enim copias his & suppeditari æquius est, & relinquere, eas transferunt ad alienos. Inest autem in tali liberalitate cupiditas plerumque rapiendi, & auferendi per injuriam, ut ad largiendum suppetant copię. Videre etiam licet plerosque non tam naturâ liberales, quàm quâdam gloriâ ductos, ut benefici videantur facere multa, quæ proficisci ab ostentatione magis, quàm à voluntate videantur. Talis autem simulatio, vanitati est conjunctior, quàm aut liberalitati, aut honestati. Tertium est propositum, ut in beneficentia delectus esset dignitatis : in quo & mores ejus erunt spectandi, in quem beneficium conferetur, & animus erga nos, & communitas ac societas vitæ, & ad nostras utilitates officia ante conlata : quæ, ut concurrant omnia, optabile est : sin minus, plures causæ majoresque ponderis plus habebunt.

*Mores non ad exactam illam sapientis Stoici rationem
spectandos, sed civilem virtutis imaginem.*

QUoniam autem vivitur non cum perfectis hominibus, plenèque sapientibus, sed cum iis in quibus præclare agitur si sunt simulacra virtutis: etiam hoc intelligendum puto, neminem omnino esse negligendum, in quo aliqua significatio virtutis adpareat: colendum autem esse ità quemque maxime, ut quisque maxime his virtutibus lenioribus erit ornatus, modestiâ, temperantiâ, hac ipsâ, de qua jam multa dicta sunt, justitiâ. Nam fortis animus & magnus in homine non perfecto ac sapiente ferventior plerumque est: illæ virtutes virum bonum videntur potius adtingere. Atque hæc in moribus.

*Quomodo considerata sit benevolentia
aliorum erga nos.*

DE benevolentia autem, quam quisque habeat erga nos, primum illud est in officio, ut ei plurimum tribuamus, à quo plurimum diligimur: sed benevolentiam non adolescentulorum more, ardore quodam amoris, sed stabilitate potius, & constantiâ judicemus.

Bene meritis de nobis quomodo referenda gratia.

SIN erunt merita, ut non ineunda, sed referenda sit gratia, major quædam cura adhibenda est. Nullum enim officium referendâ gratiâ magis necessarium est. Quod si ea, quæ utenda acceperis, majore mensurâ, si modo possis, jubet reddere Hesiodus: quidnam beneficio provocati facere debemus? an imitari agros fertiles, qui multo plus efferunt, quam acceperunt? Etenim

si in eos, quos speramus nobis profuturos, non
 dubitamus officia conferre; quales in eos esse de-
 bebamus, qui jam profuerunt? Nam cum duo ge-
 nera liberalitatis sint, unum dandi beneficii, al-
 terum reddendi: demus, nec ne, in nostra po-
 testate est: non reddere viro bono non licet, mo-
 do id facere possit sine injuria. Acceptorum autem
 beneficiorum sunt delectus habendi. Nec dubium
 quin maximo cuique plurimum debeatur. In quo
 tamen in primis, quo quisque animo, studio, be-
 nevolentia fecerit, ponderandum est. Multi enim
 faciunt multa temeritate quadam, sine iudicio, vel
 morbo, in omnes, vel repentino quodam, quasi
 vento, impetu animi incitati: quæ beneficia æque
 magna non sunt habenda, atque ea, quæ iudicio,
 consideratè, constantèrque delata sunt. Sed in
 collocando beneficio, & in referenda gratia, si
 cetera paria sint, hoc maxime officii est, ut quisq;
 maxime opis indigeat, ita ei potissimum opitulari:
 quod contra fit à plerisque. A quo enim pluri-
 mum sperant, etiamsi ille his non eget, tamen ei
 potissimum inserviunt.

*In conjunctione vitæ quis ordo, ac primum de societate
 universali omnium mortalium.*

Optimè autem societas hominum conjunctio-
 que servabitur, si, ut quisque erit conjun-
 ctissimus, ita in eum benignitatis plurimum con-
 feratur. Sed quæ naturâ principia sint commu-
 nitatis, & societatis humanæ, repetendum alti-
 us videtur. Est enim primum, quod cernitur in
 universi generis humani societate. Ejus autem vin-
 culum est, ratio & oratio, quæ docendo, discendo,
 communicando, disceptando, judicando conciliat
 inter se homines, conjungitque naturali quadam
 societate. Neque ullâ re longius absumus à na-
 tura ferarum, in quibus inesse fortitudinem sæpe
 dicimus,

dicimus, ut in equis, in leonibus: justitiam, æquitatem, bonitatem non dicimus. Sunt enim rationis & orationis expertes. Ac latissime quidem patens hominibus inter ipsos, omnibus inter omnes, societas hæc est: in qua omnium rerum, quas ad communem hominum usum natura genuit, est servanda communitas: ut quæ descripta sunt legibus & jure civili, hæc ita teneantur, ut sit constitutum: è quibus ipsis cetera sic observentur, ut in Græcorum proverbio est: Amicorum esse omnia communia. Omnia autem communia hominum videntur ea, quæ sunt generis ejus, quod ab Ennio positum in una re transferri in permultas potest:

*Homo, qui erranti comiter monstrat viam,
Quasi lumen de suo lumine accendat, facit:
Nihilominus ipsi lucet, cum illi accenderit.*

Una ex re satis præcipit, ut quidquid sine detrimento possit commodari, id tribuatur vel ignoto. Ex quo sunt illa communia: non prohibere aqua profluente; pati ab igne ignem capere, si quis velit; consilium fidele deliberanti dare; quæ sunt iis utilia, qui accipiunt, danti non molesta. Quare & his utendum est, & semper aliquid ad communem utilitatem adferendum. Sed quoniam copiarum parvæ singulorum sunt, eorum autem, qui his egeant, infinita est multitudo, vulgaris liberalitas referenda est ad illum Ennii finem, Nihilominus ipsi lucet; ut facultas sit, quâ in nostros simus liberales. Gradus autem plures sunt societatis hominum. Ut enim ab infinita illa discedatur, propior est ejusdem gentis, nationis, linguæ, quâ maximè homines conjunguntur: interius etiam est, ejusdem esse civitatis. Multa enim sunt civitatibus inter se communia, forum, fana, porticus, viæ, leges, iura, judicia, suffragia, consuetudines

tudines præterea, & familiaritates, multisque cum multis res rationesque contractæ. Arctior vero conligatio est societatis propinquorum. Ab illa enim immensa societate humani generis in exiguum angustumque concluditur. Nam cum sit hoc naturâ commune animantium, ut habeant lubidinem procreandi, prima societas in ipso conjugio est: proxima in liberis: deinde una domus, communia omnia. Id autem est principium urbis, & quasi seminarium reip. Sequuntur fratrum conjunctiones: post consobrinorum, sobrinorumque, qui cum una domo jam capi non possint, in alias domos, tamquam in colonias exeunt. Sequuntur connubia & affinitates, ex quibus etiam plures propinqui. Quæ propagatio & soboles origo est rerum publicarum. Sanguinis autem conjunctio & benevolentia devincit homines caritate. Magnum est enim eadem habere monumenta majorum, iidem uti sacris, sepulcra habere communia. Sed omnium societatum nulla præstantior est, nulla firmior, quam cum viri boni, moribus similes, sunt familiaritate conjuncti. Illud enim honestum (quod sæpe dicimus) etiam si in alio cernimus, tamen nos movet, atque illi, in quo id inesse videtur, amicos facit. Et quamquam omnis virtus nos ad se alliciat, faciatque ut eos diligamus, in quibus ipsa inesse videatur; tamen iustitia, & liberalitas id maxime efficit. Nihil autem est amabilius, nec copulativius, quam morum similitudo bonorum. In quibus enim eadem studia sunt, eademque voluntates, in his fit, ut æque quisque altero delectetur, ac se ipso, efficiturque id, quod Pythagoras ultimum in amicitia putavit, ut unus fiat ex pluribus. Magna etiam illa communitas est, quæ conficitur ex beneficiis ultro citro datis acceptis: quæ & mutua, & grata dum sunt, inter quos ea sunt, firmâ devinciuntur societate. Sed cum omnia ratione animoque lustrâris, omni-

in societatum nulla est gravior, nulla carior, quam ea, quæ cum rep. est unicuique nostrum: cari sunt parentes, cari liberi, propinqui, familiares: sed omnes omnium caritates patria una complexa est: pro qua quis bonus dubitet mortem optetere, si ei sit profuturus? Quo est detestabilior horum immanitas, qui lacerarunt omni scelere patriam, & in ea funditus delenda occupati & sunt, & fuerunt. Sed si contentio quædam, & comparatio fiat, quibus plurimum tribuendum officii, principes sint patria & parentes, quorum beneficiis maximis obligati sumus: proximi liberi, totaque domus, quæ spectat in nos solos, neque aliud ullum potest habere perfugium; deinceps bene convenientes propinqui, quibuscum etiam communis plerumque fortuna est. Quamobrem necessaria præsidia vitæ debentur iis maximè, quos antè dixi: vita autem victusque communis, consilia, sermones, cohortationes, consolationes, interdum etiam oburgationes, in amicitiiis vigent maximè; estque ea jucundissima amicitia, quam similitudo morum conjugavit.

Liberalitatis officia non solum ab his gradibus societatis, sed etiam ab aliis circumstantiis spectari oportere.

SED in his omnibus officiis tribuendis videndum erit, quid cuique maximè necesse sit, & quid quisque vel sine nobis aut possit consequi, aut non possit. Ità non iidem erunt necessitudinum gradus, qui temporum; suntque officia, quæ aliis magis, quàm aliis debeantur: ut vicinum citius adjuveris in fructibus percipiendis, quàm aut fratrem, aut familiarem. At, si lis in iudicio sit, propinquum potius & amicum, quàm vicinum defenderis. Hæc igitur & talia circumspicienda sunt in omni officio: & consuetudo exercitatioque capienda,

pienda, ut boni ratiocinatores officiorum esse possimus, & addendo, deducendóque videre, quæ reliqui summa fiat: ex quo, quantum cuique debeatur, intelligas. Sed ut nec medici, nec imperatores, nec oratores, quamvis artis præcepta perciperint, quidquam magnâ laude dignum sine usu & exercitatione consequi possunt: sic officii conservandi præcepta traduntur illa quidem, ut facimus ipsi: sed rei magnitudo usum quoque, exercitationemque desiderat. Atque ab iis rebus, quæ sunt in jure societatis humanæ, quemadmodum ducatur honestum, ex quo aptum est officium, satis ferè diximus.

Magnanimitas tertius officiorum fons, quæ ex rerum humanarum contemptu, & animi amplitudine quædam nascitur: declaratur autem potissimum in periculis adeundis, & arduis rebus obeundis. Huic ad dextram est audacia, pertinacia, immanitas, arrogantia, crudelitas, confidentia, morositas, ira, sævitia, ambitio: ad levam, timiditas, ignavia, stupor, & id genus vitia. Exercetur autem magnanimitas, partim in rebus bellicis, magis autem in negotiis urbanis, denique & privata in vita: de quibus omnibus varie differt Cicero.

Intelligendum est autem, cum proposita sint genera quatuor, è quibus honestas officiúmque manaret, splendidissimum videri, quod animo magno elatóque, humanasque res despiciente factum sit. Itaque in probris maximè in promptu est, si quid tale dici potest:

*Vos etenim juvenes animum geritis muliebrem;
Illa virago viri. Et si quid ejusmodi:
Salmaci da spolia sine sudore & sanguine.*

construere in laudibus, quæ magno animo, & fortiter excellenterque gesta sunt, ea nescio quomodo quasi pleniore ore laudamus. Hinc rhetorum campus de Marathone, Salamine, Plataeis, Thermopylis, Leuctris. Hinc noster Cocles, hinc Decii, hinc Cnæus & Publius Scipiones, hinc M. Marcellus, innumerabilesque alii: maximèque ipse populus Romanus animi magnitudine excellit. Declinatur autem studium bellicæ gloriæ, quod statuas quoque videmus ornatu fere militari.

Fortitudinem, si ab honestate recedat, nomen suum amittere.

SED ea animi elatio, quæ cernitur in periculis & laboribus, si iustitiâ vacat, pugnatque non pro salute communi, sed pro suis commodis, initio est. Non enim modo id virtutis non est, sed potius immanitatis, omnem humanitatem repellentis. Itaque probè definitur à Stoicis fortitudo, cum eam virtutem esse dicunt propugnantem pro equitate. Quocirca nemo, qui fortitudinis gloriam consecutus est, insidiis, & malitiâ laudem est adeptus. Nihil enim honestum esse potest, quod iustitiâ vacat. Præclarum igitur Platonis illud: non solum, inquit, scientia, quæ est remota à iustitia, calliditas potius, quam sapientia est appellanda: verum etiam animus paratus ad periculum, si suâ cupiditate, non utilitate communi impellitur, audaciæ potius nomen habeat, quam fortitudinis. Itaque viros fortes, magnanimos, eosdem bonos, & simplices, veritatis amicos, minimèque fallaces esse volumus: quæ sunt ex media laude iustitiæ. Sed illud odiosum est, quod in hac elatione, & magnitudine animi, facillimè pertinaçia, & nimia cupiditas principatûs innascitur. Ut enim apud Platonem est, omnem morem Lacedæmoniorum inflammatum esse cupiditate vincendi; sic, ut quisque
animi

animi magnitudine maximè excellit, ità maximè vult princeps omnium, vel potius solus esse. Difficile autem est, cùm præstare omnibus concupieris, servare æquitatem, quæ est justitiæ maximè propria. Ex quo fit, ut neque disceptatione vinci se, nec ullo publico ac legitimo jure pariantur. Existuntque in rep. plerumque largitores, & factiosi, ut opes quàm maximas consequantur, & sint vi potius superiores, quàm justitia pares. Sed quo difficilius, hoc præclarius. Nullum est enim tempus, quod justitiâ vacare debeat. Fortes igitur, & magnanimi sunt habendi, non qui faciunt, sed qui propulsant injuriam. Vera autem & sapiens animi magnitudo, honestum illud, quod maximè natura sequitur, in factis positum, non in gloria judicat: principemque se esse mavult, quam videri. Etenim qui ex errore imperitiæ multitudinis pendet, hic in magnis viris non est habendus. Facillimè autem ad res injustas impellitur, ut quisque est altissimo animo, & gloriæ cupiditate. Qui locus est sane lubricus, quod vix invenitur, qui, laboribus susceptis, periculisque aditis, non quasi mercedem rerum gestarum desideret gloriam.

Vera magnanimitas dualis in rebus potissimum sita: in contemnendis tum prosperis, tum adversis, & in arduis rebus gerendis.

OMnino fortis animus, & magnus, duabus rebus maximè cernitur: quarum una in rerum externarum despicientia ponitur, cùm persuasum sit, nihil hominem, nisi quod honestum, decorumque sit, aut admirari, aut optare, aut expetere oportere: nullique neque homini, neque perturbationi animi, nec fortunæ succumbere. Altera est res, ut, cùm ità sis adfectus animo, ut supra dixi, res geras magnas illas quidem, & maximè utiles, sed & vehementer arduas, plenasque laborum, & peri-

periculorum cum vitæ, tum multarum aliarum rerum, quæ ad vitam pertinent. Harum rerum duarum splendor omnis, & amplitudo, addo etiam utilitatem, in posteriore est: causa autem & ratio efficiens magnos viros est in priore. In eo enim est illud, quod excellentes animos, & humana contemnentes facit. Id autem ipsum cernitur in duobus, si & solum id, quod honestum sit, bonum iudices, & omni animi perturbatione liber sis. Nam & ea, quæ eximia plerisque; & præclara videntur, parva ducere: eaque ratione stabili firmæque contemnere, fortis animi, magnique ducendum est: & ea, quæ videntur acerba, quæ multa & varia in hominum vita fortunæque versantur, ita ferre, ut nihil à statu naturæ discedas, nihil à dignitate sapientis, robusti animi est, magnæque constantiæ. Non est autem consentaneum, qui metu non frangatur, eum frangi cupiditate: nec, qui invictum se à labore præstiterit, vinci à voluptate. Quamobrem & hæc vitanda; & pecuniæ fugienda cupiditas: nihil enim est tam angusti animi, tamque parvi, quam amare divitias: nihil honestius, magnificentiusque, quam pecuniam contemnere, si non habeas: si habeas, ad beneficentiam liberalitatemque conferre. Cavenda est etiam gloriæ cupiditas, ut supra dixi. Eripit enim libertatem, pro qua magnanimis viris omnis debet esse contentio. Nec vero imperia expetenda, ac potius aut non accipienda interdum, aut deponenda nonnunquam. Vacandum autem est omni animi perturbatione, tum cupiditate, & metu, tum etiam ægritudine, & voluptate animi, & iracundiâ; ut tranquillitas & securitas adsit, quæ adfert cum constantiam, tum etiam dignitatem. Multi autem & sunt, & fuerunt, qui eam, quam dico, tranquillitatem expetentes, à negotiis publicis se removerint, ad otiumque perlegerint. In his & nobilissimi philosophi, longæque principes, & quidam homines severi & graves,

vitanda

nec

nec populi, nec principum mores ferre potuerunt; vixeruntque nonnulli in agris, delectati re sua familiari. His idem propositum fuit, quod regibus, ut ne quâ re egerent, ne cui parerent, libertate uterentur: cuius proprium est, sic vivere ut velis. Quare, cum hoc commune sit potentiæ cupidorum cum iis, quos dixi, otiosis: alteri se adipisci id posse arbitrantur, si opes magnas habeant: alteri, si contenti sint & suo, & parvo. In quo neutrorum omnino contemnenda est sententia: sed & faciliior, & tutior, & minus aliis gravis aut molesta, vita est otiosorum: fructuosior autem hominum generi, & ad claritatem, amplitudinemq; aptior eorum, qui se ad remp. & ad res magnas gerendas accommodaverunt. Quapropter & iis forsitan concedendum sit, remp. non capebantibus, qui excellenti ingenio doctrinæ sese dediderunt: & iis, qui aut valitudinis imbecillitate, aut aliqua graviore causâ impediti, à repub. recesserunt, cum ejus administrandæ potestatem aliis, laudemque concederent. Quibus autem talis nulla sit causa, si despiciere se dicant ea, quæ pleriq; mirentur, imperia, & magistratus, iis non modo non laudi, verum etiam vitio dandum puto. Quorum judicium in eo, quod gloriam contemnant, & pro nihilo putent, difficile factum est non probare: sed videntur labores, & molestias tum offensionum, tum repulsarum, quasi quamdam ignominiam timere & infamiam. Sunt enim, qui in rebus contrariis parum sibi constant: voluptatem severissime contemnant, in dolore sint molliores: gloriam negligant, frangantur infamiâ: atque ea quidem non satis constanter. Sed iis, qui habent à natura adjumenta rerum gerendarum, abjecta omni cunctatione, adipiscendi magistratus, & gerenda resp. est. nec enim aliter aut regi civitas, aut declarari animi magnitudo potest. Capebantibus autem remp. nihilo minus, quam philosophis, haud scio an magis etiam, & magnificentia, & despicientia adhibenda sit

fit rerum humanarum, quam sæpe dico, & tranquillitas animi, atque securitas: si quidem nec anxii futuri sunt, & cum gravitate constantiæque victuri. Quæ eò faciliora sunt philosophis, quò minùs multa patent in eorum vita, quæ fortuna feriat, & quò minùs multis rebus egent: & quia, si quid adversi eveniat, tam graviter cadere non possunt. Quocirca non sine causa majores motus animorum concitantur, majoræque efficienda remp. gerentibus, quàm quietis: quò magis his & magnitudo animi est adhibenda, & vacuitas ab angoribus. Ad rem gerendam autem qui accedit, caveat, ne id modo consideret, quàm illa res honesta sit: sed etiam ut habeat efficiendi facultatem. In quo ipso considerandum est, nè aut temere desperet propter ignaviam: aut nimis confidat propter cupiditatem. In omnibus autem negotiis, prius quam aggrediare, adhibenda est præparatio diligens.

Longe fortius esse civilibus in rebus quam bellicis antecellere, multis argumentis docet, nonnihilque de se.

S E D cum plerique arbitrantur res bellicas majores esse, quàm urbanas: minuenda est hæc opinio. Multi enim bella sæpe quæsierunt propter gloriæ cupiditatem: atque id in magnis animis, ingeniisque plerumque contingit: eoque magis, si sunt ad rem militarem apti, & cupidi bellorum gerendorum. Verè autem si volumus judicare, multæ res exstiterunt urbanæ majores, clariorésq; quam bellicæ. Quamvis enim Themistocles jure laudetur, & sit ejus nomen, quam Solonis, illustrius, citeturque Salamis clarissimæ restis victoriæ, quæ anteponatur consilio Solonis ei, quo primum constituit Areopagitas: non minùs præclarum hoc, quàm illud, judicandum est. Illud enim semel profuit, hoc semper proderit civitati: hoc consilio leges Atheniensium, hoc majorum instituta servantur.

tur. Et Themistocles quidem nihil dixerit, in quo ipse Areopagum adjuverit: at ille vere, ab se adjutum Themistoclem. Est enim bellum gestum consilio senatûs ejus, qui à Solone erat constitutus. Licet eadem de Pausania, Lyfandrôque dicere: quorum rebus gestis quamquam imperium Lacedæmoniis dilatatum putatur, tamen nè minima quidem ex parte Lycurgi legibus, & disciplinæ conferendi sunt. Quinetiam ob has ipsas causas & parentiores habuerunt exercitus, & fortiores. Mihi quidem neque pueris nobis, M. Scaurus C. Mario, neque, cùm versaremur in rep. Qu. Catulus Cn. Pompeio cedere videbatur. Parvi enim sunt foris arma, nisi est consilium domi. Nec plus Africanus, singularis & vir & imperator, in excindenda Numantia reip. profuit, quàm eodem tempore P. Nasica privatus, cùm Ti. Gracchum interemit. quamquam hæc quidem res non solum ex domestica est ratione, adtingit etiam bellicam, quoniam vi manûque confecta est: sed tamen id ipsum gestum est consilio urbano, sine exercitu. Illud autem optimum est, in quod invadi solere ab improbis, & invidis audio:

Cedant arma togæ, concedat laurea linguae.

Ut enim alios omittam, nobis remp. gubernantibus, nonne togæ arma cessere? neque enim in repub. periculum fuit gravius unquam, nec majus otium. Ita consiliis diligentiaque nostrâ celeriter de manibus audacissimorum civium delapsa arma ipsa ceciderunt. Quæ res igitur gesta umquam in bello tanta? qui triumphus conferendus? Licet enim, Marce fili, apud te gloriari, ad quem & hæreditas hujus gloriæ, & factorum imitatio pertinet. Mihi quidem certè vir abundans bellicis laudibus Cn. Pompejus, multis audientibus, hoc tribuit, ut diceret, frustra se triumphum tertium deportaturum

rum fuisse, nisi meo in remp. beneficio, ubi triumpharet, esset habiturus. Sunt ergò domesticæ fortitudines non inferiores militaribus: in quibus plus etiam, quàm in his, operæ, studiique ponendum est. Omnino illud honestum, quod ex animo excelso magnificoque quærimus, animi efficitur, non corporis viribus. Exercendum tamen corpus, & irâ afficiendum est, ut obedire consilio rationique possit in exsequendis negotiis, & in labore tolerando. Honestum autem id, quod exquirimus, totum est positum in animi cura & cogitatione: in quo non minorem utilitatem adferunt, qui togati reip. præsumunt, quàm qui bellum gerunt. Itaque eorum consilio sæpe aut non suscepta, aut confecta bella sunt, nonnunquam etiam inlata: ut M. Catonis bellum tertium Punicum: in quo etiam mortui valuit auctoritas. Quare expetenda quidem magis est decernendi ratio, quàm decertandi fortitudo: sed cavendum, ne id bellandi magis fugâ, quam utilitatis ratione faciamus. Bellum autem irâ suscipiatur, ut nihil aliud nisi pax quæsitâ videatur. Fortis verò & constantis est, non perturbari in rebus asperis, nec tumultuantem de gradu dejici, ut dicitur; sed præsentî animo uti & consilio, nec à ratione discedere: quamquam hoc animi, illud etiam ingenii magni est, præcipere cogitatione futura, & aliquantò antè constituere, quid accidere possit in utramque partem: & quid agendum sit, cùm quid evenerit: nec committere, ut aliquando dicendum sit, *non putâram*. Hæc sunt opera magni animi & excelsi, & prudentiâ consilioque fidentis. Temere autem in acie versari, & manu cum hoste configere, immane quiddam & belluarum simile est. Sed cum tempus necessitasque postulat, decertandum manu est, & mors servituti turpitudinique anteponenda.

*Alienum esse ab officio magnanimi crudelitatem,
& item temeritatem.*

DE evertendis autem, diripiendisque urbibus valde considerandum est, nè quid temerè, nè quid crudeliter. Idque est viri magnanimi, rebus agitatæ, punire fontes, multitudinem conservare, in omni fortuna recta atque honesta retinere.

Pericula quatenus viro forti suscipienda.

UT enim sunt, quemadmodum suprà dixi, qui urbanis rebus bellicas anteponant: sic reperies multos, quibus periculosa & callida consilia quietis cogitationibus & splendidiora, & majora videantur. Numquam omnino periculi fugâ committendum est, ut imbelles timidique videamur. Sed fugiendum etiam illud, nè offeramus nos periculis sine causa: quo nihil potest esse stultius. Quapropter in adeundis periculis consuetudo imitanda medicorum est, qui leviter ægrotantes leniter curant: gravioribus autem morbis periculosas curationes, & ancipites adhibere coguntur. Quare in tranquillo tempestatem adversam optare, demeritis est: subvenire autem tempestatì quavis ratione, sapientis: eoque magis, si plus adipiscare re explicatâ boni, quam addubitatâ mali.

*Dividit actiones, quæ adferunt periculum, & docet
quid agendum sit.*

Periculosæ autem rerum actiones partim iis sunt, qui eas suscipiunt, partim reip. Itémque alii de vita, alii de gloria, & benevolentia civium in discrimen vocantur. Promptiores igitur debemus esse ad nostra pericula, quam ad communia, dimicariq; paratius de honore, & gloriâ, quàm de cæteris commodis. Inventi autem multi sunt, qui non modò pecuniâ, sed vitam etiam profundere pro patria parati essent: iidem gloriæ jacturam nè minimam quidem facere vellent, nè rep. quidem postulante: ut
Calli-

Callicratidas, qui cùm Lacedæmoniorum dux fuisset Peloponnesiaco bello, multaq; fecisset egregiè, vertit ad extremum omnia, cùm consilio non paruit eorum, qui classem ab Arginussis removendam, nec cum Atheniensibus dimicandum putabant. Quibus ille respondit, Lacedæmonios, classe illâ amisâ, aliam parare posse : se fugere sine suo dedecore non posse. Atque hæc quidem Lacedæmoniis plaga mediocris : illa pestifera, quâ, cùm Clembrotus, invidiam timens, temere cùm Epaminonda conflixisset, Lacedæmoniorum opes corruerunt. Quanto Qu. Maximus meliùs ? de quo Ennius :

Unus homo nobis cunctando restituit rem.

Non ponebat enim rumores ante salutem.

Ergo postque, magisque viri nunc gloria claret.

Quod genus peccandi vitandum est etiam in rebus urbanis. Sunt enim qui quod sentiunt, etsi optimum sit, tamen invidiæ metu non audent dicere.

Officia illorum qui rempublicam gerunt.

OMnino qui reip. præfuturi sunt, duo Platonis præcepta teneant: unum, ut utilitatem civium sic tueantur, ut quæcumq; agunt, ad eam referant, obliti commodorum suorum : alterum, ut totum corpus reip. curent : nè, dum partem aliquam tuerentur, reliquas deferant. Ut enim tutela, sic procuratio reip. ad utilitatem eorum, qui commissi sunt, non ad eorum, quibus commissa est, gerenda est. Qui autem parti civium consulant, partem negligunt, rem perniciosissimam in civitatem inducunt, seditionem atque discordiam : ex quo evenit, ut alii populares, alii studiosi optimi cujusque videantur, pauci universorum. Hinc apud Athenienses magnæ discordiæ : in nostra rep. non solum seditiones, sed pestifera etiam bella civilia :

quæ gravis, & fortis civis, & in repub. dignus principatu fugiet, atque oderit: tradetque se totum reipub. neque opes, aut potentiam consecrabitur, totamque eam sic tuebitur, ut omnibus consulat. Nec verò criminibus falsis in odium aut invidiam quemquam vocabit: omninoque ita iustitiæ honestatique adhærescet, ut, dum eam conservet, quamvis graviter offendat, mortemque oppetat potius, quam deferat illa, quæ dixi.

De honoribus vehementer contendere, contra officium esse magnanimi.

Miserrima est omnino ambitio, honorumque contentio: de qua præclare apud eundem est Platonem: Similiter facere eos, qui inter se contenderent, uter potius remp. administraret, ut si nautæ certarent, quis eorum potissimum gubernaret. Idemque præcepit, ut eos adversarios existimemus, qui arma contra ferant: non eos, qui suo iudicio tueri rempub. velint: qualis fuit inter P. Africanum, & Qu. Metellum sine acerbitate dissensio.

Iræ moderari, proprium fortitudinis.

NE C verò audiendi, qui graviter irascendum inimicis putabunt, idque magnanimi & fortis viri esse censebunt. Nihil enim laudabilius, nihil magno & præclaro viro dignius placabilitate, atque clementiâ. In liberis vero populis, & in juris æqualitate exercenda etiam est facilitas, & altitudo animi, quæ dicitur; ne, si irascamur aut intempestive accedentibus, aut impudenter rogantibus, in morositatem inutilem & odiosam incidamus. Et tamen ita probanda est mansuetudo, atque clementia, ut adhibeatur reip. causâ severitas, sine qua administrari civitas non potest.

In animadvertendo maximè ab ira temperandum.

OMnis autem & animadversio & castigatio contumeliâ vacare debet: neque ad ejus, qui punitur aliquem, aut verbis castigat, sed ad reipub. utilitatem referri. Cavendum est etiam, ne major pœna, quàm culpa sit: & ne iisdem de causis alii plectantur, alii nè appellentur quidem. Prohibenda autem maximè est ira in puniendo. Numquam enim, iratus qui accedet ad pœnam, mediocritatem illam tenebit, quæ est inter nimium & parum: quæ placet Peripateticis; & rectè placet, modò nè laudarent iracundiam, & dicerent utiliter à natura datam. Illa verò omnibus in rebus repudianda est: optandumque ut ii, qui præfunt reip. legum similes sint, quæ ad puniendum non iracundiâ, sed æquitate ducuntur.

*Magnanimi est, neque secundis rebus insolescere,
neque dejici adversis.*

ATque etiam in rebus prosperis, & ad voluntatem nostram fluentibus, superbiam, fastidium, arrogantiamque magno opere fugiamus. Nam ut adversas res, sic secundas immoderatè ferre, levitatis est: præclarâque est æquabilitas in omni vita, & idem semper vultus, eadèmq. frons, ut de Socrate, item de C. Lælio accepimus. Philippum quidem Macedonum regem, rebus gestis, & gloriâ superatum à filio: facilitate & humanitate video superiorem fuisse. Itaque alter semper magnus, alter sæpe turpissimus fuit: ut rectè præcipere videantur, qui monent ut quanto superiores sumus, tantò nos geramus summissiùs. Panætius quidem Africanum auditorem, & familiarem suum solitum ait dicere, ut equos propter crebras contentiones præliorum ferocitate

rocitate exsultantes domitoribus tradere soleant, ut his facilioribus possint uti : sic homines secundis rebus effrenatos, sibi que prædentes, tamquam in gyrum rationis & doctrinæ duci oportere, ut perspicerent rerum humanarum imbecillitatem, varietatémq; fortunæ. Atque etiam in secundissimis rebus maximè est utendum consilio amicorum, hisq; major etiam, quam antè, tribuenda auctoritas. Iisdémque temporibus cavendum est, ne assentatoribus patefaciamus aures, nec adulari nos sinamus : in quo falli facile est. Tales enim nos esse putamus, ut jurè laudemur. Ex quo nascuntur innumerabilia peccata, cum homines inflati opinionibus turpiter irridentur, & in maximis versantur erroribus. Sed hæc quidem hætenus.

Officia magnanimi in otio honesto. W^m

Illud autem sic est judicandum, maximas geri res, & maximi animi ab iis, qui reip. regant, quod earum administratio latissime pateat, ad plurimósq; que pertineat. Esse autem magni animi, & fuisse multos, etiam in vita otiosa, qui aut investigarent, aut conarentur magna quædam, seseque suarum rerum finibus continerent : aut interjecti inter philosophos, & eos, qui remp. administrarent, delectarentur re suâ familiari, non eam quidem omni ratione exaggerantes, neque excludentes ab ejus usu suus : potiúsque & amicis impartientes, & reip. si quando usus esset. Quæ primum bene parata sit, nullo neque turpi quæstu, neque odioso : tum quam plurimis, modo dignis, se utilem præbeat : deinde augeatur ratione, diligentia, parsimonia : nec libidini potius luxuriæque, quam liberalitati & beneficentiæ pateat. Hæc præscripta servantem licet magnificè, graviter, animosèque vivere, atque etiam simpliciter, fideliter, vitæque hominum amicè.

TEMPERANTIA.

Quartus officiorum fons temperantia, quam Aristoteles moderationem esse putat cupiditatum, earum duntaxat, quæ circa gulæ & inguinis voluptates versantur. Temperans, inquit, ea cupit quæ oportet, & ut oportet, & quando oportet. Hujus est caput, ut cupiditas rationi pareat, sicut puer pedagogo. Indidem oritur illud decorum, quod quemadmodum a natura, ac ceteris circumstantiis ducatur, omneque vitæ officium cohonestet, divinitus tradit Cicero.

Sequitur, ut de una reliqua parte honestatis discernendum sit: in qua verecundia, & quasi quidam ornatus vitæ temperantia, & modestia, omnisq; sedatio perturbationum animi, & rerum modus cernitur. Hoc loco continetur id, quod dici Latine decorum potest: Græcè enim *πρέπον* dicitur. Hujus vis ea est, ut ab honesto non queat separari. Nam & quod decet, honestum est, & quod honestum est, decet. Qualis autem differentia sit honesti & decori, facilius intelligi, quàm explanari potest. Quidquid est enim, quod deceat, id tum adparet, cum antegressa est honestas.

Duplex decorum: generale, quod in omni officio situm est; & speciale, quod temperantia proprie consequitur. Dicitur Ambrosius generale decorum accipit, quod ex harmonia & consensu omnium inter se virtutum existit, quale relucet in concordia universitatis: speciale, quod in una quapiam parte reluceat, potissimum tamen in temperantia.

ITaque non solum in parte hac honestatis, de qua hoc loco differendum est, sed etiam in tribus superioribus, quid deceat, adparet. Nam & ratione uti atque oratione prudenter, & agere quod agas consideratè: omnique in re quid sit veri, videre

dere, & tueri decet: contráq; falli, errare, labi, decipi tam dedecet, quam delirare & mente esse caput. Et iusta omnia, decora sunt: iniusta contrá, ut turpia, sic indecora. Similis est ratio fortitudinis. Quod enim viriliter animóque magno fit, id dignum viro, & decorum videtur: quod contrá, id ut turpe, sic indecorum. Quare pertinet quidem ad omnem honestatem hoc, quod dico, decorum: & ita pertinet, ut non reconditá quadam ratione cernatur, sed sit in promptu. Est enim quiddam idq; intelligitur in omni virtute, quod deceat: quod cogitatione magis á virtute potest, quam re, separari. Ut venustas & pulcritudo corporis secerni non potest á valitudine: sic hoc, de quo loquimur, decorum, totum illud quidem est cum virtute confusum, sed mente & cogitatione distinguitur. Est autem ejus descriptio duplex. Nam & generale quoddam decorum intelligimus, quod in omni honestate versatur: & aliud huic subiectum, quod pertinet ad singulas partes honestatis. Atque illud superius sic fere definiri solet: Decorum id esse, quod consentaneum sit hominis excellentiæ, in eo, in quo natura ejus á reliquis animantibus differat. Quæ autem pars subiecta generi est, eam sic definiunt, ut id decorum esse velint, quod ita naturæ consentaneum sit, ut in eo moderatio, & temperantia adpareat cum specie quadam liberali. Hæc ita intelligi existimare possumus ex eo decoro, quod Poetæ sequuntur, de quo alio loco plura dici solent. Sed tum servare illud poetas dicimus, quod deceat, cum id, quod quaque personâ dignum est, & fit, & dicitur. Ut, si Æacus, aut Minos diceret,

*Oderint dum metuant ----- aut,
Natis sepulcro ipse est parens:*

Indecorum videretur: quod eos fuisse justos accepimus. At Atreo dicente, plausus excitantur. Est enim

enim digna personâ oratio. Sed poetæ, quid quemque deceat, ex persona judicabunt. Nobis autem personam imposuit ipsa natura, magna cum excellentia præstantiâq; animantium reliquarum. Quocirca poetæ in magnâ varietate personarum, etiam vitiosis quid conveniat, & quid deceat, videbunt: nobis autem cum à natura constantiæ, moderationis, temperantiæ, verecundiæ partes datæ sint, cumque eadem natura doceat non negligere, quemadmodum nos adversus homines geramus: efficitur, ut & illud, quod ad omnem honestatem pertinet, decorum, quàm latè fufum fit, adpareat: & hoc, quod spectatur in unoquoque genere virtutis. Ut enim pulchritudo corporis aptâ compositione membrorum movet oculos, & delectat hoc ipso, quod inter se omnes partes cum quodam lepore consentiunt: sic hoc decorum, quod elucet in vita, movet adprobationem eorum, quibus cum vivitur, ordine, & constantiâ, & moderatione dictorum omnium, atque factorum. Adhibenda est igitur quædam reverentia adversus homines, & optimi cujusque, & reliquorum. Nam negligere quid de se quisque sentiat, non solum arrogantis est, sed etiam omnino dissoluti. Est autem quod differat, in hominum ratione habenda, inter justitiam & verecundiam. Justitiæ partes sunt non violare homines: Verecundiæ, non offendere: in quo maximè perspicitur vis decori. His igitur expositis, quale sit id, quod decere dicimus, intellectum puto.

Decorum secundùm naturam esse, & cùm in omnibus partibus, tum in temperantia plurimum valere.

Officium autem, quod ab eo ducitur, hanc primum habet viam, quæ deducit ad convenientiam, conservationemque naturæ: quam si sequemur ducem, numquam aberrabimus: sequemurque & id, quod acutum, & perspicax natura est:

est : & id, quod ad hominum consociationem accommodatum : & id, quod vehemens atque forte. Sed maxima vis decori in hac inest parte, de qua disputamus. Neque enim solum corporis, qui ad naturam apti sunt, sed multò etiam magis animi motus probandi, qui item ad naturam accommodati sunt.

*Fontem omnis esse modestia, ut appetitus pareat rationi :
At hunc ipsum putat Ambrosius, omnium officiorum
primarium esse fontem.*

DUplex est enim vis animorum, atque naturæ : una pars in appetitu posita est, quæ est *opium* Græcè, quæ hominem huc & illuc rapit : altera in ratione, quæ docet, & explanat, quid faciendum fugiendúmve sit. Ità fit, ut ratio præsit, adpetitus obtemperet. Omnis autem actio vacare debet temeritate & negligentia : nec verò agere quidquam, cujus non possit causam probabilem reddere. Hæc est enim ferè descriptio officii. Efficiendum autem est, ut adpetitus rationi obediant, eamque neque præcurrant, nec propter pigritiam, aut ignaviam deferant : sintque tranquilli, atque omni perturbatione animi careant. Ex quo elucebit omnis constantia, omnisque moderatio. Nam qui adpetitus longius evagantur, & tanquam exultantes sive cupiendo sive fugiendo, non satis à ratione retinentur, hi sine dubio finem, & modum transeunt. Relinquunt enim, & abjiciunt obedientiam, nec rationi parent, cui sunt subiecti lege naturæ : à quibus non modò animi perturbantur, sed etiam corpora. Licet ora ipsa cernere iratorum, aut eorum, qui aut libidine aliqua, aut metu commoti sunt, aut voluptate nimia gestiunt : quorum omnium vultus, voces, motus, statúsque mutantur. Ex quibus illud intelligitur (ut ad officii formam revertamur) adpetitus omnis contrahendos sedandósque, excitandámque animadversionem,

madversionem, & diligentiam, ut nè quid temere, ac fortuitu, inconsideratè, negligentèrque agamus. Neque enim ità generatì à natura sumus, ut ad ludum, & jocum facti esse videamur : sed ad severitatem potius, & ad quædam studia graviora atque majora. Ludo autem & joco uti illo quidem licet : sed sicut somno & quietibus ceteris, tum cùm gravibus scriisq; rebus satisfecerimus. Ipsùmque genus jocandi non profusum, nec immodestum, sed ingenuum & facetum esse debet. Ut enim pueris non omnem ludendi licentiam damus, sed eam, quæ ab honestis actionibus non sit aliena : sic in ipso joco aliquod probi ingenii lumen eluceat.

De scurrilitate & facetia.

DUplex omnino est jocandi genus : unum illiberale, petulans, flagitiosum, obscœnum : alterum, elegans, urbanum, ingeniosum, facetum. Quo genere non modò Plautus noster, & Atticorum antiqua comœdia, sed etiam philosophorum Socraticorum libri referti sunt : multaque multorum facetè dicta : ut ea, quæ à sene Catone collecta sunt, quæ vocant *Senecæ dicta*. Facilis igitur est distinctio ingenui & illiberalis joci. Alter est, si tempore fit, ac remisso animo, homine dignus : alter nè libero quidem, si rerum turpitudini adhibetur verborum obscœnitas.

Sententia elegantior et citius dicta

Honesti lusus modum esse quendam.

LUdendi etiam est quidam modus retinendus, ut nè nimis omnia profundamus, elatìque voluptate in aliquam turpitudinem delabamur. Suppeditant autem & campus noster, & studia venandi, honesta exempla ludendi.

Animi delectatio ab honestis studiis petenda: corporis voluptas, quia pecorina sit, aut planè rejicienda, aut quàm parcissime adhibenda.

SED pertinet ad omnem officii quæstionem semper in promptu habere, quantum natura hominis pecudibus, reliquisque belluis antecedit. Illæ nihil sentiunt, nisi voluptatem, ad eamque feruntur omni impetu. Hominis autem mens discendo alitur, & cogitando, semper aliquid aut acquirit, aut agit, videndique & audiendi delectatione ducitur. Quinetiam si quis est paulò ad voluptates propensior, modò nè sit ex pecudum genere, (sunt enim quidam homines non re, sed nomine) sed si quis est paulò erectior, quamvis voluptate capiatur, occultat, & dissimulat adpetitum voluptatis, propter verecundiam. Ex quo intelligitur, corporis voluptatem non satès esse dignam hominis præstantiâ, eamque contemni & rejici oportere. Sin sit quisquam, qui aliquid tribuat voluptati, diligenter ei tenendum esse ejus fruendæ modum. Itaque victus cultusque corporis ad validitatem referuntur, & ad vires, non ad voluptatem. Atque etiam si considerare volumus, quæ sit in natura excellentia & dignitas; intelligemus quàm sit turpe, diffuere luxuria. & delicate ac molliter vivere: quamque honestum, parcè, continenter, severè, sobriè.

Animadvertite, Lector, ordinem: primum ostendit quid decorum secundum naturam cum pecoribus communem: deinde quid secundum hominis præstantiam: deinceps quid deceat uniuscujusque personam, vel à natura tributam, vel casu impositam, vel judicio assumptam.

Intelligendum est etiam, duabus quasi nos à natura indutos esse personis: quarum una est communis, ex eo, quòd omnes participes sumus ratio-

nis, præstantiæq; ejus, quâ antecellimus bestiis, à qua omne honestum, decorumq; trahitur, & ex qua ratio inveniendi officii exquiritur: altera autem, quæ propriè singulis est tributa. Ut enim in corporibus magnæ dissimilitudines sunt (alios enim videmus velocitate ad cursum, alios viribus ad luctandum valere: itémque in formis aliis dignitatem inesse, aliis venustatem) sic in animis existunt etiam majores varietates. Erat in L. Crasso & in L. Philippo multus lepos: major etiam magisque de industria in C. Cæsare, L. F. At iisdem temporibus in M. Scauro, & in M. Druso adolescente, singularis severitas: in C. Lælio multa hilaritas: in ejus familiari Scipione ambitio major, vita tristior. De Græcis autem, dulcem & facetum, festivique sermonis, atque in omni oratione simulatorem, quem *ἑρῶνα* Græci nominaverunt, Socratem accepimus: contra Pythagoram & Periclem, summam auctoritatem consecutos, sine ulla hilaritate. Callidum Hannibalem ex Pœnorum; ex nostris ducibus Q. Maximum accepimus: facile celare, tacere, dissimulare, insidiari, præcipere hostium consilia. In quo genere Græci Themistoclem, & Pheræum Jasonem ceteris anteponunt. In primisque versutum & callidum factum Solonis, qui, quò & tutior vita ejus esset, & plus aliquanto reip. prodesset, fure se simulavit. Sunt his alii multum dispares, simplices & aperti: qui nihil ex occulto, nihil ex insidiis agendum putant, veritatis cultores, fraudis inimici: itémque alii, qui quidvis perpetiantur, cuivis deserviant, dum, quod velint, consequantur: ut Sullæ M. Crassum videbamus. Quo in genere versutissimum, & patientissimum Lacedæmonium Lylandrum accepimus. Contrâq; Callicratidam, qui præfectus classi proximus post Lylandrum fuit. Itémque in sermonibus alium quemque, quamvis præpotens sit, efficere, ut unus de multis

multis esse videatur. Quod in Catulo, & in patre, & in filio, idemque in Q. Mutio Mantia vidimus. Audivi ex majoribus natu hoc idem fuisse in P. Scipione Nafica : contraque patrem ejus, illum, qui T. Gracchi conatus perditos vindicavit, nullam comitatem habuisse sermonis : ne Xenocratem quidem, severissimum Philosophorum, ob eamque rem ipsam magnum clarumque fuisse. Innumerabiles aliae dissimilitudines sunt naturæ, morumque, minime tamen vituperandorum. Admodum autem tenenda sunt sua cuique, non vitiosa, sed tamen propria, quò facilius decorum illud, quod quærimus, retineatur. Sic enim est faciendum, ut contra universam naturam nihil contendamus : eâ tamen conservatâ, propriam naturam sequamur : ut, etiam si sint alia graviora, atque meliora, tamen nos studia nostra naturæ regulâ metiamur. Neque enim attinet repugnare naturæ, nec quidquam sequi, quod adsequi non queas. Ex quo magis emergit, quale sit decorum illud, ideo, quia nihil decet invitâ (ut aiunt) Minervâ, id est, adversante, & repugnante naturâ. Omnino si quidquam est decorum, nihil est profecto magis, quam æquabilitas universæ vitæ, tum singularum actionum : quam conservare non possis, si aliorum naturam imitans omittas tuam. Ut enim sermone eo debemus uti, qui notus est nobis, ne, ut quidam, Græca verba inculcantes jure optimo irrideamur : sic in actiones omnemque vitam nullam discrepantiam conferre debemus. Atque hæc differentia naturarum tantam habet vim, ut nonnumquam mortem sibi ipse consciscere alius debeat, alius in eadem causa non debeat. Num enim alia in causa M. Cato fuit, aliâ ceteri, qui se in Africa Cæsari tradiderunt ? Atqui ceteris forsitan vitio datum esset, si se interemissent, propterea quòd eorum vita lenior, & mores fuerant faciliores : Catoni autem cum incredibilem tribuisset natura gravitatem, eamque ipse perpetua

con-

constantia roboravisset, semperque in proposito, susceptoque consilio permansisset, moriundum potius, quam tyranni vultus adspiciendus fuit. Quam multa passus est Ulyxes in illo errore diuturno, cum & mulieribus, si Circe & Calypso mulieres appellandæ sunt, inserviret, & in omni sermone omnibus affabilem & jucundum se esse vellet? domi verò etiam contumelias servorum, ancillarumque pertulit, ut ad id aliquando, quod cupiebat, perveniret. At Ajax, quo animo traditur, millies optere mortem, quam illa perpeti maluisset. Quæ contemplantes expendere oportebit, quid quisque habeat sui: eaque moderari, nec velle experiri, quam se aliena deceant. Id enim maximè quemque decet, quod est cujusque maximè suum. Suum igitur quisque noscat ingenium, acrumque se & bonorum & vitiorum suorum judicem præbeat: ne scenici plus quam nos videantur habere prudentiæ. Illi enim non optimas, sed sibi accommodatissimas fabulas eligunt: Qui voce freti sunt, Epigonos, Medumque: qui gestu, Menalippam, Clytæmnestram: semper Rupilius, quem ego memini, Antiopam: non sæpe Æsopus Ajacem. Ergo histrio hoc videbit in scena, non videbit vir sapiens in vita? Ad quas igitur res aptissimi erimus, in iis potissimum elaborabimus. Sin aliquando necessitas nos ad ea detruserit, quæ nostri ingenii non erunt, omnis adhibenda erit cura, meditatio, diligentia, ut ea, si non decorè, at quàm minimum indecorè facere possimus. Nec tam est enitendum, ut bona, quæ nobis data non sint, sequamur, quam ut vitia fugiamus.

Decorum ab iis, quæ nobis fortuna attribuit, quæve nobis judicio ipsi adscrivimus.

AC duabus iis personis, quas suprà dixi, tertia adjungitur, quam casus aliquis, vel tempus imponit: quarta etiam, quam nobismetipsis judicio

D

nostro

nostro accommodamus. Nam regna, imperia, nobilitates, honores, divitiæ, opes, eaque, quæ sunt his contraria, in casu sita, temporibus gubernantur. Ipsi autem gerere quam personam velimus, à nostra voluntate proficiscitur. Itaque se alii ad Philosophiam, alii ad jus civile, alii ad eloquentiam adplicant : ipsarumque virtutum in aliâ alius mavult excellere. Quorum verò patres, aut majores aliqua gloriâ præstiterunt, ii student plerumque eodem in genere laudis excellere : ut Q. Mucius, P. filius, in jure civili ; Pauli filius Africanus in re militari. Quidam autem ad eas laudes, quas à patribus acceperunt, addunt aliquam suam : ut hic idem Africanus eloquentiâ cumulavit bellicam gloriam. Quod idem fecit Timotheus, Cononis F. qui, cum belli laude non inferior fuisset, quam pater : ad eam laudem doctrinæ & ingenii gloriam adjecit. Fit autem interdum, ut nonnulli, ommissa imitatione majorum, suum quoddam institutum consequantur : maximèque in eo plerumque elaborant ii, qui magna sibi proponunt, obscuris orti majoribus. Hæc igitur omnia, cum quaerimus, quid deceat, complecti animo, & cogitatione debemus.

Constituendum genus vitæ, & institutum.

IN primis autem constituendum est, quos nos, & quales esse velimus, & in quo genere vitæ : quæ deliberatio est omnium difficillima. Ineunte enim adolescentiâ, cum est maxima imbecillitas consilii, tum id sibi quisque genus ætatis degendæ constituit, quod maximè adamavit. Itaque ante implicatur aliquo certo genere, cursuque vivendi, quam potuit, quod optimum esset, judicare. Nam quod Herculem Prodicium dicunt, ut est apud Xenophontem, cum primum pubesceret (quod tempus à natura ad deligendum, quam quisque viam vivendi

vedi fit ingreffurus, datum eft) exiffe in folitudinem, atque ibi fendentem, diu fecum, multumque dubitaffe, cum duas cerneret vias, unam Voluptatis, alteram Virtutis, utram ingredi melius effer; hoc Herculi Jovis fatu edito potuit fortaffe contingere : nobis non item, qui imitamur, quos cuiq; vifum eft, atque ad eorum ftudia inftitutaque impellimur. Pleriq; autem parentum præceptis imbuti, ad eorum confuetudinem, morumque deducimur. Alii multitudinis iudicio feruntur, quæque majori parti pulcherrima videntur, ea maxime exoptant. Nonnulli tamen five felicitate quadam five bonitate naturæ, five parentum difciplina, rectam vitæ fecuti funt viam. Illud autem maxime rarum genus eft eorum, qui aut excellentis ingenii magnitudine, aut præclara eruditione, atque doctrinâ, aut utrâque re ornatî, fpatium etiam deliberandi habuerunt, quem potiffimum vitæ curfum fequi vellent : in qua deliberatione ad fuam cuiusq; naturam confilium eft omne revocandum. Nam cum in omnibus, quæ aguntur ex eo modo, quo quifque natus eft, (ut fupra dictum eft) quid deceat, exquirimus; tum in tota vira conftituenda multo eft ei rei cura major adhibenda, ut conftare in vitæ perpetuitate poffimus nobismetipfis, nec in ullo officio claudicare. Ad hanc autem rationem quoniam maximam vim natura habet, fortuna proximam, utriusq; omnino ratio habenda eft in deligendo genere vitæ: fed naturæ magis. Multo enim & firmior eft, & conftantior, ut fortuna nonnumquam, tamquam ipfa mortalis cum immortalî natura pugnare videatur. Qui igitur ad naturæ fuæ non vitiofæ genus confilium vivendi omne contulerit, is conftantiam teneat. Id enim maxime decet : nifi fortè fe intellexerit erraffe in deligendo genere vitæ. Quod fi acciderit (poteft autem accidere) facienda morum inftitutorumque mutatio eft. Eam mutationem fi tempora adjuvabunt, fa-

cilius commodiusque faciemus. Sin minus, sensim erit pedetentimque facienda : ut amicitias, quæ minus delectent, & minus probentur, magis decere censent sapientes sensim dissuere, quam repente præcidere. Commutato autem genere vitæ, omni ratione curandum est, ut id bono consilio fecisse videamur. Sed quoniam paullo ante dictum est, imitandos esse majores, primum illud exceptum sit, ne vitia sint imitanda: deinde, si natura non feret, ut quædam imitari possint, ut superioris Africani filius, qui hunc Paulo natum adoptavit, propter infirmitatem valitudinis non tam potuit patris similis esse, quam ille fuerat sui. Si igitur non poterit five causas defenditare, five populum concionibus tenere, five bella gerere : illa tamen præstare debet, quæ erunt in ipsius potestate, justitiam, fidem, liberalitatem, modestiam, temperantiam, quò minus ab eo id, quod desit, requiratur. Optima autem hereditas à patribus traditur liberis, omni que patrimonio præstantior, gloria virtutis, rerumq; gestarum : cui dedecori esse, nefas & impium judicandum est. Et quoniam officia non eadem disparibus ætatibus tribuuntur, aliq; sunt juvenum, alia seniorum, aliquid etiam de hac distinctione dicendum est.

Adolescentiam quæ propriè deceant.

EST igitur adolescentis majores natu vereri, exq; his deligere optimos, & probatissimos, quorum consilio atq; auctoritate nitatur. Ineuntis enim ætatis inscientia senum constituenda & regenda prudentiâ est. Maximè autem hæc ætas à libidinibus arcenda est, exercendaque in labore, patientiâque & animi & corporis, ut eorum & in bellicis, & civilibus officiis vigeat industria. Atque etiam cum relaxare animos, & dare se jucunditati volent, caveant intemperantiam, meminert

minerint verecundiæ : quod erit facilius, si in ejusmodi quidem rebus majores natu interesse velint.

Senectutem quæ deceant maximè.

Senibus autem labores corporis minuendi, exercitationes animi etiam augendæ videntur. Danda verò opera, ut & amicos, & juventutem, & maximè rempub. consilio, & prudentia quam plurimum adjuvent. Nihil autem magis cavendum est senectuti, quam ne languori se desidiæque dedat. Luxuria verò cum omni ætati turpis, tum senectuti fœdissima est. Sin autem libidinum etiam intemperantia accesserit, duplex malum est, quòd & ipsa senectus concipit dedecus, & facit adolescentium impudentiorem intemperantiam.

Magistratûs personam quæ deceant.

Ac ne illud quidem alienum est, de Magistratum, de privatorum, de civium, de peregrinorum officiis dicere. Est igitur proprium munus magistratûs, intelligere, se gerere personam civitatis, deberèque ejus dignitatem, & decus sustinere, servare leges, jura describere, ea fidei suæ commissa meminisse. Privatum autem oportet æquo & pari cum civibus jure vivere, neque submissum & abjectum, neque se efferentem : tum in rep. ea velle, quæ tranquilla & honesta sint. Talem enim & sentire bonum civem, & dicere solemus. Peregrini autem & incolæ officium est, nihil præter suum negotium agere, nihil de alieno anquirere, minimèque in aliena esse rep. curiosum. Ita fere officia reperientur, cum quæretur, quid deceat, & quid aptum sit personis, temporibus, ætatibus. Nihil est autem, quod tam deceat, quam

in omni re gerenda, consilióque capiendo fervare constantiam.

Decorum à cultu, motuque corporis.

SED quoniam decorum illud in omnibus factis, & dictis, in corporis deniq; motu & statu cernitur, idq; positum est in tribus rebus, formositate, ordine, ornatu ad actionem apto, difficilibus ad eloquendum, sed satis erit intelligi. In his autem tribus continetur cura etiam illa, ut probemur iis, quibuscum, & apud quos vivamus: his quoque de rebus pauca dicantur.

Quasdam corporis partes indecore offendi: res item quasdam inhoneste vel fieri palam, vel aperte nominari.

PRincipio, corporis nostri magnam natura ipsa videtur habuisse rationem, quæ formam nostram reliquâmq; figuram, in qua esset species honesta, posuit in promptu. quæ partes autem corporis ad naturæ necessitatem datæ, adspectum essent deformem habituræ ac turpem, eas contexit, atque abdidit. Hanc naturæ tam diligentem fabricam imitata est hominum verecundia. Quæ enim natura occultavit, eadem omnes, qui sanâ mente sunt, remonent ab oculis, ipsiq; necessitati dant operam ut quàm occultissimè pareant: quarumq; partium corporis usus sunt necessarii, eas neq; partes, neque earum usus suis nominibus appellant: quódq; facere turpe non est, modo occulte; id dicere obscœnum est. Itaq; nec aperte actio rerum illarum petulantia vacat, nec orationis obscœnitas. Nec verò audiendi sunt Cynici, aut si qui fuerunt Stoici pænè Cynici, qui reprehendunt, & irrident, quòd ea, quæ re turpia non sint, nominibus ac verbis flagitiosa ducamus; illa autem, quæ turpia sint, nomi-

nomnibus adpellemus suis. Latrocinari, fraudare, adulterare re turpe est : sed dicitur non obscœne : liberis dare operam re honestum est, nomine obscœnum : plurâq; in eam sententiam ab eisdem contra verecundiam disputantur : Nos autem naturam sequamur, & omne, quod abhorret oculorum auriumque adprobatione, fugiamus. Status, incessus, sessio, accubitio, vultus, oculi, manuum motus, teneant illud decorum. Quibus in rebus duo maximè sunt fugienda : nequid effœminatum, aut molle, & nequid durum, aut rusticum sit. Nec verò histrionibus oratoribusq; concedendum est, ut iis hæc apta sint, nobis dissoluta. Scenicorum quidem mos tantam habet veteri disciplina verecundiam, ut in scenam sine subligaculo prodeat nemo. Verentur enim, nè si quo casu evenerit, ut corporis partes quædam aperiantur, adspiciantur non decorè. Nostro quidem more cum parentibus puberes filii, cum soceris generi non lavantur. Retinenda est igitur hujus generis verecundia, præsertim naturâ ipsa magistrâ & duce.

Quæ forma virum, quæ fœminam deceat, & quatenus utrique colenda : quis item gestus, quis motus decorus.

CUM autem pulchritudinis duo genera sint, quorum in altero venustas sit, in altero dignitas ; venustatem muliebrem ducere debemus; dignitatem virilem. Ergo & à forma removeatur omnis viro non dignus ornatus : & huic simile vitium in gestu, motuq; caveatur. Nam & palæstrici motus sæpe sunt odiosiores ; & histrionum nonnulli gestus inepti non vacant offensione : & in utroq; genere, quæ sunt recta & simplicia laudantur. Formæ autem dignitas coloris bonitate tuenda est : color exercitationibus corporis. Adhibenda est præterea munditia non odiosa, neq; exquisita nimis; tantum quæ

fugiat agreſtem, & inhumanam negligentiam. Eadem ratio eſt habenda veſtitûs : in quo, ſicut in ple-riſq; rebus, mediocritas optima eſt. Cavendum eſt autem ne aut tarditatibus utamur in grefſu mollioribus, ut pomparum ferculis ſimiles eſſe videamur : aut in feſtinationibus ſuſcipiamus nimias celeritates : quæ cùm ſiunt, anhelitus movetur, vultus mutantur, ora torquentur : ex quibus magna ſignificatio fit, non adeſſe conſtantiam. Sed multo etiam magis elaborandum eſt, ne animi motus à natura recedant : quod adſequemur, ſi cavebimus, ne in perturbationes atque exanimationes incidamus, & ſi attentos animos ad decoris conſervationem tenebimus. Motus autem animorum duplices ſunt, alteri cogitationis, alteri adpetitûs. Cogitatio in vero exquirendo maximè verſatur : adpetitus impellit ad agendum. Curandum eſt igitur, ut cogitatione ad res quam optimas utamur : adpetitum rationi obedientem præbeamus.

Duplex orationis genus ; rhetoricum & quotidianum.

ET quoniam magna vis orationis eſt, eaq; duplex : altera contentionis, altera ſermonis : contentio diſceptationibus tribuantur iudiciorum, concionum, ſenatûs : ſermo in circulis, diſputationibus, congreſſionibus familiarium verſetur : perſequatur etiam convivium. Contentionis præcepta rhetoricorum ſunt ; nulla ſermonis : quamquam haud ſcio an poſſint hæc quoq; eſſe. Sed diſcentium ſtudiis inveniuntur magiſtri, huic autem qui ſtudeant ſunt nulli : rhetoricorum turbâ referta omnia : quamquam quæ verborum ſententiarumq; præcepta ſunt, eadem ad ſermonem pertinebunt. Sed cùm orationis indicem vocem habeamus, in voce autem duo ſequamur, ut clara ſit, ut ſuavis : utrumq; omnino à natura petendum eſt : verum alterum exercitatio augebit, alterum imitatio præſe loquentium & leniter. Nihil aliud

aliud fuit in Catulis, ut eos exquisito iudicio putares uti litterarum; quamquam erant litterati: sed & alii. Hi autem optimè uti linguâ Latinâ putabantur. Sonus erat dulcis, litteræ neq; expressæ, neq; oppres-
sæ, ne aut obscurum esset, aut putidum. Sine conten-
tione vox nec languens, nec canora. Uberior ora-
tio L. Crassi, nec minùs faceta: sed beneloquendi
de Catulis opinio non minor. Sale verò & facetiis
Cæsar, Catuli patris frater, vicit omnes: ut in
ipso illo forensi genere dicendi contentiones ali-
orum sermone vinceret. In omnibus igitur his
elaborandum est, si in omni quid deceat exquirimus.

Sermo familiaris quemadmodum moderandus.

SIT igitur hic sermo, in quo Socratici maximè ex-
cellunt, lenis, minimèq; pertinax; insit in eo le-
pos, nec verò, tamquam in possessionem suam ve-
nerit, excludat alios: sed cum reliquis in rebus,
tum in sermone communi, vicissitudinem non ini-
quam putet. Ac videat in primis, quibus de rebus
loquatur: si seriis, severitatem adhibeat; si joco-
fis, leporem. In primisq; provideat, ne sermo
vitium aliquod indicet inesse moribus: quod maxi-
mè tum solet evenire, cum studiosè de absentibus
detrahendi causâ, aut per ridiculum, aut severe,
maledicè contumeliosèq; dicitur. Habentur au-
tem plerumq; sermones aut de domesticis negotiis,
aut de repub. aut de artium studiis atq; doctrina.
Danda igitur opera est, ut etiam si aberrare ad alia
cœperit, ad hæc revocetur oratio: sed, utcumq;
aderunt res. Neq; enim omnes iisdem de rebus,
nec omni tempore, nec similiter delectamur. A-
nimadvertendum est etiam, quatenùs sermo dele-
ctationem habeat, & ut incipiendi ratio fuerit, ita
sit desinendi modus. Sed quomodo in omni vita
rectissimè præcipitur, ut perturbationes fugia-
mus,

mus, id est, motus animi nimios, rationi non obtemperantes: sic ejusmodi motibus sermo debet vacare, ne aut ira existat, aut cupiditas aliqua, aut pigritia, aut ignavia, aut tale aliquid appareat. Maximèq; curandum est, ut eos, quibus cum sermonem conferemus, & vereri, & diligere videamur. Objurgationes etiam nonnumquam incidunt necessariae, in quibus utendum est fortasse & vocis contentione majore, & verborum gravitate acriore. Id agendum etiam, ut ne ea facere videamur irati: sed, ut ad urendum, & secandum, sic & ad hoc genus castigandi rarò invitiq; veniamus; nec unquam, nisi necessariò, si nulla reperietur alia medicina. Sed tamen ira procul absit, cum qua nihil rectè fieri, nihil consideratè potest. Magna autem parte clementi castigatione licet uti, gravitate tamen adjuncta, ut & severitas adhibeatur, & contumelia repellatur. Atq; etiam illud ipsum, quod acerbitatis habet objurgatio, significandum est, ipsius causa, qui objurgetur, susceptum esse. Rectum est autem etiam in illis contentionibus, quæ cum inimicissimis fiunt, etiam si nobis indigna audiamus, tamen gravitatem retinere, iracundiam repellere. Quæ enim cum aliqua perturbatione fiunt, nec constanter fieri possunt, nec iis, qui adsunt, probari. Deforme etiam est de se ipso prædicare, falsa præsertim, & cum irrisione audientium, imitari militem gloriosum.

In aedificiis extruendis qui modus.

ET quoniam omnia persequimur, volumus quidem certè, dicendum est etiam, qualem hominis honorari & principis domum placeat esse, cujus finis est usus, ad quem accommodanda est ædificandi descriptio: & tamen adhibenda dignitatis commoditatishq; diligentia. Cn. Octavio, qui primus ex illa familiâ

familiâ consul factus est, honori fuisse accepimus, quod præclaram ædificâset in Palatio, & plenam dignitatis domum : quæ cum vulgo viseretur, suffragata domino, novo homini, ad consulatum putabatur. Hanc Scaurus demolitus accessionem adjunxit ædibus. Itaq; ille in suam domum consulatum primus adtulit : hic summi, & clarissimi viri filius, in domum multiplicatam, non repulsam solum retulit, sed ignominiam, etiam calamitatem. Ornanda est enim dignitas domo, non ex domo tota quærenda : nec domo dominus, sed domino domus honestanda est. Et ut in ceteris habenda ratio non sua solum, sed etiam aliorum : sic in domo clari hominis, in quam & hospites multi recipiendi, & admittenda hominum cujusq; modi multitudo, adhibenda est cura laxitatis. Aliter ampla domus dedecori domino sæpe fit, si est in ea solitudo. Et maximè, si aliquando alio domino solita est frequentari. Odiosum est enim cum à præterentibus dicitur :

O domus antiqua, heu quam dispari dominare domino !
 Quod quidem his temporibus in multis licet dicere. Cavendum autem est, præsertim si ipse ædifices, ne extra modum sumtu & magnificentia prodeas : quo in genere multum mali etiam in exemplo est : studiose enim plerique, præsertim in hanc partem, facta principum imitantur : ut L. Luculli summi viri virtutem quis ? At quàm multi villarum magnificentiam imitati sunt ? Quarum quidem certè est adhibendus modus, ad mediocritatèmq; revocandus : eadèmq; mediocritas ad usum cultumque vitæ referenda est. Sed hæc hæc.

Tria omni in vita servanda.

IN omni autem actione suscipienda tria sunt tenenda : primum, ut adpetitus rationi pareat, quo
 nihil

nihil est ad officia conservanda accommodatius: deinde, ut animadvertatur, quanta illa res sit quam efficere velimus: ut neve major, neve minor cura & opera suscipiatur, quam causa postulet. Tertium est, ut caveamus, ut ea, quæ pertinent ad liberalem speciem & dignitatem, moderata sint. Modus autem est optimus decus ipsum tenere, de quo ante diximus, nec progredi longius. Horum tamen trium præstantissimum est, adpetitum obtemperare rationi.

Decorum à loco & tempore.

DEinceps de ordine rerum, & temporum opportunitate dicendum est. Hac autem scientia continetur ea, quam Græci *δ'ταξία* nominant, non hæc, quam interpretamur modestiam: quo in verbo modus inest: sed illa est *δ'ταξία*, in qua intelligitur ordinis conservatio. Itaque, ut eandem nos modestiam appellemus, sic definitur à Stoicis, ut modestia sit scientia earum rerum, quæ aguntur, aut dicuntur, loco suo collocandarum. Itaque videtur eadem vis ordinis & collocationis fore. Nam & ordinem sic definiunt, compositionem rerum aptis & accommodatis locis. Locum autem actionis opportunitatem temporis esse dicunt. Tempus autem actionis opportunum, Græcè *δ'καιρία*, Latine appellatur occasio. Sic fit, ut modestia hæc, quam ita interpretamur, ut dixi, scientia sit opportunitatis idoneorum ad agendum temporum. Sed potest eadem esse prudentiæ definitio, de qua principio diximus. Hoc autem loco de moderatione, & temperantia, & earum similibus virtutibus quærimus. Itaque, quæ erant prudentiæ propria, suo loco dicta sunt. Quæ autem harum virtutum, de quibus jamdiu loquimur, quæ pertinent ad verecundiam, & ad eorum ad-

pro-

probationem, quibus cum vivimus, nunc dicenda sunt.

Quid, quo loco ac tempore deceat, dedecéatque.

TALIS est igitur ordo actionum adhibendus, ut quemadmodum in oratione constanti, sic in vita omnia sint apta inter se & convenientia. Turpe est enim valdeq; vitiosum, in re severâ convivii dicta, aut delicatum aliquem inferre sermonem. Bene Pericles, cum haberet collegam in prætura Sophoclem poetam, hiq; de communi officio convenissent, & casu formosus puer præterirer, dixissetq; Sophocles, O puerum pulchrum, Pericle! At enim prætorem, Sophocle, decet non solum manus, sed etiam oculos abstinentes habere. Atque hoc idem Sophocles si in athletarum probatione dixisset, iusta reprehensione caruisset. Tanta vis est & loci, & temporis. Ut si quis, cum causam sit acturus, in itinere, aut in ambulatione secum ipse meditetur, aut si quid aliud attentius cogitet, non reprehendatur: at hoc idem si in convivio faciat, inhumanus videatur, inscitia temporis. Sed ea, quæ multum ab humanitate discrepant, ut, si quis in foro cantet, aut si qua est alia magna perversitas, facile adparent, nec magnopere admonitionem & præcepta desiderant. Quæ autem parva videantur esse delicta, neq; à multis intelligi possunt, ab iis est diligentius declinandum: ut in fidibus, aut in tibiis, quamvis paullum discrepent, tamen id a sciente animadverti solet: sic videndum est in vita, ne forte quid discrepet; vel multo etiam magis, quo major & melior actionum, quam sonorum concentus est. Itaq; ut in fidibus musicorum aures vel minima sentiunt: sic nos, si acres ac diligentes esse volumus, animadversoresque vitiorum, magna sæpe intelligemus ex parvis. Ex oculorum obtutu, ex superciliorum aut
re-

remissione, aut contractione, ex mœstitia, ex hilaritate, ex risu, ex locutione, ex reticentia, ex contentione vocis, ex submissione, ex ceteris similibus, facile judicabimus, quid eorum apte fiat, quid ab officio naturæq; discrepet. Quo in genere non est incommodum, quale quodq; eorum sit, ex aliis judicare: ut, si quid dedeceat alios, vitemus & ipsi. Fit enim nescio quo modo ut magis in aliis cernamus, quàm in nobismetipsis, si quid delinquitur. Itaq; facillimè corriguntur in discendo, quorum vitia imitantur emendandi causa, magistri. Nec vero alienum est, ad ea eligenda, quæ dubitationem adferunt, adhibere doctos homines, vel etiam usu peritos, &, quid his de quoq; officii genere placeat, exquirere. Major enim pars eo fere deferri solet, quo à natura ipsa deducitur. In quibus videndum est, non modo quid quisque loquatur, sed etiam quid quisque sentiat, atque etiam qua de causa quid quisque sentiat. Ut enim pictores, & ii, qui signa fabricantur, & vero etiam poetæ, suum quisque opus à vulgo considerare vult: ut, si quid reprehensum sit à pluribus, id corrigatur: hiq; & secum, & cum aliis, quid in eo peccatum sit, exquirunt: sic aliorum judicio permulta nobis & facienda, & non facienda, & mutanda, & corrigenda sunt. Quæ vero more aguntur, institutisq; civilibus, de iis nihil est præcipiendum. Illa enim ipsa præcepta sunt: nec quemquam hoc errore duci oportet, ut, si quid Socrates, aut Aristippus contra morem, consuetudinemq; civilem fecerint, locutive sint, idem sibi arbitretur licere. Magnis illi, & divinis bonis hanc licentiam adsequebantur. Cynicorum vero ratio tota est ejicienda. Est enim inimica verecundiæ, sine qua nihil rectum esse potest, nihil honestum. Eos autem, quorum vita perspecta in rebus honestis, atq; magnis est, bene de repub. sentientes, ac bene meritos, aut merentes, sicut aliquo honore aut imperio

imperio adfectos, observare & colere debemus: tribuere etiam multum senectuti: cedere iis, qui magistratum habebunt: habere dilectum civis, & peregrini: in ipsôq; peregrino, privatimne an publice venerit: ad summam, ne agam de singulis, communem totius generis hominum conciliationem, & confociationem colere, tueri, servare debemus.

Quæ artes, & qui quæstus sordidi: qui contra liberales.

JAM de artificiis, & quæstibus, qui liberales habendi, qui sordidi sint, hæc fere accepimus. Primum improbantur ii quæstus, qui in odia hominum incurrunt: ut portitorum, scenariorum. Illiberales autem & sordidi quæstus mercenariorum omnium, quorum operæ, non quorum artes emuntur. Est enim illis ipsa merces auctoramentum servitutis. Sordidi etiam putandi, qui mercantur à mercatoribus, quod statim vendant. Nihil enim proficiunt, nisi admodum mentiantur. Nec vero quidquam est turpius vanitate. Opificesq; omnes in sordida arte versantur. Nec enim quidquam ingenuum potest habere officina. Minimèq; artes hæ probandæ, quæ ministræ sunt voluptatum, ceterii, lanii, coqui, fartores, piscatores, ut ait Terentius. Adde huc, si placet, unguentarios, saltatores, totumque ludum talarium. Quibus autem artibus aut prudentia major inest, aut non mediocris utilitas quæritur, ut medicina, ut architectura, ut doctrina rerum honestarum, hæ sunt iis, quorum ordini conveniunt, honestæ. Mercatura autem, si tenuis est, sordida putanda est. Sin magna, copiosa, multa undiq; adportans, multisque sine vanitate impertiens: non est admodum vituperanda. Atque etiam, si satiata quæstu, vel contenta potius, ut sæpe ex alto in portum,

portum, ex ipso portu se in agros, possessionesque contulerit, videtur jure optimo posse laudari. Omnium autem rerum, ex quibus aliquid acquiritur, nihil est agriculturâ melius, nihil uberius, nihil dulcius, nihil homine, nihil libero dignius. De qua, quoniam in Catone majore satis multa diximus, illinc assumes quæ ad hunc locum pertinebunt

E duobus honestis utrum honestius.

SED ab iis partibus, quæ sunt honestatis, quemadmodum officia ducerentur, satis expositum videtur. Eorum autem ipsorum, quæ honesta sunt, potest incidere sæpe contentio & comparatio; de duobus honestis utrum honestius: qui locus à Panætio est prætermissus. Nam cum omnis honestas manet à partibus quatuor, quarum una sit cognitionis, altera communitalis, tertia magnanimitatis, quarta moderationis: hæ in diligendo officio sæpe inter se comparentur necesse est. Placet igitur aptiora esse naturæ ea officia, quæ ex communitate, quam ea, quæ ex cognitione ducantur: idque hoc argumento confirmari potest, quod, si contigerit ea vita sapienti, ut in omnium rerum affluentibus copiis, quamvis omnia, quæ cognitione digna sunt, summo otio secum ipse consideret, & contempletur, tamen, si solitudo tanta sit, ut hominem videre non possit, excedat è vita. Princépsque omnium virtutum illa sapientia, quam σοφία Græci vocant: prudentiam enim, quam Græci οὐσίαν, aliam quamdam intelligimus, quæ est rerum expetendarum, fugiendarumque scientia; illa autem sapientia, quam principem dixi, rerum est divinarum atque humanarum scientia: in qua continetur deorum & hominum communitas & societas inter ipsos. Ea si maxima est, ut est certè; necesse est, quod à communitate ducatur officium, id esse maximum. Etenim cognitio contemplatio-

que


que naturæ manca quodam modo atque inchoata sit, si nulla actio rerum consequatur. Ea autem actio in hominum commodis tuendis maximè cernitur. Pertinet igitur ad societatem generis humani. Ergo hæc cognitioni anteponenda est, atque id optimus quisque re ipsa ostendit, & judicat. Quis enim est tam cupidus in perspiciciendâ cognoscendâque rerum naturâ, ut, si ei tractanti contemplantique res cognitione dignissimas subito sit oblatum periculum discriminèque patriæ, cui subvenire opitularique possit, non illa omnia relinquat atque abjiciat, etiam si dinumerare se stellas, aut metiri mundi magnitudinem posse arbitretur? Atque hoc idem in parentis, in amici re, aut periculo fecerit. Quibus rebus intelligitur, studiis officiisque scientiæ præponenda esse officia justitiæ, quæ pertinent ad hominum caritatem, qua nihil homini esse debet antiquius. Atque illi, quorum studia, vitæque omnis in rerum cognitione versata est, tamen ab augendis hominum utilitatibus & commodis non recesserunt. Nam & erudiverunt multos, quo meliores cives, utilioresque rebus suis publicis essent: ut Thebanum Epaminondam Lysis Pythagoreus, Syracusium Dionem Plato, multique multos: nōsque ipsi, quidquid ad remp. adtulimus, si modo aliquid adtulimus, à doctōribus atque doctrina instructi ad eam, & ornati accessimus. Neque solum vivi atque præsentēs studiosos discendi erudiunt, atque docent: sed hoc idem etiam post mortem monumentis litterarum adsequuntur: nec enim locus ullus prætermisus est ab iis, qui ad leges, qui ad mores, qui ad disciplinam reip. pertineret, ut otium suum ad nostrum negotium contulisse videantur. Ita illi ipsi doctrinæ studiis & sapientiæ dediti ad hominum utilitatem suam intelligentiam prudentiamque potissimum conferunt. Ob eamque causam eloqui copiosè, modo prudenter, melius est quam

vel acutissimè sine eloquentia cogitare: quòd cogitatio in se ipsa vertitur; eloquentia complectitur eos, quibuscum communitate juncti sumus. Atq; ut apium examina non fingendorum favorum causâ congregantur, sed, cum congregabilia naturâ sint, fingunt favos: sic homines, ac multò etiam magis, naturâ congregati adhibent agendi cogitandiq; solertiam. Itaq; nisi ea virtus, quæ constat ex hominibus tuendis, id est, ex societate generis humani, adringat cognitionem rerum, solivaga cognitio, & jejuna videatur. Itémq; magnitudo animi, remotâ communitate, conjunctioneq; humanâ, feritas sit quædam & immanitas. Ita fit, ut vincat cognitionis studium consociatio hominum atque communitas. Nec verum est, quod dicitur à quibusdam, propter necessitatem vitæ, quod ea, quæ natura desideraret, consequi sine aliis, atq; efficere non possemus, idcirco initam esse cum hominibus communitatem, & societatem: quod, si omnia nobis, quæ ad victum cultumq; pertinent, quasi virgulâ divinâ, ut ajunt suppeditarent, tum optimo quisq; ingenio, negotiis omnibus omissis, totum se in cognitione & scientiâ collocaret. Non est ita. Nam & solitudinem fugeret, & socium studii quæreret: tum docere tum discere vellet, tum audire, tum dicere. Ergo omne officium, quod ad conjunctionem hominum, & ad societatem tuendam valet, anteponendum est illi officio, quod cognitione & scientiâ continetur.

Justitiane, an temperantia potior.

Illud forsitan quærendum sit, num hæc communitas, quæ maximè est apta naturæ, sit etiam moderationi, modestiæq; semper anteponenda. Non placet. Sunt enim quædam ita fœda, partim ita flagitiosa, ut ea ne conservandæ quidem patriæ causâ sapiens facturus sit. Ea Posidonius collegit permulta, sed ita tetra quædam, ita obscœna, ut dictu quoq; videantur

videantur turpia. Hæc igitur non suscipiet reip. causâ, ne resp. quidem pro se suscipi volet. Sed hoc commodiùs se res habet, quod non potest accidere tempus, ut intersit reip. quidquam illorum facere sapientem. Quare hoc quidem effectum sit, in officiis deligendis id genus officiorum excellere, quod teneatur hominum societate. Etenim cognitionem prudentiâmq; sequitur considerata actio. Ita fit, ut agere consideratè pluris sit, quam cogitare prudenter. Atq; hæc quidem hætenus. Patefactus est enim locus ipse, ut non sit difficile in exquirendo officio, quod cuiq; sit præponendum, videre. In ipsa autem communitate sunt gradus officiorum, ex quibus, quid cuiq; præstet, intelligi possit: ut primis diis immortalibus; secunda patriæ; tertia parentibus, deinceps gradatim reliquis debeantur. Quibus ex rebus breviter disputatis intelligi potest, non solum id homines solere dubitare, honestumne an turpe sit: sed etiam, duobus propositis honestis, utrum honestius. Hic locus à Panætio est, ut suprâ dixi, prætermisus. Sed jam ad reliqua pergamus.



M. TULLII CICERONIS

D E

OFFICIIS

Ad Marcum Filium

LIBER SECUNDUS.

Argumentum per D. *Erasmum Roterod.*

*Superiore libro duas propositæ initio divisionis partes ab-
solvit, quid honestum, quid contra; & in honestis,
utrum honestius. In hoc de alteris duabus promittit,
quid utile, quid inutile; tum inter utilia utrum uti-
lius, aut quid utilissimum: deinde inconstantia repre-
hensionem deprecatur, quod à civili vita, quam sæpe
prætulerit, nunc ad otium studiorum se convertit: tum
cur ad philosophiam potius, quàm aliud studiorum ge-
nus: postremo, cur Academicus de Officiis præcipiat,
rationem reddit.*



Uemadmodum officia ducerentur ab ho-
nestate, Marce fili, atq; ab omni ge-
nere virtutis, satis explicatum arbi-
tror libro superiore. Sequitur, ut hæc
officiorum genera persequar, quæ per-
tinent ad vitæ cultum, & ad earum re-
rum, quibus utuntur homines, facultatem, ad opes,

ad

ad copias. In quo tum quæri dixi, quid utile, quid inutile: tum ex utilibus quid utilius, aut quid maximè utile. De quibus dicere aggrediar, si pauca priùs de instituto, ac de iudicio meo dixerò. Quamquam enim libri nostri complures non modo ad legendi, sed etiam ad scribendi studium excitaverunt, tamen interdum vereor, ne quibusdam bonis viris philosophiæ nomen sit invisum, mirenturque in ea tantum me operæ & temporis ponere. Ego autem quamdiu resp. per eos gerebatur, quibus se ipsa commiserat, omnes meas curas cogitationesque in eam conferebam: cum autem dominatu unius omnia tenerentur, neque esset usquam consilio, aut auctoritati locus, socios denique tuendæ reip. summos viros, amissem, nec me angoribus dedidi, quibus essem confectus, nisi iis restitsem, nec rursus indignis homine docto voluptatibus. Atque utinam resp. stetisset quo cœperat statu, nec in homines non tam commutandarum, quam evertendarum rerum cupidos incidisset. Primum enim, ut stante rep. facere solebamus, in agendo plus, quam in scribendo operæ poneremus: deinde ipsis scriptis non ea, quæ nunc, sed actiones nostras mandarem, ut sæpe fecimus. Cum autem resp. in qua omnis mea cura, cogitatio, opera poni solebat, nulla esset omnino; illæ scilicet litteræ conticuerunt, forenses, & senatoriæ. Nihil agere autem cum animus non posset, in his studiis ab initio versatus ætatis, existimavi honestissimè molestias posse deponi, si me ad philosophiam retulissem. Cui cum multum adolescens discendi causâ temporis tribuissem, postea quàm honoribus inservire cœpi, meque totum resp. tradidi, tantum erat philosophiæ loci, quantum superfuerat amicorum, & reipub. temporibus. Id autem consumebatur in legendo: scribendi otium non erat. Maximis igitur in malis hoc tamen boni assecuti videmur, ut ea litteris

mandaremus, quæ nec satis erant nota nostris, & erant cognitione dignissima. Quid est enim, per deos, optabilius sapientiâ? quid præstantius? quid homini melius? quid homine dignius? Hanc igitur qui expetunt, philosophi nominantur: nec quidquam aliud est philosophia, si interpretari velis, quam studium sapientiæ. Sapientia autem est (ut a veteribus philosophis definitum est) rerum divinarum & humanarum, causarumque, quibus hæ res continentur, scientia: cujus studium qui vituperat, haud sane intelligo quidnam sit, quod laudandum putet. Nam siue oblectatio quæritur animi, requiesque curarum; quæ conferri cum eorum studiis potest, qui semper aliquid anquirunt, quod spectet & valeat ad bene beatæque vivendum? siue ratio constantiæ virtutisque ducitur, aut hæc ars est, aut nulla omnino per quam eas adsequamur. Nullam dicere maximarum rerum artem esse, cum minimarum sine arte nulla sit, hominum est parum consideratè loquentium, atque in maximis rebus errantium. Si autem est aliqua disciplina virtutis, ubi ea quæretur, cum ab hoc discendi genere discefferis? Sed hæc, cum ad philosophiam cohortamur, accuratius disputari solent: quod alio quodam libro fecimus. Hoc autem tempore tantum nobis declarandum fuit, cur orbatî reip. muneribus ad hoc nos studium potissimum contulissemus. Occurritur autem nobis, & quidem à doctis, & eruditis, quærentibus, satisne constanter facere videamur, qui cum percipi nihil posse dicamus, tamen & aliis de rebus differere soleamus, & hoc ipso tempore præcepta officii persequamur. Quibus vellem satis cognita esset nostra sententia: non enim sumus ii, quorum vagetur animus errore, nec habeat umquam, quid sequatur. Quæ enim esset istâ mens, vel quæ vita potius, non modo disputandi, sed vivendi ratione sublatâ? Nos autem, ut cæteri

alia

alia certa, alia incerta esse dicunt, sic ab his dissentientes, alia probabilia, contra alia non probabilia esse dicimus. Quid est igitur, quod me impediât, ea, quæ mihi probabilia videantur, sequi: quæ contra, improbare: atque adfirmandi arrogantiam vitantem, fugere temeritatem, quæ à sapientia dissidet plurimum? Contra autem omnia, disputatur a nostris, quod hoc ipsum probabile elucere non posset, nisi ex utrâque parte causarum esset facta contentio. Sed hæc explanata sunt in Academicis nostris satis, ut arbitror, diligenter. Tibi autem, mi Cicero, quamquam in antiquissimâ, nobilissimâque philosophiâ, Cratippo auctore, versaris, iis simillimo, qui ista præclara pepererunt, tamen hæc nostra, finitima vestris, ignota esse nolui. Sed jam ad instituta pergamus.

Utilitatem non eam hic accipit quam vulgus pecuniario lucro metitur, & commoditate undecunque partâ: sed eam, quæ cum honesto sit conjuncta, & ad vitæ societatem pertineat.

Quinque igitur rationibus propositis officii persequendi, quarum duæ ad decus, honestatēque pertinent, duæ ad commoda vitæ, copias, opes, facultates, quinta ad eligendi iudicium, si quando ea, quæ dixi, pugnare inter se viderentur, honestatis pars confecta est, quam quidem tibi cupio esse notissimam. Hoc autem, de quo nunc agimus, id ipsum est, quod utile appellatur. In quo lapsa consuetudo deflexit de via, sensimque eo deducta est, ut honestatem ab utilitate ~~secerne~~, & constituerit honestum esse aliud, quod utile non esset, & utile, quod non honestum; qua nulla pernicies major hominum vitæ potuit adferri. Summâ quidem auctoritate philosophi severè sanè atque honestè, hæc tria genera

confusa cogitatione distinguunt. Quidquid enim justum sit, id etiam utile esse censent : itémque quod honestum, idem justum. Ex quo efficitur, ut, quidquid honestum sit, idem sit utile. Quod qui parum perspiciunt, hi sæpe versutos homines & callidos admirantes, malitiam sapientiam judicant ; quorum error eripiendus est, opinióque omnis ad eam spem traducenda, ut honestis consiliis, justisque factis, non fraude & malitiâ se intelligant ea, que velint, consequi posse.

Offendit quæ quaque ex re commoda aut incommoda capiuntur, quæ Græci ἐὺχρησίσματα & δυσχρησίσματα nominant : colligitque quicquid est fere in vita commodi, aut incommodi, id homini ab homine nasci.

QUæ ergo ad vitam hominum tuendam pertinent, partim sunt inanima, ut aurum, argentum, ut ea, quæ gignuntur è terra, ut alia ejusdem generis : partim animalia, quæ habent suos impetus, & rerum adpetitus. Eorum autem alia rationis expertia sunt, alia ratione utentia. Expertes rationis equi, boves, reliquæ pecudes, apes, quarum opere efficitur aliquid ad hominum usum atque vitam. Ratione autem utentium duo genera ponuntur, unum deorum, alterum hominum. Deos placatos pietas efficiet & sanctitas : proximè autem, & secundum deos, homines hominibus maximè utiles esse possunt. Earúmque rerum, quæ noceant & obfint, eadem divisio est. Sed quia deos nocere non putant, his exceptis, homines hominibus obesse plurimùm arbitrantur. Ea enim ipsa, quæ inanima diximus, pleraque sunt hominum operis effecta, quæ nec haberemus, nisi manus, & ars accessissent : nec his sine hominum administratione uteremur. Neque enim valetudinis curatio, neque navigatio, neque agricultura, neque frugum fructuúmque reliquo-
rum

rum perceptio & conservatio, sine hominum operâ ulla esse potuisset. Jam verò & earum rerum, quibus abundaremus, exportatio, & earum, quibus egeremus, invectio, certè nulla esset, nisi his muneribus homines fungerentur. Eadèmq; ratione nec lapides è terra exciderunt ad usum nostrum necessarii: nec ferrum, æs, aurum, argentum, effoderetur, penitus abditum, sine hominum labore, & manu. Tecta vero, quibus & frigor vis pelleretur & calorum molestiæ sedarentur, unde aut initio generi humano dari potuissent, aut postea subveniri, si aut vi tempestatis, aut terræ motu, aut vetustate cecidissent, nisi communis vita ab hominibus harum rerum auxilia petere didicisset? At deductus aquarum, derivationes fluminum, agrorum irrigationes, moles oppositas fluctibus, portus manu factos, quæ unde sine hominum operâ habere possemus? Ex quibus, multisque aliis perspicuum est, qui fructus, quæque utilitates ex rebus iis, quæ sunt inanimæ, percipiuntur, eas nos nullo modo sine hominum manu atque operâ capere potuisse. Qui denique ex bestiis fructus, aut quæ commoditas, nisi homines adjuvarent, percipi posset? nam & qui principes inveniendi fuerunt, quem ex quaque belluâ usum habere possemus, homines certe fuerunt: Nec hoc tempore sine hominum operâ aut pascere eas, aut domare, aut tueri, aut tempestivos fructus ex his capere possemus: ab eisdèmq; & ex, quæ nocent, interficiuntur: & quæ usui possunt esse, capiuntur. Quid enumerem artium multitudinem, sine quibus vita omnino nulla esse potuisset? quis enim ægris subveniret: quæ esset oblectatio valentium, qui victus, aut cultus, nisi tam multæ nobis artes ministrarent? quibus rebus ex-culta hominum vita tantum distat à victu & cultu bestiarum. Urbes vero sine hominum cœtu non potuissent nec ædificari, nec frequentari; ex quo
leges,

leges, morésque constituti, tum juris æqua descriptio, certaque vivendi disciplina. Quas res & mansuetudo animorum consecuta, & verecundia est: effectumque ut esset vita munitior; atque ut dando, & accipiendo, mutandisque facultatibus & commodis nullâ re egeremus. Longiores hoc loco sumus, quam necesse est. Quis est enim, cui non perspicua sint illa, quæ pluribus verbis à Panætio commemorantur, neminem neque ducem belli, nec principem domi, magnas res & salutare sine hominum studiis gerere potuisse? Commemoratur ab eo Themistocles, Pericles, Cyrus, Agesilaus, Alexander, quos negat sine adjumentis hominum tantas res efficere potuisse. Utitur in re non dubia testibus non necessariis. Atque ut magnas utilitates adipiscimur conspiratione hominum, atque consensu; sic nulla tam detestabilis pestis est, quæ non homini ab homine nascatur. Est Dicæarchi liber de interitu hominum, Peripatetici magni & copiosi: qui collectis cæteris causis, eluvionis, pestilentia, vastitatis, beluarum etiam repentinæ multitudinis, quarum impetu docet quædam hominum genera esse consumpta: deinde comparat, quanto plures deleti sint homines hominum impetu, id est, bellis, aut seditionibus, quàm omni reliqua calamitate. Cum igitur hic locus nil habeat dubitationis, quin homines plurimum hominibus & prosint & obsint: primum hoc statuo esse virtutis, conciliare animos hominum, & ad usus suos adjungere. Itaque, quæ in rebus inanimis, quæque in usu & tractatione beluarum fiunt utiliter ad hominum vitam, artibus ea tribuuntur operosis: Hominum autem studia ad amplificationem nostrarum rerum prompta ac parata, virorum præstantium sapientiâ & virtute excitantur. Etenim virtus omnis tribus in rebus ferè vertitur: Quarum una est in perspicendo,

quid

quid in quaque re verum sincerumque sit, quid consentaneum cuique, quid consequens, ex quo quidque gignatur, quæ cujusque rei causa sit: alterum cohibere motus animi turbatos, quos Græci *πάθη* nominant: adpetitionesque, quas illi *ὀρμῆς*, obedientes efficere rationi: tertium iis, quibus cum congregamur, uti moderatè & scienter, quorum studiis ea, quæ natura desiderat, expleta, cumulatæque habeamus: per eos denique, si quid importetur nobis incommodi, propulsemus, ulciscamurque eos, qui nocere nobis conati sunt, tantæque pœnâ adficiamus, quantum æquitas humanitasque patitur. Quibus autem rationibus hanc facultatem adsequi possimus, ut hominum studia complectamur, eaque teneamus, dicemus, neque ita multo post; sed pauca antè dicenda sint. Magnam vim esse in fortuna in utramque partem, vel secundas ad res, vel adversas, quis ignorat? nam & cum prospero flatu ejus utimur, ad exitus pervehimur optatos: & cum reflavit, adfligimur. Hæc igitur ipsa fortuna cæteros casus rariores habet, primum ab inanimis procellas, tempestates, naufragia, ruinas, incendia: deinde, à bestiis ictus, morsus, impetus. Hæc ergo, ut dixi, rariores. At vero interitus exercituum, ut proximè trium, sæpe multorum, clades imperatorum, & nuper summi ac singularis viri: invidiæ præterea multitudinis, atque ob eas, bene meritorum sæpe civium expulsionones, calamitates, fugæ: rursusque secundæ res, honores, imperia, victoriæ, quamquam fortuita sunt, tamen sine hominum opibus & studiis neutram in partem effici possunt. Hoc igitur cognito dicendum est, quonam modo hominum studia ad utilitates nostras allicere, atque excitare possimus. Quæ si longior fuerit oratio, cum magnitudine utilitatis comparetur. Ita fortassis etiam brevior videbitur.

Quibus

Quibus rebus commoveantur homines, ut quempiam magistratu dignum putent, eique parere velint.

QUæcunque igitur homines homini tribuunt ad eum augendum, atque honestandum, aut benevolentia gratiâ faciunt, cum aliqua de causa quempiam diligunt: aut honoris, si cujus virtutem suspiciunt, & si quem dignum fortunâ quam amplissimâ putant: aut cui fidem habent, & bene rebus suis consulere arbitrantur: aut cujus opes metuunt: aut contra à quibus aliquid expectant, ut cum reges popularesve homines largitiones aliquas proponunt: aut postremo pretio ac mercede ducuntur: quæ sordidissima est illa quidem ratio, & inquinatissima, & iis, qui eâ tenentur, & illis, qui ad eam confugere conantur. Male enim se res habet, cum, quod virtute effici debet, id tentatur pecuniâ. Sed quoniam nonnumquam hoc subsidium necessarium est, quemadmodum sit utendum eo dicemus, si prius iis de rebus, quæ virtuti propiores sunt, dixerimus. Atque etiam subjiciunt se homines imperio alterius, & potestati de causis pluribus. Ducuntur enim aut benevolentia, aut beneficiorum magnitudine, aut dignitatis præstantiâ, aut spe, sibi id utile futurum, aut metu, ne vi parere cogantur, aut spe largitionis, promissisque capti: aut postremo, ut sæpe in nostra repub. videmus, mercede conducti.

Utilissimum iis, qui cum imperio sunt, ab omnibus amari: metui tum turpe, tum minimè tutum.

OMnium autem rerum nec aptius est quidquam ad opes tuendas, quam diligere, nec alienius, quam timeri. Præclare enim Ennius: Quem metuunt, oderunt: quem quisque odit, perisse

perisse expetit. Multorum autem odiis nullas opes posse obsistere, si antea fuit ignotum, nuper est cognitum. Nec vero hujus tyranni solum, quem armis oppressa pertulit civitas, paret quæ cum maximè mortuo, interitus declarat, quantum odium hominum valeat ad pestem: Sed reliquorum similes exitus tyrannorum: quorum haud ferè quisquam interitum talem effugit. Malus enim est custos diuturnitatis metus: contraque benevolentia fidelis vel ad perpetuitatem. Sed iis, qui vi oppressos imperio coercent, sit sane adhibenda sævitia, ut heris in famulos, si aliter teneri non possunt: Qui vero in libera civitate ita se instruunt, ut metuantur, his nihil esse potest dementius. Quamvis enim demersæ sint leges alicujus opibus, quamvis timefacta libertas, emergunt tamen hæc aliquando aut judiciis tacitis, aut occultis de honore suffragiis. Acriores autem morsus sunt intermissæ liberratis, quam retentæ. Quod igitur latissimè patet, neque ad incolumitatem solum, sed etiam ad opes, ad potentiam valet plurimum, id amplectamur, ut metus absit, caritas retineatur; ita facillimè quæ volumus, & privatis in rebus, & in rep. consequemur. Etenim, qui se metui volent, à quibus metuentur, eosdem metuant ipsi necesse est. Quid enim censemus superiorem illum Dionysium, quo cruciatu timoris angī solitum, qui cultros meruens tonsorios, candente carbone sibi adurebat capillum? quid? Alexandrum Pheræum, quo animo vixisse arbitramur? qui (ut scriptum legimus) cum uxorem Theben admodum diligeret, tamen ad eam ex epulis in cubiculum veniens, barbarum, & eum quidem, ut scriptum est, compunctum notis Threiciis, districto gladio jubebat anteire: Præmittebātque de stipatoribus suis, qui scrutarentur arculas muliebres, &, ne quod in vestimentis occultaretur telum, exquirerent. O miserum,

serum, qui fideliorem & barbarum, & stigmati-
am putaret, quam conjugem! nec eum fefellit;
ab ea enim est ipse propter pellicatûs suspicio-
nem interfectus. Nec vero ulla vis imperii tanta
est, quæ premente metu, possit esse diuturna.
Testis est Phalaris, cujus est præter cæteros nobi-
litata crudelitas: qui non ex insidiis interiit, ut is,
quem modo dixi, Alexander: non à paucis, ut
hic noster: sed in quem universa Agrigentinarum
multitudo impetum fecit. Quid? Macedones
nónne Demetrium reliquerunt, universique se ad
Pyrrhum contulerunt? Quid? Lacedæmonios injustè
imperantes nónne repente omnes fere socii deseru-
erunt, spectatòresque se otiosos præbuerunt Leuc-
tricæ calamitatis? Externa libentius in tali re,
quam domestica recordor. Verum tamen quamdiu
imperium populi R. beneficiis tenebatur, non in-
juriis; bella aut pro sociis, aut de imperio gere-
bantur; exitus erant bellorum mites, aut necessarii.
Regum, populorum, nationum portus erat & re-
fugium, senatus. Nostri autem magistratus, im-
peratoresque ex hac una re maximam laudem
capere studebant, si provincias, si socios æquitate
& fide defendissent. Itaque illud patrocini-
um orbis terræ veriùs, quàm imperium poterat nomi-
nari. Sensim hanc consuetudinem & disciplinam
jam antea minuebamus, post vero Syllæ victoriam
penitus amisimus. Desitum est enim videri quid-
quam in socios iniquum, cum extitisset in cives tanta
crudelitas. Ergo in illo secuta est honestam causam
non honesta victoria. Est enim ausus dicere, hasta
posita, cum bona in foro venderet & bonorum viro-
rum, & locupletium, & certè civium, prædam
suam se vendere. Secutus est, qui in causa im-
piâ, victoriâ etiam scèdiore, non singulorum ci-
vium bona publicaret, sed universas provincias,
regionesque uno calamitatis jure comprehende-

ret.

ret. Itaque vexatis & perditis exteris nationibus, ad exemplum amissi imperii portari in triumpho Massiliam vidimus, & ex ea urbe triumphari, sine qua nunquam nostri imperatores ex transalpinis bellis triumphârunt. Multa præterea commemorarem nefaria in socios, si hoc uno sol quidquam vidisset indignius. Jure igitur plectimur. Nisi enim multorum impunita scelera tulissemus, numquam ad unum tanta pervenisset licentia: à quo quidem rei familiaris ad paucos, cupiditatum ad multos improbos venit hæreditas. Nec vero umquam bellorum civilium semen & causa deerit, dum homines perditæ hastam illam cruentam & meminerint, & sperabunt, quam P. Sylla cum vibrâisset, dictatore propinquo suo, idem sexto tricesimo anno post à sceleratiore hasta non recessit. Alter autem, qui in illa dictatura scriba fuerat, in hac fuit quæstor urbanus, Ex quo debet intelligi, talibus præmiis propositis numquam defutura bella civilia. Itaque parietes urbis modò stant & manent, iique ipsi jam extrema scelera metuentes: Rem vero publicam penitus amisimus: Atque in has clades incidimus (redeundum est enim ad propositum) dum metui, quam cari esse & diligi maluimus. Quæ si populo R. injustè imperanti accidere potuerunt, quid debent putare singuli? Quod cum perspicuum sit, benevolentiae vim esse magnam, metûs imbecillam, sequitur, ut differamus, quibus rebus possimus facillimè eam, quam volumus, adipisci cum honore & fide caritatem. Sed eâ non pariter omnes egemus. Nam ad cujusque vitam institutam accommodandum est, à multisne opus sit, an satis à paucis diligi. Certum igitur hoc sit, idque & primùm & maximè necessarium, familiaritates habere fidæ amantium nos amicorum, & nostra mirantium. Hæc enim est una res prorsus, ut non multùm differat inter summos & mediocres viros:

viros; eaque utrisque est propemodum comparanda. Honore, & gloria, & benevolentia civium fortasse non æquè omnes egent, sed tamen si cui hæc suppetunt, adjuvant aliquantum tum ad ætera, tum ad amicitias comparandas. Sed de amicitia alio libro dictum est, qui inscribitur Lælius. Nunc dicamus de gloria, quamquam ea quoque de re duo sunt nostri libri: Sed attingamus, quandoquidem ea in rebus majoribus administrandis adjuvat plurimum.

Tribus maximè rebus adduci multitudinem, ut honore dignum aliquem ducat; benevolentia, fide, & admiratione.

SUMMA igitur, & perfecta gloria constat ex tribus his, si diligit multitudo, si fidem habet, si cum admiratione quadam honore dignos putat. Hæc autem, si est simpliciter breviterque dicendum, quibus rebus pariuntur a singulis, eisdem fere a multitudine. Sed est alius quoque quidam aditus ad multitudinem, ut in universorum animos tanquam influere possimus.

Quæ res homini multitudinis benevolentiam conciliant.

AC primum de illis tribus, quæ ante dixi, benevolentia præcepta videamus: Quæ quidem beneficiis capitur maximè: Secundo autem loco beneficâ voluntate benevolentia movetur, etiam si res fortè non suppetit. Vehementer autem amor multitudinis commovetur ipsa famâ & opinione liberalitatis, beneficentia, iustitiæ, fidei, omniumque earum virtutum, quæ pertinent ad mansuetudinem morum & ad facilitatem. Etenim illud ipsum, quod honestum decorumque dicimus, quia per se nobis placet, animosque omnium

um naturâ, & specie sua commovet, maximèque quasi perlucet ex eis, quas commemoravi, virtutibus: Idcirco illos, in quibus eas virtutes esse remur, à natura ipsa diligere cogimur. Atque hæc quidem causæ diligendi gravissimæ: possunt enim præterea nonnullæ esse leviores.

Quibus rebus efficiatur, ut nobis habeatur fides.

Fides autem ut habeatur, duabus rebus effici potest: Si existimabimur adepti conjunctionem cum justitia prudentiam. Nam & iis fidem habemus, quos plus intelligere quam nos arbitramur, quosque & futura prospicere credimus, & cum res agatur, in discriminemque ventum sit, expedire rem, & consilium ex tempore capere posse. Hanc enim utilem homines existimant, veramque prudentiam. Justis autem & fidis hominibus, id est, bonis, ita fides habetur, ut nulla sit in his fraudis injuriæque suspicio. Itaque his salutem nostram, his fortunas, his liberos rectissime committi arbitramur. Harum igitur duarum ad fidem faciendam justitia plus pollet: Quippe cum ea sine prudentia satis habeat auctoritatis, prudentia sine justitia nihil valeat ad faciendam fidem. Quo enim quis versutior & callidior est, hoc invinior & suspectior, detracta opinione probitatis. Quamobrem intelligentiæ justitia conjuncta quantum volet habebit ad faciendam fidem virium. Justitia sine prudentia multum poterit: sine justitia nihil valebit prudentia. Sed ne quis sit admiratus, cur, cum inter omnes philosophos constet, à meque ipso sæpe disputatum sit, qui unam haberet, omnes habere virtutes, nunc ita sejungam, quasi possit quisquam, qui non idem prudens sit, justus esse: Alia est illa, cum veritas ipsa limatur in disputatione, subtilitas; alia, cum ad opinionem communem omnis accom-

F modatur

modatur oratio. Quamobrem ut vulgus, ita nos hoc loco loquimur, ut alios fortes, alios bonos viros, alios prudentes dicamus. Popularibus enim verbis est agendum & usitatis, cum loquimur de opinione populari, idque eodem modo fecit Panætius. Sed ad propositum revertamur.

*Quæ res multitudinis admirationem moveat : quæ
contra, contemptum.*

ERat igitur ex tribus, quæ ad gloriam pertinent, hoc tertium, ut cum admiratione hominum honore ab iis digni judicaremur. Admirantur igitur communiter illi quidem omnia, quæ magna, & præter opinionem suam animadverterunt : separatim autem in singulis, si perspiciunt nec opinata quædam bona. Itaque eos viros suspiciunt, maximisque efferunt laudibus, in quibus existimant se excellentes quasdam, & singulares virtutes perspicere : despiciunt autem eos & contemnunt, in quibus nihil virtutis, nihil animi, nihil nervorum putant : non enim omnes eos contemnunt, de quibus male existimant. Nam quos improbos, maledicos, fraudulentos putant, & ad faciendam injuriam instructos, eos contemnunt quidem neutiquam, sed de his male existimant. Quamobrem (ut antè dixi) contemnuntur ii, qui nec sibi, nec alteri profunt, ut dicitur ; in quibus nullus labor, nulla industria, nulla cura est. Admiratione afficiuntur ii, qui anteire cæteros virtute putantur, & cum omni carere dedecore, tum vero iis vitiis, quibus alii non facile possunt obistere. Nam & voluptates, blandissimæ dominæ, majores partes animi à virtute detorquent : & dolorum cum admoventur faces, præter modum plerique exterrentur : vita, mors, divitiæ, paupertas, omnes homines vehementissimè permovent. Quæ qui in utramque partem excelfo animo magnèque despiciunt,

spiciunt, cùmque aliqua his ampla & honesta res obiecta est, totos ad se convertit & rapit, tum quis non admiretur splendorem pulchritudinẽque virtutis? Ergo & hæc animi despicientia admirabilitatem magnam facit: & maximè justitia (ex qua unà virtute viri boni appellantur) mirifica quædam multitudini videtur: nec injuria, nemo enim justus esse potest, qui mortem, qui dolorem, qui exsilium, qui egestatem timet, aut qui ea, quæ his sunt contraria, æquitati antepōnit. Maximèque admirantur eum, qui pecuniâ non movetur: quod in quo viro perspectum sit, hunc igni spectatum arbitrantur. Itaque illa tria, quæ proposita sunt ad gloriam, omnia justitia conficit: & benevolentiam, quod prodesse vult plurimis: & ob eandem causam, fidem: & admirationem, quod eas res spernit & negligit, ad quas pleriq; inflammari aviditate rapiuntur. Ac mea quidem sententiâ omnis ratio atq; institutio vitæ adjumenta hominum desiderat: in primisque ut habeas quibuscum possis familiares conferre sermones, quod est difficile, nisi speciem præ te boni viri feras. Ergo etiam solitario homini, atque in agro vitam agentis, opinio justitiæ necessaria est: eoque etiam magis, quod si eam non habebunt, injusti habebuntur: nullis præfidiis septi multis afficientur injuriis. Atque iis etiam, qui vendunt, emunt, conducunt, locant, contrahendisq; negotiis implicantur, justitia ad rem gerendam necessaria est. Cujus tanta vis est, ut nec illi quidem, qui maleficio & scelere pascuntur, possunt sine ulla particula justitiæ vivere. Nam qui eorum cuipiam, qui unà latrocinantur, furatur aliquid, aut eripit; is sibi ne in latrocinio quidem relinquit locum: ille autem, qui archipirata dicitur, nisi æquabiliter prædam dispertiat, aut interficiatur à fociis, aut relinquatur. Quinetiam leges latronum esse dicuntur, quibus parcant, quas observent.

servent. Itaque propter æquabilem prædæ partitionem & Bardylis Illyrius latro, de quo est apud Theopompum, magnas opes habuit, & multo majores Viriatus Lusitanus, cui quidem etiam exercitus nostri imperatoresque cesserunt: quem C. Lælius, is, qui sapiens usurpatur, prætor fregit, & comminuit, ferocitatemque ejus ita repressit, ut facile bellum reliquis traderet. Cum igitur tanta vis justitiæ sit, ut ea etiam latronum opes firmet atque augeat, quantam ejus vim inter leges & judicia in constitutâ rep. fore putamus? Mihi quidem non apud Medos solum, ut ait Herodorus, sed etiam apud majores nostros, justitiæ fruendæ causa videntur olim bene morati reges constituti. Nam cum premeretur inops multitudo ab iis, qui majores opes habebant, ad unum aliquem confugebant, virtute præstantem, qui cum prohiberet injuriâ tenuiores, æquitate constituendâ summos cum infimis pari jure retinebat. Eademq; constituendarum legum fuit causa, quæ regum. Jus enim semper quæsitum est æquabile: neque enim aliter esset jus: id si ab uno justo & bono viro consequerentur, eo erant contenti: cum id minus contingeret, leges sunt inventæ, quæ cum omnibus semper unâ atque eadem voce loquerentur. Ergo hoc quidem perspicuum est, eos ad imperandum deligi solitos, quorum de justitia magna esset opinio multitudinis. Adjuncto vero, ut iidem etiam prudentes haberentur, nihil erat, quod homines his auctoribus non posse consequi se arbitrantur. Omni igitur ratione colenda, & retinenda justitia est; tum ipsa propter sese; nam aliter justitia non esset: tum propter amplificationem honoris & gloriæ. Sed ut pecuniæ non quærendæ solum ratio est, sed etiam collocandæ, quæ perpetuos sumtus suppeditet, nec solum necessarios, sed etiam liberales: sic gloria & quærenda & collocanda ratio est. Quamquam præclare

Socrates

Socrates hanc viam ad gloriam proximam, & quasi compendiarium dicebat esse, si quis id ageret, ut, qualis haberi vellet, talis esset. Quod si qui simulatione, & inani ostentatione, & ficto non modo sermone, sed etiam vultu, stabilem se gloriam consequi posse rentur, vehementer errant. Vera gloria radices agit, atque etiam propagatur: ficta omnia celeriter, tanquam flosculi, decidunt, nec simulatum potest quidquam esse diuturnum. Testes sunt permulti in utramque partem, sed brevitatis causa, familiâ erimus contenti una. Tiberius enim Gracchus, P. F. tandiu laudabitur, dum memoria rerum Romanarum manebit. At ejus nec filii vivi probabantur bonis, & mortui numerum obtinent jure cæsorum. Qui igitur adipisci veram gloriam volet, justitiæ fungatur officiis: ea quæ essent, dictum est libro superiore. Sed, ut facillime, quales simus, tales esse videamur, etsi in eo ipso vis maxima est, ut simus ii, qui haberi velimus, tamen quædam præcepta danda sunt. Nam si quis ab ineunte ætate habet causam celebritatis & nominis, aut à patre acceptam; (quod tibi, mi Cicero, arbitror contigisse) aut aliquo casu atque fortuna, in hunc oculi omnium conjiciuntur, atque in eum, quid agat, quemadmodum vivat, anquiritur: & tanquam in clarissimâ luce versetur, ita nullum obscurum potest nec dictum ejus esse, nec factum. Quorum autem prima ætas propter humilitatem & obscuritatem in hominum ignoratione versatur, hi simul ac juvenes esse cœperunt, magna spectare, & ad ea rectis studiis debent contendere, quod eo firmiore animo facient, quia non modo non invidetur illi ætati, verum etiam favetur.

Adolescentes quibus rebus populo primum commendantur.

Prima igitur est adolescenti commendatio ad gloriam, si qua ex bellicis rebus comparari potest, in qua multi apud majores nostros exstiterunt : semper enim fere bella gerebantur. Tua autem ætas incidit in id bellum, cujus altera pars sceleris nimium habuit, altera felicitatis parum. Quo tamen in bello, cum te Pompeius alæ alteri præfecisset, magnam laudem & à summo viro, & ab exercitu consequere equitando, jaculando, omni militari labore tolerando, atque ea quidem tua laus pariter cum repub. cecidit. Mihi autem hæc oratio suscepta non de te est, sed de genere toto: quamobrem pergamus ad ea, que restant. Ut igitur in reliquis rebus multo majora sunt opera animi, quam corporis : sic hæc res, quas persequimur ingenio ac ratione, graviores sunt, quam illæ, quas viribus. Prima igitur commendatio proficiscitur à modestia, tum pietate in parentes, tum in suos benevolentia. Facillimè autem, & in optimam partem cognoscuntur adolescentes, qui se ad claros, & sapientes viros, bene consulentes reip. contulerunt : quibuscum si frequentes sint, opinionem afferunt populo, eorum fore se similes, quos sibi ipsi delegerint ad imitandum. P. Rutilii adolescentiam ad opinionem & innocentiam & juris scientiam, P. Mucii commendavit domus. Nam Lucius quidem Crassus, cum esset admodum adolescens, non aliunde mutuatus est, sed sibi ipse peperit maximam laudem ex illa accusatione nobili & gloriosa : & qua ætate qui exercentur, laude affici solent, ut de Demosthene accepimus; ea ætate L. Crassus ostendit, id se in foro optime jam facere, quod etiam tum poterat domi cum laude meditari. Sed cum duplex ratio sit orationis, quarum in altera sermo

fit ;

fit; in altera contentio: non est id quidem dubium, quin contentio orationis majorem vim habeat ad gloriam; ea est enim quam eloquentiam dicimus. Sed tamen difficile dictu est, quantopere conciliet animos hominum comitas affabilitasque sermonis. Exstant epistolæ Philippi ad Alexandrum, & Antipatri ad Cassandrum, & Antigoni ad Philippum filium, trium prudentissimorum, sic enim accepimus, quibus præcipiunt, ut oratione benignâ multitudinis animos ad benevolentiam alliciant, militésque blandè appellando deliniant, Quæ autem in multitudine cum contentione habetur oratio, ea sæpe universam excitat. Magna est enim admiratio copiosè sapientérque dicentis: quem qui audiunt, intelligere etiam & sapere plus quam cæteros arbitrantur. Si vero inest in oratione mista modestiæ gravitas, nil admirabilius fieri potest: eoque magis, si ea sunt in adolescente. Sed, cum sint plura causarum genera, quæ eloquentiam desiderant, multique in nostra repub. adolescentes & apud judices, & apud senatum dicendo laudem assecuti sint, maxima admiratio est in judiciis: quorum ratio duplex est. Nam & ex accusatione, & defensione constat: quarum etsi laudabilior est defensio, tamen etiam accusatio probata persæpe est. Dixi paullo antè de Crasso. Idem fecit adolescens M. Antonius. Etiam P. Sulpicii eloquentiam accusatio illustravit, cum seditiosum & inutilem civem, C. Norbanum, in iudicium vocavit. Sed hoc quidem non est sæpe faciendum, nec unquam nisi aut reipub. causa, ut ii, quos ante dixi; aut ulciscendi, ut duo Lucilli: aut patrocinio, ut nos pro Siculis; pro Sardis: pro M. Albutio Julius. In accusando etiam M. Aquilio L. Fufii cognita industria est. Semel igitur, aut non sæpe certè. Sin erit, cui faciendum sit sapius, reip. tribuat hoc muneris, cujus inimicos ulcisci sapius, non

est reprehendendum : modus tamen adfit. Duri enim hominis, vel potius vix hominis videtur, periculum capitis inferre multis. Id cum periculosum ipsi est, tum etiam sordidum ad famam, committere ut accusator nomenetur : quod contigit M. Bruto, summo genere nato, illius filio, qui juris civilis imprimis petitus fuit. Atq; etiam hoc præceptum officii diligenter tenendum est, ne quem umquam innocentem iudicio capitis arceffas : id enim sine scelere fieri nullo pacto potest. Nam quid est tam inhumanum, quam eloquentiam, à naturâ ad salutem hominum, & ad conservationem datam, ad bonorum pestem perniciemque convertere? Nec tamen, ut hoc fugiendum est, item habendum est religioni, nocentem aliquando, modo ne nefarium impiumque defendere. Vult hoc multitudo, patitur consuetudo, feret etiam humanitas. Iudicis est, semper in causis verum sequi : patroni, nonnumquam verisimile, etiam si minus sit verum, defendere : quod scribere, præsertim cum de philosophia scriberem, non auderem, nisi idem placeret gravissimo Stoicorum Panætio. Maximè autem & gloria paritur, & gratia defensionibus : eoque major, si quando accidit, ut ei subveniatur, qui potentis alicujus opibus circumveniri, urgerique videatur, ut nos & sæpe aliàs, & adolescentes, contra L. Sullæ dominantis opes pro Sex. Roscio Amerino fecimus : quæ, ut scis, exstat oratio.

Duplex liberalitatis genus, & quatenus ad conciliandam multitudinem adhibendum.

SED expositis adolescentum officiis quæ valeant ad gloriam adipiscendam, deinceps de beneficentia ac liberalitate dicendum est. Cujus est ratio duplex ; nam aut operâ benigne fit indigentibus, aut pecuniâ : facilius est hæc posterior, locupleti præsertim : sed illa laudior ac spendidior, &

& viro forti claroque dignior. Quamquam enim in utroque inest gratificandi liberalis voluntas, tamen altera ex arca, altera ex virtute depromitur; largitiōque, quæ fit ex re familiari, fontem ipsum benignitatis exhaurit. Ita benignitate benignitas tollitur: qua, quo in plures usus sis, eo minùs in multos uti possis. At qui operâ, id est, virtute & industriâ, benefici & liberales erunt; primum, quo pluribus profuerint, eo plures ad benignè faciendum adiutores habebunt; deinde consuetudine beneficentiæ paratiores erunt, & tanquam exercitatiōes ad bene de multis promerendum. Præclare epistolâ quadam Alexandrum filium Philippus accusat, quod largitione benevolentiam Macedonum confectetur. Quæ te, malum, inquit, ratio in istam spem induxit, ut eos tibi fideles putares fore, quos pecuniâ corrupisses? An tu id agis, ut Macedones non te regem suum, sed ministrum & præbitorem sperent fore? Bene, ministrum & præbitorem, quia sordidum regi: melius etiam, quod largitionem corruptelam dixit. Fit enim deterior, qui accipit, atque ad idem semper expectandum paratior. Hoc ille filio: sed præceptum putemus omnibus. Quamobrem id quidem non dubium est, quin illa benignitas, quæ constat ex opera & industria, & honestior sit & latius pateat, & possit prodesse pluribus. Nonnumquam tamen est largiendum. nec hoc benignitatis genus omnino repudiandum est: & sæpe idoneis hominibus indigentibus de re familiari impertiendum: sed diligenter, atque moderatè. Multi enim patrimonia effuderunt inconsultè largiendo. Quid autem est stultius, quam quod libenter facias, curare ut id diutius facere non possis? Atque etiam sequuntur largitionem rapinæ: cum enim dando egere cœperint, alienis bonis manus asferre coguntur. Ita, cum benevolentiae comparandæ causa benefici esse velint, non
tanta

tanta studia assequuntur eorum, quibus dederunt, quanta odia eorum, quibus ademerunt. Quamobrem nec ita claudenda est res familiaris, ut eam benignitas aperire non possit; nec ita referenda, ut pateat omnibus. Modus adhibeatur, isque referatur ad facultates. Omnino meminisse debemus id, quod a nostris hominibus sæpissime usurpatum jam in proverbii consuetudinem venit, largitionem fundum non habere. Etenim quis potest modus esse, cum & idem qui consuerunt, & idem illud alii desiderent? Omnino duo sunt genera largorum, quorum alteri prodigi, alteri liberales: prodigi, qui epulis, & viscerationibus, & gladiatoriiis muneribus, ludorum venationumque apparatu pecunias profundunt in eas res, quarum memoriam aut brevem, aut nullam omnino sint relicturi. Liberales autem, qui suis facultatibus aut captos a prædonibus redimunt, aut æs alienum suscipiunt amicorum, aut in filiarum collocatione adjuvant, aut opitulantur in re vel quærenda, vel augenda. Itaque miror, quid in mentem venerit Theophrasto, in eo libro, quem de divitiis scripsit: in quo multa præclare, illud absurdè. Est enim multus in laudanda magnificentia, & apparatione popularium munerum, taliumque sumtuum facultatem fructum divitiarum putat. Mihi autem ille fructus liberalitatis, cujus pauca exempla posui, multo & major videtur, & certior. Quanto Aristoteles gravius & veriùs nos reprehendit, qui has pecuniarum effusiones non admiremur, que fiunt ad multitudinem delinendam? at ii, qui cum ab hoste obsidentur, si emere aquæ sextarium minâ cogerentur, hoc primo auditu incredibile nobis videri, omnesque mirari: sed, cum attenderint, veniam necessitati dare: in his immanibus jacturis, infinitisque sumtibus, nihil nos magnopere mirari; cum præsertim nec necessitati subveniatur, nec dignitas augeatur: ipsaque.

ipsaque illa delectatio multitudinis sit ad breve exiguumque tempus, eaque a levissimo quoque : in quo tamen ipso una cum satietate memoria quoque moriatur voluptatis. Bene etiam colligit, hæc pueris, & mulierculis, & servis, & servorum simillimis liberis esse grata : gravi vero homini, & ea, quæ fiunt, iudicio certo ponderanti, probari posse nullo modo. Quamquam intelligo, in nostra civitate inveterasse jam a bonis temporibus, ut splendor ædilitatum ab optimis viris postuletur : itaque & P. Crassus, cum cognomine dives tum copiis, functus est ædilitio maximo munere. Et paullo post L. Crassus cum omnium hominum moderatissimo, Q. Mucio, magnificentissima ædilitate functus est; deinde C. Claudius, Appii F. multi post, Luculli, Hortensius, Silanus; omnes autem P. Lentulus, me consule, vicit superiores. Hunc est Scaurus imitatus. Magnificentissima vero nostri Pompeii munera, secundo consulatu : in quibus omnibus quid mihi placeat, vides. Vitanda tamen est suspicio avaritiæ. Mamerco, homini divitissimo, prætermisso ædilitatis consulatus repulsam attulit. Quare & si postulatur a populo, bonis viris si non desiderantibus, attamen approbantibus, faciendum est, modo pro facultatibus; nos ipsi ut fecimus: & si quando aliqua res major, atque utilior populari largitione acquiritur : ut Orestis nuper prandia in semitis, decumæ nomine, magno honori fuerunt. Ne Marco quidem Scio vitio datum est, quod in caritate asse modicum populo dedit; magna enim se & inveteratâ invidiâ, nec turpi jacturâ, quando erat ædilis, nec maximâ liberavit. Sed honori summo nuper nostro Miloni fuit, quod gladiatoribus emtis reip. causa, quæ salute nostra continebatur, omnes P. Clodii conatus furoresque compressit. Causa igitur largitionis est, si aut necesse est, aut utile. In his autem ipsis mediocritatis regula optima est. L. quidem

dem Philippus Q. filius, magno vir ingenio, in primisque clarus, gloriari solebat, se sine ullo munere adeptum esse omnia, quæ haberentur amplissima; dicebat idem C. Curio. Nobis quoque licet in hoc quodammodo gloriari. Nam pro amplitudine honorum, quos cunctis suffragiis adepti sumus nostro quidem anno, quod contigit eorum nemini, quos modo nominavi, sane exiguus sumus ædilitatis fuit. Atque etiam illæ impensæ meliores, muri, navalia, portus, aquarum ductus, omniæque quæ ad usum reip. pertinent, quamquam quod præsens tanquam in manu datur, jucundius est, tamen hæc in posterum gratiora. Theatra, porticus, nova templa verecundiùs reprehendo propter Pompeium: sed doctissimi non probant. Ut & hic ipse Panætius, quem multum in his libris secutus sum, non interpretatus: & Phalereus Demetrius, qui Periclem, principem Græciæ vituperat, quod tantam pecuniam in præclara illa propylæa conjecerit. Sed de hoc genere toto, in iis libris, quos de repub. scripsi, diligenter est disputatum. Tota igitur ratio talium largitionum, genere vitiosa est, temporibus necessaria; & tum ipsa & ad facultates accommodanda, & mediocritate moderanda est.

Privata liberalitas in quos, & quatenus exercenda.

IN illo autem altero genere largiendi, quod a liberalitate proficiscitur, non uno modo in disparibus causis affecti esse debemus. Alia causa est ejus, qui calamitate premitur, & ejus, qui res meliores quærit, nullis suis rebus adversis. Propensior benignitas esse debet in calamitosos, nisi forte erunt digni calamitate; in iis tamen, qui se adjuvari volent, non ut ne affligantur, sed ut altiorum gradum ascendant, restricti omnino esse nullo modo

modo debemus: sed in deligendis idoneis iudicium
& diligentiam adhibere: nam præclare Ennius,

Benefacta malè locata, malefacta arbitror.

Quod autem tributum est bono viro & grato, in eo cum ex ipso fructus est, tum etiam ex cæteris. Temeritate enim remotâ, gratissima est liberalitas: eoque eam studiosius plerique laudant, quod summi cujusque bonitas commune perfugium est omnium. Danda igitur opera est, ut iis beneficiis quàmplurimos afficiamus, quorum memoria liberis posterisque prodatur, ut iis ingratis esse non liceat: omnes enim immemorem beneficii ode-runt: eamque injuriam in deterrenda liberalitate sibi etiam fieri; eumque, qui faciat, communem hostem tenuiorum putant. Atque hæc benignitas etiam reip. utilis est, redimi è servitute captos, locupletari tenuiores: quod quidem vulgo solitum fieri ab ordine nostro in oratione Crassi scriptum copiosè videmus. Hanc ergo consuetudinem benignitatis largitioni munerum longe antepono. Hæc est gravium hominum, atque magnorum: illa quasi adsentatorum populi, multitudinis levitatem voluptate quasi titillantium. Conveniet autem cum in dando munificum esse, tum in exigendo non acerbum, in omnique re contrahendâ, vendendo, emendo, conducendo, locando, viciniratus & confiniis, æquum & facilem; multa multis de jure suo cedentem: à litibus vero, quantum liceat, & nescio an paullo plus etiam quàm liceat, abhorrentem. Est enim non modo liberale, paullum nonnunquam de suo jure decedere, sed interdum etiam fructuosum. Habenda autem est ratio rei familiaris, quam quidem dilabi sinere flagitiosum est: sed ita ut illiberalitatis avaritiæque absit suspicio. Posse enim liberalitate uti, non spoliantem se patrimonio, nimirum is est pecu-niæ

niæ fructus maximus. Rectè etiam a Theophrasto est laudata hospitalitas: est enim, ut mihi quidem videtur, valde decorum, patere domos hominum illustrium illustribus hospitibus: idque etiam reip. est ornamento, homines externos hoc liberalitatis genere in urbe nostra non egere. Est autem etiam vehementer utile iis, qui honestè posse multum volunt, per hospites apud externos populos valere opibus & gratia. Theophrastus quidem scribit, Cimonem Athenis etiam in suos curiales Laciadas hospitalem fuisse: ita enim instituisse, & villicis imperavisse, ut omnia præberentur, quicumque Laciades in villam suam divertisset.

In altero beneficentia genere, quod operis constat, multum valere jurisprudentiam, longe plurimum eloquentiam.

Quæ autem operâ, non largitione beneficia dantur, hæc tum in universam remp. tum in singulos cives conferuntur; nam in jure cavere, consilio juvare, atque hoc scientiæ genere prodesse quàm plurimis, vehementer & ad opes augendas pertinet, & ad gratiam. Itaque cum multa præclara majorum, tum quod optime constituti juris civilis summo semper in honore fuit cognitio, atque interpretatio: quam quidem ante hanc confusionem temporum in possessione sua principes retinuerunt: nunc ut honores, ut omnes dignitatis gradus, sic hujus scientiæ splendor deletus est: idque eo indignius, quod eo tempore hoc contigit, cum is esset, qui omnes superiores, quibus honore par esset, scientiâ facile vicisset. Hæc igitur opera grata multis, & ad beneficiis obstringendos homines accommodata. Atque huic arti finitima est dicendi gravior facultas, & gratior, & ornatior. Quid enim eloquentiâ præstabilius,

vel

vel admiratione audientium, vel spe indigentium, vel eorum, qui defensi sunt, gratia? huic quoque ergo à majoribus nostris est in toga dignitatis principatus datus. Diserti igitur hominis, & facile laborantis, quòdque in patriis est moribus, multorum causas, & non gravatè, & gratuito defendentis, beneficia, & patrocinia late patent. Admonebat me res, ut hoc quoque loco intermissionem eloquentiæ, ne dicam interitum, deplorarem, ni vereretur, ne de meipso aliquid videretur queri. Sed tamen videmus, quibus extinctis oratoribus, quam in paucis spes, quanto in paucioribus facultas, quam in multis sit audacia. Cum autem omnes non possint, ne multi quidem, aut jurisperiti esse, aut disertis, licet tamen operâ prodesse multis, beneficia petentem, commendantem iudicibus & magistratibus, vigilantem pro re alterius, eos ipsos, qui aut consuluntur, aut defendunt, rogantem: quod qui faciunt, plurimum gratiæ consequuntur, latissimèque eorum manat industria. Jam illud non sunt admonendi, est enim in promptu, ut animum advertant, cum juvare alios velint, ne quos offendant: sæpe enim aut eos lædunt, quos non debent: aut eos, quos non expedit. Si imprudentes, negligentia est: si scientes, temeritatis. Utendum etiam est excusatione adversus eos, quos invitus offendas, quacumque possis, quare id, quod feceris, necesse fuerit, nec aliter facere potueris: cæterisque operis & officiis erit id, quod violatum est, compensandum.

Operam apud tenues & bonos rectius, quàm apud locupletes collocari: nulli tamen nisi iusta in re præstandam esse.

SED cum in hominibus juvandis aut mores spectari, aut fortuna soleat: dictum quidem est proclive, itaque vulgò loquuntur, se in beneficiis collocandis mores hominum, non fortunam sequi.

Honestà

Honestæ oratio est: sed quis est tandem, qui inopis, & optimi viri causæ non anteponat in operâ danda gratiam fortunati & potentis? à quo enim expeditior & celerior remuneratio fore videtur, in eum ferè est voluntas nostra propensior. Sed animadvertendum est diligentius, quæ natura rerum sit: nimirum enim inops ille, si bonus est vir, etiam si referre gratiam non potest, habere certè potest. Commodè autem, quicumq; dixit, pecuniam qui habeat, non reddidisse; qui reddiderit, non habere: gratiam autem & qui retulerit habere, & qui habeat, retulisse. At, qui se locupletes, honoratos, beatos putant, hi ne obligari quidem beneficio volunt; quin etiam beneficium se dedisse arbitrantur, cum ipsi quamvis magnum aliquod acceperint: atque etiam à se postulari, aut exspectare aliquid suspicantur: patrocinio verò tuo se usos, & clientes appellari, mortis instar putant. At vero ille tenuis, cum quidquid factum sit, se spectatum, non fortunam putet, non modo illi, qui est meritis, sed etiam illis, à quibus expectat, eget enim multis, gratum se videri studet, neque vero verbis auget suum munus, si quo fortè fungitur, sed etiam extenuat. Videndumque illud est, quod si opulentum fortunatumque defenderis, in uno illo, aut fortè in liberis ejus manet gratia: sin autem inopem, probum tamen, & modestum, omnes non improbi humiles, quæ magna in populo multitudo est, præsidium sibi paratum vident. Quamobrem melius apud bonos, quam apud fortunatos, beneficium collocari puto. Danda omnino opera est, ut omni generi satisfacere possimus: sed si res in contentionem veniet, nimirum Themistocles est auctor adhibendus, qui cum consuleretur, utrum bono viro pauperi, an minus probato diviti filiam collocaret? Ego vero, inquit, malo virum, qui pecunia egeat, quam pecuniam, quæ viro. Sed corrupti mores, deprava-

depravatique sunt admiratione divitiarum: quarum magnitudo quid ad unumquemque nostrum pertinet? Illum fortasse adjuvat, qui habet: ne id quidem semper. sed fac juvare, potentior sanè sit, honestior vero quomodo? Quod si etiam bonus erit vir, ne impediunt divitiæ, quo minus juvetur, modo ne adjuvent; sitque omne iudicium, non quàm locuples, sed qualis quisque sit. Extremum autem præceptum in beneficiis, operâque danda, est, ne quid contra æquitatem contendas, ne quid per injuriam. Fundamentum enim perpetuæ commendationis & famæ est iustitia, sine qua nihil potest esse laudabile.

Liberalitas in universam multitudinem modicè exercenda; exactiones, non nisi in iusta necessitate.

SED quoniam de eo genere beneficiorum dictum est, quæ ad singulos spectant: deinceps de iis, quæ ad universos, quæque ad remp. pertinent, disputandum est. Eorum autem ipsorum partim ejusmodi sunt, ut ad universos cives pertineant, partim singulos ut attingant, quæ sunt etiam gratiora. Danda est opera omnino, si possit, utrisque, nec minus, ut etiam singulis consulatur: sed ita, ut ea res aut prosit, aut certè non obstit reip. C. Gracchi frumentaria magna largitio; exhauriebat igitur ærarium: modica M. Octavii, & reip. tolerabilis, & plebi necessaria; ergo & civibus, & reipub. salutaris. In primis autem videndum erit ei, qui rempub. administrabit, ut suum quisque teneat, neque de bonis privatorum publice deminutio fiat. perniciosè enim Philippus in tribunatu, cum legem agrariam ferret, quam tamen antiquari facillè passus est, & in eo vehementer se moderatum præbuit: sed cum in agendo multa populariter, tum illud malè: non esse in civitate duo millia hominum, qui rem

G

habe-

haberent. Capitalis oratio, & ad æquationem bonorum pertinens : qua peste quæ potest esse major? Hanc enim ob causam maximè, ut sua tenerent, respub. civitatésque constitutæ sunt. Nam etsi duce naturâ congregabantur homines, tamen spe custodiæ rerum suarum, urbium præsidia quærebant. Danda etiam opera est, ne, quod apud majores nostros sæpe fiebat, propter ærarii tenuitatem, assiduitatémque bellorum, tributum sit conferendum : idque ne eveniat, multo ante erit providendum. Sin quæ necessitas hujus muneris alicui reip. obvenerit, malo enim quam nostræ ominari, neque tamen de nostra, sed de omni respub. disputo, danda erit opera, ut omnes intelligant, si salvi esse velint, necessitati esse parendum. Atque etiam omnes, qui remp. gubernabunt, consulere debebunt, ut earum rerum copia sit, quæ sunt necessariæ ; quarum qualis comparatio fieri soleat, & debeat, non est necesse disputare, est enim in promptu : tantum locus attingendus fuit.

Ad gratiam multitudinis comparandam, maximè valere abstinentiam : contrâque ex invasione alieni, summam existere perniciem.

C Apud autem est in omni procuratione negotii, & muneris publici, ut avaritiæ pellatur etiam minima suspicio. Utinam, inquit C. Pontius Samnis, ad illa tempora me fortuna reservavisset, & tum essem natus, si quando Romani. dona accipere cœpissent! non essem passus diutius eos imperare. Næ illi multa sæcula expectanda fuerunt, modo enim hoc malum in hanc rempub. invasit. itaque facile patior tum potius Pontium fuisse, siquidem in illo tantum fuit roboris. Nondum centum & decem anni sunt, cum de pecuniis reperundis a L. Pisone lata est lex, nulla antea cum fuisset. At vero po-

stea tot leges, & proximæ quæque duriores: tot rei, tot damnati, tantum Italicum bellum propter judiciorum metum excitatum: tanta, sublatis legibus & judiciis, expilatio direptioque sociorum, ut imbecillitate aliorum, non nostra virtute, valeamus. Laudat Africanum Panætius, quod fuerit abstinens. Quidni laudet? Sed in illo alia majora: laus abstinentiæ, non hominis est solum, sed etiam temporum illorum. Omni Macedonum gazâ, quæ fuit maxima, potitus est Paullus: tantam in ærarium pecuniâ invexit, ut unius imperatoris præda finem attulerit tributorum: at hic nihil domum suam intulit præter memoriam nominis sempiternam. Imitatus patrem Africanus, nihil locupletior Carthagine eversâ. Quid? qui ejus collega in censurâ fuit L. Mummius, numquid copiosior, cum copiosissimam urbem funditus sustulisset? Italiam ornare, quàm domum suam maluit: quamquam Italiâ ornatâ, domus ipsa mihi videtur ornatio. Nullum igitur vitium tetrius, ut eo, unde digressa est, referat se oratio, quam avaritia, præsertim in principibus repub. gubernantibus: habere enim quæstui repub. non modo turpe est, sed sceleratum etiam & nefarium. Itaque quod Apollo Pythius oraculum edidit, Spartam nullâ re aliâ, nisi avaritiâ perituram, id videtur non solum Lacedæmoniis, sed & omnibus opulentis populis prædixisse. Nullâ autem re conciliare facilius benevolentiam multitudinis possunt ii, qui reipub. præsent, quàm abstinentiâ & continentiâ. Qui verò se populares volunt, ob eamque causam aut agrariam rem tentant, ut possessores suis sedibus pellantur: aut pecunias creditas debitoribus condonandas putant, ii labefactant fundamenta reipublicæ; concordiam primum, quæ esse non potest, cum aliis adimuntur, aliis condonantur pecuniæ: deinde æquitatem, quæ tollitur omnis, si habere suum cuique non licet.

licet. Id enim est proprium (ut supra dixi) civitatis, atque urbis, ut sit libera & non sollicita suæ rei cujusque custodia. Atque in hac perniciæ reip. ne illam quidem consequuntur, quam putant, gratiam. Nam cui res erepta est, est inimicus: cui data, etiam dissimulat se accipere voluisse: & maximè in pecuniis creditis occultat suum gaudium, ne videatur non fuisse solvendo. At vero ille, qui accipit injuriam; & meminit & præ se fert dolorem suum: nec, si plures sunt ii, quibus improbè datum est, quam illi, quibus injustè ademptum est, idcirco plus etiam valent. Non enim numero hæc judicantur, sed pondere. Quam autem habet æquitatem, ut agrum multis annis, aut etiam sæculis antè possessum, qui nullum habuit, habeat: qui autem habuit, amittat? Ac propter hoc injuriæ genus Lacedæmonii Lysandrum Ephorum expulerunt: Agin regem, quod nunquam antea apud eos acciderat, necaverunt: exque eo tempore tantæ discordiæ secutæ sunt, ut & tyranni existerent, & optimates exterminarentur, & præclarissimè constituta resp. dilaberetur. Nec vero solum ipsa cecidit, sed etiam reliquam Græciam evertit contagionibus malorum, quæ à Lacedæmoniis profectæ manârunt latius. Quid? nostros Gracchos, Ti. Gracchi, summi viri, filios, Africani nepotes, nonne agrariæ contentiones perdiderunt? At vero Aratus Sicyonius jure laudatur, qui, cum ejus civitas quinquaginta annos à tyrannis teneretur, profectus Argis, Sicyonem clandestino introitu urbe est potitus. Cùmque tyrannum Nicoclem improvise oppressisset, sexcentos exules, qui fuerant ejus civitatis locupletissimi, restituit, remque pub. adventu suo liberavit. Sed cum magnam animadverteret in bonis, & possessionibus difficultatem, quod & eos, quos ipse restituerat, quorum bona alii possederant, egere iniquissimum arbitrabatur, & quinquaginta annorum possessiones

nes moveri non nimis æquum putabat propterea quod tam longo spatio multa hereditatibus, multa emtionibus, multa dotibus tenebantur sine injuriâ, judicavit, neque illis adimi, neque his non satisfieri, quorum illa fuerant, oportere. Cum igitur statuisset, opus esse ad eam rem constituendam pecuniâ, Alexandriam se proficisci velle dixit, remq; integram ad reditum suum jussit esse: isque celeriter ad Ptolemæum, suum hospitem venit, qui tum regnabat alter post Alexandriam conditam: cui cum exposuisset, patriam se liberare velle, causamque docuisset, a rege opulento vir summus facile impetravit, ut grandi pecuniâ adjuvaretur. Quam cum Sicyonem attulisset, adhibuit sibi in consilium quindecim principes, cum quibus causas cognovit & eorum, qui aliena tenebant, & eorum, qui sua amiserant: perfecitque æstimandis possessionibus, ut persuaderet aliis, ut pecuniam accipere mallent, possessionibus cederent: aliis, ut commodius putarent numerari sibi quod tanti esset, quam suum recuperare. Ita perfectum est, ut omnes concordiam constitutam sine querelâ discederent. O virum magnum, dignumque qui in nostra repub. natus esset! Sic par est agere cum civibus, non, ut bis jam vidimus, hastam in foro ponere, & bona civium voci subicere præconis. At ille Græcus, id quod fuit sapientis & præstantis viri, omnibus consulendum putavit: eaque est summa ratio & sapientia boni civis, commoda civium non divellere, atque omnes æquitate eadem continere. Habitant gratis in alieno. Quid ita? Ut, cum ego emerim, ædificârim, tuear, impendam, tu, me invito, fruarere meo? Quid est aliud aliis sua eripere, aliis dare aliena? Tabulæ vero novæ quid habent argumenti, nisi ut emas mea pecuniâ fundum, eum tu habeas, ego non habeam pecuniam? Quamobrem ne sit æs alienum quod reipub. noceat, providendum est: quod mul-

tis rationibus caveri potest: non si fuerit, ut locupletes suum perdant, debitores lucrentur alienum. Nec enim ulla res vehementius remp. continet, quam fides: quæ esse nulla potest, nisi erit necessaria solutio rerum creditarum. Nunquam vehementius actum est, quam me consule, ne solveretur. Armis & castris tentata res est ab omni genere hominum & ordine: quibus sic restiti, ut hoc tantum malum de repub. tolleretur. Nunquam nec majus æs alienum fuit, nec melius, nec facilius dissolutum est: fraudandi enim spe sublata, solvendi necessitas consecuta est. At vero hic nunc victor, tum quidem victus, quæ cogitabat, ea perfecit, cum ejus jam nihil interesset. Tanta in eo peccandi libido fuit, ut hoc ipsum eum delectaret peccare, etiam si causa non esset. Ab hoc igitur genere largitionis, ut aliis detur, aliis auferatur, aberunt ii, qui rempub. tuebuntur: in primisque operam dabunt, ut juris & judiciorum æquitatem suam quisque teneat: & neque tenuiores propter humilitatem circumveniantur, neque locupletibus ad sua vel tenenda, vel recuperanda obsit invidia: præterea quibuscunque rebus vel belli, vel domi poterunt, remp. augeant imperio, agris, vectigalibus. Hæc magnorum hominum sunt: hæc apud majores nostros factitata: hæc genera officiorum qui persequuntur, cum summa utilitate reip. magnam ipsi adipiscentur & gratiam & gloriam. In his autem utilitatum præceptis Antipater Tyrius, Stoicus, qui Athenis nuper est mortuus, duo præterita censet esse a Panætio, valitudinis curationem, & pecuniæ. Quas res a summo Philosopho præteritas arbitror, quod essent faciles: sunt certe utiles.

Quibus rationibus valitudo, & res familiaris tum paranda, tum tuenda.

SED valitudo sustentatur notitiâ sui corporis; & observatione, quæ res aut prodesse soleant, aut obesse: & continentia in victu omni, atque cultu, corporis tuendi causâ; & prætermittendis voluptatibus: postremo, arte eorum, quorum ad scientiam hæc pertinent. Res autem familiaris quæri debet iis rebus, à quibus abest turpitudine: conservari autem diligentia, & parsimonia: iisdem etiam rebus augeri. Has res commodissime Xenophon Socraticus persecutus est in eo libro, qui Oeconomicus inscribitur: quem nos, istâ ferè ætate cum essemus, quâ es tu nunc, è Græco in Latinum convertimus.


Quantum genus deliberationis, inter utilia utrum utilius, aut quid utilissimum.

SED utilitatum comparatio, quoniam hic locus erat quartus à Panætio prætermisus, sæpe est necessaria. Nam & corporis comoda cum externis, & externa cum corporis, & ipsa inter se corporis, & externa cum externis comparari solent. Cum externis, corporis hoc modo comparantur: Valere ut malis, quàm dives esse. Cum corporis, externa hoc modo: Dives esse potius, quàm maximis corporis viribus. Ipsa inter se corporis sic: ut bona valitudo voluptati anteponatur, vires celeritati. Externorum autem, ut gloria divitiis, vestigalia urbana rusticis. Ex quo genere comparisonis illud est Catonis senis: à quo cum quæreretur, quid maximè in re familiari expediret? respondit, Bene pascere. Quid secundum? Satis bene pascere. Quid tertium? Malè pascere. Quid quartum? Arare. Et cum ille qui quæsierat, dixisset, Quid fenerari? Tum Cato, Quid hominem, inquit, occidere?

cidere? Ex quo, & multis aliis, intelligi debet utilitatum comparationes fieri solere, recteque hoc adjunctum esse quartum exquirendorum officiorum genus. Sed toto hoc de genere, de quærendâ, de collocandâ pecuniâ, vellem etiam de utendâ, commodiùs à quibusdam optimis viris ad medium Janum sedentibus, quàm ab ullis Philosophis ulla in Schola disputatur. Sunt tamen ea cognoscenda. Pertinent enim ad utilitatem, de qua hoc libro disputatum est. Reliqua deinceps persequemur.



M. TULLII



M. TULLII CICERONIS

D E

OFFICIIS

Ad Marcum Filium

LIBER TERTIUS.



Ublum Scipionem, Marce Fili, eum, qui primus Africanus appellatus sit, dicere solitum scripsit Cato, qui fuit ferè ejus æqualis, numquam se minus otiosum esse, quam cum otiosus; nec minus solum, quam cum solus esset. Magnifica verò vox, & magno viro ac sapiente digna; quæ declarat, illum & in otio de negotiis cogitare, & in solitudine secum loqui solitum; ut neque cessaret umquam, & interdum colloquio alterius non egeret. Itaque duæ res, quæ languorem afferunt ceteris, illum acuebant, otium & solitudo. Vellem nobis hoc idem verè dicere liceret: sed si minus imitatione tantam ingenii præstantiam consequi possumus, voluntate certè proximè accedimus: nam & à repub. forensibusque negotiis, armis impiis vique prohibiti otium persequimur: & ob eam causam, urbe relictâ, rura peragrantes, sæpe soli sumus. Sed nec otium hoc cum Africani otio, nec hæc soli-

solitudo cum illâ comparanda est. Ille enim requiescens à reip. pulcherrimis muneribus, otium sibi sumebat aliquando, & à cœtu hominum frequentiaque interdum, tanquam in portum, se in solitudinem recipiebat. Nostrum autem otium negotii inopiâ, non requiescendi studio, constitutum est. Extincto enim senatu, delerisque judiciis, quid est quod dignum nobis aut in curiâ, aut in foro agere possimus? Itaque qui in maxima celebritate, atque in oculis civium quondam viximus, nunc fugientes conspectum sceleratorum, quibus omnia redundant, abdimus nos, quantum licet, & sæpe soli sumus. Sed quia sic ab hominibus doctis accepimus, non solum ex malis eligere minima oportere, sed etiam excerpere ex his ipsis, si quid inesset boni; propterea & otio fruor non illo quidem, quo debeat is, qui quondam peperisset otium civitati: nec eam solitudinem languere patior, quam mihi adfert necessitas, non voluntas. Quamquam Africanus majorem laudem vel meo judicio assequebatur: nulla enim ejus ingenii monumenta mandata litteris, nullum opus otii, nullum solitudinis munus exstat, ex quo intelligi debet, illum mentis agitatione investigationeque earum rerum, quas cogitando consequebatur, nec otiosum, nec solum umquam fuisse. Nos autem, qui non tantum roboris habemus, ut cogitatione tacitâ à solitudine abstrahamur, ad hanc scribendi operam omne studium curamque convertimus. Itaque plura brevi tempore eversâ, quam multis annis stante rep. scripsimus. Sed cum tota philosophia, mi Cicero, frugifera & fructuosa, nec ulla pars ejus inculta ac deserta sit: tum nullus feracior in ea locus est, nec uberior, quam de officiis, à quibus constanter honesteque vivendi præcepta ducuntur. Quare quamquam à Cratippo nostro, principe hujus memorie philosophorum, hæc te assidue audire, atque accipere

cipere confido, tamen conducere arbitror, talibus aures tuas vocibus undique circumsonare, nec eas, si fieri possit, quidquam aliud audire. Quod cum omnibus est faciendum, qui vitam honestam ingredi cogitant; tum haud scio, an nemini potius, quam tibi. Sustines enim non parvam expectationem imitandæ industriæ nostræ, magnam honorum, nonnullam fortasse nominis. Suscepisti onus præterea grave & Athenarum, & Cratippi: ad quos cum tamquam ad mercaturam bonarum artium sis profectus, inanem redire turpissimum est, dedecorantem & urbis auctoritatem, & magistri. Quare quantum conniti animo potes, quantum labore contendere (si discendi labor est potius, quam voluptas) tantum fac ut efficias: neve committas, ut, cum omnia suppeditata sint à nobis, tute tibi defuisse videare. Sed hæc hæcenus. Multa enim sæpe ad te cohortandi gratiâ scripsimus. Nunc ad reliquam partem propositæ divisionis revertamur.

Reprehensus Panætius, quod tria genera pollicitus, tertium non exolverit. Ab aliis item notatus, quod eam partem homo Stoicus induxerit, in qua diceretur cum honestate pugnare utilitas, atque à Cicerone defensus.

PAnætius igitur, qui sine controversia de officiis accuratissime disputavit, quemque nos, correctione quadam adhibitâ, potissimum secuti sumus, tribus generibus propositis, in quibus deliberare homines, & consultare de officio solerent: uno, cum dubitarent, honestumne id esset, de quo ageretur, an turpe: altero, utilene an inutile: tertio, si id, quod speciem haberet honesti, pugnaret cum eo, quod utile videretur, quomodo ea discerni oporteret: de duobus generibus primis tribus libris explicavit: de tertio autem genere deinceps se scripsit dicturum, nec id exsolvit, quod promiserat. Quod eo magis miror, quia scriptum

à dis-

à discipulo ejus Posidonio est, triginta annis vixisse Panætium posteaquam eos libros edidisset. Quem locum miror à Posidonio breviter esse tactum in quibusdam commentariis ; præsertim cum scribat, nullum esse locum in tota Philosophia tam necessarium. Minimè vero assentior iis, qui negant eum locum à Panætio prætermisum, sed consultò relictum, nec omnino scribendum fuisse : quia nunquam posset utilitas cum honestate pugnare : de quo alterum potest habere dubitationem, adhibendùmne fuerit hoc genus, quod in divisione Panætii tertium est, an plane omittendum : alterum dubitari non potest, quin à Panætio susceptum sit, sed relictum. Nam qui è divisione tripartitâ duas partes absolverit, huic necesse est restare tertiam. Præterea in extremo libro de hac parte pollicetur se deinceps esse dicturum. Accedit eodem testis locuples, Posidonius, qui etiam scribit in quadam epistolâ, Publium Rutilium Rufum dicere solere, qui Panætium audierat, ut nemo pictor esset inventus, qui Coæ Veneris eam partem, quam Apelles inchoatam reliquisset, absolveret (oris enim pulchritudo reliqui corporis imitandi spem auferbat :) sic ea, quæ Panætius prætermisisset, & non perfecisset, propter eorum, quæ perfecisset, præstantiam, neminem esse perfectum. Quamobrem de judicio Panætii dubitari non potest : rectène autem hanc tertiam partem ad exquirendum officium adjunxerit, an secus, de eo fortasse dubitari potest. Nam sive honestum solum bonum est, ut Stoicis placet : sive quod honestum est, id ita summum bonum est, quemadmodum Peripateticis vestris videtur, ut omnia ex altera parte collocata, vix minimi momenti instar habeant : dubitandum non est, quin nunquam possit utilitas cum honestate contendere. Itaque accepimus, Socratem exsecrari solitum eos, qui primum hæc, natura cohærentia, opinione distraxissent.

issent. Cui quidem ita sunt Stoici assensu, ut quidquid honestum esset, id utile esse censerent: nec utile quidquam, quod non honestum. Quod si is esset Panætius, qui virtutem propterea colendam diceret, quod ea efficiens utilitatis esset; ut ii, qui res expetendas vel voluptate, vel indolentiâ metiuntur: liceret ei dicere, utilitatem aliquando cum honestate pugnare. Sed, cum sit is, qui id solum bonum iudicet, quod honestum sit: quæ autem huic repugnent specie quadam utilitatis, eorum neque accessione meliorem vitam fieri, nec decessione pejorem: non videtur ejusmodi debuisse deliberationem introducere, in qua, quod utile videretur, cum eo, quod honestum est, compararetur. Etenim quod summum bonum à Stoicis dicitur, convenienter naturæ vivere, id habet hanc (ut opinor) sententiam, cum virtute congruere semper: cetera autem, quæ secundum naturam essent, ita legere, si ea virtute non repugnarent. Quod cum ita sit, putant quidam, hanc comparisonem non rectè introductam, nec omnino de eo genere quidquam præcipiendum fuisse. Atque illud quidem honestum, quod proprie verèque dicitur, id in sapientibus est solis, neque à virtute divelli umquam potest; in iis autem, in quibus sapientia perfecta non est, ipsum illud quidem perfectum honestum nullo modo; similitudines honesti esse possunt. Hæc enim omnia officia, de quibus his libris disputamus, media Stoici appellant. Ea communia sunt & latè patent: quæ & ingenii bonitate multi assequuntur, & progressionem discendi. Illud autem officium, quod rectum iidem appellant, perfectum atque absolutum est, &, ut iidem dicunt, omnes numeros habet; nec, præter sapientem, cadere in quemquam potest. Cum autem aliquid actum est, in quo media officia compareant, id cumulatè videtur esse perfectum, proptereaque vulgus quid absit à perfecto

non

non ferè intelligit: quatenus autem intelligit, nihil putat prætermisſum. Quod item in poematis, & picturis uſu evenit, in aliisque compluribus, ut delectentur imperiti, laudentque ea, quæ laudanda non ſint, ob eam, credo, cauſam, quod inſit in his aliquid probi, quod capiat ignaros, qui iidem, quid in unaquaque re vitii ſit, nequeant judicare. Itaque cum ſunt docti à peritis, facile deſiſtunt ſententiâ. Hæc igitur officia, de quibus his libris diſſerimus, quaſi ſecunda quædam honeſta eſſe dicunt, non ſapientum modo propria, ſed cum omni hominum genere communia. Itaque his omnes, in quibus eſt virtutis indoles, commoventur. Nec vero cum duo Decii, aut duo Scipiones, fortes viri commemorantur, aut cum Fabricius Ariſtideſve juſti nominantur; aut ab illis fortitudinis, aut ab his juſtitia, tanquam à ſapientibus, petitur exemplum: nemo enim horum ſic ſapiens eſt, ut ſapientem volumus intelligi. Nec ii, qui ſapientes habiti & nominati, M. Cato & C. Lælius, ſapientes fuerunt; ne illi quidem ſeptem: ſed ex mediorum officiorum frequentia ſimilitudinem quandam gerebant ſpeciẽmque ſapientum. Quocirca nec id, quod verè honeſtum eſt, fas eſt cum utilitatis repugnantia comparari: nec id quidem, quod communiter appellamus honeſtum, quod colitur ab iis, qui bonos ſe viros haberi volunt, cum emolumentis umquam eſt comparandum: tamque id honeſtum, quod in noſtram intelligentiam cadit, tuendum conſervandumque eſt nobis, quam id, quod propriè dicitur, verèque eſt honeſtum, ſapientibus. Aliter enim teneri non poteſt, ſi qua eſt ad virtutem facta progreſſio. Sed hæc quidem de iis, qui conſervatione officiorum exiſtimantur boni. Qui autem omnia meriuntur emolumentis & commodis, neque ea volunt præponderari honeſtate, hi ſolent in deliberando honeſtum cum eo, quod utile putant, comparare; boni

boni viri non solent. Itaque existimo Panætium, cum dixerit, homines solere in hac comparatione dubitare, hoc ipsum sensisse, quòd dixerit, solere modo, non etiam oportere : etenim non modo plurisputare quod utile videatur, quam quod honestum : sed hæc etiam inter se comparare, & in his addubitare, turpissimum est. Quid est ergo, quod nonnumquam dubitationem afferre soleat, considerandumque videatur ? Credo, si quando dubitatio accidit, quale sit id, de quo consideretur. Sæpe enim tempore fit, ut, quod plerumque turpe haberi soleat, inveniatur non esse turpe. Exempli causa, ponatur aliquid, quod pateat latius. Quòd potest majus esse scelus, quam non modo hominem, sed etiam familiarem hominem occidere ? Num igitur se adstrinxit scelere, si qui tyrannum occidit, quamvis familiarem ? Populo quidem Romano non videtur, qui ex omnibus præclaris factis illud pulcherrimum existimat. Vicit ergo utilitas honestatem : imò vero honestas utilitatem secuta est.

Formula præscripta, nè quando nos falsa utilitatis species ab honestate abducat : ut justitiam, vel solum, vel maximum bonum statuamus ; injustitiam malorum maximum : nihilque ad privatum commodum, sed ad communem societatem referantur omnia.

ITaque, ut sine ullo errore dijudicare possimus, si quando cum illo, quod honestum intelligimus, pugnare id videbitur, quod appellamus utile, formula quædam constituenda est ; quam si sequemur in comparatione rerum, ab officio numquam recedemus. Erit autem hæc formula, Stoicorum rationi disciplinæque maxime consentanea : quam quidem his libris propterea sequimur, quod, quamquam à veteribus Academicis, & à Peripateticis vestris, qui quondam iidem erant, qui Academici, quæ honesta

honestæ sunt, anteponantur iis, quæ videntur utilia: tamen splendidius hæc ab eis differuntur, quibus quidquid honestum est, idem utile videtur: nec utile quidquam, quod non honestum: quam ab iis, quibus honestum aliquid non utile, aut utile non honestum. Nobis autem nostra Academia magnam licentiam dat, ut quodcumque maxime probabile occurrat, id nostro jure liceat defendere. Sed redeo ad formulam. Detrahære igitur aliquid alteri, & hominem hominis incommodo suum augere commodum, magis est contra naturam, quam mors, quam paupertas, quam dolor, quam cetera, quæ possunt aut corpori accidere, aut rebus externis. Nam principio tollit convictum humanum, & societatem: si enim sic erimus affecti, ut propter suum quisque emolumentum spoliæ, aut violet alterum, disrumpi necesse est eam, quæ maxime est secundum naturam, humani generis societatem. Ut, si unumquodque membrum sensum hunc haberet, ut posse putaret se valere, si proximi membri valitudinem ad se traduxisset, debilitari & interire totum corpus necesse est: sic, si unusquisque nostrum rapiat ad se commoda aliorum, detrahâtque quod cuique possit, emolumentum sui gratiâ, societas hominum & communitas evertatur necesse est. Nam sibi ut quisque malit, quod ad usum vitæ pertineat, quam alteri acquirere, concessum est, non repugnante naturâ. Illud natura non patitur, ut aliorum spoliis nostras facultates, copias, opes augeamus. Neque vero hoc solum naturâ, id est, jure gentium, sed etiam legibus populorum, quibus in singulis civitatibus resp. continetur, eodem modo constitutum est, ut non liceat sui commodi causâ nocere alteri: hoc enim spectant leges, hoc volunt; incolumem esse civium conjunctionem: quam qui dirimunt, eos morte, exsilio, vinclis, damno coercent. Atque hoc multo magis exigit ipsa naturæ ratio,

ratio, quæ est lex divina, & humana : cui parere qui velit, omnes autem parebunt, qui secundum naturam volent vivere, numquam committet, ut alienum appetat, & id, quod alteri detraxerit, sibi assumat. Etenim multo magis est secundum naturam excelsitas animi & magnitudo, itémque comitas, justitia, liberalitas, quàm voluptas, quàm vita, quàm divitiæ : quæ quidem contemnere, & pro nihilo ducere comparantem cum utilitate communi, magni animi & excelsi est. Detrahere autem alteri sui commodi causa, magis est contra naturam, quam mors, quam dolor, quam cetera generis ejusdem : itémque magis est secundum naturam, pro omnibus gentibus, si fieri possit, conservandis, aut juvandis, maximos labores molestiasque suscipere, imitantem Herculem illum, quem hominum fama, beneficiorum memor, in concilium cœlestium collocavit : quàm vivere in solitudine, non modo sine ullis molestiis, sed etiam in maximis voluptatibus, abundanter omnibus copiis ; ut excellas etiam pulchritudine & viribus. Quocirca optimo quisque & splendidissimo ingenio longè illam vitam huic anteponebat. Ex quo efficitur, hominem naturæ obedientem homini nocere non posse. Deinde, qui alterum violat, ut ipse aliquid commodi consequatur, aut nihil se existimat contra naturam facere ; aut magis fugiendam censet mortem, paupertatem, dolorem, amissionem etiam liberorum, propinquorum, amicorum, quàm facere culpam injuriam, si nihil existimat contra naturam fieri hominibus violandis : quid cum eo differas, qui omnino hominem ex homine tollat ? si fugiendum id quidem censet, sed & multo illa pejora, mortem, paupertatem, dolorem, errat in eo, quod ullum aut corporis aut fortunæ vitium animi vitiis gravius existimat. Ergo unum debet esse omnibus propositum, ut eadem sit utilitas uni-

uscujusque & universorum : quam si ad se quisque rapiat, dissolvetur omnis humana consortio. Atque si etiam hoc natura præscribit, ut homo homini, quicumque sit, ob eam ipsam causam, quod is homo sit, consultum velit; necesse est secundum eandem naturam omnium utilitatem esse communem. Quod si ita est; unâ continemur omnes, & eâdem lege naturæ : idque ipsum si ita est, certè violare alterum lege naturæ prohibemur. Verum autem primum; verum igitur & extremum. Nam illud quidem absurdum est, quod quidam dicunt, parenti se, aut fratri nihil detracturos commodi sui causâ: aliam rationem esse civium reliquorum: hi sibi nihil juris, & nullam societatem, communis utilitatis causâ, statuunt esse cum civibus: quæ sententia omnem societatem distrahit civitatis. Qui autem civium rationem dicunt habendam, externorum negant, hi dirimunt communem humani generis societatem: qua sublatâ, beneficentia, liberalitas, bonitas, justitia funditus tollitur: quæ qui tollunt, etiam adversus deos immortales impii judicandi sunt, ab iis enim constitutam inter homines societatem evertunt: cujus societatis arctissimum vinculum est, magis arbitrari esse contra naturam, hominem homini detrahere sui commodi causâ, quam omnia incommoda subire vel externa, vel corporis, vel etiam ipsius animi, quæ non vacent justitiâ. Hæc enim una virtus, omnium est domina, & regina virtutum. Forsitan quispiam dixerit: Nónne igitur sapiens, si fame ipse conficiatur, abstulerit cibum alteri, homini ad nullam rem utili? Mínime veró. Non enim mihi est vita mea utilior, quam animi talis affectio, neminem ut violentem commodi mei gratiâ. Quid? si Phalarim, crudelem tyrannum, & immanem, vir bonus, ne ipse frigore conficiatur, vestitu spoliare possit, nónne faciat? Hæc ad judicandum sunt facillima. Nam, si quid

quid ab homine ad nullam partem utili tuæ utilitatis causâ detraxeris, inhumanè feceris, contrâque naturæ legem: sin autem is tu sis, qui multam utilitatem reip. atque hominum societati, si in vitâ remaneas, afferre possis: si quid ob eam causam alteri detraxeris, non sit reprehendendum: sin autem id non sit ejusmodi, suum cuique incommodum ferendum est potius, quam de alterius commodis detrahendum. Non igitur magis est contra naturam morbus, aut egestas, aut quid hujusmodi, quam detractio, aut appetitio alieni. Sed communis utilitatis derelictio contra naturam est, est enim injusta: itaque lex ipsa naturæ, quæ utilitatem hominum conservat & continet, decernit profectò, ut ab homine inertî atque inutili ad sapientem, bonum fortémque virum transferantur res ad vivendum necessaria: qui si occiderit, multum de communi utilitate detraxerit: modò hoc ita faciat, ut ne ipse de se bene existimans, seseque diligens, hanc causam habeat ad injuriam. Ita semper officio fungetur, utilitati consulens hominum, & ei, quam sæpe commemoro, humanæ societati. Nam, quod ad Phalarim attinet, perfacile judicium est: nulla enim nobis societas cum tyrannis, sed potius summa distractio est: neque est contra naturam, spoliare eum, si possis, quem honestum est necare: atque hoc omne genus pestiferum atque impium ex hominum communitate exterminandum est. Etenim, ut membra quædam amputantur, si & ipsa sanguine, & tamquam spiritu carere cœperunt, & nocent reliquis partibus corporis: sic ista in figurâ hominis feritas, & immanitas belluæ à communi tamquam humanitate corporis segreganda est. Hujus generis sunt quæstiones omnes eæ, in quibus ex tempore officium exquiritur. Ejusmodi igitur credo res Panætium persecuturum fuisse, nisi aliqui casus, aut occupatio consilium.

ejus peremisset : ad quas ipsas consultationes ex superioribus libris satis multa præcepta sunt, quibus perspicui possit, quid sit propter turpitudinem fugiendum : quid sit id, quod idcirco fugiendum non sit, quia omnino turpe non est. Sed quoniam operi inchoato & prope jam absoluto, tanquam fastigium imponimus : ut geometræ solent non omnia docere, sed postulare, ut quædam sibi concedantur, quo facilius, quæ volunt, explicent : sic ego à te postulo, mi Cicero, ut mihi concedas, si potes, nihil, præter id quod honestum sit, propter se esse expetendum : sin hoc non licet per Cratipum, at illud certè dabis, quod honestum sit, id esse maximè propter se expetendum. Mihi utrumvis satis est : & cum hoc, tum illud probabilius videtur, nec præterea quidquam probabile. Ac primum Panætius in hoc defendendus est, quod non utilia cum honestis pugnare aliquando posse dixerit (neque enim ei fas erat) sed ea, quæ videntur utilia. Nihil vero utile, quod non idem honestum : nihil honestum, quod non idem utile sit, sæpe testatur : negatque ullam pestem majorem in vitam hominum invasisse, quam eorum opinionem, qui ista distraxerint. Itaque non ut aliquando anteponeremus utilia honestis, sed ut ea sine errore dijudicaremus, si quando incidissent, induxit eam, quæ videretur esse, non quæ esset, repugnantiam. Hanc igitur partem relictam explebimus, nullius adminiculis, sed (ut dicitur) Marte nostro : neque enim quidquam de hac parte post Panætium explicatum est, quod quidem mihi probaretur de iis quæ in manus meas venerunt.

Ne qua nos commoditas quantavis, cum summa etiam impunitate conjuncta permoveat, ut vel tantillum ab honesto recedamus, sine quo nihil non perniciosum.

CUM igitur aliqua species utilitatis objecta est, commoveri necesse est. Sed si, cum animum
 atten-

attenderis, turpitudinem videas adjunctam ei rei quæ speciem utilitatis attulerit, tunc non utilitas relinquenda est, sed intelligendum, ubi turpitudinis sit, ibi utilitatem esse non posse. Quod si nihil est tam contra naturam quàm turpitudinis, (recta enim & convenientia, & constantia natura desiderat, aspernaturque contraria) nihilque tam secundum naturam, quam utilitas: certè in eadem re utilitas & turpitudinis esse non potest. Itémque si ad honestatem nati sumus, eaque aut sola expendenda est, (ut Zenoni visum est) aut certe omni pondere gravior habenda, quam reliqua omnia; quod Aristoteli placet; necesse est, quod honestum sit, id esse aut solum, aut summum bonum: quod autem bonum, id certè utile: ita quidquid honestum, id utile: quare error hominum non proborum, cum aliquid, quod utile visum est, arripuit, id continuo secernit ab honesto. Hinc sicæ, hinc venena, hinc falsa testamenta nascuntur: hinc furta, peculatus, expilationes, direptionesque sociorum & civium: hinc opum nimiarum potentia non ferenda: postremo etiam in liberis civitatibus regnandi existunt cupiditates, quibus nihil nec tætrius, nec foedius excogitari potest: emolumentum enim rerum fallacibus judiciis vident; pœnam non dico legum, quas sæpe per-rumpunt, sed ipsius turpitudinis, quæ acerbissima est, non vident. Quamobrem hoc quidem deliberantium genus pellatur è medio (est enim totum sceleratum, & impium) qui deliberant, utrum id sequantur, quod honestum esse videant, an se scientes scelere contaminent: in ipsa enim dubitatione facinus inest, etiam si ad id non pervenerint. Ergo ea deliberanda omnino non sunt, in quibus est turpis ipsa deliberatio, atque etiam ex omni deliberatione celandi & occultandi spes opinioque removenda est: satis enim nobis (si modo in philosophia aliquid profecimus) persuasum esse

debet, si omnes deos hominésque celare possimus, nihil tamen avarè, nihil injuste, nihil libidinose, nihil incontinenter esse faciendum. Hinc ille Gyges inducitur à Platone: qui, cum terra discessisset magnis quibusdam imbribus, in illum hiatum descendit. æneúmque equum, (ut ferunt fabulæ) animadvertit, cujus in lateribus fores essent: quibus apertis mortui vidit corpus magnitudine inusitatâ, annulúmque aureum in digito: quem, ut detraxit, ipse induit: (erat autem regius pastor) tum in concilium pastorum se recepit: ibi cum palam ejus annuli ad palmam converterat, à nullo videbatur, ipse autem omnia videbat. idem rursus videbatur, cum in locum annulum inverterat. Itaque hac opportunitate annuli usus reginæ stuprum intulit: eaque adjutrice regem dominum interemit, sustulit quos obistere arbitrabatur; nec in his eum quisquam facinoribus potuit videre: sic repente annuli beneficio rex exortus est Lydiæ. Hunc igitur ipsum annulum si habeat sapiens, nihil plus sibi licere putet peccare, quam si non haberet: honesta enim bonis viris, non occulta quærentur. Atque hoc loco philosophi quidam, minimè mali illi quidem, sed non satis acuti, fictam & commentitiam fabulam dicunt prolatam à Platone: quasi vero ille aut factum id esse, aut fieri potuisse defendat. Hæc est vis hujus annuli, & hujus exempli: si nemo sciturus, nemo ne suspicaturus quidem sit, cum aliquid divitiarum, potentiæ, dominationis, libidinis causâ feceris, si id diis, hominibusque futurum sit semper ignotum, sisne facturus? negant id fieri posse: quamquam potest id quidem: sed quæro, quod negant posse, id si posset, quidnam facerent? Urgent rusticè sane. negant enim posse, & in eo perstant. Hoc verbum quid valeat, non vident. Cùm enim quærimus, si possint celare, quid facturi sint: non quærimus, possintne celare; sed tamquam tormenta quædam

adhibemus, ut, si responderint se impunitate propositâ facturos quod expediat, facinorosos se esse fateantur : si negent, omnia turpia per se ipsa fugienda esse concedant. Sed jam ad propositum revertamur. Incidunt sæpe multæ causæ, quæ conturbent animos utilitatis specie : non cum hoc deliberetur, reliquendane sit honestas propter utilitatis magnitudinem : (nam id quidem improbum est) sed illud, possitne id, quod utile videatur, fieri non turpiter. Cum Collatino collegæ Brutus imperium abrogabat, poterat videri facere id injustè : fuerat enim in regibus expellendis socius Bruti, consiliorum etiam adjutor : cum autem consilium hoc principes cepissent, cognationem Superbi, noménque Tarquiniorum, & memoriam regni esse tollendam : quod erat utile, patriæ consulerè, id erat ita honestum, ut etiam ipsi Collatino placere deberet. Itaque utilitas valuit propter honestatem, sine qua ne utilitas quidem esse potuisset. At in eo rege, qui urbem condidit, non ita : species enim utilitatis animum pepulit ejus : cui cum visum esset utilius, solum quàm cum altero regnare, fratrem interemit. Omisit hic & pietatem, & humanitatem, ut id, quod utile videbatur, neque erat, assequi posset : & tamen muri causam opposuit, speciem honestatis neque probabilem, neque satis idoneam. Peccavit igitur, pace vel Quirini, vel Romuli dixerim.

*Propriis commodis quatenus cuique inservire
permissum.*

N E C tamen nostræ nobis utilitates omittendæ sunt, aliisque tradendæ, cum his ipsi egeamus : sed suæ cuique utilitati, quod sine alterius injuriâ fiat, serviendum est. Scite Chrysippus, ut multa : Qui stadium, inquit, currit, eniti & contendere debet, quam maxime possit, ut vincat :

supplantare eum, quicum certet, aut manu depellere, nullo modo debet. sic in vita sibi quemque petere, quod pertineat ad usum, non iniquum est: alteri deripere jus non est.

Formula in amicitiiis, ut semper honestati cedat benevolentia amici: fides præstetur, etiam maximis incommodis propositis. Communibus in rebus tantum charitati amicorum tribuatur, quantum religio, & honestatio patitur. Ceterum nè qua res turpis aut petatur ab amico, aut præstetur petenti.

Maximè autem perturbantur officia in amicitiiis: quibus & non tribuere, quod rectè possis, & tribuere, quod non sit æquum, contra officium est. Sed hujus generis totius breve & non difficile præceptum est. Quæ enim videntur utilia, honores, divitiæ, voluptates, cetera generis ejusdem, hæc amicitiaë numquam anteponenda sunt. At neque contra remp. neque contra iusjurandum, ac fidem, amici causâ vir bonus faciet; ne si iudex quidem erit de ipso amico: ponit enim personam amici, cum induit iudicis. Tantum dabit amicitiaë, ut veram amici causam esse malit, ut orandæ liti tempus, quoad per leges liceat, accommodet. Cum vero jurato sententia dicenda sit, meminerit, deum se adhibere testem, id est (ut arbitror) mentem suam, qua nihil homini dedit deus ipse divinius. Itaque præclarum à maioribus accepimus morem rogandi iudicis, si eum teneremus, quæ salvâ fide facere possit. Hæc rogatio ad eâ pertinet, quæ paullò antè dixi honestè amico à iudice posse concedi. nam, si omnia faciendâ sint, quæ amici velint, non amicitiaë tales, sed coniurationes putandæ sunt. Loquor autem de communibus amicitiiis: nam in sapientibus viris perfectisque nihil potest esse tale. Dæmonem & Phintiam Pythagoreos ferunt hoc animo inter se fuisse,

fuisse; ut, cum eorum alteri Dionysius tyrannus diem necis destinavisset, & is, qui morti addictus esset, paucos sibi dies commendandorum suorum causâ postulavisset, vas factus est alter ejus sistendi, ut, si ille non revertisset, moriendum esset ipsi: qui cum ad diem se recepisset, admiratus eorum fidem tyrannis, petivit, ut se ad amicitiam tertium adscriberent. Cum igitur id, quod utile videtur in amicitia, cum eo, quod honestum est, comparatur, jaceat utilitatis species, valeat honestas: cum autem in amicitia, quæ honesta non sunt, postulabuntur, religio & fides anteponantur amicitiae: sic habebitur is, quem exquirimus, delectus officii.

In publicis consultationibus semper honestum falsâ utilitate potius habendum, neque consilium ullum videri utile oportere, quod cum honesto pugnat. Atque hujus rei utramque in partem exempla.

SED utilitatis specie in repub. sæpissime peccatur, ut in Corinthi disturbance nostrî. Durius etiam Athenienses, qui sciverunt, ut Æginetis, qui classe valebant, pollices præciderentur: hoc visum est utile; nimis enim imminabat, propter propinquitatem, Ægina Piræo: sed nihil quod crudele, utile: est enim hominum naturæ, quam sequi debemus, maximè inimica crudelitas. Malè etiam, qui peregrinos urbibus uti prohibent, eosque exterminant; ut Pennus apud patres nostros, Papius nuper. Nam esse pro cive, qui civis non sit, rectum est non licere: quam tulerunt legem sapientissimi consules, Crassus & Scævola: usu vero urbis prohibere peregrinos, sanè inhumanum est. Illa præclara, in quibus publicæ utilitatis species præ honestate contemnitur. Plena exemplorum est nostra respub. cum sæpe, tum maximè bello Punico secundo: quæ Cannensi
cala-

calamitate acceptâ, majores animos habuit, quam umquam rebus secundis : nulla timoris significatio, nulla mentio pacis : tanta vis est honesti, ut speciem utilitatis obscurer. Athenienses cum Persarum impetum nullo modo possent sustinere, statueréntque ut urbe relicta conjugibus & liberis Trœzene depositis, naves conscenderent, libertatémque Græciæ Classe defenderent, Cyrsilum quendam, suadentem ut in urbe manerent, Xerxémque reciperent, lapidibus obruerunt. Atque ille utilitatem sequi videbatur : sed ea nulla erat repugnante honestate. Themistocles post victoriam ejus belli, quod cum Persis fuit, dixit in concione, se habere consilium reip. salutare, sed id sciri opus non esse : postulavit, ut aliquem populus daret, quicum communicaret : datus est Aristides. Huic ille, classem Lacedæmoniorum, quæ subducta esset ad Gytheum, clam incendi posse : quo facto frangi Lacedæmoniorum opes necesse esset. Quod Aristides cum audisset, in concionem magnâ expectatione venit : dixitque, perutile esse consilium, quod Themistocles afferret, sed minimè honestum. Itaque Athenienses, quod honestum non esset, id ne utile quidem putaverunt : totâque eam rem, quam ne audierant quidem, auctore Aristide repudiaverunt. Melius hi, quam nos, qui piratas immunes, socios vectigales habemus. Maneat ergo, quod turpe sit, id nunquam esse utile, ne tum quidem, cum id, quod esse utile putes, adipiscare. Hoc enim ipsum utile putare, quod turpe sit, calamitosum est.

In contractibus communibus quæ formula honesti & utilis. Fingit autem speciem quandam, jurisconsultorum more, deque ea duos Stoicos diversa sentientes : quorum alter ad Stoicam rationem omnia fert, alter ex hominum consuetudine & jure civili moderatur.

SED incidunt (ut supra dixi) sæpe causæ, cum repugnare utilitas honestati videatur, ut animadvertendum sit, repugnèrne planè, an possit cum honestate conjungi. Ejus generis hæ sunt quæstiones : Si (exempli gratiâ) vir bonus Alexandriâ Rhodum magnum frumenti numerum advexerit in Rhodiorum inopiâ & fame, summâque annonæ caritate : si idem sciat, complures mercatores Alexandriâ solvisse, navésque in cursu frumento onustas, petentes Rhodum, viderit ; dicturúsne sit id Rhodiis, an silentio suum quam plurimo venditurus ? Sapiensem & bonum virum fingimus : de ejus deliberatione & consultatione quærimus, qui celaturus Rhodios non sit, si id turpe judicer, sed dubitet, an turpe non sit. In hujusmodi causis aliud Diogeni Babylonio videri solet, magno & gravi Stoico, aliud Antipatro, discipulo ejus, homini acutissimo. Antipatro omnia patefacienda, ut ne quid omnino, quod venditor nòrit, emtor ignoret : Diogeni venditorem, quatenus jure civili constitutum sit, dicere vitia oportere, cetera sine insidiis agere, & quoniam vendat, velle quam optimè vendere. Advexi, exposui, vendo meum non pluris, quam ceteri, fortasse etiam minoris, cum major est copia : cui fit injuria ? Exoritur Antipatri ratio ex alterâ parte : Quid ais ? tu cum hominibus consulere debeas, & servire humanæ societati, eâque lege natus sis, & ea habeas principia naturæ, quibus parere, & quæ sequi debeas, ut utilitas tua communis utilitas sit, vicissimque communis utilitas tua sit ; celabis homines

mines, quid iis adsit commoditatis & copiae? Respondebit Diogenes fortasse sic. Aliud est celare, aliud tacere: neque ego nunc te celo, si tibi non dico, quæ natura deorum sit, quis sit finis bonorum, quæ tibi plus prodesse cognita, quam tritici utilitas: sed non quidquid tibi audire utile est, id mihi dicere necesse est. Immo vero (inquiet ille) necesse est, si quidem meministi esse inter homines naturam conjunctam societatem. Memini, inquiet ille, sed num ista societas talis est, ut nihil suum cujusque sit? quod si ita est, ne vendendum quidem quidquam est, sed donandum. Vides in hac tota disceptatione non illud dici, Quamvis hoc turpe sit, tamen, quoniam expedit, faciam: sed ita expedire, ut turpe non sit: ex alterâ autem parte; eâ re, quia turpe sit, non esse faciendum. Vendat ædes vir bonus propter aliqua vitia, quæ ipse nôrit, ceteri ignorent: pestilentes sint, & habeantur salubres: ignoretur in omnibus cubiculis apparere serpentes: male materiata, ruinosæ: sed hoc præter dominum nemo sciat: quæro, si hoc emtoribus venditor non dixerit, ædesque vendiderit pluris multo, quam se venditurum putârit, num id injuste, an improbe fecerit? Ille vero, inquit Antipater. Quid enim est aliud, erranti viam non monstrare (quod Athenis execrationibus publicis sanctum est) si hoc non est, emtorem pati ruere, & per errorem in maximam fraudem incurrere? plus etiam est, quam viam non monstrare: nam est scientem in errorem alterum inducere. Diogenes contra: Num te emere coegit, qui ne hortatus quidem est? ille quod non placebat proscripsit: tu quod placebat emisti. Quod si qui proscribunt, villam bonam, benèque ædificatam, non existimantur fefellisse, etiam si illa nec bona est, nec ædificata ratione; multo minus, qui domum non laudârunt. Ubi enim iudicium emtoris est, ibi fraus venditoris quæ potest esse? sin
autem

autem dictum non omne præstandum est; quod dictum non est, id præstandum putas? Quid vero est stultius, quam venditorem, ejus rei, quam vendat, vitia narrare? Quid autem tam absurdum, quam si domini jussu ita præco prædicet? Domum pestilentem vendo. Sic ergo in quibusdam causis dubiis ex alterâ parte defenditur honestas, ex altera ita de utilitate dicitur, ut id, quod utile videatur, non modo facere honestum sit, sed etiam non facere turpe. Hæc est illa, quæ videtur utilium fieri cum honestis sæpe dissensio.

Superiori altercationi Philosophorum suam interponit sententiam, omnino viro bono neque simulandum esse quicquam, neque dissimulandum sui commodi causâ, etiamsi mos, legesque civiles quadam reticeri non vetent.

QUÆ adjudicanda sunt: non enim, ut quæreremus, exposuimus, sed ut explicaremus. Non igitur videtur nec frumentarius ille Rhodios, nec hic ædium venditor celare emtores debuisse. Neque enim id est celare, quidquid reticeas: sed cum, quod tu scias, id ignorare emolumentum tui causâ velis eos, quorum intersit id scire. Hoc autem celandi genus quale sit, & cujus hominis, quis non videt? certe non aperti, non simplicis, non ingenui, non justii, non viri boni: versuti potius, obscuri, astuti, fallacis, malitiosi, callidi, veteratoris, vafri, hæc tot, & alia plura nonne inutile est vitiorum subire nomina? Quod si vituperandi sunt qui reticuerunt, quid de iis existimandum est, qui orationis vanitatem adhiberunt? C. Canius, eques Romanus, nec infacetis, & satis litteratus, cum se Syracusas oriandi, ut ipse dicere solebat, non negotiandi causâ, contulisset, distitabat, se hortulos aliquos velle emere, quo invitare amicos, & ubi se oblectare sine
inter-

interpellatoribus posset. Quod cum percreebuisset, Pythius ei quidam, qui argentariam faceret Syra-
sis, venales quidem se hortos non habere, sed li-
cere uti Canio, si vellet, ut suis; & simul ad cœ-
nam hominem in hortos invitavit in posterum
diem. Cum ille promississet, tum Pythius, qui esset,
ut argentarius, apud omnes ordines graciosus, pis-
catores ad se convocavit, & ab his petivit, ut ante
suos hortulos postridiè piscarentur, dixitque, quid
eos facere vellet. Ad cœnam tempore venit Ca-
nius: opiparè à Pythio apparatus convivium:
cymbarum ante oculos multitudo, pro se quisque
quod ceperat afferebat, ante pedes Pythii pisces
abjiciebantur. Tum Canius, Quæso, inquit,
quid est hoc, Pythi, tantumne piscium? tan-
tumne cymbarum? Et ille, Quid mirum?
inquit; hoc loco est, Syracusis quidquid est
piscium: hic aquatio: hac villa isti carere non
possunt. Incensus Canius cupiditate contendit
à Pythio, ut venderet. Gravate ille primo.
Quid multa? impetrat: emit homo cupidus & lo-
cuples tanti, quanti Pythius voluit, & emit in-
structos: nomina facit, negotium conficit. Invi-
tat Canius postridiè familiares suos, venit ipse
maturè, scalmum nullum videt, quærit ex proximo
vicino, num feriæ quædam piscatorum essent,
quod eos nullos videret. Nullæ (quod sciam)
inquit ille: Sed hic piscari nulli solent: itaque
heri mirabar, quid accidisset. Stomachari Cani-
us. Sed quid faceret? nondum enim Aquillius,
collega & familiaris meus, protulerat de dolo ma-
lo formulas: in quibus ipsis cum ex eo quærere-
rur, quid esset dolus malus: respondebat, cum esset
aliud simulatum, aliud actum. Hoc quidem sanè
luculenter, ut ab homine perito definiendi. Ergo
& Pythius, & omnes aliud agentes, aliud simulan-
tes, perfidi, improbi, malitiosi sunt. Nullum igi-
tur factum eorum potest utile esse, cum sit tot vi-
tiis

tiis inquinatum. Quod si Aquilliana definitio vera est, ex omni vita simulatio dissimulatioque tollenda est: ita nec, ut emat melius, nec ut vendat, quidquam simulabit, aut dissimulabit vir bonus. Atque iste dolus malus etiam legibus erat vindicatus, ut tutela xii tabulis, & circumscriptio adolescentium lege Lætorîâ; & sine lege judiciis, in quibus additur, ex fide bonâ agitur. Reliquorum autem judiciorum hæc verba maximè excellunt, in arbitrio rei uxoriæ, melius, æquius: in fiduciâ, ut inter bonos bene agier. Quid ergo? aut in eo, quod melius æquius, potest ulla pars inesse fraudis? aut, cum dicitur: inter bonos bene agier, quidquam agi dolosè, aut malitiosè potest? Dolus autem malus simulatione, ut ait Aquillius, continetur. Tollendum est igitur ex rebus contrahendis omne mendacium, non licitatore venditor, nec qui contra se liceatur, emtor apponet: uterque, si ad eloquendum venerit, non plus, quam semel, eloquetur. Q. quidem Scævola, P. filius, cum postulâisset, ut sibi fundus, cujus emptor erat, semel indicaretur, idque venditor ita fecisset, dixit, se pluris æstimare: addidit centum millia. Nemo est, qui hoc boni viri fuisse neget, sapientis negant: ut si minoris, quam potuisset, vendidisset. Hæc igitur est illa perniciēs, quod alios bonos, alios sapientes existimant: ex quo Ennius, quicquam sapere sapientem, qui sibi ipse prodesse non quiret. Verè id quidem, si, quid esset prodesse, mihi cum Ennio conveniret. Hecatonem quidem Rhodium, discipulum Panætii, video in iis libris, quos de officiis scripsit Q. Tuberoni, dicere, Sapientis esse nihil contra mores, leges, instituta facientem, habere rationem rei familiaris: neque enim solum nobis divites esse volumus, sed liberis, propinquis, amicis, maximèque reip. singulorum enim facultates & copię, divitiæ sunt civitatis. Huic Scævolæ factum, de quo paullò antè

tē dixi, placere nullo modo potest: etenim omnino tantum se negat facturum compendii sui causā, quod non liceat. Huic nec laus magna tribuenda, nec gratia est. Sed sive simulatio & dissimulatio dolus malus est; perpaucæ res sunt, in quibus dolus iste malus non verferetur: sive vir bonus est is, qui prodest quibus potest, nocet nemini, certē istum virum bonum non facile reperiemus. Numquam igitur est utile peccare, quia semper est turpe: &, quia semper est honestum virum bonum esse, semper est utile. Ac de jure quidem prædiorum sancitum est apud nos jure civili, ut in his vendendis vitia dicerentur, quæ nota essent venditori. Nam cum ex XII. Tabulis satis esset ea præstari, quæ essent linguā nuncupata, quæ qui inficiatus esset, dupli pœnam subiret: à jureconsultis etiam reticentiæ pœna est constituta. Quicquid enim esset in prædio vitii, id statuerunt, si venditor sciret, nisi nominatim dictum esset, præstari oportere. Ut, cum in arce augurium augures acturi essent, jussissentque T. Claudium Centumalum, qui ædes in Cœlio monte habebat, demoliri ea, quorum altitudo officeret auspiciis: Claudius proscripsit insulam, vendidit: emit P. Calpurnius Lanarius: huic ab auguribus illud idem denuntiatum est. Itaque Calpurnius cum demolitus esset, cognossetque, Claudium ædes postea proscripsisse, quā esset ab auguribus demoliri jussus, arbitrum illum adegit, quicquid sibi dare facere oporteret ex fide bonā. M. Cato sententiam dixit, hujus nostri Catonis pater: ut enim ceteri ex patribus, sic hic, qui lumen illud progenit, ex filio est nominandus. Is igitur judex ita pronuntiavit: cum in venundando rem eam scisset, & non pronuntiasset, emptori damnum præstari oportere. Igitur ad fidem bonam statuit pertinere, notam esse emptori vitium, quod nōsser venditor. Quod si rectē judicavit: non rectē fru-

men-

mentarius ille, non rectè ædium pestilentium venditor tacuit. Sed hujusmodi reticentiæ jure civili omnes comprehendi non possunt: quæ autem possunt, diligenter tenentur. M. Marius Grati-dianus, propinquus noster, C. Sergio Oratæ ven-diderat ædes eas, quas ab eodem ipse paucis antè annis emerat: hæ Sergio serviebant: sed hoc in mancipio Marius non dixerat. Adducta res in judicium est. Oratam Crassus, Gratidianum defen-debat Antonius. Jus Crassus urgebat: quod vitii venditor non dixisset sciens, id oportere præstari: æquitatem Antonius: quoniam id vitium igno-tum Sergio non fuisset, qui illas ædes vendidisset, nihil fuisse necesse dici: nec eum esse decep-tum, qui id, quod emerat, quo jure esset, tene-ret. Quorsum hæc? ut illud intelligas, non pla-cuisse majoribus nostris astutos. Sed aliter leges, aliter philosophi tollunt astutias: leges, quatenus manu tenere possunt: philosophi, quatenus ratione & intelligentia. Ratio igitur postulat, ne quid insi-diose, ne quid simulatè, ne quid fallaciter. Sûntne igitur insidiæ, tendere plagas, etiam si excitaturus non sis, nec agiturus? ipsæ enim feræ nullo inse-quente sæpe incidunt: sic tu ædes proscribas, ta-bulam, tamquam plagam, ponas, domum propter vitia vendas; in eam aliquis incurrat imprudens. Hoc quamquam video propter depravationem con-suetudinis, neque more turpe haberi, neque aut lege sanciri, aut jure civili, tamen naturæ lege san-ctum est: societas enim est, quod etsi sæpe dictum est, dicendum tamen est sæpius, latissimè quidem quæ pateat, hominum inter homines: interior e-orum, qui ejusdem generis sunt; propior eorum, qui ejusdem civitatis. Itaque majores aliud jus gen-tium, aliud jus civile esse voluerunt, quod civile, non idem continuo gentium; quod autem gentium, idem civile esse debet. Sed nos veri juris, germa-næque justitiæ solidam & expressam effigiem nul-

lam tēnemus: umbrā & imaginibus utimur: eas ipsas utinam sequeremur! feruntur enim ex optimis naturæ, & veritatis exemplis. Nam quanti verba illa, uti ne propter te, fidēve tuam captus, fraudatūve siem? quam illa aurea! ut inter bonos bene agier oportet, & sine fraudatione? Sed, qui sint boni, & quid sit, bene agi, magna quæstio est. Qu. quidem Scævola, pontifex max. summam vim dicebat esse in omnibus iis arbitriis, in quibus adderetur, ex fide bonā: fideique bonæ nomen existimabat manare latissime, idque versari in tutelis, societatibus, fiduciis, mandatis, rebus emtis, venditis, conductis, locatis, quibus vitæ societas continetur: in his magni esse iudicis, statuere, præsertim cum in plerisque essent iudicia contraria, quid quemque cuique præstare oporteret. Quocirca astutiæ tollendæ sunt, eaque malitia, quæ vult illa quidem videri se esse prudentiam, sed abest ab ea distatque plurimum. Prudentia est enim locata in delectu bonorum, & malorum: malitia, si omnia, quæ turpia sunt, mala sunt, mala bonis ponit antè. Nec vero in prædiis solum jus civile, ductum à natura, malitiam fraudēque vindicat: sed etiam in mancipiorum venditione fraus venditoris omnis excluditur: qui enim scire debuit, de sanitate, de fuga, de furtis, præstat edicto Aedilium. Heredum alia causa est. Ex quo intelligitur, quoniam juris natura fons sit, hoc secundum naturam esse, neminem id agere, ut ex alterius prædetur inscientiā, nec ulla perniciēs vitæ major inveniri potest, quam in malitiā simulatio intelligentiæ: ex quo ista innumerabilia nascuntur: ut utilia cum honestis pugnare videantur, quorus enim quisque reperietur, qui impunitate: & ignoratione omnium proposita, abstinere possit injuriā? Periclitemur: si placet, in iis quidem exemplis, in quibus peccari vulgus hominum fortasse non putat. Neque enim

enim de sicariis, veneficis, testamentariis, furibus, peculatoribus hoc loco differendum est: qui non verbis sunt, & disputatione philosophorum, sed vinculis & carcere fatigandi: sed hæc consideremus, quæ faciunt ii, qui habentur boni. L. Minutius Basili, locupletis hominis, falsum testamentum quidam è Græcia Romam attulerunt: quod quo facilius obtinerent, scripserunt heredes secum M. Crassum, & Qu. Hortensium, homines ejusdem ætatis potentissimos: qui, cum illud falsum esse suspicarentur, sibi autem nullius essent conscii culpæ, alieni facinoris munusculum non repudiaverunt. Quid ergo? satin' hoc est, ut non deliquisse videantur? mihi quidem non videtur: quamquam alterum amavi vivum, alterum non odi mortuum. Sed cum Basilius M. Satrium, sororis filium, nomen suum ferre voluisset, eumque fecisset heredem: hunc, ait, dico patronum agri Piceni & Sabini: (ò turpem notam temporum illorum!) num erat æquum, principes cives rem habere, ad Satrium nihil præter nomen pervenire? Etenim, si is, qui non defendit injuriam, neque propulsat à suis, cum potest, injustè facit, ut in primo libro differui: qualis habendus est is, qui non modo non repellit, sed etiam adjuvat injuriam? Mihi quidem etiam veræ hereditates non honestæ videntur, si sint malitiosis blanditiis officiorum; non veritate, sed simulatione quæsitæ. Atqui in talibus rebus aliud utile interdum, aliud honestum videri solet. Falsò: nam eadem utilitatis, quæ honestatis est regula: qui hoc non perviderit, ab hoc nulla fraus aberit, nullum facinus: sic enim cogitans: Est istuc quidem honestum, verum hoc expedit, res à natura copulatas audebit errore divellere: qui fons est fraudum, maleficiorum, scelerum omnium. Itaque si vir bonus habeat hanc vim, ut, si digitis concrepuerit, possit in locupletium testamenta nomen ejus irrepere; hac vi non utatur, ne

si exploratum quidem habeat, id omnino neminem unquam suspicaturum. At dares hanc vim M. Crasso, ut digitorum percussione heres posset scriptus esse, qui re verâ non esset heres, in foro, mihi crede, saltaret. Homo autem justus, isque quem sentimus virum bonum, nihil cuiquam, quod in se transferat, detrahet. Hoc qui admiratur, is se, quid sit vir bonus, nescire fateatur. At vero si quis voluerit animi sui complicatam notionem evolvere, jam se ipse doceat, cum virum bonum esse, qui profit quibus possit, noceat nemini, nisi laceffitus injuriâ. Quid ergo? hic non noceat, qui quodam quasi veneno perficiat, ut veros heredes moveat, in eorum locum ipse succedat? Non igitur faciat, dixerit quis, quod utile sit, quod expediat? Immo intelligat, nihil nec expedire, nec utile esse, quod sit injustum. Hoc qui non didicerit, bonus vir esse non poterit. Fimbriam consularem audiebam de patre nostro puer, judicem M. Lutatio Pinthiæ fuisse, equiti Rom. sane honesto, cum is sponsonem fecisset, ni bonus vir esset: itaque ei dixisse Fimbriam, se illam rem numquam judicaturum: ne aut spoliaret famâ probatum hominem, si contra judicasset, aut statuisse videretur, virum bonum aliquem esse, cum ea res innumerabilibus officiis & laudibus contineretur. Huic igitur viro bono, quem Fimbria etiam, non modo Socrates noverat, nullo modo videri potest quidquam esse utile, quod non honestum sit. Itaque talis vir non modo facere, sed nec cogitare quidem quidquam audebit, quod non audeat prædicare. Hæc nonne est turpe dubitare philosophos, quæ ne rustici quidem dubitent? à quibus natum est id quod jam tritum est vetustate proverbium: cum enim fidem alicujus bonitatemque laudant, dignum esse dicunt, quicum in tenebris mices. Hoc quam habet vim, nisi illam, nihil expedire, quod non deceat, etiam si id possis nullo refellente obtinere?

Vidēsne igitur, hoc proverbio neque Gygi illi posse veniam dari, neque huic, quem paullo antè fingebam digitorum percussione hereditates omnium posse convertere? Ut enim, quod turpe est, id quamvis occultetur, tamen honestum fieri nullo modo potest: sic, quod honestum non est, id utile ut sit, effici non potest, adversante & repugnantē naturā. At enim, cum permagna præmia sunt, est causa peccandi. C. Marius cum à spe consulatūs longè abesset, & jam septimum annum post præturam jaceret, neque petiturus umquam consulatum videretur, Q. Metellum, cūjus legatus erat, summum virum & civem, cum ab eo, imperatore suo, Romam missus esset, apud pop. Rom. criminatus est, bellum ducere: si se consulem fecissent, brevi tempore aut vivum, aut mortuum Jugurtham se in potestatem pop. Rom. redacturum. Itaque factus est ille quidem consul, sed à fide, justitiāque discessit, qui optimum, & gravissimum civem, cūjus legatus, & à quo missus esset, in invidiam falso crimine adduxerit. Ne noster quidem Gratidianus officio boni viri functus est tum, cum prætor esset, collegiūmq; prætorum tribuni plebis adhibuissent, ut res nummaria de communi sententiā constitueretur: jactabatur enim temporibus illis nummus sic, ut nemo posset scire, quid haberet. Conscripserunt communiter edictum cum pœnā atque judicio; constitueruntque ut omnes simul in rostra post meridem descenderent: & ceteri quidem alius alio, Marius è subselliis in rostra recta, idque quod communiter compositum fuerat, solus edixit, & ea res, si quæris, ei magno honori fuit: omnibus vicis statux: ad eas thus, & cerei: quid multa? nemo umquam multitudini fuit carior. Hæc sunt, quæ conturbant in deliberatione nonnumquam, cum id, in quo violatur æquitas, non ita magnum; illud autem, quod ex eo paritur, permagnum videtur:

tur : ut Mario, præripere collegis & tribunis plebis popularem gratiam, non ita turpe ; consulem ob eam rem fieri, quod sibi tunc proposuerat, valde utile videbatur. Sed omnium una regula est, quam tibi cupio esse notissimam : aut illud, quod utile videtur, turpe ne sit : aut, si turpe est, ne videatur esse utile. Quid igitur ? possumusne aut illum Marium, virum bonum judicare, aut hunc ? Explica atque excute intelligentiam tuam, ut videas, quæ sit in ea species, forma, & notio viri boni. Cadit ergo in virum bonum mentiri emolumentum sui causa, criminari, præripere, fallere ? nihil profectò minus. Est ergo ulla res tanti, aut commodum ullum tam expetendum, ut viri boni & splendorem, & nomen amittas ? quid est, quod afferre tantum utilitas ista, quæ dicitur, possit, quantum auferre, si boni viri nomen eripuerit, fidem justitiamque detraxerit ? Quid enim interest, utrum ex homine se quis conferat in beluam, an hominis figura immanitatem gerat beluæ ? Quid ? qui omnia recta & honesta negligunt, dummodo potentiam consequantur, nonne idem faciunt, quod is, qui etiam focerum habere voluit eum, cujus ipse audaciâ potens esset ? Utile ei videbatur plurimum posse alterius invidiâ : id quam injustum in patriam, quam inutile, quam turpe esset, non videbat. Ipse autem focer in ore semper Græcos versus de Phœnissis habebat, quos dicam ut potero, inconditè fortasse, sed tamen ut res possit intelligi.

*Nam si violandum est jus, regnandi gratiâ
Violandum est : aliis rebus pietatem colas.*

Capitalis Eteocles, vel potius Euripides, qui id unum, quod omnium sceleratissimum fuerat, exceperit. Quid igitur minuta colligimus, hereditates, mercaturas, venditiones fraudulentas ? Ecce tibi, qui rex pop. Roman. dominusque omnium gentium esse concupierit, idque perfecerit. Hanc

cupiditatem si honestam quis esse dicit, amens est : probat enim legum & libertatis interitum, earumque oppressionem tetram, & detestabilem, gloriosam putat. Qui autem fatetur, honestum non esse in ea civitate, quæ libera fuit, quæque esse debeat, regnare, sed ei, qui id facere possit, esse utile, qua hunc objurgatione aut quo potius convicio à tanto errore coner avellere? Poteest enim, dii immortales, cuiquam esse utile fœdissimum & teterrimum parricidium patriæ : quamvis is qui se eo obstrinxerit, ab oppressis civibus Parens nominetur? Honestate igitur dirigenda utilitas est, & quidem sic, ut hæc duo, verbo inter se discrepare, re tamen unum sonare videantur. Non habeo, ad vulgi opinionem, quæ major utilitas, quam regnandi, esse possit : nihil contra inutilius ei, qui id injustè consecutus sit, invenio, cum ad veritatem cœpi revocare rationem : possunt enim cuiquam esse utiles angores, sollicitudines, diurni & nocturni metus, vita insidiarum periculorumque plenissima?

Multi iniqui atque infideles regno, pauci sunt boni.

inquit Accius. At cui regno? quod à Tantalo, & Pelope proditum jure obtinebatur. Nam quanto plures ei regi putas, qui exereitu populi Romani populum ipsum Rom. oppressisset, civitatémque non modo liberam, sed etiam gentibus imperantem, servire sibi coegisset? Hunc tu quas conscientia lates in animo censes habuisse? quæ vulnera? cujus autem vita ipsi potest utilis esse, cum ejus vitæ ea conditio sit, ut qui illam eripuerit, in maximâ & gratiâ futurus sit & gloriâ? Quod si hæc utilia non sunt, quæ maximè videntur, quia plena sunt dedecoris, ac turpitudinis, satis persuasum esse debet, nihil esse utile, quod non honestum sit. Quamquam id quidem, cum sæpe alias, tum Pyrrhi bello à C. Fabricio, consule iterum, & à senatu nostro judicatum est. Cum enim rex Pyrrhus populo Rom. bellum ultro intulisset, cumque

de imperio certamen esset cum rege generoso, ac potente ; perfuga ab eo venit in castra Fabricii, eique est pollicitus, si præmium sibi proposuisset, se, ut clam venisset, sic clam in Pyrrhi castra reditumum, & eum veneno necaturum. Hunc Fabricius reducendum curavit ad Pyrrhum : idque factum ejus à senatu laudatum est : Atqui si speciem utilitatis opinionemque quærimus, magnum illud bellum perfuga unus, & gravem adversarium imperii sustulisset : sed magnum dedecus & flagitium, quicum laudis certamen fuisset, eum non virtute sed scelere superatum. Utrum igitur utilius vel Fabricio, qui talis in hac urbe, qualis Aristides Athenis fuit, vel senatui nostro, qui numquam utilitatem à dignitate sejunxit, armis cum hoste certare, an venenis ? Si gloriæ causâ imperium expetendum est, scelus absit, in quo non potest esse gloria : sin ipsæ opes expetuntur quoquo modo, non poterunt utiles esse cum infamiâ. Non igitur utilis illa L. Philippi, Qu. filii, sententia : quas civitates L. Sulla, pecunia acceptâ ex senatusconsulto liberavisset, ut hæc rursus vectigales essent : neque his pecuniam, quam pro libertate dederant, redderemus. Est ei senatus assensus : turpe imperio : piratarum enim melior fides, quam senatus. At aucta vectigalia ; utile igitur. Quousque audebunt dicere quidquam utile, quod non honestum ? Potest autem ulli imperio, quod gloriâ fultum esse debet, & benevolentia sociorum, utile esse odium, & infamia ? Ego etiam cum Catone meo sæpe dissensi. nimis mihi præfractè videbatur ærarium, vectigaliâque defendere, omnia publicanis negare, multa sociis : cum in hos beneficii esse deberemus, cum illis sic agere, ut cum colonis nostris soleremus, eoque magis, quo illa ordinum conjunctio ad salutem reipub. pertinebat. Malè etiam Curio, cum causam Transpadanorum æquam esse dicebat : semper autem addebat

bat, Vincat utilitas. Potius diceret, non esse æquam, quia non esset utilis reip. quam, cum utilem esse diceret, non esse æquam fateretur.

Formulas aliquot, & rogatiunculas colligit non inanimas, in quibus videtur aliud hortari utilitas, aliud honestas.

PLEnus est sextus liber de officiis Hecatonis tallium quæstionum: Sitne boni viri in maxima caritate annonæ familiam non alere? in utramque partem disputat: sed tamen ad extremum utilitate putat officium dirigi magis, quam humanitate. Quærit, si in mari jactura facienda sit, equine pretiosi potius jacturam faciat, an servuli vilis? hic alio res familiaris, alio dueit humanitas. Si tabulam de naufragio stultus arripuerit, extorquebitne eam sapiens, si potuerit? negat, quia sit injurium. Quid? dominus navis, eripiétne suum? minimè: non plus, quam si navigantem in alto ejicere de navi velit, quia sua sit: quoad enim perventum sit eo, quo sumta navis est, non domini est navis, sed navigantium. Quid, si in una tabula sint duo naufragi, æquè sapientes, sibíne uter rapiat, an alter cedat alteri? cedat vero: sed ei, cujus magis intersit vel suæ, vel reipub. causâ vivere. Quid, si hæc paria in utroque? nullum erit certamen, sed quasi sorte, aut micando victus, alteri cedat alter. Quid si pater fana expilet, cuniculos agat ad ærarium: indicétne id magistratibus filius? nefas id quidem est: quinetiam defendat patrem, si arguatur. Non igitur patria præstat omnibus officiis? immo vero: sed ipsi patriæ conducit, pios cives habere in parentes. Quid, si tyrannidem occupare, si patriam prodere conabitur pater? fílebitne filius? immo vero obsecrabit patrem, ne id faciat: si nihil proficiet, accusabit, minabitur etiam: ad extremum si ad perniciem patriæ

patriæ res spectabit, patriæ salutem anteponet salutem patris. Quærit etiam, si sapiens adulterinos nummos acceperit imprudens pro bonis : cum id rescierit, soluturusne sit eos, si cui debeat, pro bonis. Diogenes ait ; Antipater negat, cui potius assentior. Qui vinum fugiens vendat sciens, debeátne dicere ? Non necesse putat Diogenes : Antipater viri boni existimat. Hæc sunt quasi controversa jura Stoicorum. In mancipio vendendo dicendane vitia ? non ea, quæ nisi dixeris, redhibeatur mancipium jure civili : sed hæc, mendacem esse, aleatorem, furacem, ebriosum. Alteri dicenda videntur, alteri non videntur. Si quis aurum vendens, orichalcum se putet vendere, indicétne ei vir bonus, aurum illud esse, an emat denario, quod sit mille denariûm ? Perspicuum jam est, & quid mihi videatur, & quæ sit inter eos Philosophos, quos nominavi, controversia. Pacta & promissa semperne fervanda sint, quæ nec vi, nec dolo malo, ut prætores solent, facta sint ? Si quis medicamentum cuiquam dederit ad aquam intercutem, pepigeritque, ne illo medicamento umquam postea uteretur ; si eo medicamento sanus factus fuerit, & annis aliquot post inciderit in eundem morbum, nec ab eo, quicum pepigerat, impetret, ut item eo liceat uti, quid faciendum sit ? Cum sit is inhumanus, qui non concedat, nec ei quidquam fiat injuriæ, vitæ & salutis consulendum. Quid ? si quis sapiens rogatus sit ab eo, qui eum heredem faciat, cum ei testamento sestertium millies relinquatur, ut antè quam hereditatem adeat, luce palam in foro saltet, idque se facturum promiserit, quod aliter eum heredem scripturus ille non esset : faciat, quod promiserit, necne ? Promisisse nollem, & id arbitror fuisse gravitatis : sed quoniam promisit, si saltare in foro turpe ducet, honestius mentierur, si ex hereditate nihil ceperit : nisi forte eam pecuniam in reip. magnum aliquod tempus

contu-

contulerit: ut vel saltare eum, cum patriæ confuturus sit, turpe non sit. Ac ne illa quidem promissa servanda sunt, quæ non sunt iis ipsis utilia, quibus illa promiseris. Sol Phaëthonti filio, ut redeamus ad fabulas, facturum se esse dixit, quidquid optasset: optavit ut in currum patris tolleretur: sublatus est; atque insanus antequam constitit, istu fulminis deflagravit. Quanto melius fuerat, in hoc promissum patris non esse servatum? Quid, quod Theseus exegit promissum a Neptuno? Cui cum tres optationes Neptunus dedisset, optavit interitum Hippolyti, filii sui, cum is patri suspectus esset de noverca: quo optato impetrato, Theseus in maximis fuit luctibus. Quid? Agamemnon cum devovisset Dianæ, quod in suo regno pulcherrimum natum esset illo anno, immolavit Iphigeniam, qua nihil erat eo quidem anno natum pulchrius; promissum potius non faciendum, quam tam tetrum facinus admittendum fuit. Ergo & promissa non facienda nonnumquam: neque semper deposita reddenda. Si gladium quis apud te sanâ mente deposuerit, repetat insaniens, reddere peccatum sit, non reddere officium. Quid? si is, qui apud te pecuniam deposuerit, bellum inferat patriæ, reddasne depositum? non, credo: facias enim contra remp. quæ debet esse carissima. Sic multa, quæ honesta natura videntur esse, temporibus fiunt non honesta. Facere promissa, stare conventis, reddere deposita, commutata utilitate, fiunt non honesta. Ac de iis quidem quæ videntur esse utilitates contra justitiam simulatione prudentiæ, satis arbitror dictum. Sed quoniam à quatuor fontibus honestatis primo libro officia duximus, in eisdem versabimur, cum docebimus, ea, quæ, videntur esse utilia, neque sunt, quam sint virtutis inimica. Ac de prudentia quidem, quam vult imitari malitia: itémque de justitia, quæ semper est utilis, disputatum est.

De Fortitudine.

Reliquæ sunt duæ partes honestatis, quarum altera in animi excellentis magnitudine & præstantiâ cernitur, altera in conformatione & moderatione continentiae & temperantiae. Utile videbatur Ulyssi, ut quidem poetæ tragici prodiderunt: nam apud Homerum, optimum auctorem, talis de Ulysse nulla suspicio est: sed insimulant eum tragædiæ, simulatione insaniae militiam subterfugere voluisse. Non honestum consilium; at utile, ut aliquis fortasse dixerit, regnare, & Ithacæ vivere otiose cum parentibus, cum uxore, cum filio. Ullum tu decus in quotidianis periculis & laboribus cum hac tranquillitate conferendum putas? Ego vero istam contemnendam, & abjiciendam: quoniam, quæ honesta non sit, ne utilem quidem esse arbitror. Quid enim auditurum putas fuisse Ulysses, si in illa simulatione perseverâset? qui, cum maximas res gesserit in bello, tamen hæc audiat ab Ajace:

*Cujus ipse princeps juris jurandi fuit,
Quod omnes scitis, solus neglexit fidem.
Furere assimulavit, ne coiret institit.
Quod ni Palamedis perspicax prudentia
Istius percepisset malitiosam audaciam,
Fide sacratum jus perpetuo falleret.*

Illi vero non modo cum hostibus, verum etiam cum fluctibus, id quod fecit, dimicare melius fuit, quam deferere consentientem Græciam ad bellum barbaris inferendum. Sed dimittamus & fabulas, & externa; ad rem factam nostraque veniamus. M. Atilius Regulus, cum consul iterum in Africa ex insidiis captus esset, duce Xantippo Lacedæmonio, imperatore autem patre Hannibalis Hamilcare, juratus missus est ad senatum, ut, nisi redditi essent Pœnis captivi nobiles quidam, redderet ipse Karthaginem. Is cum Romam venisset, utilitatis speciem videbat; sed eam, ut res declar-

rat

rat, falsam judicavit: quæ erat talis, manere in patria, esse domi suæ cum uxore, cum liberis: quam calamitatem accepisset in bello, communem fortunæ bellicæ judicantem, tenere consularis dignitatis gradum: quis hæc neget esse utilia? quem censes? magnitudo animi & fortitudo negat. Num locupletiores quæris auctores? Harum enim est virtutum proprium, nil extimescere, omnia humana despicere, nihil, quod homini accidere possit, intolerandum putare. Itaque quid fecit? In senatum venit, mandata exposuit, sententiam ne diceret recusavit: quamdiu jurejurando hostium teneretur, non esse se senatorem. Atque illud etiam, o stultum hominem, dixerit quispiam, & repugnantem utilitati suæ! reddi captivos negavit esse utile: illos enim adolescentes esse & bonos duces; se jam confectum senectute: cujus cum valuisset auctoritas, captivi retenti sunt, ipse Karthaginem rediit, neque eum caritas patriæ retinuit, nec suorum. Neque vero tum ignorabat, se ad crudelissimum hostem, & ad exquisita supplicia proficisci: sed jusjurandum conservandum putabat. Itaque tum, cum vigilando necabatur, erat in meliore causa, quam si domi senex captivus, perjurus consularis remansisset. At stultè, qui non modò non censuerit captivos remittendos, verum etiam dissuaserit. Quomodo stultè? etiàmne si reipub. conducebat? potest autem, quod inutile reipub. sit, id cuiquam civi utile esse? Pervertunt homines ea, quæ sunt fundamenta naturæ, cum utilitatem ab honestate sejungunt. Omnes enim expetimus utilitatem, ad eamque rapimur, nec facere aliter ullo modo possumus: nam quis est, qui utilia fugiat? aut quis potius, qui ea non studiosissime persequatur? sed quia nusquam possumus, nisi in laudè, decore, honestate, utilia reperire, propterea illa prima & summa habemus: utilitatis nomen non tam splendidum, quam necessarium ducimus.

cimus. Quid est igitur, dixerit quis, in jurejurando? num iratum timemus Jovem? At hoc quidem commune est omnium Philosophorum, non eorum modò, qui deum nihil habere ipsum negotii dicunt, & nihil exhibere alteri: sed eorum etiam, qui deum semper agere aliquid, & moliri volunt; nunquam nec irasci deum, nec nocere. Quid autem iratus Jupiter plus nocere potuisset, quam nocuit sibi ipse Regulus? nulla igitur vis fuit religionis, quæ tantam utilitatem præverteret. An ne turpiter faceret? Primum, minima de malis. Num igitur tantum mali turpitudine ista habebat, quantum ille cruciatus? deinde illud etiam apud Accium,

Fregisti fidem. Neque dedi, neque do infideli cuiquam.

Quamquam ab impio rege dicitur, luculentè tamen dicitur. Addunt etiam, quemadmodum nos dicamus, videri quædam utilia, quæ non sint: sic se dicere, videri quædam honesta, quæ non sint: ut hoc ipsum videtur honestum, conservandi juris jurandi causâ ad cruciatum revertisse: sed fit non honestum: quia, quod per vim hostium esset actum, ratum esse non debuit. Addunt etiam, quidquid valde utile sit, id fieri honestum, etiam si antea non videretur. Hæc fere contra Regulum. Sed prima videamus. Non fuit Jupiter metuendus, ne iratus noceret, qui neque irasci solet, neque nocere. Hæc quidem ratio non magis contra Regulum, quam contra omne jusjurandum valet: sed in jurejurando, non qui metus, sed quæ vis sit, debet intelligi: est enim jusjurandum affirmatio religiosa; quod autem affirmatè, quasi deo teste, promiseris, id tenendum est: jam enim non ad iram deorum, quæ nulla est; sed ad justitiam, & ad fidem pertinet: nam præclare Ennius,

O fides alma, apta pinis: & jusjurandum Jovis!

Qui igitur jusjurandum violat, is Fidem violat, quam in Capitolio vicinam Jovis Opt. Max. (ut in Catonis oratione est) majores nostri esse voluerunt.

At enim ne iratus quidem Jupiter plus Regulo nocuisset, quam sibi nocuit ipse Regulus. Certè, si nihil malum esset, nisi dolere. Id autem non modo non summum malum, sed nec malum quidem esse, maximâ auctoritate Philosophi affirmant: quorum quidem testem non mediocre, sed haud scio an gravissimum, Regulum, nolite, quæso, vituperare: quem enim locupletiores quærimus, quam principem populi Rom. qui retinendi officii causâ cruciatum subierit voluntarium? Nam quod ajunt, minima de malis, id est, ut turpiter potius, quam calamitosè: an est ullum majus malum turpitudine? quæ si in deformitate corporis habet aliquid offensionis, quanta illa depravatio & fœditas turpificati animi debet videri? Itaque, nervosius qui ista differunt, solum audent malum dicere id, quod turpe sit: qui autem remissius, hi tamen non dubitant summum malum dicere. Nam illud quidem,

Neque dedi, neque do fidem infideli cuiquam:

Idcirco rectè a poeta; quia, cum tractaretur Atræus, personæ serviendum fuit. Sed si hoc sibi sumunt, nullam esse fidem, quæ infideli data sit, videant ne quæratur latebra perjurio. Est autem jus etiam bellicum, fidésque jurisjurandi sæpe cum hoste servanda. Quod enim ita juratum est, ut mens conciperet fieri oportere, id servandum est: quod aliter; id si non feceris, nullum est perjurium: ut, si prædonibus pactum pro capite pretium non attuleris, nulla fraus est: ne si juratus quidem id non feceris: nam pirata non est perduellium numero definitus, sed communis hostis omnium: cum hoc nec fides debet, nec jusjurandum esse commune. Non enim falsum jurare perjurare est: sed, quod ex animi tui sententiâ juraris, sicut verbis concipitur more nostro, id non facere perjurium est. Scitè enim Euripides:

Juravi

Furavi linguâ, mentem injuratam gero,

Regulus vero non debuit conditiones pactionesque bellicas & hostiles perturbare perjurio : cum iusto enim & legitimo hoste res gerebatur ; adversus quem & totum jus feciale, & multa sunt jura communia : quod ni ita esset, numquam claros viros senatus victos hostibus dedidisset. At vero L. Veturius & Sp. Postumius, cum iterum consules essent, quia, cum male pugnatum apud Caudium esset, legionibus nostris sub jugum missis, pacem cum Samnitibus fecerant, dediti sunt his : injussu enim populi senatusque fecerant : eodémque tempore Ti. Numicius, Qu. Mælius, qui tum tribuni plebis erant, quod eorum auctoritate pax erat facta, dediti sunt, ut pax Samnitium repudiaretur. Atque hujus deditionis ipse Postumius, qui dedebatur, suasor & auctor fuit : quod idem multis annis post C. Mancinus ; qui ut Numantinis, quibuscum sine senatus auctoritate fœdus fecerat, dederetur, rogationem suasit eam, quam L. Furius, & Sex. Atilius ex s. c. ferebant : qua accepta, est hostibus deditus. Honestius hic, quam Qu. Pompeius, quo, cum in eâdem causa esset, deprecante, accepta lex non est. Hic ea, quæ videbatur utilitas, plus valuit, quam honestas : apud superiores, utilitatis species falsa ab honestatis auctoritate superata est. At non debuit ratum esse, quod erat actum per vim. Quasi vero forti viro vis possit adhiberi. Cur igitur ad senatum proficiscebatur, cum præsertim de captivis dissuasurus esset ? Quod maximum in eo est, id reprehenditis : non enim suo iudicio stetit, sed suscepit causam, ut esset iudicium senatus : cui nisi ipse auctor fuisset, captivi profecto Pœnis redditi essent : ita incolumis in patriâ Regulus restitisset : quod quia patriæ non utile putavit, idcirco sibi honestum & sentire illa, & pati credidit. Nam quod aiunt, quod valde utile sit, id fieri honestum : immo vero esse, non fieri.

feri: est enim nihil utile quod idem non honestum: nec quia utile, honestum est; sed quia honestum, utile. Quare ex multis mirabilibus exemplis, haud facile quis dixerit hoc exemplo aut laudabilius, aut præstantius. Sed ex tota hac laude Reguli unum illud est admiratione dignum, quod captivos retinendos censuerit: nam quod rediit, nobis nunc mirabile videtur; illis quidem temporibus aliter facere non potuit: itaque ista laus non est hominis, sed temporum: nullum enim vinculum ad adstringendam fidem jurejurando majores arctius esse voluerunt. Id indicant leges in XII. tabulis: indicant sacratæ, indicant fœdera, quibus etiam cum hoste devincitur fides; indicant notiones animadversionesque censorum; qui nulla de re diligentius quam de jurejurando judicabant. L. Manlio, A. filio, cum dictator fuisset, M. Pomponius tribunus plebis diem dixit, quod is paucos sibi dies ad dictaturam gerendam addidisset: criminabatur etiam, quod Titum filium, qui postea est Torquatus appellatus, ab hominibus relegasset, & ruri habitare jussisset: quod cum audivisset adolescens filius negotium exhiberi patri, accurrisse Romam, & cum prima luce Pomponii domum venisse dicitur: cui cum esset nuntiatum; qui illum iratum allaturum ad se aliquid contra patrem arbitraretur, surrexit è lectulo, remotisque arbitris ad se adolescentem jussit venire. At ille, ut ingressus est, confestim gladium distrinxit, juravitque, se illum statim interfectorum, nisi jusjurandum sibi dedisset, se patrem missum esse facturum. Juravit hoc coactus terrore Pomponius: rem ad populum detulit, docuit, cur sibi causâ desistere necesse esset: Manlium missum fecit: tantum temporibus illis jusjurandum valebat. Atque hic T. Manlius is est, qui ad Anienem Galli, quem ab eo provocatus occiderat, torque detracto, cognomen invenit: cujus terrio

consulatu Latini ad Vesperim fusi, & fugati: magnus vir in primis, & qui perindulgens in patrem, idem acerbè severus in filium. Sed, ut laudandus Regulus in conservando jurejurando, sic decem illi, quos post Cannensem pugnam juratos ad senatum misit Annibal, in castra redituros ea, quorum potiti erant Pœni, nisi de redimendis captivis impetravissent; si non redierunt, vituperandi. De quibus non omnes uno modo: nam Polybius, bonus auctor in primis, scribit ex decem nobilissimis, qui tum erant missi, novem revertisse à senatu re non impetratâ: unum ex decem, qui paullo post, quam egressus erat è castris, redisset, quasi aliquid esset oblitus, Romæ remansisse. Reditu enim in castra liberatum se esse jurejurando interpretabatur: non rectè: fraus enim adstringit, non dissolvit perjurium. Fuit igitur stulta calliditas perversè imitata prudentiam. Itaque decrevit senatus, ut ille veterator & callidus victus ad Annibalem duceretur. Sed illud maximum: octo hominum millia tenebat Annibal, non quos in acie cepisset, aut qui periculo mortis diffugissent, sed qui relictî in castris fuissent à Paulo & Varrone consulibus: eos senatus non censuit redimendos, cum id parva pecunia fieri posset: ut esset insitum militibus nostris aut vincere, aut emori. Qua quidem re auditâ, fractum animum Annibalis scripsit idem, quod senatus populusque Romanus rebus afflictis tam excelso animo fuisset. Sic honestatis comparatione ea, quæ videntur utilia, vincuntur. Acilius autem, qui Græce scripsit historiam, plures ait fuisse, qui in castra revertissent, eâdem fraude, ut jurejurando liberarentur, eosque à censoribus omnibus ignominiis notatos. Sit jam hujus loci finis: perspicuum est enim, quæ timido animo, humili, demisso fractoque fiant, (quale fuisset Reguli factum, si aut de captivis, quod ipsi opus esse videretur, non quod reipub. censuisset, aut domi remanere voluisset) non esse utilia, quia sunt flagitiosa, fœda, turpia.

De

De Temperantia.

Restat quarta pars, quæ decore, moderatione, modestiâ, continentiâ, temperantiâ continetur. Potest igitur quidquam esse utile, quod sit huic talium virtutum choro contrarium? Atqui ab Aristippo Cyrenaici, atque Annicerii Philosophi nominati, omne bonum in voluptate posuerunt: virtutemque censuerunt ob eam rem esse laudandam, quod efficiens esset voluptatis: quibus obsoletis floret Epicurus, ejusdem ferè adjutor, auctorque sententiæ. Cum his viris equisque, ut dicitur, si honestatem tueri ac retinere sententia est, decertandum est: nam si non modo utilitas, sed vita omnis beata corporis firmâ constitutione, ejusque constitutionis spe exploratâ, ut à Metrodoro scriptum est, continetur: certè hæc utilitas, & quidem summa, sic enim censent, cum honestate pugnabit: nam ubi primum prudentiæ locus dabitur? an ut conquirat undique suavitates? Quam miser virtutis famulatus servientis voluptati! quod autem munus prudentiæ? an legere intelligenter voluptates? fac nihil isto esse jocundius: quid cogitari potest turpius? Jam, qui dolorem summum malum dicat, apud eum quem habet locum fortitudo, quæ est dolorum laborumque contemtio? quamvis enim multis in locis dicat Epicurus, sicut hic dicit, satis fortiter de dolore: tamen non id spectandum est, quid dicat, sed quid consentaneum sit ei dicere, qui bona voluptate terminaverit, mala dolore: ut, si illum audiam de continentiâ & temperantiâ; dicit ille quidem multa multis locis: sed aquâ hæret, ut aiunt: nam quî potest temperantiam laudare is, qui ponat summum bonum in voluptate? est enim temperantia libidinum inimica: libidines autem consecratrices voluptatis. Atque in his tamen

tribus generibus, quoquo modo possunt, non incalidè tergiversantur. Prudentiam introducunt scientiam suppeditantem voluptates, depellentem dolores. Fortitudinem quoque aliquo modo expediunt, cum tradunt rationem negligendæ mortis, perpetiendique doloris. Etiam temperantiam inducunt, non facillimè illi quidem, sed tamen quoquo modo possunt : dicunt enim, voluptatis magnitudinem doloris detractiōe finire. Iustitia vacillat, vel jacet potius, omnesque eæ virtutes, quæ in communitate cernuntur, & in societate generis humani ; neque enim bonitas, nec liberalitas, nec comitas esse potest, non plus quam amicitia, si hæc non per se expetantur, sed ad voluptatem, utilitatemve referantur. Conferamus igitur in pauca. Nam ut utilitatem nullam esse docuimus, quæ honestati esset contraria : sic omnem voluptatem dicimus honestati esse contrariam. Quo magis reprehendendos Calliphonem, & Dinomachum judico, qui se dirempturos controversiam putaverunt, si cum honestate voluptatem, tanquam cum homine pecudem, copulavissent. Non recipit istam conjunctionem honestas, aspernatur, repellit. Nec verò finis bonorum & malorum, qui simplex esse debet, ex dissimilibus rebus misceri & temperari potest. Sed de hoc, magna enim res est, alio loco pluribus. Nunc ad propositum. Quemadmodum igitur, si quando ea, quæ videretur utilitas, honestati repugnat, dijudicanda res sit, satis est supra disputatum. Sin autem speciem utilitatis etiam voluptas habere dicetur, nulla potest esse ei cum honestate conjunctio. Nam ut tribuamus aliquid voluptati, condimenti fortasse non nihil, utilitatis certè nihil habebit.

Peroratio Operis.

HAbes à patre munus, Marce fili, meâ quidem sententia, magnum : sed perinde erit, ut acceperis : quamquam tibi hi tres libri inter Cratippi commentarios, tanquam hospites, erunt recipiendi. Sed ut, si ipse venissem Athenas, quod quidem esset factum, nisi me è medio cursu clara voce patria revocâisset, aliquando me quoque audires : sic, quoniam his voluminibus ad te profecta vox mea est ; tribues his temporis quantum poteris ; poteris autem quantum voles. Cum verò intellexero, te hoc scientiæ genere gaudere, tum & præsens tecum propediem, ut spero, &, dum aberis, absens loquar. Vale igitur, mi Cicero, tibi-que persuade, esse te quidem mihi carissimum : sed multo fore cario-rem, si talibus monumentis præceptisque lætabere.





M. TULLII CICERONIS
CATO MAJOR,

Ad T. Pomponium Atticum, Præfatio.



*Tite, si quid ego adjuvero, curamve levasso,
Qua nunc te coquit, & versat sub pectore
Ecquid erit pretii?* *fixa,*
Licet enim versibus iisdem mihi af-
fari te, Attice, quibus affatur Fla-
mininum;

Ille vir haud magna cum re; sed plenus fidei :
quamquam certo scio, non, ut Flamininum,

Sollicitari te, Tite, sic noctesque diesque.

senio Novi enim moderationem animi tui & æquitatem:
teque non cognomen solum Athenis deportasse,
sed humanitatem & prudentiam intelligo. Et ta-
men te suspicor iisdem rebus, quibus meipsum in-
terdum gravius commoveri : quarum consolatio &
major est, & in aliud tempus differenda. Nunc autem
mihi visum est de senectute aliquid ad te conscribere.
Hoc enim onere, quod mihi commune tecum est,
aut jam urgentis, aut certe adventantis senectutis, &
te & meipsum levare volo. Etsi te quidem id modicè
ac sapienter, sicut omnia, & ferre, & laturum esse
certè scio. Sed mihi, cum de senectute aliquid
vellem scribere, tu occurrebas dignus eo munere,
quo uterque nostrum communiter uteretur. Mi-
hi

hi quidem ita jucunda hujus libri confectio fuit, ut non modo omnes absterferit senectutis molestias, sed effecerit mollem etiam & jucundam senectutem. Nunquam igitur satis laudari dignè poterit philosophia, cui qui pareat, omne tempus ætatis sine molestiâ possit degere. Sed de ceteris & diximus multa, & sæpe dicemus : nunc librum de senectute ad te misimus. Omnem autem sermonem tribuimus non Tithono, ut Aristo Chius ; parum enim esset auctoritatis in fabulâ : sed M. Catoni seni, quo majorem auctoritatem haberet oratio : apud quem, Lælium & Scipionem facimus admirantes, quod is tam facile senectutem ferat ; iisque eum respondentem : qui si eruditius videbitur disputare quam consuevit ipse in suis libris, attribuito Græcis literis, quarum constat eum perstudiosum fuisse in senectute. Sed quid opus est plura ? Jam enim ipsius Catonis sermo explicabit nostram omnem de senectute Sententiâ. *Scip.* Sæpenumero mirari soleo cum hoc C. Lælio, tum ceterarum rerum tuam excellentem, M. Cato, perfectamque sapientiam, tum vel maximè, quod nunquam senectutem tibi gravem esse senserim : quæ plerisque senibus sic odiosa est, ut onus se Aetna gravius dicant sustinere. *Cato.* Rem haud sanè difficilem, Scipio & Læli, admirari videmini : quibus enim nihil opis est in ipsis ad bene beatæque vivendum, iis omnis gravis est ætas : qui autem omnia bona à seipsis petunt, iis nihil potest malum videri, quod naturæ necessitas afferat : quo in genere in primis est senectus, quam ut adipiscantur omnes optant : eandem accusant adeptam : tanta inest inconstantia stultitiæ atque perversitas. Obrepere, aiunt, eam citius, quam putassent. Primum, quis coegit eos falsum putare ? quî enim citius adolescentiæ senectus, quam pueritiæ adolescentiæ obrepit ? deinde, quî minus gravis esset iis senectus, si octingentesimum annum agerent, quam

quam si octogesimum ? præterita enim ætas, quamvis longa, cum effluxisset, nullâ consolatione permulcere posset stultam senectutem. Quocirca si sapientiam meam admirari soletis, quæ utinam digna esset opinione vestrâ, nostrôque cognomine, in hoc sumus sapientes, quòd naturam optimam ducem tanquam deum, sequimur, eiq; paremus : à qua non verisimile est, cum ceteræ partes ætatis bene descriptæ sint, extremum actum, tamquam ab inertii poeta, esse neglectum : sed tamen necesse fuit esse aliquid extremum, & tanquam in arborum baccis, terræque frugibus maturitate tempestiva, quasi vietum & caducum : quod ferendum est molliter sapienti : quid enim est aliud gigantum modo bellare cum diis, nisi naturæ repugnare ? *Lael.* Atqui, Cato, gratissimum nobis, ut etiam pro Scipione pollicear, feceris, si, quoniam speramus, volumus quidem certè, senes fieri, antè multò à te didicerimus, quibus facillimè rationibus ingravescentem ætatem ferre possimus. *Cato.* Faciam vero, *Læli*; præsertim si utrique vestrum, ut dicis, gratum futurum est. *Scip.* Volumus sanè, nisi molestum est, Cato, tamquam aliquam viam longam confeceris, quam nobis quoque ingrediendum sit, istuc, quo pervenisti, videre, quale sit. *Cat.* Faciam, ut potero, *Læli* : sæpe enim interfui querelis meorum æqualium : pares autem cum paribus, veteri proverbio, facillimè congregantur, quæ *C. Salinator*, quæ *Sp. Albinus*, homines consulares, nostri fere æquales, deplorare solebant : tum quòd voluptatibus carerent, sine quibus vitam nullam putarent : tum quòd spernerentur ab iis à quibus essent coli soliti : qui mihi non id videbantur accusare, quod esset accusandum. Nam si id culpâ senectutis accideret, eadem mihi usu evenirent, reliquisque omnibus majoribus natu : quorum ego multorum cognovi senectutem sine querelâ : qui se & libidinum vinculis laxatos esse non molestè ferrent

ferrent, nec à suis despicerentur: sed omnium istiusmodi querelarum in moribus est culpa, non in ætate: moderati enim, & nec difficiles, nec inhumani senes tolerabilem agunt senectutem. Importunitas autem & inhumanitas omni ætate molesta est. *Lael.* Est, ut dicis, Cato: sed fortasse dixerit quispiam, tibi propter opes & copias, & dignitatem tuam, tolerabiliorem senectutem videri: id autem non posse multis contingere. *Cato.* Est istuc quidem, *Læli*, aliquid; sed nequaquam in isto sunt omnia: ut Themistocles fertur Seriphio cuidam in iurgio respondisse, cum ille dixisset, non eum suam, sed patriæ gloriâ splendorem assecutum: Nec hercule, inquit, si ego Seriphius essem, nobilis: nec tu si Atheniensis esses, clarus umquam fuisses. Quod eodem modo de senectute potest dici. Neque enim in summa inopiâ levis esse senectus potest, ne sapienti quidem: nec insipienti etiam in summa copiâ non gravis. Aptissima omnino sunt, *Scipio*, & *Læli*, arma senectutis, artes exercitationesque virtutum; quæ in omni ætate cultæ, cum multum diuque vixeris, mirificos effeferunt fructus, non solum quia nunquam deferunt, ne in extremo quidem tempore ætatis, quamquam id maximum est, verum etiam quia conscientia bene actæ vitæ, multorumque benefactorum recordatio, jucundissima est. Ego *Q. Maximum*, eum, qui Tarentum recepit, adolescens ita dilexi senem, ut æqualem: erat enim in illo viro comitate condita gravitas: nec senectus mores mutaverat: quamquam eum colere cœpi non admodum grandem natu, sed tamen jam ætate proVectum: anno enim post consul primum fuerat, quam ego natus sum: cumque eo quartum consule adolescentulus miles profectus sum ad Capuam, quintoque anno post ad Tarentum quæstor: deinde ædilis, quadriennio post factus sum prætor: quem magistratum gessi consulibus Tuditano & Cethego, cum quidem

quidem ille admodum senex, suator legis Cincia de donis & muneribus fuit. Hic & bella gerebat, ut adolescens, cum planè grandis esset: & Annibalem juveniliter exultantem patientia sua mollebat: de quo præclare familiaris noster Ennius:

Unus homo nobis cunctando restituit rem.

Non ponebat enim rumores ante salutem.

Ergo magisque magisque viri nunc gloria claret.

Tarentum vero qua vigilantia, quo consilio recepit? cum quidem, me audiente, Salinatori, qui amisso oppido, fugerat in arcem, glorianti atque ita dicenti: Mea operâ, Q. Fabi, Tarentum recepisti: Certè, inquit ridens: nam, nisi tu amississet, ego numquam recepissem. Nec vero in armis præstantior, quam in toga: qui consul iterum Sp. Carvilio collegâ quiescente, C. Flaminio tribuno pl. quoad potuit restitit, agrum Picentem & Gallicum viritum contra senatus auctoritatem dividenti: augurque cum esset, dicere ausus est, optimis auspiciis ea geri, quæ pro reipub. salute gererentur: quæ contra remp. ferrentur, contra auspicia ferri. Multa in eo viro præclara cognovi; sed nihil est admirabilius, quam quomodo ille mortem M. filii tulit, clari viri, & consularis: est in manibus laudatio: quam cum legimus, quem Philosophum non contemnimus? Nec vero ille in luce modo, atque in oculis civium magnus: sed intus domique præstantior. Qui sermo? quæ præcepta? quanta notitia antiquitatis? quæ scientia juris augurii? multæ etiam, ut in homine Romano, litteræ: omnia memoriâ tenebat, non domestica solum, sed etiam externa bella: cuius sermone itatum cupide fruebar, quasi jam divinarem id, quod evenit, illo extincto, fore unde discerem neminem. Quorsum igitur hæc tam multa de Maximo? Quia profecto videris, nefas esse dictu, miseram fuisse talem senectutem. Nec tamen omnes possunt esse Scipiones, aut Maximi, ut urbium

bium expugnationes, ut pedestres navalésve pugnas, ut bella à se gesta, ut triumphos recordentur. Est etiam quietè, & purè, & eleganter actæ ætatis placida ac lenis senectus: qualem accepimus Platonis, qui uno & octogesimo anno scribens mortuus est: qualem Isocratis, qui eum librum, qui Panathenæicus inscribitur, quarto & nonagesimo anno scripisse dicitur, vixitque quinquennium postea: cujus magister Leontinus Gorgias, centum & septem complevit annos: neque umquam in suo studio atque opere cessavit: qui, cum ex eo quæreretur, cur tamdiu vellet esse in vita? Nihil habeo, inquit, quod incusem senectutem. Præclarum responsum, & docto homine dignum: sua enim vitia insipientes, & suam culpam in senectutem conferunt: quod non faciebat is, cujus modò mentionem feci, Ennius.

Sicut fortis equus, spatio qui sæpe supremo

Vicit Olympia, nunc senio confectus quiescit.

Equi fortis & victoris senectuti comparat suam: quem quidem probè meminisse potestis. Anno enim undevicesimo post ejus mortem, hi consules, T. Flaminius, & M. Acilius facti sunt: ille autem Cæpione & Philippo iterum consulibus mortuus est: cum ego quidem V & LX annos natus, legem Voconiam voce magnâ & bonis lateribus suasissem. Annos LXX natus, tot enim vixit Ennius, ita ferebat duo, quæ maxima putantur onera, paupertatem & senectutem, ut eis pæne delectari videretur. Etenim, cum contemplor animo, reperio quatuor causas, cur senectus misera videatur: unam, quod advocet à rebus gerendis: alteram, quòd corpus faciat infirmius: tertiam, quòd privet omnibus fere voluptatibus: quartam, quòd haud procul absit à morte. Earum, si placer, causarum quanta quàmque sit justa unaquæque, videamus. A rebus gerendis senectus abstahit? Quibus? an iis, quæ in juventute geruntur & viribus?

ribus? Nullane igitur res sunt seniles, quæ vel infirmis corporibus, animo tamen administrantur? Nihil ergo agebat Q. Maximus? nihil L. Paullus, pater tuus, Scipio, focer optimi viri, filii mei? ceteri senes Fabricii, Curii, Coruncanii, cum remp. consilio & auctoritate defendebant, nihil agebant? Ad App. Claudii senectutem accedebat etiam, ut cæcus esset: tamen is, cum sententia senatus inclinaret ad pacem, & fœdus faciendum cum Pyrrho, non dubitavit dicere illa, quæ veribus persecutus est Ennius:

Quo vobis mentes, rectæ quæ stare solebant

Ante hac, dementes sese flexere viai?

Ceteraque gravissime: notum enim vobis carmen est: & tamen ipsius Appii exstat oratio: atque hanc ille egit septem & decem annos post alterum consularum, cum inter duos consulatus anni decem interfuissent, censorque ante consulatum superiorem fuisset. Ex quo intelligitur, Pyrrhi bello grandem sanè fuisse: & tamen sic a patribus accepimus. Nihil igitur afferunt, qui in re gerenda versari senectutem negant, similisque sunt iis qui gubernatorem in navigando agere nihil dicant, cum alii malos scandant, alii per foros cursent, alii sentinam exhauriant. ille autem clavum tenens quietus sedeat in puppi. Non facit ea quæ juvenes: at vero multo maiora & meliora facit. Non viribus, aut velocitatibus, aut celeritate corporum res magnæ geruntur: sed consilio, auctoritate, sententia: quibus non modo non orbari, sed etiam augeri senectus solet: nisi fortè ego vobis, qui & miles, & tribunus, & legatus, & consul versatus sum in vario genere bellorum, cessare nunc videor, cum bella non gero. At senatui quæ sunt gerenda præscribo, & quomodo: Karthagini malè jam diu cogitanti bellum multò antè denuntio: de qua vereri non ante desinam, quam illam excisam esse cognovero: quam palmam utinam dii immortales

mortales tibi, Scipio, reseruent, ut avi reliquias persequare : cujus a morte hic tertius & tricesimus est annus : sed memoriam illius viri excipient omnes anni consequentes. Anno ante me censorem mortuus est, novem annis post meum consulatum, cum consul iterum, me consule, creatus esset. Num igitur, si ad centesimum annum vixisset, senectutis eum suæ pœniteret ? nec enim excursione, nec saltu, nec eminus hastis, aut cominùs gladiis uteretur : sed consilio, ratione, sententiâ : quæ nisi essent in senibus, non summum consilium majores nostri appellâssent Senatum. Apud Lacedæmonios quidem ii, qui amplissimum magistratum gerunt, ut sunt, sic etiam nominantur senes. Quod si legere, aut audire voletis externa, maximas resp. ab adolescentibus labefactas, a senibus sustentatas, & restitutas reperietis.

Cedo, qui vestram remp. tantam amisistis tam citò ?

sic enim percontanti, ut est in Nævii ludo, respondentur & alia, & hæc in primis,

Proveniebant oratores novi, stulti, adolescentuli.

Temeritas est videlicet florentis ætatis ; prudentia senescentis. At memoria minuitur : credo, nisi eam exerceas, aut si sis natura tardior. Themistocles omnium civium nomina perceperat : num igitur censetis eum, cum ætate processisset, qui Aristides esset, Lysimachum salutare solitum ? Equidem non modo eos novi, qui sunt ; sed eorum patres etiam, & avos : nec sepulcra legens vereor, quod aiunt, ne memoriam perdam : his enim ipsis legendis redeo in memoriam mortuorum : nec vero quemquam senum audivi oblitum, quo loco thesaurum obruisset. Omnia, quæ curant, meminerunt : vadimonia constituta : qui sibi, quibus ipsi debeant. Quid jurisconsulti ? quid pontifices ? quid augures ? quid philosophi senes ? quam multa meminerunt ? manent ingenia senibus, modo permaneat studium, & industria : nec ea solum in claris

claris & honoratis viris, sed in vitâ etiam privatâ, & quietâ. Sophocles ad summam senectutem tragœdias fecit: quod propter studium cum rem familiarem negligere videretur, a filiis in iudicium vocatus est: ut, quemadmodum nostro more malè rem gerentibus patribus, bonis interdici solet; sic illum, quasi desipientem, à re familiari removerent iudices. Tum senex dicitur eam fabulam, quam in manibus habebat, & proximè scripserat, Oedipum Coloneum recitasse iudicibus, quævisseque, num illud carmen desipientis videretur? quo recitato, sententiis iudicum est liberatus. Num igitur hunc, num Homerum, num Hesiodum, num Simonidem, num Stesichorum, num, quos ante dixi, Isocratem, Gorgiam, num philosophorum principes, Pythagoram, Democritum, num Platonem, num Xenocratem, num postea Zenonem, Cleanthem, aut eum, quem vos etiam Romæ vidistis, Diogenem Stoicum, coegit in suis studiis obmutescere senectus? an non in omnibus iis studiorum agitatio vitæ æqualis fuit? Age, ut ista divina studia omittamus, possum nominare ex agro Sabino rusticos Romanos vicinos, & familiares meos, quibus absentibus, numquam ferè ulla in agro maiora opera sunt, non ferendis, non percipiendis, non condendis fructibus. Quamquam in illis minus hoc mirum: nemo enim est tam senex, qui se annum non putet posse vivere: sed iidem elaborant in eis, quæ sciunt nihil omnino ad se pertinere.

Sevit arbores, quæ alteri seculo prosint,

Ut ait Statius noster in Synephebis. Nec vero dubitet agricola, quamvis senex, quærenti, cui serat, respondere: Diis immortalibus, qui me non accipere modo hæc à maioribus voluerunt, sed etiam posteris prodere. Melius Cæcilius de sene alteri seculo prospiciente, quam illud,

*Aedepol senectus, si nihil quidquam aliud vitii
Apportes tecum, cum advenis; unum id sat est,
Quod diu vivendo, multa quæ non vult, videt.*

Et multa fortasse quæ vult: atque in ea quidem,
quæ non vult, sæpe etiam adolescentia incurrit. Il-
lud vero idem Cæcilius vitiosius:

*Tum equidem in senectâ hoc deputo miserrimum,
Sentire eâ atate esse se odiosum alteri.*

Jucundum potius, quam odiosum: ut enim ado-
lescentibus bonâ indole prædiris sapientes senes de-
lectantur, leviôrque fit eorum senectus, qui à ju-
ventute coluntur & diliguntur: sic adolescentes se-
num præceptis gaudent, quibus ad virtutum studia
ducuntur: nec minùs intelligo me vobis, quam
vos mihi esse jucundos. Sed videtis, ut senectus
non modo languida atque iners non sit, verum eti-
am sit operosa, & semper agens aliquid & moli-
ens: tale scilicet, quale cujusque studium in supe-
riore vitâ fuit. Quid, quod etiam addiscunt
aliquid? ut Solonem versibus gloriantem videmus,
qui se quotidie aliquid addiscentem senem fieri di-
cit: ut ego feci, qui Græcas literas senex didici:
quas quidem sic avidè arripui, quasi diuturnam si-
tim explere cupiens, ut ea ipsa mihi nota essent,
quibus me nunc exemplis uti videtis. Quod cum
fecisse Socratem in fidibus audirem, vellem equi-
dem & illud: discebant enim fidibus antiqui: sed
in literis certe elaboravi. Nec nunc quidem vires
desidero adolescentis: is enim erat locus alter de
vitiis senectutis: non plus, quam adolescens tauri,
aut elephantum desiderabam. Quod enim homini na-
turaliter insitum est, eo decet uti: & quicquid agas,
agere pro viribus. Quæ enim vox potest esse contemti-
or quam Milonis Crotoniatæ? qui, cum jam senex
esset, athletasque se in curriculo exercentes videret,
adspexisse lacertos suos dicitur, illachrymansque dix-
isse, At hi quidem jam mortui sunt. Non vero tam isti,
quam tu ipse, nugator: neque enim ex te unquam

es nobilitatus, sed ex lateribus & lacertis tuis. Nihil Sext. Ælius tale, nihil multis annis ante T. Coruncanius: nihil modo P. Crassus: à quibus jura civibus præscribebantur: quorum usque ad extremum spiritum est provecta prudentia. Orator metuo ne languescat senectute: est enim munus ejus non ingenii solum, sed laterum etiam & virium. Omnino canorum illud in voce splendescit etiam nescio quo pacto in senectute: quod equidem adhuc non amisi, & videtis annos: sed tamen est decorus sermo senis quietus & remissus, facitque persæpe ipsa sibi audientiam disertis senis compta & mitis oratio. Quod si ipse exsequi nequeas, possis tamen Scipioni præcipere & Lælio. Quid enim est jucundius senectute stipatâ studiis juventutis? An ne eas quidem vires senectuti relinquemus, ut adolescentulos doceat, instituat, ad omne officii munus instruat? quo quidem opere quid potest esse præclarius? Mihi vero Cn. & P. Scipiones, & avi tui duo, L. Æmilius, & P. Africanus comitatu nobilium juvenum fortunati videbantur: nec ulli bonarum artium magistri non beati putandi, quamvis consenuerint vires, atque defecerint: etsi ista ipsa defectio virium adolescentiæ vitiis efficitur sæpius, quam senectutis: libidinosa etenim & intemperans adolescentia effæctum corpus tradit senectuti. Cyrus quidem apud Xenophontem eo sermone, quem moriens habuit, cum admodum senex esset, negat se umquam sensisse senectutem suam imbecilliores factam, quam adolescentia fuisset. Ego L. Metellum memini puer, qui cum quadriennio post alterum consulatum pontifex maximus factus esset, viginti & duos annos ei sacerdotio præfuit, ita bonis esse viribus extremo tempore ætatis, ut adolescentiam non requireret. Nihil necesse est mihi de me ipso dicere: quamquam est id quidem senile, ætatique nostræ conceditur. Viderisne, ut apud Home-

rum sapissimè Nestor de virtutibus suis prædicer? jam enim tertiam ætatem hominum vivebat: nec erat ei verendum, ne vera de se prædicans nimis videretur aut insolens aut loquax: etenim, ut ait Homerus, ex ejus lingua melle dulcior fluebat oratio: quam ad suavitatem nullis egebat corporis viribus: & tamen dux ille Græciæ nusquam optat, ut Ajacis similes habeat decem, at ut Nestoris: quod si acciderit, non dubitat quin brevi Troja sit peritura. Sed redeo ad me: quartum annum ago & octogesimum: equidem posse vellem idem gloriari, quod Cyrus: sed tamen hoc queo dicere, non me quidem iis esse viribus, quibus aut miles bello Punico, aut quæstor eodem bello, aut consul in Hispaniâ fuerim, aut quadriennio post, cum tribunus militaris depugnavi apud Thermopylas, M. Acilio Glabrione consule: sed tamen, ut vos videris, non planè me enervavit, nec afflixit senectus. Non curia vires meas desiderat, non rostra, non amici, non clientes. non hospites: nec enim umquam sum assensus veteri illi laudatoque proverbio, quod monet, maturè fieri senem, si diu velis esse senex. Ego verò me minus diu senem esse mallet, quam esse senem antè, quam essem. Itaque nemo adhuc convenire me voluit, *quis* fuerim occupatus. At minus habeo virium, quam vestrum utervis. Nec vos quidem T. Pontii Centurionis vires habetis: num idcirco est ille præstantior? moderatio modo virium adsit, & tantum, quantum potest quisque, nitatur; nã ille non magno desiderio tenebimur virium. Olympiæ per stadium ingressus esse Milo dicitur, cum humeris sustineret bovem vivum. Utrum igitur has corporis, an Pythagoræ tibi malis vires ingenii dari? denique isto bono utare, dum adsit: cum absit, ne requiras: si fortè adolescentes pueritiam, paulùm ætate progressi adolescentiam debeant requirere. Cursus est certus ætatis, & una via naturæ,

nisi

L

eaque

eaque simplex : suaq; cuiq; parti ætatis tempesti-
 tas est data ; ut & infirmitas puerorum, & ferocitas
 juvenum, & gravitas jam constantis ætatis, & se-
 nectutis maturitas naturale quiddam habeat, quod
 suo tempore percipi debeat. Arbitror te audire,
 Scipio, hospes tuus avitus Massinissa quæ faciat
 hodie, nonaginta annos natus : cum ingressus iter
 pedibus sit, in equum omnino non adscendere :
 cum equo, ex equo non descendere : nullo imbre,
 nullo frigore adduci, ut capite operto sit : sum-
 mam in eo esse corporis siccitatem : itaque exsequi
 omnia regis officia & munera. Potest igitur ex-
 exercitatio & temperantia etiam senectuti conserva-
 re aliquid pristini roboris. Non sint in senectute
 vires : ne postulantur quidem vires à senectute.
 Ergo & legibus & institutis vacat ætas nostra
 muneribus iis, quæ non possunt sine viribus susti-
 neri : itaque non modo, quod non possumus, sed
 ne quantum possumus quidem, cogimur. At ita
 multi sunt imbecilli senes, ut nullum officii, aut
 omnino vitæ munus exsequi possint. At id qui-
 dem non proprium senectutis est vitium, sed com-
 mune valetudinis. Quàm fuit imbecillus P. Afri-
 cani filius is, qui te adoptavit ? quàm tenui, aut
 nullâ prorsus valetudine ? quod ni ita fuisset, alte-
 rum ille exstitisset lumen civitatis : ad paternam
 enim magnitudinem animi doctrina uberior acce-
 serat. Quid mirum igitur in senibus, si infirmi
 sunt aliquando, cum ne id quidem adolescentes
 effugere possint ? Resistendum, Læli, & Scipio,
 senecturi est, ejusque vitia diligentia compensan-
 da sunt. Pugnandum tamquam contra morbum,
 sic contra senectutem. Habenda ratio valetudi-
 nis : utendum exercitationibus modicis. Tantum cibi
 & potionis adhibendum, ut reficiantur vires, non op-
 primantur. Nec verò corpori soli subveniendum est,
 sed menti, atque animo multo magis. Nam hæc
 quoque, nisi tanquam lumini oleum instilles, ex-
 stin-

stinguuntur senectute ; & corpora quidem defatigatione & exercitatione ingravescent : animi autem exercitando levantur. Nam quos ait Cæcilius — comicos stultos senes, hos significat credulos, obliuiosos, dissolutos : quæ vitia sunt non senectutis, sed inertis, ignavæ, somniculosæ senectutis : ut petulantia, ut libido, magis est adolescentium, quàm senum : nec tamen omnium adolescentium, sed non proborum : sic ista senilis stultitia, quæ deliratio appellari solet, senum levium est, non omnium. Quatuor robustos filios, quinque filias, tantam domum, tantas clientelas Appius regebat & senex, & cæcus. Intantum enim animum, tanquam arcum, habebat, nec languescens succumbebat senectuti. Tenebat non modo auctoritatem, sed etiam imperium in suos : metuebant servi, verebantur liberi ; carum omnes habebant : vigeat in illâ domo patrius mos, & disciplina. Ita enim senectus honesta est, si se ipsa defendit, si jus suum retinet, si nemini emancipata est, si usque ad extremum spiritum vindicet jus suum. Ut enim adolescentem, in quo senile aliquid, sic senem, in quo est adolescentis aliquid, probo : quod qui sequitur, corpore senex esse poterit, animo numquam erit. Septimus mihi Originum liber est in manibus : omnia antiquitatis monumenta colligo : causarum illustrium, quascunque defendi, nunc quam maximè conficio orationes ; jus augurum, pontificum, civile tracto : multum etiam Græcis litteris utor : Pythagoreorumque more exercendæ memoriæ gratiâ, quid quoque die dixerim, audierim, egerim, commemoro vesperi. Hæ sunt exercitationes ingenii, hæc curricula mentis : in his desudans atque elaborans corporis vires non magnopere desidero. Adsum amicis : venio in senatum frequens, ultroque assero res multum & diu cogitatas ; easque tueor animi, non corporis viribus : quæ si exsequi ne-

quirem, tamen me lectulus oblectaret meus ea ipsa cogitantem, quæ jam agere non possem : sed ut possim, facit acta vita. Semper enim in his studiis, laboribusque viventi non intelligitur, quando obrepat senectus. Ita sensim sine sensu ætas senescit : nec subito frangitur ; sed diuturnitate extinguitur. Sequitur tertia vituperatio senectutis, quod eam carere dicunt voluptatibus. O præclarum munus ætatis, si quidem id aufert nobis, quod est in adolescentia vitiosissimum ! Accipite enim, optimi adolescentes, veterem orationem Archytæ Tarentini, magni in primis, & præclari viri ; quæ mihi tradita est, cum essem adolescens Tarenti cum Q. Maximo. Nullam capitaliorem pestem, quam corporis voluptatem, hominibus dicebat à naturâ datam : cujus voluptatis avidæ libidines temere, & effrenatæ ad potiundum incitantur. Hinc patriæ proditioes, hinc rerumpeverfiones, hinc cum hostibus clandestina colloquia nasci : nullum denique scelus, nullum malum facinus esse, ad quod suscipiendum non libido voluptatis impelleret : stupra vero, & adulteria, & omne tale flagitium nullis illecebris excitari aliis, nisi voluptatis. Cumque homini sive natura, sive quis deus nihil mente præstabilius dedisset ; huic divino muneri ac dono nihil esse tam inimicum, quam voluptatem. Nec enim libidine dominante temperantiæ locum esse, neque omnino in voluptatis regno virtutem posse consistere. Quod quod magis intelligi posset, fingere animo jubebat, tantâ incitatum aliquem voluptate corporis, quantâ percipi possit maximâ. Nemini censebat fore dubium, quin tamdiu, dum ita gauderet, nihil agitare mente, nihil ratione, nihil cogitatione consequi posset. Quocirca nihil esse tam detestabile, tamque pestiferum, quam voluptatem : si quidem ea, cum major esset atque longior, omne animi lumen exstingeret. Hæc cum C. Pontio Sam-

nite,

nite, patre ejus, à quo, Caudino prælio Sp. Postumius, T. Veturius, consules, superati sunt, locutum Archytam, Nearchus Tarentinus, hospes noster, qui in amicitia populi Rom. permanerat, se à majoribus natu accepisse dicebat, cum quidem ei sermoni interfuisset Plato Atheniensis : quem Tarentum venisse, L. Camillo, Appio Claudio consulibus reperio. Quorsum hæc : ut intelligatis, si voluptatem aspernari ratione & sapientia non possemus, magnam habendam senectuti gratiam, quæ efficeret, ut id non liberet, quod non oporteret. Impedit enim consilium voluptas, rationi inimica est, ac mentis, ut dicam, præstringit oculos, nec habet ullum cum virtute commercium. Invitus quidem feci, ut fortissimi viri T. Flaminini fratrem L. Flamininum è senatu ejicerem, septem annis post, quam consul fuisset : sed notandam putavi libidinem. Ille enim cum esset Consul in Gallia, exoratus in convivio à scorto est, ut secuti feriret aliquem eorum, qui in vinculis essent damnati rei capitalis. Hic Tito fratre suo censore, qui proximus ante me fuerat, elapsus est : mihi vero & Flaccone utiquam probari potuit tam flagitiosa & tam perdita libido, quæ cum probro privato conjungeret imperii dedecus. Sæpe audiivi à majoribus natu, qui se porro pueros à senibus audisse dicebant, mirari solitum C. Fabricium, quod cum apud regem Pyrrhum legatus esset, audisset à Thessalo Cyneâ, esse quendam Athenis, qui se sapientem profiteretur : eumque dicere, omnia quæ faceremus ad voluptatem esse referenda : quod ex eo audientes, M. Curium, & T. Coruncanium optare solitos, ut id Samnitibus, ipsique Pyrrho persuaderetur : quo facilius vinci possent, cum se voluptatibus dedissent. Vixerat M. Curius cum P. Decio, qui quinquennio ante eum consulem se pro rep. quarto consulatu devoverat. Nôrat eundem Fabricius, nôrat Coruncanius : qui cum ex

sua vita, tum ex ejus, quem dico, P. Decii facto,
 judicabant esse profecto aliquid naturâ pulchrum
 atq; præclarum, quod sua sponte peteretur, quodq;
 spretâ & contemptâ voluptate optimus quisque se-
 queretur. Quorsum igitur tam multa de volup-
 tate? Quia non modo vituperatio nulla, sed etiam
 summa laus senectutis est, quod ea voluptates
 nullas magnopere desiderat: caret epulis, extructif-
 que mensis, & frequentibus poculis: caret ergo
 etiam vinolentiâ, & cruditate, & insomniis. Sed
 si aliquid dandum est voluptati, quoniam ejus blan-
 ditiis non facile obsistimus (divinè enim Plato
 escam malorum voluptatem appellat, quod ea vi-
 delicet homines capiantur, ut hamo pisces) quam-
 quam immoderatis epulis careat senectus, modi-
 cis tamen conviviis delectari potest. C. Duillium,
 M. filium, qui Poenos classe primus devicerat,
 redeuntem à cœnâ senem sæpe videbam puer, de-
 lectabatur crebro funali, & tibicine, quæ sibi
 nullo exemplo privatus sumserat: tantum licen-
 tiæ dabat gloria. Sed quid ego alios? ad meip-
 sum jam revertar. Primum habui semper sode-
 les. Sodalitates autem me quæstore constitutæ sunt,
 sacris Idæis Magnæ Matris acceptis: epulabar
 igitur cum sodalibus omnino modicè, sed erat
 quidam fervor ætatis: qua progrediente, omnia
 fient indies mitiora: neque enim ipsorum con-
 viviorum delectationem voluptatibus corporis ma-
 gis, quam coetu amicorum & sermonibus, metie-
 bar. Bene enim majores nostri accubitionem epu-
 larem amicorum, quia vitæ conjunctionem habe-
 ret, convivium nominarunt, melius, quam Græci:
 qui hoc idem tum comotationem, tum concena-
 tionem vocant: ut, quod in eo genere minimum
 est, id maximè probare videantur. Ego vero prop-
 ter sermonis delectationem tempestivis quoque
 conviviis delector, nec cum æqualibus solum, qui
 pauci admodum restant, sed cum vestrâ etiam

æ tate,

ætate, atque vobiscum : habeoque senectuti mag-
 nam gratiam, quæ mihi sermonis aviditatem auxit,
 potionis & cibi sustulit. Quod si quem etiam ista
 delectant, ne omnino bellum indixisse videar vo-
 luptati, cujus est fortasse quidam naturalis *modus*, *motus*
 non intelligo, ne in istis quidem voluptatibus ip-
 sis, carere sensu senectutem. Me vero & magiste-
 ria delectant à majoribus instituta : & is sermo,
 qui more majorum à summo adhibetur in poculis :
 & pocula, sicut in symposio Xenophontis, minuta
 atque rorantia, & refrigeratio æstate, & vicissim
 aut sol, aut ignis hibernus : quæ quidem in Sabi-
 nis etiam persequi soleo, conviviumque vicinorum
 quotidie compleo, quod ad multam noctem, quàm
 maxime possumus, vario sermone producimus.
 At non est voluptatum tanta quasi titillatio in se-
 nibus. Credo : sed ne desideratio quidem : nihil
 autem molestum, quod non desideres. Bene So-
 phocles, cum ex eo quidam jam affecto ætate
 quæreretur, utereturne rebus venereis? Dii melio-
 ra, inquit : libenter vero istinc, tamquam à do-
 mino agresti ac furioso profugi. Cupidis enim re-
 rum talium odiosum & molestum est fortasse ca-
 rere : satiatis vero & expletis jucundius est carere,
 quam frui : quamquam non caret is, qui non de-
 siderat. Ego, *hæc* non desiderare dico esse jucun-
 dius. Quod si istis ipsis voluptatibus bona ætas
 fruitur libentius : primum parvulis fruitur rebus,
 ut diximus ; deinde iis, quibus senectus, si non a-
 bunde potitur, non omnino caret : ut Turpione
 Ambivio magis delectatur, qui in prima caveâ
 spectat : delectatur tamen etiam qui in ultima :
 sic adolescentia voluptates prope intuens magis
 fortasse lætatur : sed delectatur etiam senectus pro-
 cul eas spectans tantum, quantum sat est. At
 illa quanti sunt, animum tamquam emeritis stipen-
 diis libidinis, ambitionis, contentionis, inimici-
 tiarum, cupiditarum omnium, secum esse, secum-

L 4

que,

Ergo non desiderare, dico esse jucundius,
 quam frui —

que, ut dicitur, vivere? si vero habet aliquid tamquam pabulum studii atque doctrinæ, nihil est otiosâ senectute jucundius. Mori videbamus in studio dimetiendi pæne cœli, atque terræ C. Gallum, familiarem patris tui, Scipio: quoties illum lux noctu aliquid describere ingressum, quoties nox oppressit, cum manè cœpisset? quam delectabatur eum, defectiones solis & lunæ multò ante nobis prædicere? Quid in levioribus studiis, sed tamen acutis! quam gaudebat bello suo Punico Nævius! quam Truculento Plautus! quam Pseudolo! vidi etiam senem Livium: qui cum sex annos antè, quam ego natus sum, fabulam ^{scripsisset} docuisset, Centone Tuditanoque consulibus, usque ad adulescentiam meam processit ætate. Quid de P. Licinii Crassi & pontificii, & civilis juris studio loquar? aut de hujus P. Scipionis, qui his paucis diebus pontifex maximus factus est? Atqui eos omnes, quos commemoravi, his studiis flagrantes senes vidimus. M. vero Cethegum, quem rectè Suadæ medullam dixit Ennius, quanto studio exerceri in dicendo videbamus, etiam senem? Quæ sunt igitur epularum, aut ludorum, aut scortorum voluptates cum his voluptatibus comparandæ? Atque hæc quidem studia doctrinæ: quæ quidem prudentibus, & bene institutis pariter cum ætate crescunt: ut honestum illud Solonis sit, quod ait versiculo quodam, ut antè dixi, senescere se multa indies addiscentem: qua voluptate animi nulla certe potest esse major. Venio nunc ad voluptates agricolarum, quibus ego incredibiliter delector: quæ nec ullâ impediuntur senectute, & mihi ad sapientis vitam proximè videntur accedere: habent enim rationem cum terra, quæ numquam recusat imperium, nec umquam sine usurâ reddit, quod accepit: sed alias minore, plerumque majore cum scœnore: quamquam me quidem non fructus modo, sed etiam ipsius terræ

vis ac natura delectat : quæ cum gremio mollito
 ac subactō semen sparsum excepit, primum id
 occurratū cohibet ; ex quo occasio, quæ hoc ef-
 ficat, nominata est : deinde tepesactum vapore &
 compressu suo diffundit, & elicit herbescentem ex
 eo viriditatem : quæ nixa fibris stirpium sensim
 adolescit, culmōque erecta geniculato, vaginis jam
 quasi pubescens includitur, è quibus cum emerse-
 rit, fundit frugem, spicū ordine structam, & con-
 tra avium minorum morsus munitur vallo arista-
 rum. Quid ego vitium satus, ortus, incrementa
 commemorem ? satiari delectatione non possum,
 ut meæ senectutis requietem oblectamentaque per-
 moscatis. Omitto enim vim ipsam omnium, quæ
 generantur è terrâ : quæ ex fici tantulo grano, aut
 ex acino, vinaceo, aut ex ceterarum frugum ac stir-
 pium minutissimis seminibus tantos truncos ramōs-
 que procreat : malleoli, plantæ, sarmenta, vivi-
 radices, propagines, nōne ea efficiunt, ut quemvis
 cum admiratione delectent ? Vitis quidem, quæ
 natura caduca est, & nisi fulta sit, ad terram
 fertur ; eadem, ut se erigat claviculis suis, qua-
 si manibus, quidquid est nacta, complectitur :
 quam serpentem multiplici lapu & erratico ferro
 amputans coercet ars agricolarum, ne silvescat
 sarmentis, & in omnes partes nimia fundatur.
 Itaque ineunte vere in iis, quæ relicta sunt, ex-
 sistit tanquam ad articulos sarmentorum ea quæ
 gemma dicitur : à quo oriens uva sese ostendit :
 quæ & succo terræ, & calore solis augescens
 primo est peracerba gustatu, deinde maturata dul-
 cescit ; vestitæque pampinis, nec modico te-
 pore caret, & nimios solis defendit ardores, qua
 quid potest esse cum fructu lætius, tum adspectu
 pulchrius ? cujus quidem non utilitas me solum,
 ut antè dixi, sed etiam cultura, & ipsa natura de-
 lectat : adminiculorum ordines, capitum jugatio,
 religatio & propagatio vitium ; sarmentorūque
 ea,

ea, quam dixi, aliorum amputatio, aliorum immissio. Quid ego irrigationes? Quid solles agri, repastinationesque proferam, quibus fit multo terra fecundior? Quid de utilitate loquar stercorandi? dixi in eo libro, quem de rebus rusticis scripsi: de qua doctus Hesiodus ne verbum quidem fecit, cum de cultura agri scriberet. At Homerus, qui multis, ut mihi videtur, ante saeculis fuit, Laertem lenientem desiderium, quod capiebat e filio, colentem agrum, & eum stercorantem facit. Nec vero segetibus solum, & pratis, & vineis, & arbuſtis res rusticae laetae sunt; sed etiam hortis & pomariis: tum pecudum pastu, apium examinibus, florum omnium varietate. Nec conſitiones modo delectant, sed etiam insitiones: quibus nihil invenit agricultura sollertius. Possum persequi multa oblectamenta rerum rusticarum: sed ea ipsa, quae dixi, fuisse sentio longiora. Ignoscetis autem, nam & studio rerum rusticarum provectus sum, & senectus est natura loquacior: ne ab omnibus eam vitiis videar vindicare. Ergo in hac vita M. Curius, cum de Samnitibus, de Sabinis, de Pyrrho triumphasset, consumsit extremum tempus aetatis: cuius quidem villam ego contemplans, abest enim non longe a me, admirari satis non possum vel hominis ipsius continentiam, vel temporum disciplinam. Curio ad focum sedenti magnum auri pondus Samnites cum attulissent, repudiati ab eo sunt: non enim aurum habere praclarum sibi videri dixit; sed iis qui haberent aurum, imperare. Poteratne tantus animus non jucundam efficere senectutem? Sed venio ad agricolas, ne a meipso recedam. In agris erant tum senatores, id est, senes. Siquidem aranti L. Quinctio Cincinnato nuntiatum est, eum dictatorem esse factum: cuius dictatoris jussu magister equitum C. Servilius Ahala Sp. Maelium regnum appetentem, occupatum interemit. A villa in senatum arcessebantur & Curius, & ceteri senes:

ex quo, qui eos arcessiebant, viatores nominati sunt: num igitur horum senectus miserabilis fuit, qui se agri cultione oblectabant? Meâ quidem sententiâ haud scio, an ulla beatior esse possit: neque solum officio, quòd hominum generi universo cultura agrorum est salutaris: sed & delectatione, quam dixi, & saturitate copiâque omnium rerum, quæ ad victum hominum, ad cultum etiam deorum pertinent: ut quoniam hæc quidam desiderant, in gratiam jam cum voluptate redeamus. Semper enim boni assiduâque domini referta cella vinaria, olearia, etiam penaria est, villâque tota locuples est: abundat porco, hædo, agno, gallinâ, lacte, caseo, melle. Jam hortum ipsi agricolæ succidiam alteram appellant. Conditiora facit hæc supervacaneis operis aucupium atque venatio. Quid de pratorum viriditate, aut arborum ordinibus, aut vinearum olivetorumque specie dicam? Brevi præcudam. Agro bene culto nil potest esse nec usu uberior, nec specie ornatus: ad quem frucundum non modo non retardat, verum etiam invitât atque allectat senectus. Ubi enim potest illa ætas aut calefcere vel apricatione melius, vel igni: aut vicissim umbris aquisve refrigerari salubrius? Sibi igitur habeant arma, sibi equos, sibi hastas, sibi clavam, sibi pilam, sibi natationes & cursus: nobis senibus ex lusionibus multis talos relinquant & reseras: id ipsum utrum lubebit: quoniam sine his beata esse senectus potest. Multas ad res perutiles Xenophontis libri sunt: quos legite, quæso, studiose, ut facitis: quam copiose ab eo agricultura laudatur in eo libro, qui est de tuenda re familiari, qui Oeconomicus inscribitur? Atque ut intelligatis, nihil ei tam regale videri, quam studium agri colendi, Socrates in eo libro loquitur cum Critobulo, Cyrum minorem, regem Persarum, præstantem ingenio atque imperii gloriâ, cum Lysander Lacedæmonius, vir summæ virtutis, venisset ad eum Sardis, eique

eique dona à sociis attulisset: & ceteris in rebus
 comem erga Lysandrum atque humanum fuisse,
 & ei quendam conseptum agrum, diligenter
 consitum ostendisse: cum autem admiraretur
 Lysander & proceritates arborum, & directos in
 quincuncem ordines, & humum subactam atque
 puram, & suavitatem odorum, qui afflarentur è floribus:
 tum dixisse, mirari se non modo diligentiam,
 sed etiam sollertiam ejus, à quo essent illa
 dimensa atque descripta: & ei Cyrum respondisse:
 atqui ego omnia ista sum dimensus; mei sunt
 ordines, mea descriptio; multæ etiam istarum
 arborum meâ manu sunt satæ. Tum Lysandrum
 intuentem ejus purpuram & nitorem corporis,
 ornatumque Persicum multo auro multisque
 gemmis, dixisse: Rectè verò te, Cyre, beatum
 ferunt, quoniam virtuti tuæ fortuna conjuncta
 est. Hac igitur fortunâ frui licet senibus: nec
 ætas impedit, quo minus & ceterarum rerum,
 & imprimis agri colendi studia teneamus usque
 ad ultimum tempus senectutis. Marcum quidem
 Valerium Corvum accepimus ad centesimum annum
 vitam perduxisse, cum esset acta jam ætate in agris,
 eosque coleret: cujus inter primum & sextum
 consulatum sex & quadraginta anni interfuerunt:
 itaque quantum spatium ætatis majores nostri
 ad senectutis initium esse voluerunt, tantus illi
 cursus honorum fuit: atque ejus extrema ætas
 hoc beatior, quam media, quod auctoritatis plus
 habebat, laboris vero minus. Apex autem
 senectutis est auctoritas. Quanta fuit in
 L. Cæcilio Metello? quanta in Atilio Calatino?
 in quem illud elogium unicuique, plurimæ
 consentiunt gentes, populi primum fuisse
 virum: notum est carmen incisum in sepulchro.
 Jure igitur gravis, cujus de laudibus omnium
 esset fama consentiens. Quem virum P. Cras-
 sum, nuper pontificem maximum, quem postea
 M. Lepidum eodem sacerdotio præditum, vidi-
 mus?

mus? Quid de Paulo, aut Africano loquar? aut, ut jam ante, de Maximo? quorum non in sententiâ solum, sed etiam in nutu residebat auctoritas. Habet senectus, honorata præsertim, tantam auctoritatem, ut ea pluris sit, quam omnes adolescentiæ voluptates. Sed in omni oratione mementote, eam me laudare senectutem, quæ fundamentis adolescentiæ constituta sit. Ex quo id efficitur, quod ego magno quondam cum assensu omnium dixi: miseram esse senectutem, quæ se oratione defenderet: non cani, non rugæ repente auctoritatem arripere possunt: sed honeste acta superior ætas fructus capit auctoritatis extremos. Hæc enim ipsa sunt honorabilia, quæ videntur levia atque communia, salutari, appeti, decedi, assurgi, deduci, reduci, consuli: quæ & apud nos, & in aliis civitatibus, ut quæque optimè morata, ita diligentissimè observantur. Lysandrum Lacedæmonium, cujus modo mentionem feci, dicere aiunt solitum, Lacedæmone esse honestissimum domicilium senectutis: nusquam enim tantum tribuitur ætati, nusquam est senectus honoratior. Quin etiam memoriæ proditum est, cum Athenis, ludis, quidam in theatrum grandis natu venisset, in magno confessu locum ei à suis civibus nusquam datum: cum autem ad Lacedæmonios accessisset, qui cum legati essent, certo in loco confederant, consurrexisse omnes, & senem illum sessum recepisse: quibus cum à cuncto confessu plausus esset multiplex datus, dixisse ex iis quendam, Athenienses scire quæ recta essent, sed facere nolle. Multa in nostro collegio præclara: sed hoc, de quo agimus, imprimis, quod, ut quisque ætate antecedit, ita sententiæ principatum tenet: neque solum honore antecedentibus, sed iis etiam, qui cum imperio sunt, majores natu augures anteponuntur. Quæ sunt igitur voluptates corporis cum auctoritatis præmiis comparandæ? quibus
2 qui

qui splendide usi sunt, ii mihi videntur fabulam ætatis peregisse, nec, tamquam inexercitati histriones, in extremo actu corruisse. At sunt morosi, & anxii, & iracundi, & difficiles senes, si quærimus, etiam avari: sed hæc morum vitia sunt, non senectutis. At morositas tamen, & ea vitia, quæ dixi, habent aliquid excusationis, non illius quidem justæ, sed quæ probari posse videatur: contemni se putant, despici, illudi. Præterea in fragili corpore odiosa omnis offensio est: quæ tamen omnia dulciora fiunt & moribus bonis & artibus: idque tum in vitâ, tum in scenâ intelligi potest ex iis fratribus, qui in Adelphis sunt: quanta in altero duritas, in altero comitas! Sic se res habet: ut enim non omne vinum, sic non omnis ætas vetustate coacescit: severitatem in senectute probo, sed eam, sicut alia, modicam: acerbitatem nullo modo: avaritia vero senilis quid sibi velit non intelligo: potest enim quidquam esse absurdius, quam quo minus viæ restat, eo plus viatici quærere? Quarta restat causa, quæ maxime angere atque sollicitam habere nostram ætatem videtur, appropinquatio mortis, quæ certè à senectute non potest longè abesse. O miserum senem, qui mortem contemnendam esse in tam longa ætate non viderit! quæ aut planè negligenda est, si omnino extinguit animum; aut etiam optanda, si aliquo eum deducit, ubi sit futurus æternus. Atqui tertium certè nihil inveniri potest. Quid igitur timeam, si aut non miser post mortem, aut beatus etiam futurus sum? quamquam quis est tam stultus, quamvis sit adolescens, cui sit exploratum, se ad vesperum esse victurum? quin etiam ætas illa multo plures quam nostra mortis casus habet: facilius in morbos incidunt adolescentes; gravius ægrotant; tristiùs curantur: itaque pauci veniunt ad senectutem: quod ni ita accideret, melius & prudentius viveretur: mens enim & ratio,

tio, & consilium in senibus est : qui si nulli fuissent, nullæ omnino civitates essent. Sed redeo ad mortem impendentem : quod illud est crimen senectutis, cum illud videatis cum adolescentia esse commune ? sensi ego cum in optimo filio meo, tum in expectatis ad amplissimam dignitatem fratribus tuis, Scipio, omni ætati mortem esse communem. At sperat adolescens, diu se victurum : quod sperare idem senex non potest. Insipienter sperat : quid enim stultius, quam incerta pro certis habere, falsa pro veris ? Senex, ne quod speret quidem, habet. At est eo meliore conditione quam adolescens, cum id, quod ille sperat, hic jam consecutus est. Ille vult diu vivere : hic diu vixit. Quamquam, ò dii boni ! quid est in hominis vita diu ? da enim supremum tempus : expectemus Tarreftiorum regis ætatem : fuit enim, ut scriptum video, Arganthonius quidam Gadibus, qui octoginta regnavit annos, centum & viginti vixit. Sed mihi ne diuturnum quidem quidquam videtur, in quo est aliquid extremum : cum enim id advenit, tunc illud, quod præterit, effluit : tantum remanet, quod virtute & recte factis consecutus sis. Horæ quidem cedunt, & dies, & menses, & anni : nec præteritum tempus umquam revortitur, nec, quid sequatur, sciri potest. Quod cuique temporis ad vivendum datur, eo debet esse contentus. Neque enim histrioni, ut placeat, peragenda est fabula, modò, in quocumque fuerit actu, proberur ; neque sapienti usque ad plaudite vivendum : breve enim tempus ætatis satis est longum ad bene honestèque vivendum. Sin processeris longius, non magis dolendum est, quam agricolæ dolent, præterita verni temporis suavitate, æstatem auctumnūque venisse. Ver enim, tanquam adolescentiam significat, ostenditque fructus futuros : reliqua tempora demerendis fructibus & percipiendis accommodata sunt : fructus autem senectutis

nectutis est, ut sæpe dixi, antè partorum bonorum memoria & copia. Omnia vero, quæ secundum naturam sunt, sunt habenda in bonis: quid est autem tam secundum naturam, quam senibus emori? Quod idem contingit adolescentibus, adversante & repugnante naturâ. Itaque adolescentes mori sic mihi videntur, ut cum aquæ multitudine vis flammæ opprimitur: senes autem, sicut sua sponte, nulla adhibita vi, consumtus ignis exstinguitur: & quasi poma ex arboribus, cruda si sint, vi aveluntur; si matura & costâ, decidunt: sic vitam adolescentibus vis aufert, senibus maturitas: quæ mihi quidem tam jucunda est, ut, quo propius ad mortem accedam, quasi terram videre videar, aliquandoque in portum ex longa navigatione esse venturus. Omnium ætatum certus est terminus: senectutis autem nullus certus est terminus: rectèque in eâ vivitur, quoad munus officii exsequi & tueri possis, & tamen mortem contemnere: ex quo fit, ut animosior etiam senectus sit, quam adolescentia, & fortior. Hoc illud est, quod Pisistrato tyranno à Solone responsum est: cum illi quærenti, Qua tandem spe fretus sibi tam audacter oblisteret? respondisse dicitur, Senectute. Sed vivendi finis est optimus, cum integrâ mente ceterisque sensibus, opus ipsa suum eadem, quæ coagmentavit, natura dissolvit. Ut navem, ut ædificium idem destruit facillimè, qui construxit: sic hominem eadem optimè, quæ conglutinavit, natura dissolvit. jam omnis conglutinatio recens ægrè, inveterata facillè, divellitur: ita fit, ut ille breve vitæ reliquum nec avidè appetendum senibus, nec sine causa deferendum sit: vetâtque Pythagoras injussu imperatoris, id est, dei, de præsidio & statione vitæ decedere. Solonis quidem sapientis elogium est, quo se negat velle suam mortem dolore amicorum & lamentis vacare: vult, credo, se esse carum suis. Sed haud scio an melius Ennius:

Nemo me lacrymis decoret, neque funera fletu Faxit.

Non censet lugendam esse mortem, quam immortalitas consequatur. Jam sensus moriendi aliquis esse potest, isque ad exiguum tempus, præsertim seni: post mortem quidem sensus aut optandus, aut nullus est. Sed hoc meditatum ab adolescentiâ debet esse, mortem ut negligamus: sine qua meditatione, tranquillo esse animo nemo potest: moriendum enim certè est: & id incertum, an eo ipso die. Mortem igitur omnibus horis impendentem timens, quî poterit animo consistere? de qua non ita longâ disputatione opus esse videtur, cum recorder, non solum Brutum, qui in liberanda patriâ est interfectus: non duos Decios, qui ad voluntariam mortem cursum equorum incitaverunt: non M. Atilium, qui ad supplicium est profectus, ut fidem hosti datam conservaret: non duos Scipiones, qui iter Pœnis vel corporibus suis obstruere voluerunt: non avum tuum L. Paullum, qui morte luit collegæ in Cannensi ignomiâ temeritatem: non M. Marcellum, cujus interitum ne crudelissimus quidem hostis honore sepulturæ carere passus est: sed legiones nostras, quod scripsi in Originibus, in eum sæpe locum profectas alacri animo & erecto, unde se numquam redituras arbitrarentur. Quod igitur adolescentes, & ii quidem non solum indocti, sed etiam rustici contemnunt, id docti senes extimescent? Omnino, ut mihi quidem videtur, studiorum omnium satietas vitæ facit satietatem. Sunt pueritiæ certa studia, num igitur ea desiderant adolescentes? sunt & ineuntis adolescentiæ, num ea constans jam requirit ætas, quæ media dicitur? sunt etiam hujus ætatis, nec ea quidem quærentur à senectute: sunt extrema quædam studia senectutis: ergo, ut superiorum ætatum studia occidunt, sic occidunt etiam senectutis. Quod cum evenit, satietas vitæ tempus

M

maturum

Nemo

maturum mortis affert. Equidem non video, cur, quid ipse sentiam de morte, non audeam vobis dicere: quod eo melius mihi cernere videor, quo ab ea propius absum. Ego vestros patres, P. Scipio, tuque, C. Læli, viros clarissimos, mihiq̃ue amicissimos, vivere arbitror: & eam quidem vitam, quæ est sola vita nominanda. Nam, dum sumus in his inclusi compagibus corporis, munere quodam necessitatis, & gravi opere perfungimur. Est enim animus cœlestis ex altissimo domicilio depressus & quasi demersus in terram, locum divinæ naturæ æternitatique contrarium. Sed credo deos immortales sparsisse animos in corpora humana, ut essent, qui terras tuerentur, quique cœlestium ordinem contemplantes, imitarentur eum vitæ modo atque constantiâ. Nec me solum ratio ac disputatio impulit, ut ita crederem: sed nobilitas etiam summorum philosophorum & auctoritas. Audiebam Pythagoram, Pythagoreosque, incolas pæne nostros, qui essent Italici philosophi quondam nominati, numquam dubitasse, quin ex universa mente divinâ delibatos animos haberemus. Demonstrabantur mihi præterea quæ Socrates supremo vitæ die de immortalitate animorum disseruisset, is, qui esset omnium sapientissimus oraculo Apollinis judicatus. Quid multa? sic mihi persuasi, sic sentio, cum tanta celeritas animorum sit, tanta memoria præteritorum, futurorumque prudentia, tot artes, tantæ scientiæ, tot inventa, non posse eam naturam, quæ res eas contineat, esse mortalem: cùmque semper agitur animus, nec principium motus habeat, quia se ipse moveat, ne finem quidem habiturum esse morus, quia numquam se ipse sit relicturus: & cum simplex animi natura esset, neque haberet in se quidquam admistum dispar sui atque dissimile, non posse eum dividi: quod si non possit, non posse interire: magnoque esse argumento, homi-

nes scire pleraque antè, quam nati sint, quod jam pueri, cum artes difficiles discant, ita celeriter res innumerabiles arripiant, ut eas non tum primum accipere videantur, sed reminisci, & recordari. Hæc Plato noster. Apud Xenophontem autem moriens Cyrus major, hæc dicit. Nolite arbitrari, ô mihi carissimi filii, me, cum à vobis discessero, nusquam, aut nullum fore. Nec enim, dum eram vobiscum, animum meum videbatis: sed eum esse in hoc corpore, ex iis rebus, quas gerebam, intelligebatis. Eundem igitur esse creditote, etiam si nullum videbitis. Nec vero clarorum virorum post mortem honores permanerent, si nihil eorum ipsorum animi efficerent, quò diutius memoriam sui tuerentur. Mihi quidem numquam persuaderi potuit, animos, dum in corporibus essent mortalibus, vivere: cum exissent ex iis, emori: nec vero tum animum esse insipientem, cum ex insipienti corpore evasisset: sed cum omni admixtione corporis liberatus, purus & integer esse cœpisset, tum esse sapientem. Atque etiam, cum hominis natura morte dissolvitur, ceterarum rerum perspicuum est quo quæque discedant: abeunt enim illuc omnia, unde orta sunt: animus autem solus, nec cum adest, nec cum discedit, apparet. Jam vero videtis, nihil esse mortis tam simile, quam somnum. Atqui dormientium animi maximè declarant divinitatem suam: multa enim cum remissi & liberi sunt, futura prospiciunt. Ex quo intelligitur, quales futuri sint, cum se planè corporis vinculis relaxaverint. Quare, si hæc ita sunt, sic me colitote ut deum. Si una est interiturus animus cum corpore, vos tamen deos verentes, qui hanc omnem pulchritudinem tuentur & regunt, memoriam nostri piè inviolatèque servabitis. Cyrus quidem hæc moriens. Nos, si placet, nostra videamus. Nemo unquam mihi, Scipio, persuadebit, aut patrem

tuum Paullum, aut duos avos, Paullum & Africanum, aut Africani patrem, aut patruum, aut multos præstantes viros, quos enumerare non est necesse, tanta esse conatos, quæ ad posteritatis memoriam pertinerent: nisi animo cernerent, posteritatem ad se pertinere. An censes, ut de me ipso aliquid more senum glorier, me tantos labores diurnos, nocturnosque domi militiæque susceptorum fuisse, si iisdem finibus gloriam meam, quibus vitam essem terminaturus? Nónne melius multo fuisset, otiosam ætatem & quietam sine ullo labore & contentione traducere? Sed nescio quomodo animus erigens se posteritatem semper ita prospiciebat, quasi, cum excessisset è vitâ, tum denique victurus esset. Quod quidem ni ita se haberet, ut animi immortales essent, haud optimi cujusque animus maximè ad immortalitatis gloriam niteretur. Quid, quod sapientissimus quisque æquissimo animo moritur, stultissimus iniquissimo? Nónne vobis videtur animus is, qui plus cernat & longius, videre se ad meliora proficisci: ille autem, cui obtusior sit acies, non videre? Equidem efferor studio patres vestros, quos colui & dilexi, videndi: neque vero eos solos convenire aveo, quos ipse cognovi; sed illos etiam, de quibus audiivi & legi, & ipse conscripsi. Quo quidem me proficiscentem haud sanè quis facile retraxerit, neque tanquam Peliam recoxerit. Quod si quis deus mihi largiatur, ut ex hac ætate repuerascam, & in cunis vagiam, valde recusem: nec verò velim, quasi decurso spatio, ad carceres à calce revocari. Quid enim habet vita commodi? Quid non potius laboris? Sed habeat sane; habet certè tamen aut satietatem, aut modum. Non lubet enim mihi deplorare vitam, quod multi, & ii docti, sæpe fecerunt: neque me vixisse pœnitet; quoniam ita vixi, ut non frustra me natum existimem: & ex vitâ ita discedo, tamquam ex hospiti-

tio, non tanquam ex domo : commorandi enim natura diversorium nobis, non habitandi dedit. O præclarum diem, cum ad illud divinum animorum concilium cætumque proficiscar, cumque ex hac turbâ & colluvione discedam ! proficiscar enim non ad eos solum viros, de quibus antè dixi ; sed etiam ad Catonem in eum, quo nemo vir melior natus est, nemo pietate præstantior ; cujus à me corpus crematum est : quod contra decuit ab illo meum. Animus verò non me deferens, sed respectans, in ea profectò loca discessit, quo mihi ipsi cernebat esse veniendum. Quem ego meum casum fortiter ferre visus sum : non quod æquo animo ferrem ; sed me ipse consolabar, existimans, non longinquum inter nos digressum & discessum fore. His mihi rebus, Scipio, (id enim te cum Lælio admirari solere dixisti) levis est senectus, nec solum non molesta, sed etiam jucunda. Quod si in hoc erro, quòd animos hominum immortales esse credam, lubenter erro : nec mihi hunc errorem, quo delector, dum vivo, extorqueri volo. Sin mortuus, ut quidam minuti philosophi censent, nihil sentiam ; non vereor ne hunc errorem meum mortui philosophi irrideant. Quòd si non sumus immortales futuri, tamen extinguì homini suo tempore optabile est. Nam habet natura, ut aliarum omnium rerum, sic vivendi modum. Senectus autem peractio ætatis est tamquam fabulæ ; cujus defatigationem fugere debemus, præsertim adjuncta satietate. Hæc habui de senectute quæ dicerem : ad quam urinam perveniatis ; ut ea, quæ ex me audistis, re experti probare possitis.



M. TULLII CICERONIS
LÆLIUS:

SIVE

De AMICITIA Dialogus,
Ad T. Pomponium Atticum, Præfatio.



Uintus Mucius augur multa narrare de C. Lælio, focero suo, memoriter & jucundè solebat; nec dubitare illum in omni sermone appellare sapientem. Ego autem à patre ita eram deductus ad Scævola, sumptâ virili togâ, ut, quoad possem & liceret, à senis latere numquam discederem. Itaq; multa ab eo prudenter disputata, multa etiam breviter & commodè dicta memoriæ mandabam; fierique studebam ejus prudentiâ doctior. Quo mortuo, me ad pontificem Scævola contuli, quem unum nostræ civitatis & ingenio, & justitiâ præstantissimum audeo dicere. Sed de hoc aliàs; nunc redeo ad augurem. Cum sæpe multa narraret, tum memini, domi in hemicyclo sedentem, ut solebat, cum & ego essem unâ, & pauci admodum familiares, in eum sermonem illum incidere, qui tum ferè omnibus erat in ore. Meministi enim profecto, ut opinor, Attice, & eo magis, quòd P. Sulpitio utebare multum, cum is tribunus pl. capitali odio à Q. Pompeio, qui tum erat consul, dissideret, quo-

cum conjunctissime & amantissime vixerat, quanta hominum esset vel admiratio, vel querela. Itaque tum Scævola, cum in eam ipsam mentionem incidisset, exposuit nobis sermonem Lælii de amicitia, habitum ab illo secum, & cum altero genero C. Fannio, Marci filio, paucis diebus post mortem Africani. Ejus disputationis sententias memoria mandavi, quas hoc libro exposui meo arbitrato. Quasi enim ipsos induxi loquentes, ne, inquam, & inquit, sæpius interponerentur: atque ut tamquam à præsentibus coram haberi sermo videretur. Cum enim sæpe mecum ageres, ut de amicitia scriberem aliquid, digna mihi res cum omnium cognitione, tum nostrâ familiaritate visa est. Itaque feci non invitus, ut prodessem multis tuo rogatu. Sed ut in Catone Majore, qui est scriptus ad te de senectute, Catonem induxi senem disputantem; quia nulla videbatur aptior persona, quæ de illa ætate loqueretur, quam ejus, qui & diutissime senex fuisset, & in ipsa senectute præ ceteris floruisset: sic, cum accepissemus à patribus maxime memorabilem C. Lælii & P. Scipionis familiaritatem fuisse, idonea mihi Lælii persona visa est, quæ de amicitia ea ipsa differeret, quæ disputata ab eo meminisset magister meus Scævola. Genus autem hoc sermonum, positum in hominum veterum auctoritate, & eorum illustrium, plus nescio quo pacto videtur habere gravitatis. Itaque ipse mea legens, sic afficior interdum, ut Catonem, non me, loqui existimem. Sed ut tum ad senem senex de senectute, sic hoc libro ad amicum amicissimus de amicitia scripsi. Tum est Cato locutus, quo erat nemo ferè senior temporibus illis, nemo prudentior: nunc Lælius & sapiens, sic enim est habitus, & amicitie gloria excellens, de amicitia loquitur. Tu velim animum à me parumper avertas, Lælium loqui ipsum putes. C. Fannius & Q. Mucius

ad focerum veniunt post mortem Africani. Ab his sermo oritur. Respondet Lælius : cuius tota disputatio est de amicitia ; quam legens tu te ipse cognosces. *Fannius*. Sunt ista, Læli : nec enim melior vir fuit Africano quisquam, nec clarior. Sed existimare debes, omnium oculos in te esse coniectos : unum te sapientem & appellant & existimant. Tribuebatur hoc modo M. Catoni. Scimus L. Atilium apud patres nostros appellatum esse sapientem. Sed uterque alio quodam modo : Atilius, quia prudens esse in jure civili putabatur ; Cato, quia multarum rerum usum habebat : multa ejus & in senatu & in foro vel provisâ prudenter, vel acta constanter, vel responsa acutè ferebantur. Propterea, quasi cognomen jam habebat in senectute sapientis. Te autem alio quodam modo, non solum naturâ & moribus, verum etiam studio & doctrinâ esse sapientem : nec sicut vulgus, sed ut eruditi solent appellare sapientem, qualem in tota Græcia neminem. Nam qui septem appellantur, eos, qui ista subtilius quærent, in numero sapientium non habent. Athenis unum accepimus, & eum quidem etiam Apollinis oraculo sapientissimum judicatum. Hanc esse in te sapientiam existimant, ut omnia tua in te posita ducas, humanosque casus virtute inferiores putes. Itaque ex me quærent, credo item ex te, Scævola, quonam pacto mortem Africani feras ; eoque magis, quod his proximis Nonis, cum in hortos D. Bruti auguris, commentandi causâ, ut assolet, venissemus, tu non adfuisti ; qui diligentissimè semper illum diem, & illud munus solitus esses obire. *Scævola*. Quærent quidem, C. Læli, multi, ut est à Fannio dictum : sed ego id respondeo, quod animadverti, te dolorem, quem acceperis cum summi viri, tum amicissimi morte, ferre moderatè : nec potuisse non commoveri, nec fuisse id humanitatis tuæ. Quod autem his Nonis in nostro collegio non adfuisses,

in-

invaliditudinem causæ, non mœstitiam fuisse. *Lal.*
Rectè tu quidem, Scævola, & verè: nec enim
ab isto officio, quod semper usurpavi cum valerem,
abduci incommodo meo debui: nec ullo casu arbi-
tror hoc constanti homini posse contingere, ut ulla
intermissio fiat officii. Tu autem, Fanni, qui mihi
tantum tribui dicis, quantum ego nec agnosco,
nec postulo, facis amicè: sed ut mihi videris,
non rectè judicas de Catone: aut enim nemo, quod
quidem magis credo, aut si quisquam, ille sa-
piens fuit. Quomodo enim, ut alia omittam,
mortem filii tulit? memineram Paullum, videram
Gallum: sed hi in pueris; Cato in perfecto &
spectato viro. Quamobrem cave Catoni anteponas
ne istum quidem ipsum, quem Apollo, ut ais, sa-
pientissimum judicavit: hujus enim facta, illius
dicta laudantur. De me autem, ut jam cum utro-
que loquar, sic habetote. Ego si Scipionis deside-
rio me moveri negem, quam id rectè faciam, vi-
derint sapientes; sed certè mentiar: moveor enim
tali amico orbarus, qualis, ut arbitror, nemo um-
quam erit: & ut confirmare possum, nemo cer-
te fuit. Sed non egeo medicina: me ipse consolor,
& maximè illo solatio, quod eo errore careo, quo
amicorum decessu plerique angi solent. Nihil enim
mali accidisse Scipioni puto: mihi accidit, si quid
accidit: suis autem incommodis graviter angi, non
amicum, sed seipsum amantis est. Cum illo verò
quis neget actum esse præclare? nisi enim, quod
ille minime putabat, immortalitatem optare vel-
let, quid non est adeptus, quod homini fas esset
optare? qui summam spem civium, quam de eo
jam puero habuerant, continuo adolescens incre-
dibili virtute superavit: qui consulatum perivit
numquam, factus est consul bis, primum ante tem-
pus: iterum sibi suo tempore, reip. pæne serò:
qui duabus urbibus everfis, inimicissimis huic
imperio, non modo præsentia, verum etiam fu-
tura

tura bella delevit. Quid dicam de moribus facil-
limis? de pietate in matrem? liberalitate in so-
rores? bonitate in suos? justitiâ in omnes? no-
ta sunt vobis: quam autem civitati carus fuerit,
mœrore funeris indicatum est. Quid igitur hunc
paucorum annorum accessio juvare potuisset? se-
nectus enim quamvis non sit gravis, ut memini
Catonem anno antè quam mortuus est, mecum,
& cum Scipione differere, tamen aufert eam vi-
riditatem, in qua etiamnum erat Scipio. Quam-
obrem vita quidem talis fuit, vel fortunâ, vel
gloriâ, ut nihil posset accedere: moriendi autem
sensus celeritas abstulit. Quo de genere mortis
difficile dictu est: quid homines suspicentur, vi-
deris. Hoc tamen verè licet dicere, P. Scipioni,
ex multis diebus, quos in vitâ celeberrimos læ-
rissimósque videris, illum diem clarissimum fuisse,
quo senatu dimisso, domum reductus ad vespe-
rum est à patribus conscriptis, à P. R. sociis &
Latinis, pridie quam excessit è vitâ: ut ex tam
alto dignitatis gradu ad superos videatur Deos po-
tius, quam ad inferos pervenisse: neque enim as-
sentior iis, qui hæc nuper differere cœperunt, cum
corporibus simul animos interire, atque omnia
morte deleri. Plus apud me antiquorum auctoritas
valet, vel nostrorum majorum, qui mortuis tam
religiosa jura tribuerunt: quod non fecissent pro-
fecto, si nihil ad eos pertinere arbitrarentur: vel
eorum, qui in hac terra fuerunt, magnamque Græ-
ciam, quæ nunc quidem deleta est, tum flore-
bat, institutis & præceptis suis erudierunt: vel e-
jus, qui Apollinis oraculo sapientissimus est judica-
tus: qui non tum hoc, tum illud, ut in plerisque,
sed idem dicebat semper, animos hominum esse di-
vinos: iisque, cum è corpore excessissent, reditum
in cælum patere, optimoque & justissimo cuique
expeditissimum. Quod item Scipioni videbatur,
qui quidem quasi præ sagiret, perpaucis ante mor-

tem diebus, cum & Philus, & Manilius adessent, & alii plures, tūque etiam Scævola mecum venisses, triduum differuit de republicâ: cujus disputationis fuit extremum ferè de immortalitate animorum: quæ se in quiete per visum ex Africano audisse dicebat. Id si ita est, ut optimi cuiusque animus in morte facillimè evolet tamquam è custodiâ vinculisque corporis; cui censemus cursum ad deos faciliorem fuisse, quam Scipioni? quocirca mœrere hoc ejus eventum, vereor ne invidi magis quam amici sit. Sin autem illa veriora, ut idem interitus sit animorum & corporum, nec ullus sensus maneat; ut nihil boni est in morte, sic certè nihil mali: sensu enim amisso, fit idem, quasi natus non esset omnino: quem tamen esse natum & nos gaudemus, & hæc civitas, dum erit, lætabitur. Quamobrem cum illo quidem, ut suprà dixi, actum optimè est; mecum incommodius: quem fuerat æquius, ut prius introieram in vitam, sic prius exire de vita. Sed tamen recordatione nostræ amicitiae sic fruor, ut beatè vixisse videar, quia cum Scipione vixerim: quocum mihi conjuncta cura de re publicâ & de privatâ fuit, quocum & domus & militia communis: & id, in quo est omnis vis amicitiae, voluntatum, studiorum, sententiarum summa consensus. Itaque non tam ista me sapientiae, quam modo Fannius commemoravit, fama delectat, falsa præsertim, quàm quod amicitiae nostræ memoriam spero sempiternam fore. Idque mihi eo magis est cordi, quod ex omnibus sæculis vix tria aut quatuor nominantur paria amicorum: quo in genere sperare videor Scipionis & Lælii amicitiam notam posteritati fore. *Fannius.* Istuc quidem, Læli, ita necesse est: sed, quoniam amicitiae mentionem fecisti, & sumus otiosi, pergratum mihi feceris, spero item Scævolæ, si, quemadmodum soles de ceteris rebus, cum ex te quærentur; sic de amicitia

amicitiâ [disputâris, quid sentias, qualem existi-
mes, quæ præcepta des. *Scæv.* Mihi vero per-
gratum erit: atque, idipsum cum tecum agere
conarer, Fannius antevertit: quamobrem utri-
que nostrum gratum admodum feceris. *Læl.* Ego
vero non gravarer, si mihi ipse considerem: nam
& præclara res est, & sumus, ut dixit Fannius,
otiosi: sed quis ego sum? aut quæ in me est facul-
tas? doctorum est ista consuetudo, eaque Græ-
corum, ut iis ponatur de quo disputent quamvis
subito. Magnum opus est, egétque exercitatione
non parvâ. Quamobrem quæ disputari de amici-
tiâ possunt, ab eis censeo petatis, qui ista profiten-
tur: ego vos hortari tantum possum, ut amicitiam
omnibus rebus humanis anteponatis: nihil est enim
tam naturæ aptum, tam conveniens ad res vel
secundas, vel adversas. Sed hoc primum sentio,
nisi in bonis amicitiam esse non posse: neque id ad
vivum refeco, ut illi, qui hæc subtilius disserunt,
fortasse verè, sed ad communem utilitatem pa-
rum: negant enim quemquam virum bonum esse,
nisi sapientem. Sit ita sanè: sed eam sapientiam
interpretantur, quam adhuc mortalis nemo est
consecutus: nos autem ea, quæ sunt in usu vitæ
que communi, non ea, quæ finguntur, aut op-
tantur, spectare debemus. Numquam ego dicam,
C. Fabricium, M. Curium, T. Coruncanium,
quos sapientes nostri majores judicabant, ad isto-
rum normam fuisse sapientes. Quare sibi habeant
sapientiæ nomen & invidiosum & obscurum:
concedantque, ut hi boni viri fuerint. Ne id qui-
dem facient: negabunt, id, nisi sapienti, posse con-
cedi. Agamus igitur pingui Minervâ, ut aiunt.
Qui ita se gerunt, ita vivunt, ut eorum probetur
fides, integritas, æqualitas, liberalitas; nec sit
in illis ulla cupiditas, vel libido, vel audacia;
sintque magna constantia, ut ii fuerunt, modo
quos nominavi; hos viros bonos, ut habiti sunt,

fic

sic etiam appellandos putemus; quia sequantur, quantum homines possunt, naturam, optimam bene videndi ducem. Sic enim mihi perspicere videor, ita natos esse nos, ut inter omnes esset societas quædam: major autem, ut quisque proximè accederet. Itaque cives potiores, quam peregrini: & propinqui, quam alieni. cum his enim amicitiam natura ipsa peperit: sed ea non satis habet firmitatis. Namque hoc præstat amicitia propinquitati, quod ex propinquitate benevolentia tolli potest, ex amicitia non potest: sublata enim benevolentia, amicitia nomen tollitur, propinquitatis manet. Quanta autem vis amicitia sit, ex hoc intelligi maxime potest: quod ex infinita societate generis humani, quam conciliavit ipsa natura, ita contracta res est & adducta in angustum, ut omnis caritas aut inter duos, aut inter paucos jungeretur. Est autem amicitia nihil aliud nisi omnium divinarum humanarumque rerum cum benevolentia & caritate summa consensus: qua quidem haud scio, an, excepta sapientia, quicquam melius homini sit a diis immortalibus datum. Divitias alii præponunt, bonam alii valitudinem, alii potentiam, alii honores, multi etiam voluptates: belluarum hoc quidem extremum est: illa autem superiora caduca & incerta, posita non tam in nostris consiliis, quam in fortunæ temeritate. Qui autem in virtute summum bonum ponunt, præclare illi quidem: sed hæc ipsa virtus amicitiam & gignit & continet: nec sine virtute amicitia esse ullo pacto potest. Jam virtutem ex consuetudine vitæ sermonisque nostri interpretemur: nec eam, ut quidam docti, verborum magnificentiam metiamur: virosque bonos eos, qui habentur, numeremus, Paullos, Catones, Gallos, Scipiones, Philos. His communis vita contenta est. eos autem omittamus, qui omnino nusquam reperiuntur. Tales igitur inter viros amicitia tantas

opportunitates habet, quantas vix queo dicere. Principio, cui potest esse vita vitalis, ut ait Ennius, qui non in amici mutuâ benevolentîâ conquiescat? Quid dulcius, quam habere, quicum omnia audeas sic loqui, ut tecum? Quis esset tantus fructus in prosperis rebus, nisi haberes, qui illis æquè, ac tu ipse, gauderet? adversas vero ferre difficile esset sine eo, qui illas gravius etiam, quam tu, ferret: denique ceteræ res, quæ expetuntur, opportunæ sunt singulæ rebus ferè singulis: divitiæ, ut utare; opes, ut colare; honores, ut laudare; voluptates, ut gaudeas; valetudo, ut dolore careas, & muneribus fungare corporis. Amicitia res plurimas continet: quoquo te verteris, præsto est, nullo loco excluditur, numquam intempestiva, numquam molesta est. Itaque non aqua, non igni, ut aiunt, pluribus locis utimur, quam amicitîâ. Neque ego nunc de vulgari, aut de mediocri, quæ tamen ipsa & delectat, & prodest, sed de verâ, & perfectâ loquor, qualis eorum, qui pauci nominantur, fuit; nam & secundas res splendidiore facit amicitia, & adversas partiens comunicansque leviores. Cùmque plurimas & maximas commoditates amicitia contineat, tum illa nimirum præstat omnibus, quod bonam spem prælucet in posterum: nec debilitari animos, aut cadere patitur. Verum etiam amicum qui intuetur, tamquam exemplar aliquod intuetur sui: quocirca & absentes adsunt, & agentes abundant, & imbecilles valent, &, quod difficilius dictu est, mortui vivunt: tantus eos honos, memoria, desiderium prosequitur amicorum: ex quo illorum beata mors videtur: horum vita laudabilis. Quod si exemeris ex naturâ rerum benevolentiae junctionem: nec domus ulla, nec urbs stare poterit: ne agri quidem cultus permanebit. Id si minus intelligitur, quanta vis amicitiae concordiaeque sit, ex dissensionibus, atque discordiis

discordiis percipi potest. Quæ enim domus tam stabilis, quæ tam firma civitas est, quæ non odiis atque diffidiis funditus possit everti? ex quo quantum boni sit in amicitia judicari potest. Agri-
gentinum quidem, doctum quendam virum carmi-
nibus Græcis vaticinatum ferunt, quæ in re-
rum naturâ totoque mundo constarent, quæque
moverentur, ea contrahere amicitiam, dissipare
discordiam. Atque hoc quidem omnes mortales &
intelligunt & re probant. Itaque, si quando ali-
quod officium existit amici in periculis aut adeun-
dis, aut communicandis, quis est, qui id non
maximis efferat laudibus? Qui clamores totâ caveâ
nuper in hospitis & amici mei, M. Pacuvii, novâ
fabulâ, cum ignorante rege, uter eorum esset O-
restes, Pilades Orestem se esse diceret, ut pro illo
necaretur: Orestes autem, ita ut erat, Orestem se
esse perseveraret? Stantes plaudebant in re fictâ:
quid arbitramur in verâ fuisse facturos? facile in-
dicabat ipsa natura vim suam: cum homines, quod
facere ipsi non possent, id rectè fieri in altero judi-
carent. Hactenus mihi videor, de amicitia quid
sentirem, potuisse dicere. Siqua præterea sunt, cre-
do autem esse multa, ab iis, si videbitur, qui ista
disputant, quæritote. *Fann.* Nos autem à te po-
tius: quamquam etiam ab istis sæpe quæsi, &
audi, non invitum equidem: sed aliud quoddam
expetimus filum orationis tuæ. *Scæv.* Tum magis
id diceres, Fanni, si nuper in hortis Scipionis, cum
est de Republica disputatum, affuisses. Qualis tum
patronus justitiæ fuit contra accuratam orationem
Phili! *Fann.* Facile id quidem fuit justitiam justis-
simo viro defendere. *Scæv.* Quid amicitiam? Nón-
ne facile ei erit, qui ob eam summâ fide, constantiâ,
justitiâque servatam, maximam gloriam ceperit?
Lal. Vim hoc quidem est asserre: quid enim re-
fert, qua me rogatione cogatis? cogitis certè: stu-
diis enim generorum, præsertim in re bonâ, cum
difficile

difficile est, tum ne æquum quidem, obfistere. Sæpissime igitur mihi de amicitia cogitanti maxime illud considerandum videri solet, num propter imbecillitatem atque inopiam desiderata sit amicitia : ut dandis recipiundisque meritis, quod quisque minus per se ipse posset, id acciperet ab alio, vicissimque redderet : an esset hoc quidem proprium amicitiae ; sed antiquior & pulchrior, & magis à natura ipsa profecta alia causa. Amor enim, ex quo amicitia nominata, princeps est ad benevolentiam conjungendam. Nam utilitates quidem etiam ab iis percipiuntur sæpe, qui simulatione amicitiae coluntur, & observantur causâ temporis. In amicitia autem nihil fictum, nihil simulatum ; &, quidquid in ea est, id & verum & voluntarium est. Quapropter à natura mihi videtur potius, quam ab indigentia orta amicitia, & applicatione magis animi cum quodam sensu amandi, quam cogitatione, quantum illa res utilitatis esset habitura. Quod quidem quale sit, etiam in bestiis quibusdam animadverti potest : quæ ex se natos ita amant ad quoddam tempus, & ab eis ita amantur, ut facile earum sensus appareat : quod in homine multo est evidentius. Primum ex eâ caritate, quæ est inter natos & parentes : quæ dirimi nisi detestabili scelere non potest. Deinde cum similis sensus existit amoris, si aliquem nati sumus, cujus cum moribus & naturâ congruamus, quod in eo quasi lumen aliquod probitatis & virtutis perspicere videamur. Nihil est enim amabilius virtute, nihil, quod magis alliciat ad diligendum : quippe cum propter virtutem & probitatem eos etiam, quos numquam vidimus, quodam modo diligamus. Quis est, qui C. Fabricii, M. Curii non cum caritate aliquâ benevolâ memoriam usurpet, quos numquam viderit ? Quis autem est, qui Tarquinium Superbum, qui Sp. Cassium, Sp. Mælium non oderit ? Cum duobus ducibus de imperio in

Italia

Italia decertatum, Pyrrho, & Hannibale. Ab altero, propter probitatem ejus, non nimis alienos animos habemus : alterum propter crudelitatem semper hæc civitas oderit. Quod si tanta vis probitatis est, ut eam vel in eis, quos numquam vidimus, vel, quod majus est, in hoste etiam diligamus; quid mirum, si animi hominum moveantur, cum eorum, quibuscum usu conjuncti esse possunt, virtutem & bonitatem perspicere videantur? Quamquam confirmatur amor & beneficio accepto, & studio perspecto, & consuetudine adjunctâ; quibus rebus ad illum primum motum animi & amoris adhibitis, admirabilis quædam exardescit benevolentia magnitudo : quam si qui putant ab imbecillitate proficisci, ut sit, per quem quisque assequatur, quod desideret; humilem sanè relinquunt, & minimè generosum, ut ita dicam, ortum amicitia, quam ex inopia atque indigentia natam volunt. Quod si ita esset; ut quisque valetudinis minimum in se esse arbitraretur, ita ad amicitiam esset aptissimus: quod longè secus est. Ut enim quisque sibi plurimum confidit, & ut quisque maxime virtute & sapientia sic munitus est, ut nullo egeat, suaque omnia in seipso posita judicet, ita in amicitia expetendis colendisque maxime excellit. Quid enim Africanus indigens mei? Minimè hercle: ac ne ego quidem illius: sed ego admiratione quadam virtutis ejus, ille vicissim opinione fortasse nonnullâ, quam de meis moribus habebat, me dilexit: auxit benevolentiam consuetudo. Sed quamquam utilitates multæ & magnæ consecutæ sunt, non sunt tamen ab earum spe causæ diligendi profectæ. Ut enim benefici liberalesque sumus, non ut exigamus gratiam (neque enim beneficium sœneramur) sed naturâ propensi ad liberalitatem sumus; sic amicitiam non spe mercedis adducti, sed quod omnis ejus fructus in ipso amore inest, expetendam putamus. Ab iis qui

pecudum ritu ad voluptatem omnia referunt, longè dissentimus. Nec mirum : nihil enim altum, nihil magnificum ac divinum suspicere possunt, qui suas omnes cogitationes abjecerunt in rem tam humilem, tamque contemptam. Quamobrem hos quidem ab hoc sermone removeamus : ipsi autem intelligamus, naturâ gigni sensum diligendi, & benevolentiae caritatem, factâ significatione probitatis ; quam qui appetiverunt, applicant sese & propius admovent, ut & usu ejus, quem diligere cæperunt, fruantur, & moribus ; sintque pares in amore & æquales, propensioresque ad bene merendum, quam ad reposcendum. Atque hæc inter eos sit honesta certatio. Sic & utilitates ex amicitia maximæ capientur ; & erit ejus ortus à natura, quàm ab imbecillitate, & gravior & verior. Nam si utilitas amicitias conglutinaret, eadem commutata dissolveret. Sed quia natura mutari non potest, idcirco veræ amicitiae sempiternæ sunt. Ortum quidem amicitiae videtis, nisi quid ad hæc forte vultis. *Fann.* Tu verò perge, Læli : pro hoc enim, qui minor est natu, meo jure respondeo. *Scæv.* Rectè tu quidem. Quamobrem audiamus. *Lal.* Audite ergo, optimi viri, ea quæ sæpissimè inter me & Scipionem de amicitia differebantur. Quamquam ille quidem nihil difficilius esse dicebat, quam amicitiam usque ad extremum vitæ diem permanere : nam vel ut non idem expediret utrique incidere sæpe ; vel ut de rep. non idem sentirent : mutari etiam mores hominum sæpe dicebat, alias adversis rebus, alias ætate ingravescente. Atque earum rerum exemplum ex similitudine capiebat ineuntis ætatis, quod summi puerorum amores sæpe unâ cum prætexta ponerentur. Sin autem ad adolescentiam perduxissent ; dirimi tamen interdum contentione vel uxoriæ conditionis, vel commodi alienjus, quod idem adipisci uterque non posset.

Quod

Quod si qui longius in amicitia provecti essent, tamen sæpe labefactari, si in honoris contentionem incidissent : pestem enim majorem esse nullam in amicitiiis, quam in plerisq; pecuniæ cupiditatem; in optimis quibusque honoris certamen & gloriæ: ex quo inimicitias maximas sæpe inter amicissimos extitisse. Magna enim dissidia, & plerumque justa nasci, cum aliquid ab amicis, quod rectum non esset, postularetur, ut aut libidinis ministri, aut adjuutores essent ad injuriam. Quod qui recusarent, quamvis honestè id facerent, jus tamen amicitiae deferere arguerentur ab iis, quibus obsequi nollent: illos autem, qui quidvis ab amico auderent postulare, postulatione ipsa profiteri, omnia se amici causâ esse facturos: eorum querelâ inveterata non modo familiaritates exstingui solere, sed etiam odia gigni sempiterna. Hæc ita multa, quasi fata, impendere amicitiiis, ut omnia subterfugere non modo sapientiæ, sed etiam felicitatis diceret sibi videri. Quamobrem id primùm videamus, si placeat, quatenus amor in amicitia progredi debeat. Num, si Coriolanus habuit amicos, ferre contra patriam arma illi cum Coriolano debuere? num Viscellinum amici regnum appetentem, num Sp. Mælium debuerunt juvare? Ti. quidem Gracchum remp. vexantem, à Qu. Tuberone, æqualibusque amicis derelictum videbamus. At C. Blossius Cumanus, hospes familiæ vestræ, Scævola, cum ad me, qui aderam Lænati & Rupilio consulibus in consilio, deprecaturum venisset, hanc, ut sibi ignoscerem, causam afferebat, quod tanti Ti. Gracchum fecisset, ut, quidquid ille vellet, sibi faciendum putaret. Tum ego; Etiamne, si te in Capitolium faces ferre vellet? Numquam inquit, voluisset id quidem. Sed si voluisset? Paruisssem. Videtis, quam nefaria vox: & hercle ita fecit, vel plus etiam quàm dixit. Non enim paruit ille Ti. Gracchi temeritati, sed præfuit: nec

se comitem illius furoris, sed ducem præbuit. Itaque hac amentia, quæstione nova perterritus, in Asiam profugit, ad hostes se contulit, pœnas reipub. graves justasque persolvit. Nulla est igitur excusatio peccati, si amici causâ peccaveris. Nam cum conciliatrix amicitia virtutis opinio fuerit, difficile est amicitiam manere, si à virtute defeceris. Quod si rectum statuerimus, vel concedere amicis quidquid velint, vel impetrare ab iis quidquid velimus, perfecta quidem sapientia sumus, si nihil habeat res vitii: sed loquimur de iis amicis, qui ante oculos sunt, quos videmus, aut de quibus memoriam accepimus, aut quos novit vita communis. Ex hoc numero nobis exempla sumenda sunt; & eorum quidem maximè, qui ad sapientiam proximè accedunt. Videmus Papum Æmilium C. Lusino familiarem fuisse (sic à patribus accepimus) bis una consules, & collegas in censura: tum & cum iis, & inter se conjunctissimos fuisse, M. Curium, & T. Coruncanium, memoria proditum est. Igitur ne suspicari quidem possumus, quemquam horum ab amico quippiam contendisse, quod contra fidem, contra jusjurandum, contra remp. esset. Nam hoc quidem in talibus viris quid attinet dicere? si contendisset, scio impetraturum non fuisse, cum illi sanctissimi viri fuerint: æquè autem nefas sit, tale aliquid & facere rogatum, & rogare. At verò Ti. Gracchum sequebantur C. Carbo, C. Cato, & minimus tum quidem Caius frater, nunc idem acerrimus. Hæc igitur lex in amicitia sancitur, ut neque rogemus res turpes, nec faciamus rogati. Turpis enim excusatio est, & minimè accipienda, cum in ceteris peccatis, tum si quis contra remp. se amici causa fecisse fateatur. Etenim eo loco, Fanni, & Scævola, locati sumus, ut nos longè prospicere oporteat futuros casus reip. Deflexit enim jam aliquantulum de spatio curriculoque consuetudo majorum. T. Gracchus regnum

regnum occupare conatus est, vel regnavit is quidem paucos menses. Num quid simile pop. R. audierat, aut viderat? Hunc etiam post mortem secuti amici & propinqui quid in P. Nasicam Scipionem effecerint, sine lachrymis non queo dicere: nam Carbonem quoquo modo potuimus, propter recentem pœnam T. Gracchi, sustinuisse. De C. Gracchi autem tribunatu, quid exspectem, non libet augurari. Serpit deinde res, quæ proclivius ad perniciem, cum semel cœpit, labitur. Videtis in tabellâ jam ante quanta sit facta labe, primo Gabinîa lege, biennio autem post Cassiâ. Videre jam videor populum à senatu disjunctum: multitudinisque arbitrio res maximas agi. Plures enim dicent, quemadmodum hæc fiant, quam quemadmodum his resistatur. Quorsum hæc? Quia sine sociis nemo quidquam tale conatur. Præcipiendum est igitur bonis, ut, si in ejusmodi amicitiiis ignari casu aliquo inciderint, ne existiment, ita se alligatos, ut ab amicis magna aliqua re in remp. peccantibus non discedant: improbis autem pœna statuenda est: nec vero minor iis, qui sequuti erunt alterum, quam iis, qui ipsi fuerint impietatis duces. Quis clarior in Græciâ Themistocle? Quis potentior? Qui, cum imperator bello Persico servitute Græciam liberasset, proptérque invidiam in exilium pulsus esset, ingratae patriæ injuriâ non tulit, quam ferre debuit. Fecit idem quod xx annis antè apud nos fecerat Coriolanus. His adjutor contra patriam inventus est nemo: itaque mortem sibi uterque conscivit. Quare talis improborum consensus non modo excusatione amicitiae tegenda non est, sed potius omni supplicio vindicanda: ut ne quis sibi concessum putet amicum vel bellum patriæ inferentem sequi. Quod quidem, ut res cœpit ire, haud scio, an aliquando futurum sit. Mihi autem non minori curæ est, qualis respub. post mortem

meam futura sit, quam qualis hodie sit. Hæc igitur prima lex amicitiae sanciat, ut ab amicis honesta petamus, amicorum causâ honesta faciamus: ne expectemus quidem, dum rogemur: studium semper adsit, cunctatio absit: consilium vero dare gaudeamus liberè: plurimum in amicitia amicorum bene suadentium valeat auctoritas: eaque & adhibeatur ad monendum non modo aperte, sed etiam acriter, si res postulabit: & adhibita pareatur. Nam quibusdam, quos audio sapientes habitos in Græcia, placuisse opinor mirabilia quædam. Sed nihil est quod illi non persequantur suis argutiis: partim fugiendas esse nimias amicitias, ne necesse sit unum sollicitum esse pro pluribus: satis superque esse sibi suarum cuique rerum: alienis nimis implicari molestum esse: commodissimum esse, quam laxissimas habenas habere amicitiae; quas vel adducas cum velis, vel remittas: caput enim esse ad beatè vivendum securitatem: qua frui non possit animus, si tanquam parturiat unus pro pluribus. Alios autem dicere aiunt multo etiam inhumanius, quem locum breviter perstrinxi paullo antè, præsidii adjumentique causa, non benevolentiae, neque caritatis, amicitias esse expetendas. Itaque ut quisque minimum firmitatis habeat, minimumque virium, ita amicitias appetere maximè. Ex eo fieri, ut mulierculæ magis amicitiarum præsidia quærant, quam viri; & inopes, quam opulenti; & calamitosi, quam ii, qui putentur beati. O præclaram sapientiam! Solem enim è mundo tollere videntur, qui amicitiam è vitâ tollunt: quâ à diis immortalibus nihil melius habemus, nihil jucundius. Quæ est enim ista securitas? Specie quidem blanda, sed reapse multis locis repudianda. Neque enim est consentaneum, ullam honestam rem actionemve, ne sollicitus sis, aut non suscipere, aut susceptam deponere. Quod si curam fugimus, virtus fugienda est; quæ ne-

J
cesse

cesse est, cum aliquâ curâ res sibi contrarias aspernetur atque oderit; ut bonitas malitiam, temperantia libidinem, ignaviam fortitudo. Itaque videas rebus injustis justos maximè dolere, imbecillibus fortes, flagitiosis modestos. Ergo hoc proprium est animi bene constituti, & lætari bonis rebus, & dolere contrariis. Quamobrem si cedit in sapientem animi dolor, (qui profectò cedit, nisi ex ejus animo extirpatam humanitatem arbitremur,) quæ causa est, cur amicitiam funditus tollamus è vitâ, ne aliquas propter eam suscipiamus molestias? Quid enim interest, motu animi sublato, non dico inter hominem & pecudem, sed inter hominem & saxum, aut truncum, aut quidvis generis ejusdem? neque enim sunt isti audiendi, qui virtutem duram, & quasi ferream esse volunt; quæ quidem est, cum multis in rebus, tum in amicitia, tenera atque tractabilis: ut & bonis amici quasi diffundatur, & incommodis contrahatur. Quamobrem angor iste, qui pro amico sæpe capiendus est, non tantum valet, ut tollat è vitâ amicitiam: non plus, quam ut virtutes, quia nonnullas curas & molestias afferunt, repudientur. Cum autem contrahat amicitiam, ut suprà dixi, si qua significatio virtutis eluceat, ad quam se similis animus applicet & adjungat; id cum contingit, amor ibi exoriatur necesse est. Quid enim tam absurdum, quam delectari multis inanibus rebus, ut honore, ut gloriâ, ut ædificio, ut vestitu, cultûque corporis: animo autem virtute prædito, eo, qui vel amare, vel, ut ita dicam, redamare possit, non admodum delectari? nihil est enim remuneratione benevolentiae, nihil vicissitudine studiorum officiorumque jucundius. Quod si etiam illud addimus, quod rectè addi potest, nihil esse, quod ad se rem ullam tam illiciat & tam adtrahat, quam ad amicitiam similitudo: concedatur profectò verum esse, ut bonos boni diligant, adscif-

adsciscântque sibi quasi propinquitate conjunctos
atque naturâ. Nihil est enim appetentius similitum
sui, nihil rapacius, quam natura. Quamobrem
hoc quidem, Fanni, & Scævola, constat, ut o-
pinor, bonis inter bonos quasi necessariam bene-
volentiam esse : qui est amicitiae fons à naturâ
constitutus. Sed eadem bonitas etiam ad multitu-
dinem pertinet. Non est enim inhumana virtus, ne-
que immunis, neque superba : quæ etiam popu-
los universos tueri, eisque optimè consulere so-
leat : quod non faceret profectò, si à caritate
vulgi abhorreret. Atque etiam mihi quidem vi-
dentur, qui utilitatis causâ fingunt amicitias, ama-
bilissimum nodum amicitiae tollere. Non enim
tam utilitas parta per amicum, quam amici amor
ipse delectat : tumque illud sit, quod ab amico
est profectum, jucundum, si cum studio est pro-
fectum : tantumque abest, ut amicitiae propter in-
digentiam colantur, ut ii, qui opibus & copiis,
maximèque virtute præditi, in qua plurimum est
præsidii, minimè alterius indigeant, liberalissimi
sint & beneficentissimi. Atque haud scio, an ne
opus sit quidem, nihil umquam omnino deesse
amicis. Ubi enim studia nostra viguissent, si num-
quam consilio, numquam opera nostra nec domi,
nec militiæ Scipio eguisset ? Non igitur utilita-
tem amicitia, sed utilitas amicitiam consecuta
est. Non ergo erunt homines deliciis diffuentes
audiendi, si quando de amicitia, quam nec usu,
nec ratione habent cognitam, disputabunt. Nam
quis est, proh deum fidem atque hominum ! qui
velit, ut neque diligat quemquam, nec ipse ab
ullo diligatur, circumfluere omnibus copiis, at-
que in omnium rerum abundantia vivere ? Hæc
enim est tyrannorum vita ; in qua nimirum nulla
fides, nulla caritas, nulla stabilis benevolentiae
potest esse fiducia : omnia semper suspecta at-
que sollicita : nullus locus amicitiae. Quis enim

aut cum diligit, quem meruit : aut eum à quo se
metui putat ? Coluntur tamen simulatione amicitiae
duntaxat ad tempus. Quod si forte, ut fit plerumque,
cecidierint, tum intelligitur, quam fuerint inopes
amicorum. Quod Tarquinius dixisse ferunt tum
exultantem, se intellexisse, quos fidos amicos ha-
buisset, quos infidos, cum jam neutris gratiam re-
ferre posset. Quamquam miror illa superbiâ & im-
portunitate si quemquam habere potuit. Atque
ut hujus, quem dixi, mores veros amicos parare
non potuere : sic multorum opes præpotentium
excludunt amicitias fideles. Non enim solum ipsa
fortuna cæca est, sed eos etiam plerumque efficit
cæcos, quos complexa est. Itaque efferuntur illi
fere fastidio & contumaciâ : neque quidquam in-
sistente fortunato intolerabilius fieri potest. At-
que hoc quidem videre licet, eos, qui antea com-
modis fuerunt moribus, imperio, potestate, pros-
peris rebus immutari, spernique ab iis veteres
amicitias, indulgeri novis. Quid autem stultius,
quam, cum plurimum copiis, facultatibus, opi-
bus possint, cetera parare, quæ parantur pecu-
niâ, equos, famulos, vestem egregiam, vasa pre-
tiosa : amicos non parare, optimam & pulcher-
rimam vitæ, ut ita dicam, supellestem. Ete-
nim cetera cum parant, cui parent, nesciunt,
nec cujus causâ laborent. Ejus enim est istorum
quidque, qui vincit viribus : amicitiarum sua cui-
que permanet stabilis & certa possessio : ut, e-
tiam si illa maneant, quæ sunt quasi dona for-
tunæ, tamen vita inculta, & deserta ab amicis,
non possit esse jucunda. Sed hæc hætenus. Con-
stituendi autem sunt, qui sint in amicitia fines,
& quasi termini diligendi : de quibus tres video
sententias ferri ; quarum nullam probo : unam, ut
eodem modo erga amicum affecti simus, quo erga
nosmetipsos : alteram, ut nostra in amicos bene-
volentia illorum, erga nos benevolentiae pariter æ-
quali-

qualitérque respondeat : tertiam, ut, quanti quisque se ipse facit, tanti fiat ab amicis. Harum trium sententiarum nulli prorsus assentior : nec enim illa prima vera est, ut, quemadmodum in se quisque, sic in amicum sit animatus. Quam multa enim, quæ nostrâ causâ numquam faceremus, facimus causâ amicorum ? precari ab indigno, supplicare ; tum acerbius in aliquem invehi insectarique vehementius : quæ in nostris rebus non satis honestè, in amicorum fiunt honestissimè : Multæque res sunt, in quibus de suis commodis viri boni multa detrahunt, detrahique patiuntur, ut iis amici potius, quam ipsi fruantur. Altera sententia est, quæ definit amicitiam paribus officiis ac voluntatibus. Hoc quidem est nimis exiguè & exiliter ad calculos vocare amicitiam, ut par sit ratio acceptorum & datorum. Ditiior mihi & affluentior videtur esse vera amicitia : nec observare strictè, ne plus reddat, quam acceperit. Neque enim verendum est, ne quid exeat, aut ne quid in terram defluat, aut ne plus æquo quid in amicitiam congeratur. Tertius vero ille finis deterrimus, ut, quanti quisque se ipse faciat, tanti fiat ab amicis. Sæpe enim in quibusdam aut animus abjectior est, aut spes amplificandæ fortunæ fractior. Non est igitur amici, talem esse in eum, qualis ille in se est : sed potius eniti & efficere, ut amici jacentem animum excitet, inducâtque spem cognitionemque meliorem. Alius igitur finis veræ amicitiae constituendus est, si prius, quid maxime reprehendere Scipio solitus sit, edixero. Negabat ullam vocem inimiciorum amicitiae potuisse reperiri, quam ejus, qui dixisset, ita amare oportere, ut si aliquando esset osurus. Nec vero se adduci posse, ut hoc, quemadmodum putaretur, à Biantio esse dictum crederet, qui sapiens habitus esset, unus è septem ; sed impuri cujusdam, aut ambitiosi, aut omnia ad suam potentiam revocantis esse

sen

sententiam. Quonam enim modo quisquam amicus
ejus esse poterit, cui se putabit inimicum esse pos-
se? quinetiam necesse erit cupere & optare: ut
quàm sæpissime peccet amicus, quo plures det sibi
tanquam ansas ad reprehendendum: rursus autem
recte factis commodisque amicorum necesse erit an-
gi, dolere, invidere. Quare hoc quidem præceptum,
cujuscumque est, ad tollendam amicitiam valet.
Illud potius præcipiendum fuit, ut eam diligen-
tiam adhiberemus in amicitiiis comparandis, ut ne-
quando amare inciperemus eum, quem aliquando
odisse possemus: quinetiam si minùs felices in deli-
gendo fuisset, ferendum id Scipio potius, quam
inimicitiarum tempus cogitandum, putabat. His
igitur finibus utendum arbitror, ut, cum emen-
dati mores amicorum sint, tum sit inter eos om-
nium rerum, consiliorum, voluntatum, sine ullâ
exceptione communitas: ut etiam si qua fortuna
acciderit, ut minùs justæ amicorum voluntates
adjuvandæ sint, in quibus eorum aut caput aga-
tur, aut fama, declinandum sit de viâ, modo
ne summa turpitudine sequatur. Est enim quatenus
amicitiæ dari venia possit. Nec vero negligenda
est fama: nec mediocri telum ad res gerendas ex-
istimare oportet benevolentiam civium: quam
blanditiis & assentando colligere turpe est. Virtus,
quam sequitur caritas, minimè repudianda est.
Sed sæpe, (etenim redeo ad Scipionem, cujus om-
nis sermo erat de amicitia) querebatur, quòd om-
nibus in rebus homines diligentiores essent; ut
capras, & oves quot quisque haberet, dicere pos-
set: amicos quot haberet, non posset dicere: &
in illis quidem parandis adhibere curam; in a-
micis eligendis negligentes esse: nec habere qua-
si signa quædam & notas, quibus eos, qui ad ami-
citiam essent idonei, judicarent. Sunt igitur fir-
mi, & stabiles, & constantes eligendi: cujus gene-
ris est magna penuria: & judicare difficile est
sanè

Sanè nisi expertum; experiendum autem est in ipsa amicitia: ita præcurrit amicitia iudicium, tollitque experiendi potestatem. Est igitur prudentis sustinere ut currum, sic impetum benevolentia: quo utamur quasi equis tentatis sic amicitiiis, aliquâ parte periclitatis moribus amicorum. Quidam sæpe in parvâ pecuniâ perspiciuntur, quam sint leves: quidam, quos parva movere non potuit, cognoscuntur in magnâ: sin vero erunt aliqui reperti, qui pecuniam præferre amicitia sordidum existiment: ubi eos inveniemus qui honores, magistratus, imperia, potestates, opes amicitia non anteponunt? ut cum ex alterâ parte proposita hæc sint, ex alterâ jus amicitia, non multo illa malint? imbecilla enim natura est ad contemnendam potentiam: quam etiam si neglecta amicitia consecuti sunt, obscuratum iri se arbitrantur, quia non sine magna causa sit neglecta amicitia. Itaque veræ amicitia difficillime reperiuntur in iis, qui in honoribus reque publicâ versantur. Ubi enim istum invenias, qui honorem amici anteponat suo? Quid? hæc ut omittam, quam graves, quam difficiles plerisque videntur calamitatum societates? ad quas non est facile inventu qui descendant. Quamquam Ennius rectè:

Amicus certus in re incertâ cernitur:

tamen hæc duo levitatis & infirmitatis plerosque convincunt: aut si in bonis rebus contemnunt, aut in malis deserunt. Qui igitur utrâque in re gravem, constantem, stabilem se in amicitia præstiterit, hunc ex maximè raro hominum genere iudicare debemus, & pæne divino. Firmamentum autem stabilitatis constantiaque est ejus, quam in amicitia quærimus, fides. Nihil enim est stabile, quod infidum est. Simplicem præterea, & communem, & consentientem, & qui rebus iisdem moveatur, eligi par est: quæ omnia pertinent ad fidelitatem: neque enim fidum potest esse multiplex in-

geni

genium & tortuosum : neque vero, qui non iisdem rebus movetur, naturâque consentit, aut fidus, aut stabilis potest esse. Addendum eodem est, ut ne criminibus aut inferendis delectetur, aut credat oblati : quæ omnia pertinent ad eam, quam jamdudum tracto, constantiam. Ita fit verum illud, quod initio dixi, amicitiam, nisi inter bonos, esse non posse. Est enim boni viri, quem eundem sapientem licet dicere, hæc duo tenere in amicitia : primum, nequid fictum sit, neve simulatum : aperte enim vel odisse magis ingenui est, quam fronte occultare sententiam : deinde non solum ab aliquo allatas criminationes repellere, sed ne ipsum quidem esse suspiciosum, semper aliquid existimantem ab amico esse violatum. Accedat huc suavitas quædam oportet sermonum atque morum, haud quaquam mediocre condimentum amicitia. Tristitia autem & in omni re severitas absit. Habet illa quidem gravitatem : sed amicitia remissior esse debet, & liberior, & dulcior, & ad omnem comitatem facilitatémque proclivior. Existit autem hoc loco quædam quæstio subdifficilis : num quando amici novi, digni amicitia, veteribus sint anteponendi, ut equis vetulis teneros anteponeere solemus. Indigna homine dubitatio : non enim esse debent amicitiarum, sicut aliarum rerum, satietates. Veterrima quæque, (ut ea vina, quæ verustatem ferunt) esse debent suavissima : verumque illud est, quod dicitur, multos modios salis simul edendos esse, ut amicitia munus expletum sit. Novitates autem, si spem afferunt, ut tamquam in herbis non fallacibus fructus appareat, non sunt illæ quidem repudiandæ : vetustas tamen loco suo conservanda : maxima est enim vis vetustatis & consuetudinis. Quin ipso equo, cujus modo mentionem feci, si nulla res impediat, nemo est, qui non eo, quo consuevit, libentius utatur, quam intractato & novo. Nec vero

in hoc, quod est animal, sed in iis etiam, quæ sunt inanimata, consuetudo valet: cum locis ipsis delectemur montuosis etiam & silvestribus, in quibus diutius commorati sumus. Sed maximum est in amicitia, superiorem parem esse inferiori: sæpe enim excellentiæ quædam sunt, qualis erat Scipionis in nostro, ut ita dicam, grege. Numquam se ille Philo, numquam Rupilio, numquam Mummio anteposuit, numquam inferioris ordinis amicis. Q. vero Maximum fratrem, egregium virum, omnino sibi nequaquam parem, quod is anteibat ætate, tamquam superiorem colebat; suosque omnes per se posse esse ampliores volebat. Quod faciendum imitandumque est omnibus: ut, si quam præstantiam virtutis, ingenii, fortunæ consecuti sunt, impertiant eam suis, comunicentque cum proximis: ut, si parentibus nati sint humilibus, si propinquos habeant imbecilliores vel animo, vel fortunâ, eorum augeant opes, eisque honori sint & dignitati: ut in fabulis, qui aliquamdiu propter ignorationem stirpis & generis in famulatu fuerint, cum cogniti sunt, & aut deorum, aut regum filii inventi, retinent tamen caritatem in pastores, quos patres suos multos annos esse duxerunt. Quod quidem est multo profectò magis in veris patribus certisque faciendum: fructus enim ingenii & virtutis, omnisque præstantiæ, tum maximus capitur, cum in proximum quemque confertur. Ut igitur ii, qui sunt in amicitia conjunctionisque necessitudine superiores, exæquare se cum inferioribus debent: sic inferiores non dolere se à suis aut ingenio, aut fortunâ, aut dignitate superari: quorum plerique aut queruntur semper aliquid, aut etiam exprobrant: eoque magis, si habere se putant, quod officiosè, & amicè, aut cum labore aliquo suo factum queant dicere. Odiosum sanè genus hominum officia exprobrantium: quæ memi-

niffe

nisse debet is, in quem collata sunt; non commemorare, qui contulit. Quamobrem ut ii, qui superiores sunt, summittere se debent in amicitia: sic quodam modo inferiores extollere. Sunt enim quidam, qui molestas amicitias faciunt, cum ipsi se contemni putant: quod non ferè contingit, nisi iis, qui etiam contemnendos se arbitrantur: qui hac opinione non modo verbis, sed etiam opere levandi sunt. Tantum autem cuique tribuendum, primum quantum ipse efficere possis: deinde etiam, quantum ille, quem diligas atque adjuves, sustinere. Non enim tu possis, quantumvis licet excellas, omnes tuos ad honores amplissimos perducere: ut Scipio P. Rutilium potuit consulem efficere, fratrem ejus Lucium non potuit. Quod si etiam possis quidvis deferre ad alterum, videndum est tamen, quid ille possit sustinere. Omnino amicitiae, corroboratis jam confirmatisque & ingeniis & ætatibus, judicandæ sunt: nec, si qui ineunte ætate venandi, aut pilæ studiosi fuerint, eos habere necessarios oportet, quos tum eodem studio præditos dilexerunt. Isto enim modo nutrices, & pædagogi jure verustatis plurimum benevolentiae postulabunt: qui negligendi quidem non sunt, sed alio quodam modo colendi; aliter enim amicitiae stabiles permanere non possunt. Dispar enim mores disparia studia sequuntur, quorum dissimilitudo dissociat amicitias. Nec ob aliam causam ullam boni improbis, improbi bonis amici esse non possunt, nisi quod tanta est inter eos, quantam maxima potest esse, morum studiorumque distantia. Rectè etiam præcipi potest in amicitiiis, ne intemperata quædam benevolentia, quod persæpe fit, impediat magnas utilitates amicorum. Nec enim, ut ad fabulas redeam, Trojam Neoptolemus capere potuisset, si Lycomedem, apud quem erat educatus, multis cum lacrymis iter suum impredientem, audire voluisset. Et sæpe incidunt

magnæ res, ut discedendum sit ab amicis : quas qui impedire vult, quod desiderium non facile ferat, is & infirmus est, mollisque naturâ, & ob eam ipsam causam in amicitia parum justus. Atque in omni re considerandum est, & quid postules ab amico, & quid patiari à te impetrari. Est etiam quasi quædam calamitas in amicitiiis dimittendis nonnumquam necessaria : jam enim à sapientum familiaritatibus ad vulgares amicitias oratio nostra delabitur. Erumpunt sæpe vitia amicorum tum in ipsos amicos, tum in alienos ; quorum tamen ad amicos redundet infamia : tales igitur amicitia sunt remissione usus eluendæ, & ut Catonem dicere audivi, disfluendæ magis, quam discindendæ : nisi quædam admodum intolerabilis injuria exarserit : ut neque rectum, neque honestum sit, neque fieri possit, ut non statim alienatio disjunctioque facienda sit. Sin autem aut morum, aut studiorum commutatio quædam, ut fieri solet, facta erit, aut in reip. partibus dissensio intercesserit, loquor enim jam, ut paulò antè dixi, non de sapientium, sed de communibus amicitiiis, cavendum erit, ne non solum amicitia depositæ, sed inimicitia etiam susceptæ videantur. Nihil enim est turpius, quam cum eo bellum gerere, quicum familiariter vixeris. Ab amicitia Q. Pompeij meo nomine se removerat, ut scitis, Scipio : propter dissensionem autem, quæ erat in repub. alienatus est à collega nostro Metello : utrumque egit graviter, auctoritate & offensione animi non acerbâ. Quamobrem primum danda opera est, nequa amicorum discidia fiant : sin tale aliquid evenerit, ut extinctæ potius amicitia, quam oppressæ esse videantur. Cavendum vero, ne etiam in graves inimicitias convertant se amicitia : ex quibus jurgia, maledicta, contumelia gignuntur : quæ tamen si tolerabiles erunt, ferendæ sunt : & hic honos veteri amicitia

amicitiæ tribuendus est, ut is in culpa sit, qui faciat, non qui patiatur injuriam. Omnino omnium horum vitiorum atque incommodorum una cautio est, atque una provisio; ut ne nimis citò diligere incipiamus, neve non dignos. Digni autem sunt amicitia, quibus in ipsis inest causa, cur diligantur. Rarum genus, & quidem omnia præclara rara, nec quidquam difficilius, quam reperire, quod sit omni ex parte in suo genere perfectum. Sed plerique neque in rebus humanis quidquam bonum nōrunt, nisi quod fructuosum sit: & amicos, tamquam pecudes, eos potissimum diligunt, ex quibus sperant se maximum fructum esse capturos. Ita pulcherrima illa & maximè naturali carent amicitia, per se & propter se expetenda: nec ipsi sibi exemplo sunt, hæc vis amicitiae qualis & quanta sit. Ipse enim se quisque diligit, non ut aliquam à se ipse mercedem exigit caritatis suæ, sed quòd per se sibi quisque carus est. Quòd nisi idem in amicitiam transferatur, verus amicus numquam reperietur: est enim is, tamquam alter idem. Quod si hoc apparet in bestiis, volucribus, nantibus, agrestibus, cicuribus, feris, primum ut se diligant ipsæ, id enim pariter cum omni animante nascitur: deinde, ut requirant atque appetant, ad quas se applicent ejusdem generis animantes; idque faciunt cum desiderio, & cum quadam similitudine amoris humani: quanto id magis in homine fit naturâ, qui & se ipse diligit, & alterum anquiri, cujus animum ita cum suo misceat, ut efficiat pænè unum ex duobus? Sed plerique perverse, ne dicam impudenter, amicum habere talem volunt, quales ipsi esse non possunt; quæque ipsi non tribuunt amicis, hæc ab iis desiderant. Par est autem, primum ipsum esse virum bonum, tum alterum similem sui quærere. Equidem in talibus ea, quam jamdudum tractamus, stabilitas amicitiae, confirmari potest: cum homines

O

bene-

benevolentia conjuncti, primum cupiditatibus iis, quibus ceteri serviunt, imperabunt : deinde æquitate justitiæque gaudebunt, omniaque alter pro altero suscipiet. Neque quidquam umquam nisi honestum & rectum alter ab altero postulabit : neque solum colent inter se, ac diligunt, sed etiam verebuntur. Nam maximum ornamentum amicitia tollit, qui ex ea tollit verecundiam. Itaque in iis perniciosus est error, qui existimant, libidinum peccatorumque omnium parere in amicitia licentiam. Virtutum amicitia adjutrix à natura data est, non vitiorum comes : ut, quoniam solitaria non posset virtus ad ea, quæ summa sunt, pervenire, conjuncta & consociata cum alterâ perveniret : quæ si quos inter societas aut est, aut fuit, aut futura est, eorum est habendus ad summum naturæ bonum, optimus beatissimusque comitatus. Hæc est, inquam, societas in qua omnia insunt, quæ putant homines expetenda, honestas, gloria, tranquillitas animi, atque jocunditas : ut &, cum hæc adsint, beata vita sit, & sine his esse non possit. Quod cum optimum maximumque sit, si id volumus adipisci, virtuti opera danda est : sine qua neque amicitiam, neque ullam rem expetendam consequi possumus : ea verò neglecta, qui se amicos habere arbitrantur, tum se denique errasse sentiunt, cum eos gravis aliquis casus experiri cogit. Quocirca, dicendum est enim sapius, cum judicaris, diligere oportet : non cum dilexeris, judicare. Sed cum multis in rebus negligentia plectimur, tum maxime in amicis & diligendis & colendis : præposteris enim utimur consiliis, & acta agimus, quod verainur vetere proverbio. Nam implicati ultrò & citrò, vel usu diuturno, vel etiam officiis, repente in medio cursu amicitias, exortâ aliqua offensione, dirumpimus. Quo etiam magis vituperanda est rei maxime necessaria tanta incuria. Una est enim amicitia in rebus

humanis, de cujus utilitate omnes uno ore consentiunt; quanquam à multis ipsa virtus contemnitur, & venditatio quædam atque ostentatio esse dicitur. Multi divitias despiciunt, quos parvo contentos tenuis victus cultusque delectat: honores verò, quorum cupiditate quidam inflammantur, quam multi ita contemnunt, ut nihil inanius, nihil esse levius existiment. Itemque cetera, quæ quibusdam admirabilia videntur, permulti sunt, qui pro nihilo putent. De amicitia omnes ad unum idem sentiunt, & ii, qui ad rempub. se contulerunt, & ii, qui rerum cognitione doctrinaque delectantur: & ii, qui suum negotium gerunt otiosi: postremo ii, qui se totos tradiderunt voluptatibus, sine amicitia vitam esse nullam sentiunt, si modo velint aliqua ex parte liberaliter vivere. Serpit enim nescio quomodo per omnium vitas amicitia, nec ullam ætatis degendæ rationem patitur esse expertem sui. Quinetiam si quis eâ asperitate est & immanitate naturæ, congressus ut hominum fugiat atque oderit, qualem fuisse Athenis Timonem nescio quem accepimus: tamen is pati non possit, ut non anquirat aliquem, apud quem evomat virus acerbitalis suæ. Atque hoc maximè judicaretur, si quid tale posset contingere, ut aliquis nos deus ex hac hominum frequentia tolleretur, & in solitudine uspiam collocaret, atque ibi suppeditans omnium rerum, quas natura desiderat, abundantiam & copiam, hominis omnino aspiciendi potestatem eriperet. Quis tam esset ferreus, qui eam vitam ferre posset, cuique non auferret fructum voluptatum omnium solitudo? Verum ergo illud est, quod à Tarentino Archyta, ut opinor, dici solitum, nostros senes commemorare audiavi, ab aliis senibus auditum: Si quis in cælum ascendisset, naturamque mundi, & pulchritudinem siderum perspexisset, insuavem illam admirationem ei fore; quæ jucundissima fuisset, si aliquem

quem cui narraret, habuisset. Sic natura solitarium nihil amat, semperque ad aliquod tamquam adminiculum annitur : quod in amicissimo quoque dulcissimum est. Sed cum tot signis eadem natura declaret, quid velit, anquirat, ac desideret : absurdescimus tamen nescio quomodo ; nec ea, quæ ab ea monemur audimus. Est enim varius & multiplex usus amicitiae, multæque causæ suspicionum offensionumque dantur : quas tum evitare, tum elevare, tum ferre, sapientis est. Una illa sublevanda offensio est, ut & veritas in amicitia, & fides retineatur. Nam & monendi amici sæpe sunt, & objur-gandi : & hæc accipienda amice, cum benevole fiunt. Sed nescio quomodo verum est, quod in Andriâ familiaris meus dicit :

Obsequium amicos, veritas odium parit.

Molesta veritas, si quidem ex ea nascitur odium, quod est venenum amicitiae. Sed obsequium multo molestius, quod peccatis indulgens, præcipitem amicum ferri finit. Maxima autem culpa in eo est, qui & veritatem aspernatur, & in fraudem obsequio impellitur. Omni igitur hac in re habenda ratio & diligentia est : primum ut monitio acerbitate, deinde ut objurgatio contumeliâ carcat : in obsequio autem, quoniam Terentiano verbo lubenter utimur, comitas adsit : assentatio, vitiorum adiutrix, procul amoveatur : quæ non modo amico, sed ne libero quidem digna est. Aliter enim cum tyranno, aliter cum amico vivitur. Cujus autem aures veritati clausæ sunt, ut ab amico verum audire nequeat, hujus salus desperanda est. Scitum est enim illud Catonis, ut multa ; Melius de quibusdam acerbos inimicos mereri, quam eos amicos, qui dulces videantur : illos verum sæpe dicere, hos nunquam. Atque illud absurdum est, quod ii, qui monentur, eam molestiam, quam debent capere, non capiunt : eam capiunt, qua debent vacare. Peccasse enim se non anguntur, ob-
jurgari

jurgari moleste ferunt: quod contrà oportebat, delicto dolere, correctione gaudere. Ut igitur & monere, & moneri proprium est veræ amicitiae: & alterum liberè facere, non asperè; alterum patienter accipere, non repugnanter: sic habendum est, nullam in amicitiiis pestem esse majorem, quam adulationem, blanditiam, assentationem: quamvis enim multis nominibus est hoc vitium notandum, levium hominum atque fallacium, ad voluntatem loquentium omnia, nihil ad veritatem. Cum autem omnium rerum sumulatio est vitiosa, tollit enim judicium veri, idque adulterat, tum amicitiae repugnat maximè: delet enim veritatem, sine qua nomen amicitiae valere non potest. Nam cum amicitiae vis sit in eo, ut unus quasi animus fiat ex pluribus: quî id fieri poterit, si ne in uno quidem quoque unus animus erit, idemque semper; sed varius, commutabilis, multiplex? Quid enim potest esse tam flexibile, tam devium, quam animus ejus, qui ad alterius non modò sensum ac voluntatem, sed etiam vultum atque nutum convertitur?

*Negat quis? nego: ait? aio. Postremo imperavi ego-
met mihi,*

Omnia assentari.

ut ait idem Terentius, sed ille in Gnathonis personâ: quod amici genus adhibere, omnino levitatis est. Multi autem Gnathonum similes, cum sint loco, fortunâ, famâ superiores: horum est assentatio molesta, cum ad vanitatem accessit auditoritas. Secerni autem blandus amicus à vero, & internosci tam potest, adhibita diligentia, quam omnia fucata & simulata à sinceris atque veris. Concio, quæ ex imperitissimis constat, tamen judicare solet, quid intersit inter popularem, id est, assentatorem, & levem civem, & inter constantem, severum & gravem. Quibus blanditiis C. Papirius nuper influebat in aures concio-

nis, cum ferret legem de tribunis pleb. rescindendis? Dissuasimus nos. Sed nihil de me: de Scipione dicam libentius. Quanta illa, dii immortales! fuit gravitas, quanta in oratione majestas! ut facile ducem pop. Rom. non comitem diceres: sed affuistis, & est in manibus oratio: itaque lex popularis suffragiis populi repudiata est. Atque, ut ad me redeam: meministis, Q. Maximo, fratre Scipionis, & L. Mancino consulibus, quam popularis lex de sacerdotiis C. Licinii Crassi videbatur? cooptatio enim collegiorum ad populi beneficium transferebatur. Atque is primum instituit in forum versus, agere cum populo: tamen illius vendibilem orationem religio deorum immortalium, nobis defendentibus, facile vincebat: atque id actum est prætor me, quinquennio antè, quàm consul sum factus. Itaque rei veritate magis, quàm auctoritate causa illa defensa est. Quod si in scena, id est, in concione, in qua rebus fictis & adumbratis loci plurimum est, tamen verum valet, si modò id patefactum & illustratum est; quid in amicitia fieri oportet, quæ tota veritate perpenditur? in qua nisi, ut dicitur, apertum pectus videas, tuumque ostendas, nihil fandum, nihil exploratum habeas: ne amare quidem, aut amari; cum id, quam verè fiat, ignores. Quamquam ista assentatio quamvis perniciofa sit, nocere tamen nemini potest, nisi ei, qui eam recipit, atque eâ delectatur: ita fit, ut is assentatoribus patefaciat aures suas maximè, qui ipse sibi assentetur, & se maximè ipse delectet. Omnino est amans sui virtus. Optimè enim se ipsa novit, quamq; amabilis sit intelligit. Ego autem non de virtute nunc loquor, sed de virtutis opinione. Virtute enim ipsâ non tam multi præditi esse, quam videri volunt. Hos delectat assentatio: his fictus ad ipsorum voluntatem sermo cum adhibetur, orationem illam vanam, testimonium esse

se laudum suarum putant. Nulla est igitur hæc amicitia, cum alter verum audire non vult, alter ad mentiendum paratus est. Nec parasitorum in comœdiis assentatio nobis faceta videretur, nisi essent milites gloriosi.

Magnas verò agere gratias Thais mihi ?

Satis erat respondere, Magnas : ingentes, inquit. Semper auget assentator id, quod is, cujus ad voluntatem dicitur, vult esse magnum. Quamobrem, quamquam blanda ista vanitas apud eos valeat, qui ipsi illam allecant & invitant : tamen etiam graviores constantioresque admonendi sunt, ut animadvertant, ne callidâ assentatione capiantur. Apertè enim adulantem nemo non videt, nisi qui admodum est excors. Callidus ille & occultus ne se insinuet, studiosè cavendum est : nec enim facillimè agnoscitur, quippe qui etiam adversando sæpe assentetur : & litigare se simulans blandiatur, atque ad extremum det manus, vincique se patiatur, ut is, qui illusor sit, plus vidisse videatur. Quid autem turpius quam illudi ? Quod ne accidat magis cavendum est, ut in Epiclero :

Hodie me ante omnes comicos stultos senes


Verfâris, atque luseris lautissimè.

Hæc enim etiam in fabulis stultissima persona est improvidorum & credulorum senum. Sed nescio quo pacto ab amicitiiis perfectorum hominum, id est, sapientium, (de hac dico sapientiâ, quæ videtur in hominem cadere posse) ad leves amicitias deflexit oratio. Quamobrem ad illa prima redeamus, eâque ipsa concludamus aliquando. Virtus, virtus inquam, C. Fanni, & tu, Q. Muci, & conciliat amicitias, & conservat. In ea est enim convenientia rerum, in ea stabilitas, in ea constantia : quæ cum se extulit, & ostendit lumen suum, & idem aspexit agnovitque in altero ; ad id se admoveret, vicissimque accipit

illud, quod in altero est : ex quo eorum exardescit
 sive amor. sive amicitia ; utrumque enim dictum est
 ab amando. Amare autem nihil aliud est, nisi
 eum ipsum diligere, quem ames, nulla indigen-
 tiâ, nulla utilitate quæsitâ. Quæ tamen ipsa ef-
 florescit ex amicitia, etiam si tu eam minus
 sequutus sis. Hac nos adolescentes benevolentia
 senes illos L. Paullum, M. Catonem, C. Gallum,
 P. Nasicam, T. Gracchum, Scipionis nostri so-
 cerum, dileximus. Hæc etiam magis elucet inter
 æquales, ut inter me & Scipionem, L. Furium,
 P. Rupilium, Sp. Mummius. Vicissim autem se-
 nes in adolescentium caritate acquiescimus ;
 ut in vestrà, ut in Q. Tuberonis ; equidem eti-
 am admodum adolescentis, P. Rutilii, A. Vir-
 ginii familiaritate delector. Quoniamque ita ra-
 tio comparata est vitæ naturæque nostræ, ut
 alia ætas oriatur ; maximè quidem optandum est,
 ut cum æqualibus possis, quibus, cum tanquam
 è carceribus emissus sis, cum iisdem ad calcem,
 ut dicitur, pervenire. Sed quoniam res huma-
 næ fragiles caducæque sunt, semper aliqui an-
 quirendi sunt, quos diligamus, & a quibus dili-
 gamur. Caritate enim benevolentiaque sublatâ, om-
 nis est è vitâ sublata jucunditas. Mihi quidem
 Scipio, quamquam est subito creptus, vivit ta-
 men, semperque vivet : virtutem enim amavi il-
 lius viri, quæ extincta non est. Nec mihi soli ver-
 satur ante oculos, qui illam semper in manibus
 habui, sed etiam posteris erit clara, & insignis.
 Nemo umquam animo, aut spe majora suscipiet,
 qui sibi non illius memoriam atque imaginem pro-
 ponendam putet. Equidem ex omnibus rebus,
 quas mihi aut fortuna, aut natura tribuit, nihil
 habeo, quod cum amicitia Scipionis possim compa-
 rare. In hac mihi de repub. consensio, in hac re-
 rum privatarum consilium ; in eadem requies ple-
 na oblectationis fuit, numquam illum ne minimâ
 quidem

quidem re offendi, quod quidem senserim: nihil audivi ex eo ipse, quod nollem. Una domus erat, idem victus, isque communis: Neque solum militia, sed etiam peregrinationes, rusticationesque communes. Nam quid ego de studiis dicam cognoscendi semper aliquid atque discendi? in quibus remoti ab oculis populi, omne otiosum tempus contrivimus. Quarum rerum recordatio & memoria si unâ cum illo occidisset, desiderium conjunctissimi atque amantissimi viri ferre nullo modo possem. Sed nec illa extincta sunt, alunturque potius & augentur cogitatione & memoriâ mea: & si illis planè orbatus essem; magnum tamen afferret mihi ætas ipsa solatium: diutius enim jam in hoc desiderio esse non possum. Omnia autem breviter, tolerabilia esse debent, etiam si magna sint. Hæc habui de amicitia quæ dicerem. Vos autem hortor, ut ita virtutem locetis, sine qua amicitia esse non potest, ut eâ exceptâ, nihil amicitia præstabilius putetis.





M. TULLII CICERONIS P A R A D O X A,

A D

M A R C U M B R U T U M.



Nimadverti, Brute, sæpe Catonem, avunculum tuum, cum in senatu sententiam diceret, locos graves ex Philosophia tractare, abhorrentes ab hoc usu forensi & publico : sed dicendo consequi tamen, ut illa etiam populo probabilia viderentur. Quodeo majus est illi, quam aut tibi aut nobis ; quia nos eâ Philosophia plus utimur, quæ peperit dicendi copiam, & in qua dicuntur ea, quæ non multum discrepant ab opinione populari. Cato autem perfectus, mea sententia, Stoicus, & ea sentit, quæ non sane probantur in vulgus : & in eâ est hæresi, quæ nullum sequitur florem orationis, neque dilatat argumentum : sed minutis interrogatiunculis, quasi punctis, quod proposuit, efficit. Sed nihil est tam incredibile, quod non dicendo fiat probabile ; nihil tam horridum, tam incultum, quod non splendescat oratione, & tanquam excolatur. Quod cum ita putarem, feci etiam audaciùs, quam ille ipse, de quo loquor. Cato enim duntaxat de magnitudine animi, de continentia,

tinencia, de morte, de omni laude virtutis, de diis immortalibus, de caritate patriæ, Stoicè solet, nullis oratoriis ornamentis adhibitis, dicere. Ego vero illa ipsa, quæ vix gymnasiis & in otio Stoici probant, ludens conjeci in communes locos: quæ quia sunt admirabilia, contraque opinionem omnium, ab ipsis etiam *παράδοξα* appellantur: tentare volui, possetne proferri in lucem, id est, in forum, & ita dici, ut probarentur: an alia quædam esset erudita, alia popularis oratio: eoque scripsi libentiùs, quòd mihi ista *παράδοξα*, quæ appellant, maximè videntur esse Socratica, longèque verissima. Accipies igitur hoc parvum opusculum, locubraturum his jam contractioribus noctibus: quoniam illud majorum vigiliarum munus in tuo nomine apparuit: & degustabis genus hoc exercitationum earum, quibus uti consuevi, cum ea, quæ dicuntur in scholis *ἀπὸ*, ad nostrum hoc oratorium transfero dicendi genus. Hoc tamen opus in acceptum ut referas, nihil postulo. Non est enim ut in arce poni possit, quasi illa Minerva Phidiæ: sed tamen ut ex eadem officinâ exisse appareat.

P A R A D O X O N I.

Ὅτι μόνον τὸ καλὸν ἀγαθόν.

Quod honestum sit, id solum bonum esse.

Vereor, ne cui vestrum ex Stoicorum hominum disputationibus, non ex meo sensu, deprompta hæc videatur oratio: dicam tamen quod sentio, & dicam brevius, quam res tanta dici possit. Numquam hercule ego, neque pecunias istorum, neque recta magnifica, neque opes, neque imperia, neque eas, quibus maximè adstricti sunt, voluptates, in bonis rebus aut expetendis esse duxi: quippe cum viderem, rebus his circumfluentibus, ea tamen

deside-

desiderare maximè, quibus abundarent. Neque enim expletur unquam, nec satiatur cupiditatis fitis: neque solum ea qui habent, libidine augendi cruciantur, sed etiam amittendi metu. In quo equidem continentissimorum hominum, majorum nostrorum, sæpe requiro prudentiam, qui hæc imbecilla & commutabilia pecuniæ membra, verbo bona putaverunt appellanda, cum re ac factis longè aliter judicavissent. Potestne bonum cuiquam malo esse? aut potest quisquam in abundantia bonorum ipse esse non bonus? Atqui ista omnia talia videmus, ut etiam improbi habeant, & obsint probis. Quamobrem licet irrideat, si quis vult: plus apud me tamen vera ratio valebit, quam vulgi opinio. Neque ego umquam bona perdidisse dicam, si quis pecus, aut suppellectilem amiserit: neque non sæpe laudabo sapientem illum Biantem, ut opinor, qui numeratur in septem: cujus cum patriam Prienen cepisset hostis, ceterique ita fugerent, ut multa de suis rebus secum asportarent: cum esset admonitus à quodam, ut idem ipse faceret: Ego vero, inquit, facio. Nam omnia mea porto mecum. Ille hæc ludibria fortunæ ne sua quidem putavit, quæ nos appellamus etiam bona. Quid est igitur, quæret aliquis, bonum? Si quid rectè fit, & honestè, & cum virtute, id bene fieri verè dicitur: & quod rectum, & honestum, & cum virtute est, id solum opinor bonum. Sed hæc videri possunt obscuriora, cum lentius disputantur. Vitæ atque factis illustranda sunt summorum virorum hæc, quæ verbis subtilius, quam satis est, disputari videntur. Quæro enim à vobis, num ullam cogitationem habuisse videantur ii, qui hanc remp. tam præclare fundatam nobis reliquerunt, aut argenti ad avaritiam, aut amœnitatum ad delectationem, aut suppellectilis ad delicias, aut epularum ad voluptates? Ponite ante oculos unumquemque regum. Vultis à Romulo?

mulo? vultis post liberam civitatem, ab iis ipsis, qui liberaverunt eam? Quibus tandem gradibus Romulus ascendit in cælum? Iisne, quæ isti bona appellant? An rebus gestis atque virtutibus? Quid à Numâ Pompilio? Minúsne gratas diis immortalibus capedines, ac fictiles urnulas fuisse, quam filicatas aliorum pateras arbitramur? Omitto reliquos: sunt enim omnes pares inter se, præter Superbum. Brutum si quis roget, quid egerit in patriâ liberandâ: si quis item reliquos ejusdem consilii socios, quid spectaverint, quid secuti sint: num quis existet, cui voluptas, cui divitiæ, cui denique præter officium fortis & magni viri, quidquam aliud propositum fuisse videatur? Quæ res ad necem Porcennæ C. Mucium impulit, sine ullâ spe salutis suæ? Quæ vis Coclitem contra omnes hostium copias tenuit in ponte solum? Quæ patrem Decium, qui filium devotavit, atque immisit in armatas hostium copias? Quid continentia C. Fabricii? Quid tennitas victus M. Curii sequebatur? Quid duo propugnacula belli Punic, Cn. & P. Scipiones, qui Karthaginensum adventum corporibus suis intercludendum putaverunt? Quid Africanus major? Quid minor? Quid inter horum ætates interjectus Cato? Quid innumerabiles alii? (nam domesticis exemplis abundamus) cogitâsse quidquam putamus in vitâ sibi expetendum, nisi quod laudabile esse & præclarum videretur? Veniant igitur isti irrisores hujus orationis ac sententiæ, & jam vel ipsi judicent, utrum se horum alicujus, qui marmoreis testis, ebore & auro fulgentibus, qui signis, qui tabulis, qui cælato auro, & argento, qui Corinthiis operibus abundant, an C. Fabricii, qui nihil eorum habuit, nihil habere voluit, esse similes malint? Atque hæc quidem, quæ modò huc, modò illuc transferuntur, facile adduci solent, ut in rebus bonis esse negent. Illud tamen arcte tenent,

tenent, accuratèque defendunt, voluptatem esse summum bonum. Quæ quidem mihi vox pecudum videtur esse, non hominum. Tu, cum tibi sive deus, sive mater, ut ita dicam, rerum omnium natura, dederit animum, quo nihil est præstantius, neque divinius: sic te ipse abjicies atque prosterne, ut nihil inter te, atque quadrupedem aliquam putes interesse? Quidquam bonum est, quod non eum, qui id possidet, meliorem facit? Ut enim quisque est maximè boni particeps, ita laudabilis maximè: neque est ullum bonum, de quo non is, qui id habeat, honeste possit gloriari. Quid autem est horum in voluptate? Melioremne efficit, aut laudabiliorem virum? an quisquam in potiundis voluptatibus gloriando se & prædicatione effert? Atqui si voluptas, quæ plurimorum patrociniis defenditur, in rebus bonis habenda non est: eaque, quo est major, eo magis mentem è suâ sede & statu dimovet: profecto nihil est aliud bene & beatè vivere, nisi honestè & rectè vivere.

P A R A D O X O N II.

Ὅτι αὐτάρκης ἢ ἀρετὴ πρὸς εὐδαιμονίαν.

In quo virtus sit, ei nihil deesse ad beatè vivendum.

Nec verò ego M. Regulum ærumnosum, nec infelicem, nec miserum, umquam putavi. Non enim magnitudo animi ejus cruciabatur à Pœnis, non gravitas, non fides, non constantia, non ulla virtus, non denique animus ipse: qui tot virtutum præsidio, tantoque comitatu, cum corpus ejus caperetur, capi certè ipse non potuit. Caium verò Marium vidimus, qui mihi secundis rebus unus ex fortunatis hominibus, adversis unus ex summis viris videbatur, quo beatius esse mortali nihil potest. Nescis, insane, nescis, quantas vires virtus habeat. Nomen

tantum

tantum virtutis usurpas: quid ipsa valeat, ignoras. Nemo potest non beatissimus esse, qui est totus apertus ex sese, quique in se uno sua ponit omnia. Cui spes omnis, & ratio, & cogitatio pender ex fortunâ; huic nihil potest esse certi; nihil quod exploratum habeat, permanfurum sibi unum diem. Eum tu hominem terreto, si quem eris nactus, istis mortis, aut exilii minis. Mihi vero quidquid acciderit in tam ingrâtâ civitate, ne recusanti quidem evenerit, non modo non repugnanti. Quid ego enim laboravi, aut quid egi, aut in quo evigilaverunt curæ & cogitationes meæ, si quidem nihil peperitale, nihil consecutus sum, ut eo statu essem, quem neque fortunæ temeritas, neque inimicorum labefactaret injuria? Mortemne mihi minitaris, ut omnino ab hominibus: an exilium, ut ab improbis demigrandum sit? Mors terribilis est iis, quorum cum vitâ omnia exstinguuntur: non iis, quorum laus emori non potest: exilium autem illis, quibus quasi circumscriptus est habitandi locus: non iis, qui omnem orbem terrarum unam urbem esse ducunt. Te miseriæ, te ærumnæ premunt, qui te beatum, qui florentem putas: tuæ libidines te torquent: tu dies noctesque cruciaris; cui nec sat est, quod est, & idipsum ne non sit diuturnum, times: te conscientiæ stimulant maleficiorum tuorum te metus exanimant judiciorum, atque legum: quocumque adspexisti, ut furia, sic tuæ tibi occurrunt injuriæ, quæ te respirare non sinunt. Quamobrem ut improbo, & stulto & inertî nemini bene esse potest: sic bonus vir, & sapiens, & fortis miser esse non potest: Nec vero cujus virtus, morésque laudandi sunt, ejus non laudanda vita est. Neque porro fugienda vita, quæ laudanda est: esset autem fugienda, si esset misera. Quamobrem quidquid est laudabile, idem & beatum, & florens, & experendum videri debet

P A R A D O X O N III.

Ἐὰν ἴσα τὰ ἀμαρτήματα, καὶ τὰ κατὰ νόμον ἔργα.

Æqualia esse peccata, & recte facta.

Parva, inquis, res est : at magna culpa. Nec enim peccata rerum eventu, sed vitiiis hominum metienda sunt. In quo peccatur, id potest aliud alio majus esse, aut minus : ipsum quidem illud peccare, quoquo te verteris, unum est. Auri navem evertat gubernator, an paleæ ; in re aliquantulum, in gubernatoris inscitiam nihil interest. Lapsa est libido in muliere ignotâ : dolor ad pauciores pertinet, quam si petulans fuisset in aliquâ generosa ac nobili virgine : peccavit vero nihilominus, si quidem est peccare, tamquam transilire lineas : quod cum feceris, culpa commissa est : quam longe progrediare, cum semel transieris, ad augendam transeundi culpam nihil pertinet. Peccare certè licet nemini. Quod autem non licet, id hoc uno tenetur, si arguitur non licere. Id si nec majus, nec minus umquam fieri potest, quoniam in eo est peccatum, si non licuit : quod semper unum, & idem est, quæ ex eo peccata nascuntur, æqualia sint oportet. Quod si virtutes pares sunt inter se, paria esse etiam vitia necesse est. Atqui pares esse virtutes, nec bono viro meliorem, nec temperante temperantiorem, nec forti fortiozem, nec sapiente sapientiorem posse fieri, facillimè potest perspicui. An virum bonum dices, qui depositum nullo teste, cum lucrari impune posset, auri pondo decem reddiderit : si idem in decem millibus pondo auri non idem fecerit ? aut temperantem, qui se in aliqua libidine continuerit, in aliqua effuderit ? Una virtus est, consentiens cum ratione, & perpetua constantiâ nihil huic addi potest, quo magis vir-

tus sit : nihil demi, ut virtutis nomen relinquatur. Etenim si benefacta rectè facta sunt, & nihil recto rectius : certe ne bono quidem melius quidquam inveniri potest. Sequitur igitur, ut etiam vitia sint paria : siquidem pravitates animi rectè vitia dicuntur. Atqui quoniam pares virtutes sunt, rectè facta, quando à virtutibus proficiuntur, paria esse debent : itémq; peccata, quoniam ex vitiis manant, sint æqualia necesse est. A Philosophis, inquis, ista sumis. Meruebam, ne à lenonibus diceres. Socrates disputabat isto modo. Bene hercle narras : nam istum doctum & sapientem virum fuisse, memoriæ traditum est. Sed tamen quæro ex te, quando verbis inter nos contendimus, non pugnis, utrum de bonis est quærendum, quid bajuli atque operarii, an quid homines doctissimi senserint ? Præsertim cum hac sententiâ non modo verior, sed ne utilior quidem hominum vitæ reperiri ulla possit. Quæ vis enim est, quæ magis arceat homines ab improbitate omni, quam si senserint, nullum in delictis esse discrimen ? Æque peccare se, si privatis, ac si magistratibus manus adferant ? Quamcumque in domum stuprum intulerint, eandem esse labem libidinis ? Nihilne igitur interest, (nam hoc dicet aliquis) patrem quis enecet, an servum ? Nuda ista si ponas, judicari qualia sint non facile possunt. Patrem vitâ privare si per se scelus est, Saguntini, qui parentes suos liberos emori, quam servos vivere, maluerunt, parricidæ fuerunt. Ergo & parenti nonnumquam adimî vita sine scelere potest : & servo sæpe sine injuriâ non potest. Causa igitur hæc, non natura, distinguit : quæ quando utro accessit, id sit propensius ; si utroque adjuncta sit, paria fiant necesse est. Illud tamen interest, quod in servo necando, si adsit injuria, semel peccatur. In patris virâ violanda, multa peccantur. Violatur is, qui procreavit ; is, qui aluit ; is, qui erudivit ; is, qui in

fede, ac domo, atque in rep. collocavit. Multitudine peccatorum præstat, eoque pœnâ majore dignus est. Sed nos in vitâ, non quæ cuique peccato pœna sit, sed quantum cuique liceat, spectare debemus. Quidquid non oportet, scelus esse: quidquid non licet, nefas putare debemus. Etiâ in minimis rebus? Etiam: siquidem rerum modum fingere non possumus; animorum modum tenere possumus. Histrio si paullum se movit extra numerum, aut si versus pronuntiatus est syllabâ unâ brevior, aut longior, exhibitur & exploditur: in vitâ, tu, qui omni gestu moderatior, omni versu aptior esse debes, ut in syllabâ te peccare dices? Poëtâ non audio in nugis; in vitæ societate audiam civem, digitis peccata dimerientem sua? Quæ si visa sunt breviora, leviora quâ possunt videri, cum quidquid peccatur, perturbatione peccetur rationis atque ordinis? Perturbata autem semel ratione & ordine, nihil possit addi, quo magis peccari posse videatur.

P A R A D O X O N IV.

Ὅτι πᾶς ἀφρων μάνεται.

Omnem stultum insanire.

Ego vero te non stultum, ut sæpe, non improbum, ut semper, sed dementem & insanum rebus evincam necessariis. Sapientis animus magnitudine consilii, tolerantia rerum humanarum, contemptione fortunæ, virtutibus denique omnibus, ut moribus septus, vincetur, & expugnabitur, qui ne civitate quidem pelli potest? Quæ est enim civitas? Omnisne conventus etiam furum & immanium? Omnisne etiam fugitivorum ac latronum congregata unum in locum multitudo? certè negabis.

bis. Non igitur erat illa tum civitas, cum leges in ea nihil valebant, cum judicia jacebant, cum mos patrius occiderat, cum ferro pulsus magistratibus, senatus nomen in rep. non erat. Prædonum ille concursus, & te duce latrocinium in foro constitutum, & reliquæ conjurationis à Catilinæ furis ad tuum scelus, furorémque conversæ, num civitas erat? Itaque pulsus ego civitate non sum, quæ nulla erat: arcessitus in civitatem sum, cum esset in rep. consul, qui tum nullus fuerat: esset senatus, qui tum occiderat: esset consensus populi liberi: esset juris, & æquitatis, quæ vincula sunt civitatis, repetita memoria. At vide, quam ista tui latrocinii tela contemserim. Jactam & immissam à te nefariam in me injuriam semper duxi: pervenisse ad me numquam putavi: nisi fortè, cum parietes disturbabas, aut cum tectis sceleratas faces inferebas, meorum aliquid ruere aut deflagrare arbitrabare. Nihil neque meum est, neque cujusquam, quod auferri, quod eripi, quod amitti potest. Si mihi eripuisses divinam animi mei constantiam, meas curas, vigilias, consilia, quibus respublica te invitissimo stat; si hujus æterni beneficii immortalem memoriam delevisses, multo etiam magis si illam mentem, unde hæc consilia manârunt, mihi eripuisses; tum ego accepisse me confiterer injuriam. Sed si hæc nec fecisti, nec facere potuisti, reditum mihi gloriosum injuria tua dedit, non exitum calamitosum. Ergo ego semper civis; & tum maximè, cum meam salutem senatus exteris nationibus, ut civis optimi, commendabat; tu ne nunc quidem es civis, nisi fortè idem esse hostis & civis potest. An tu civem ab hoste naturâ ac loco, non animo factisque distinguis? Cædem in foro fecisti, armatis latronibus templa tenuisti, privatorum domos, ædes sacras incendiisti. Cur hostis Spartacus, si tu civis? Potes autem esse tu civis, propter quem ali-

quando civitas non fuit? & me tuo nomine appellas, cum omnes meo discessu exsulâsse rempublicam putent? Numquamne, homo amentissime, te circumspicies? Numquâmnè quid facias considerabis, nec quid loquare? Nescis, exsilium scelerum esse pœnam? Meum illud iter ob præclarissimas res à me gestas esse susceptum? Omnes scelerati atque impii, quorum tu te ducem esse profiteris, quos leges exilio affici volunt, exsules sunt, etiam si solum non mutarunt. An cum omnes leges te exulem esse jubeant, non eris tu exul? Non appellatur inimicus, qui cum telo fuerit? Ante senatum tuâ sica deprehensa est. Qui hominem occiderit? tu plurimos occidisti. Qui incendium fecerit? ædis Nympharum manu tua deflagravit. Qui templa occupaverit? In foro etiam castra posuisti. Sed quid ego communes leges profero, quibus omnibus es exsul? Familiarissimus tuus de te privilegium tulit, ut, si in opertum Bonæ Deæ accessisses, exsulares. At te id fecisse etiam gloriari soles. Quomodo igitur tot legibus in exsilium ejectus, nomen exsulis non perhorrescis? Romæ sum, inquis. Et tu quidem in operto fuisti. Non igitur ubi quisque erit, ejus loci jus tenebit, si ibi eum legibus esse non oportebit.

P A R A D O X O N V.

Ὅτι μόνος ὁ σοφὸς ἐλεύθερος, καὶ πάντων ἀρρῶν δεσλός.

Solum sapientem liberum esse, & stultum omnem servum.

Laudetur vero hic imperator, aut etiam appelletur, aut hoc nomine dignus putetur. Quo modo, aut cui tandem hic libero imperabit, qui non potest cupiditatibus suis imperare? Refrenet primum libidines, spernat voluptates, iracundiam teneat, coerceat avaritiam, ceteras animi labeſ repellat,

tum

tum incipiat aliis imperare, cum ipse improbissimis dominis, dedecori ac turpitudini parere desierit. Dum quidem his obediet, non modo imperator, sed liber habendus omnino non erit. Præclare enim est hoc usurpatum à doctissimis, quorum auctoritate non uteretur, si mihi apud aliquos agrestes hæc habenda esset oratio. Cum verò apud prudentissimos loquar, quibus hæc inaudita non sunt, cur ego similem, me, si quid in his studiis operæ posuerim, perdidisse? Dictum est igitur ab eruditissimis viris, nisi sapientem, liberum esse neminem. Quid est enim libertas? potestas vivendi ut velis. Quis igitur vivit ut vult, nisi qui recta sequitur, qui gaudet officio, cui vivendi via considerata atque provisa est? qui legibus quidem non propter metum paret, sed eas sequitur atque colit, quia id salutare maxime esset judicat: qui nihil dicit, nihil facit, nihil cogitat denique; nisi libenter ac libere: cujus omnia consilia, resque omnes, quas gerit, ab ipso profiscuntur, eodemque feruntur: nec est ulla res, quæ plus apud eum polleat, quam ipsius voluntas atque iudicium: cui quidem etiam, quæ vim habere maximam dicitur, Fortuna ipsa cedit: sicut sapiens poeta dixit; suis ea cuique; fingitur moribus. Soli igitur hoc contingit sapienti, ut nihil faciat invitus, nihil dolens, nihil coactus. Quod etsi ita esse, pluribus verbis differendum est, illud tamen & breve & confitendum est, nisi qui ita sit adfectus, esse liberum neminem. Servi igitur omnes improbi. Nec hoc tam re est, quam dictu inopinatum atque mirabile. Non enim ita dicunt eos esse servos, ut mancipia, quæ sunt dominorum facta nexu, aut aliquo jure civili: sed, si servitus sit, sicut est, obedientia fracti animi, & abjecti, & arbitrio carentis suo, quis neget, omnes leves, omnes cupidos, omnes denique improbos, esse servos? An ille mihi liber, cui mulier imperat? Cui leges imponit, præscribit, jubet, vetat quod videtur?

Qui nihil imperanti negare potest, nihil recusare audet? poscit? dandum est: vocat? veniendum: ejicit? abeundum: minatur? extimescendum. Ego vero istum non modo servum, sed nequissimum servum, etiam si in amplissima familia natus sit, appellandum puto. Atq; ut in magnâ familia sunt alii lautiores, ut sibi videntur, servi, sed tamen servi, atrieneses ac topiarii: pari stultitiâ sunt, quos signa, quos tabulæ, quos cælaturum argentum, quos Corinthia opera, quos ædificia magnifica nimio opere, delectant. At sumus, inquit, civitatis principes. Vos vero ne conservorum quidem vestrorum principes estis. Sed ut in familia, qui tractant illa, qui tergunt, qui ungunt, qui verrunt, qui spargunt, non honestissimum locum servitutis tenent: sic incivitate, qui se istarum rerum cupiditatibus dederunt, ipsius servitutis locum pæne infimum obtinent. Magna, inquis, bella gessi: magnis imperiis, & provinciis præfui. Gere igitur animum laude dignum. Echionis tabula te stupidum detinet, aut signum aliquod Polycleti. Omitto, unde sustuleris, & quomodo habeas. intuentem te, admirantem, clamores tollentem cum video, servum te esse ineptiarum omnium judico. Nonne igitur sunt ista festiva? Sunt; nam nos quoque oculos eruditos habemus. Sed obsecro te, ita venusta habeantur ista, non ut vincula virorum sint, sed ut oblectamenta puerorum. Quid enim censes? si L. Mummius aliquem istorum videret matellionem Corinthium cupidissime tractantem, cum ipse totam Corinthum contempsisset: utrum illum civem excellentem, an atriensem diligentem putaret? Reviviscat M. Curius, aut eorum aliquis, quorum in villa, ac domo nihil splendidum, nihil ornatum fuit, præter ipsos; & videat aliquem summis populi beneficiis usum barbatulos mullos exceptantem de piscinâ, & pertractantem, & murænarum copiâ gloriantem: nonne hunc hominem ita servum judicet, ut ne in familia quidem dignum majore

jore a
bia el
recus
iniqu
locup
lunta
sectat
ri? c
illa c
imper
quam
non p
plissu
domu
servi
cum
domi
quam
centi
nes c
timen
quo t
tus se
viri,
eripit
claro
tati,
Nolit
dicar
vobis
vult.
quid
gerat
posse
dixe
est t
deat
liber
cat.

jore aliquo negotio putet? An eorum servitus dubia est, qui cupiditate peculii nullam conditionem recusant durissimæ servitutis? hereditatis spes quid iniquitatis in serviendo non suscipit? quem nutum locupletis orbi senis non observat? loquitur ad voluntatem: quidquid denunciatum sit, facit: adfectatur, adsidet, muneratur. Quid horum est liberi? quid non denique servi inertis? Quid? jam illa cupiditas, quæ videtur esse liberalior, honoris, imperii, provinciarum, quam dura est domina! quam imperiosa quam vehemens! Cethego homini non probatissimo servire coegit eos, qui sibi esse amplissimi videbantur; munera mittere, noctu venire domum ad eum, precari, denique supplicare. Quæ servitus est, si hæc libertas existimari potest? Quid? cum cupiditatum dominatus excessit, & alius est dominus exortus ex conscientia peccatorum, timor? quam est illa misera, quam dura servitus! adolescentibus paullo loquacioribus est serviendum: omnes qui aliquid scire videntur, tamquam domini timentur. Judex vero quantum habet dominatum? quo timore nocentes adficit? an non est omnis metus servitus? Quid valet igitur illa eloquentissimi viri, L. Crassi, copiosa magis, quam sapiens oratio? *eripite nos ex servitute.* Quæ est ista servitus tam claro homini, tamve nobili? Omnis animi debilitati, & humilis, & fracti timiditas servitus est. *Nolite finire nos cuiquam servire.* In libertatem vindicari vult? minimè. Quid enim adjungit? *nisi vobis universis.* Dominum mutare, non liber esse vult. *Quibus & possumus & debemus.* Nos verò, si quidem animo excelso, & alto, & virtutibus exaggerato sumus, nec debemus, nec possumus. Tu posse te dicito, quoniam quidem potes: debere ne dixeris: quoniam nihil quisquam debet, nisi quod est turpe non reddere. Sed hæc hætenus. Ille videat, quomodo imperator esse possit; cum eum ne liberum quidem esse ratio, & veritas ipsa convincat.

P A R A D O X O N. VI.

Ὅτι μόνος ὁ σοφὸς πλέσι.

Solum sapientem esse divitem.

Quæ est ista in commemorandâ pecuniâ tua tam insolens ostentatio? solusne tu dives? Pro dii immortales! Egone me audivisse aliquid: & didicisse non gaudeam? Solusne dives? Quid si ne dives quidem? quid si pauper etiam? Quem enim intelligimus divitem? aut hoc verbum in quo homine ponimus? opinor in eo, cui tanta possessio est, ut ad liberaliter vivendum faciliè contentus sit: qui nihil quærat, nihil appetat, nihil optet amplius. Animus oportet tuus te judicet divitem, non hominum sermo, neque possessiones tuæ: nihil sibi deesse putet, nihil curet amplius. Satiatus est, aut contentus etiam pecuniâ? concedo, dives es. Sin autem propter aviditatem pecuniæ nullum quæstum turpem putas, cum isti ordini ne honestus quidem possit esse ullus: si quotidie fraudas, decipis, poscis, pacisceris, auferis, eripis: si socios spolias, ærarium expilas: si testamenta amicorum expectas, aut ne expectas quidem, atque ipse supponis: hæc utrum abundantis, an egeni signa sunt? Animus hominis dives, non arca appellari solet. Quamvis illa sit plena, dum te inanem videbo, divitem non putabo. Etiam ex eo, quantum cuique satis est, metiuntur homines divitiarum modum. Filiam quis habet? pecuniâ est opus. Duas? majore. Plures? majore etiam. Et si, ut ajunt, Danaï quinquaginta sint filiæ, tot doctes magnam quærunt pecuniam. Quantum enim cuique satis est, ad id accommodatur, ut antè dixi, divitiarum modus. Qui igitur non filias plures, sed innumerabiles cupiditates habet, quæ

brevi

brevi
hunc
etiam
cum d
ercitu
Roma
test.
antè,
ficiatu
equitu
igitur
explea
tatem
tuam
honest
ris da
esse q
cusato
qui n
re co
cedun
cunia
nes l
provi
nia i
entib
prose
rum,
tur,
mine
cretu
mum
confi
sito
tem
pian
tia:
quan

breui tempore maximas copias exhaurire possint ; hunc quo modo ego appellabo divitem, cum ipse etiam egere se sentiat ? multi ex te audierunt, cum diceres, neminem esse divitem, nisi qui exercitum alere possit suis fructibus : quod populus Romanus tantis vectigalibus jampridem vix potest. Ergo hoc proposito, numquam eris dives ante, quam tibi ex tuis possessionibus tantum reficiatur, ut ex eo tueri sex legiones, & magna equitum, ac peditum auxilia possis. Jam fateris igitur non esse te divitem, cui tantum desit, ut expleas id, quod exoptas. Itaque istam paupertatem, vel potius egestatem, ac mendicitatem tuam numquam obscure tulisti. Nam ut iis, qui honestè rem quærunt mercaturis faciendis, operis dandis, publicis sumendis, intelligimus opus esse quæsito : sic, qui videt domi tuæ pariter accusatorum, atque judicum consociatos greges ; qui nocentes & pecuniosos reos eodem te auctore corruptelam judicii molientes, qui tuas mercedum pactiones in patrociniis, intercessiones pecuniarum in coitionibus candidatorum, dimissiones libertorum ad defœnerandas diripiendasque provincias : qui expulsionem vicinorum, qui latrocinia in agris, qui cum servis, cum libertis, cum clientibus societates, qui possessiones vacuas, qui proscriptiones locuplerum, qui cædes municipiorum, qui illam Sullani temporis messem recorderetur, qui testamenta subiecta, qui sublatis tot homines : qui denique omnia venalia, dilectum, decretum, alienam, suam sententiam, forum, domum, vocem, silentium. Quis hunc non putet confiteri, sibi quæsito opus esse ? Cui autem quæsito opus sit, quis unquam hunc verè dixerit divitem ? Etenim divitiarum fructus in copia est ; copiam autem declarat satietas rerum atq; abundantia : quam tu quoniam numquam assequere, numquam omnino es futurus dives. Meam autem quoniam

niam pecuniam contemnis, & rectè (est enim ad vulgi opinionem mediocris ; ad tuam, nulla ; ad meam, modica) de me filebo, de re loquar. Si censenda nobis, atque æstimanda res sit, utrùm tandem pluri æstimemus pecuniam Pyrrhi, quam Fabricio dabat, an continentiam Fabricii, qui illam pecuniam repudiabat ? utrum aurum Samnitum, an responsum M. Curii ? hæreditatem L. Paulli, an liberalitatem Africani, qui ejus hæreditatis Q. Maximo fratri partem suam concessit ? Hæc profectò, quæ sunt summarum virtutum, pluri æstimanda sunt, quam illa, quæ sunt pecuniæ. Quis igitur (si quidem, ut quisque quod plurimi sit, possideat, ita ditissimus habendus sit) dubitet, quin in virtute divitiæ sint ? quoniam nulla possessio, nulla vis auri, & argenti, pluri quam virtus æstimanda est. O dii immortales ! non intelligunt homines, quam magnum vestigal sit parsimonia. Venio enim jam ad sumptuosos : relinquo istum quæstuosum. Capit ille ex suis prædiis sexcenta sesteria ; ego centena ex meis : illi aurata tecta in villis, & sola marmorea facienti, & signa, tabulas, supellectilem, & vestem infinite concupiscenti, non modo ad fructum ille est sumtus, sed etiam ad fœnus, exiguus. Ex meo tenui vestigali, deductis sumtibus cupiditatis, aliquid etiam redundabit. Uter igitur est ditior, cui deest, an cui superat ? qui eget, an qui abundat ? cujus possessio quo est major, eo plus requirit ad se tuendam ; an quæ suis se viribus sustinet ? Sed quid ego de me loquor, qui morum ac temporum vitio aliquantum etiam ipse fortasse in hujus sæculi errore verfer ? M. Manlius, patrum nostrorum memoriâ, ne semper Curios, & Luscinos loquamur, pauper tandem fuit : habuit enim ædiculas in Carinis, & fundum in Labicano. Nos igitur divitiores, qui plura habemus ? utinam quidem. Sed non æstimatione census, verum victu atque cultu

termini
cunia
tum, v
mæqu
stimat
quod
quanti
surrip
incend
porum
sunt,
fructu
primum
putan
nihil
bi aut
su po
eorum
haber
vites,
sunt.

terminatur pecuniæ modus. Non esse cupidum, pecunia est : non esse emacem, vectigal est : contentum vero suis rebus esse, maximæ sunt certissimæque divitiæ. Etenim si isti callidi rerum æstimatores prata & areas quasdam magno æstimant, quod ei generi possessionum minimè noceri potest : quanti est æstimanda virtus, quæ nec eripi nec surripi potest umquam : neque naufragio, neque incendio amittitur : nec tempestatum, nec temporum perturbatione mutatur ? qua præditi qui sunt, soli sunt divites. Soli enim possident res & fructuosas & sempiternas : solique, quod est proprium divitiarum, contenti rebus suis, satis esse putant, quod est : nihil appetunt, nullâ re egent, nihil sibi deesse sentiunt, nihil requirunt. Improbi autem & avari, quoniam incertas, atque in casu positas habent, & plus semper appetunt, nec eorum quisquam adhuc inventus est, cui, quod haberet, esset satis ; non modo non copiosi ac divites, sed etiam inopes ac pauperes existimandi sunt.



M. TULLII CICERONIS
S O M N I U M
S C I P I O N I S.
SCIPIO LOQUITUR.



Um in Africam venissem, M. Manlio consuli ad quartam legionem tribunus, ut scitis, militum, nihil mihi potius fuit, quam ut Massinissam convenirem, regem familiæ nostræ justis de causis amicissimum. Ad quem ut veni, complexus me senex collacrimavit, aliquantoque post suspexit in cælum : & gratias, inquit, tibi ago, summe Sol, vobisque reliqui cœlites, quod antè, quam ex hac vitâ migro, conspicio in meo regno, & his tectis P. Cornelium Scipionem. Cujus ego nomine ipso recreor : ita nunquam ex animo meo discedit illius optimi atque invictissimi viri memoria. Deinde ego illum de suo regno, ille me de nostra rep. percontatus est. Multisque verbis ultrò, citroque habitis, ille nobis consumtus est dies. Post autem regio apparatu accepti, sermonem in multam noctem produximus, cum senex nihil nisi de Africano loqueretur, omniaque ejus non facta solum, sed etiam dicta meminisset. Deinde, ut cubitum discessimus, me & festum de viâ, & qui ad multam noctem vigilassem, ætior, quàm solebat, somnus complexus est. Hic mi-

hi, (fit en
paria
scribi
soleba
illâ f
ipso,
horru
timor
Vidēs
acta
quiesc
excel
dam
pæne
eritqu
bes a
Karth
forqu
am,
sens,
am e
inve
potis
patria
Sed
viam.
fractu
meri,
causâ
fatale
nome
omne
eris
multa
pias
excla
ment

hi, (credo quidem ex hoc, quod eramus locuti; fit enim ferè, ut cogitationes sermonesque nostri pariant aliquid in somno tale, quale de Homero scribit Ennius, de quo videlicet sæpissime vigilans solebat cogitare, & loqui:) Africanus se ostendit illâ formâ, quæ mihi ex imagine ejus, quam ex ipso, erat notior. Quem ut agnovi, equidem cohorruui. Sed ille, Ades, inquit, animo, & omitte timorem, Scipio, & quæ dicam, trade memoriæ. Vidésne illam urbem, quæ parere populo R. coacta per me, renovat pristina bella, nec potest quiescere? (ostendebat autem Karthaginem de excelso, & pleno stellarum, illustri, & claro quodam loco) ad quam tu oppugnandam nunc venis pæne miles? hanc hoc biennio consul evertes, eritque cognomen id tibi per te partum, quod habes adhuc à nobis hereditarium. Cum autem Karthaginem deleveris, triumphum egeris, censorque fueris, & obieris legatus Ægyptum, Syriam, Asiam, Græciam, deligere iterum cos. absens, bellumque maximum conficies, Numantiam exscindes. Sed cum eris curru Capitolium inductus, offendes remp. perturbatam consiliis nepotis mei. Hic tu, Africane, ostendas oportebit patriæ, lumen animi, ingenii, consiliique tui. Sed ejus temporis ancipitem video quasi fatorum viam. Nam cum ætas tua septenos octies solis anfractus, reditusque converterit, duoque hi numeri, quorum uterque plenus, alter alterâ de causâ, habetur, circuitu naturali summam tibi fatalem confecerint: in te unum, atque in tuum nomen, se tota convertet civitas: te senatus, te omnes boni, te socii, te Latini intuebuntur: tu eris unus, in quo nitatur civitatis salus: ac ne multa, dictator remp. constituas oportet, si impias propinquorum manus effugeris. Hic cum exclamasset Lælius, ingemuissentque ceteri vehementius: leniter arridens Scipio, Quæso, inquit,

ne

ne me è somno excitetis, & parum rebus: audite cetera. Sed quò sis, Africane, alacrior ad tutandum remp. sic habeto. Omnibus, qui patriam conservârint, adjuverint, auxerint, certum esse in cœlo definitum locum, ubi beati ævo sempiterno fruantur. Nihil est enim illi principi Deo, qui omnem hunc mundum regit, quod quidem in terris fiat, acceptius, quam concilia cœtusque hominum jure sociati, quæ civitates appellantur: harum rectores, & conservatores hinc profecti, hunc revertuntur. Hic ego, etsi eram perterritus, non tam metu mortis, quam insidiarum à meis, quæsiui tamen, viverétne ipse & Paulus pater, & alii, quos nos extinctos arbitraremur. Immo verò, inquit, ii vivunt, qui ex corporum vinculis, tanquam è carcere, evolaverunt: Vestra vero quæ dicitur vita, mors est. Quin tu aspicias ad te venientem Paullum patrem. Quem ubi vidi, equidem vim lacrymarum profudi. Ille autem me complexus atque osculans flere prohibebar. Atque ego ut primum, fletu represso, loqui posse cœpi, Quæso, inquam, pater sanctissime atque optime, quoniam hæc est vita, ut Africanum audio dicere, quid moror in terris, quin huc ad vos venire propero? Non est ita, inquit ille, nisi Deus is, cujus hoc templum est omne, quod conspicias, istis te corporis custodiis liberaverit, huc tibi aditus patere non potest. Homines enim sunt hac lege generati, qui tuerentur illum globum, quem in hoc templo medium vides, quæ terra dicitur: hisque animus datus est ex illis sempiternis ignibus, quæ sidera, & stellas vocatis. Quæ globosæ, & rotundæ, divinis animatæ mentibus, circos suos, orbésque conficiunt celeritate mirabili. Quare & tibi, Publi, & piis omnibus rerinendus est animus in custodiâ corporis: nec injus su ejus, à quo ille est vobis datus, ex hominum vitâ migrandum est, ne munus humanum adsignatum

tum
ut a
cole,
renti
est:
tum
illum
is, sp
lucen
lacter
plant
erant
loco
esse
illa
lucen
nitud
mih
quasi
cum
usq;
in te
globi
cœle
tur,
ros:
larun
tem,
cœlu
quam
homi
qui d
ris, c
am f
& m
di, &
sua lu
sequu

tum a Deo defugisse videamini. Sed sic, Scipio, ut avus hic tuus, ut ego, qui te genui, justitiam cole, & pietatem: quæ, cum sit magna in parentibus, & propinquis, tum in patriâ maxima est: ea vita via est in cælum, & in hunc cœtum eorum, qui jam vixerunt, & corpore laxati, illum incolunt locum, quem vides: erat autem is, splendidissimo candore inter flammæ circus elucens, quem vos, ut à Graijs accepistis, orbem lacteum nuncupatis: ex quo omnia mihi contemplant, præclara cetera, & mirabilia videbantur. erant autem eæ stellæ, quas numquam ex hoc loco vidimus: & eæ magnitudines omnium, quas esse numquam suspicati sumus: ex quibus erat illa minima, quæ ultima cœlo, citima terris, luce lucebat alienâ. Stellarum autem globi, terræ magnitudinem facile vincebant. Jam ipsa terra ita mihi parva visa est, ut me imperii nostri, quo quasi punctum ejus attingimus, pœniteret. Quam cum magis intuerer, quæso, inquit Africanus, quousq; humi defixa tua mens erit? nōne adspicis, quæ in templa veneris? novem tibi orbibus, vel potius globis, connexa sunt omnia: quorum unus est cœlestis, extimus, qui reliquos omnes complectitur, summus ipse Deus, arcens, & continens ceteros: in quo infixi sunt illi, qui volvuntur, stellarum cursus sempiterni: cui subjecti sunt septem, qui versantur retro, contrario motu, atque cælum, ex quibus unum globum possidet illa, quam in terris Saturniam nominant. Deinde est hominum generi prosperus & salutaris ille fulgor, qui dicitur Jovis: tum rutilus horribilisque terris, quem Martium dicitis: deinde subter mediam fere regionem Sol obtinet, dux & princeps, & moderator luminum reliquorum, mens mundi, & temperatio, tanta magnitudine, ut cuncta sua luce illustret, & compleat. Hunc ut comites consequuntur alter Veneris, alter Mercurii cursus; in
infimó-

infimóque orbe Luna, radiis solis accensa, convertitur. Infra autem jam nihil est, nisi mortale & caducum, præter animos generi hominum munere deorum dados. Supra lunam sunt æterna omnia. Nam ea, quæ est mediâ & nona, tellus neque movetur, & infima est, & in eam feruntur omnia suo nutu pondera. Quæ cum intuerer stupens, ut me recepi, Quid hic, inquam, quis est, qui complet aures meas tantus, & tam dulcis sonus? Hic est, inquit ille, qui intervallis conjunctus imparibus, sed tamen pro rata portione distinctis, impulsu & motu ipsorum orbium conficitur: qui acuta cum gravibus temperans, varios æquabiliter concentus efficit. Nec enim silentio tanti motus incitari possunt, & natura fert, ut extrema ex alterâ parte graviter, ex alterâ autem acutè sonent. Quam ob causam summus ille cœli stellifer cursus, cujus conversio est concitator, acuto & excitato movetur sono: gravissimo autem hic lunaris atque infimus. Nam terra, nona, immobilis manens, ima sede semper hæret complexa medium mundi locum. Illi autem octo cursus, in quibus eadem vis est duorum, Mercurii & Veneris, septem efficiunt distinctos intervallis sonos: qui numerus rerum omnium fere nodus est. Quod docti homines nervis imitati, atque cantibus, aperuere sibi reditum in hunc locum: sicut alii, qui præstantibus ingeniis in virâ humanâ divina studia coluerunt. Hoc sonitu oppleræ aures hominum obscuruerunt: nec est ullus hebetior sensus in vobis: sicut ubi Nilus ad illa, quæ Catadupa nominantur, præcipitat ex altissimis montibus, ea gens, quæ illum locum accolit, propter magnitudinem sonitus, sensu audiendi caret. Hic vero tantus est totius mundi incitatissima conversione sonitus, ut eum aures hominum capere non possint: sicut intueri solem adversum nequitis, ejusque radiis acies vestra sensusque vincitur. Hæc ego admirans, referebam

rebam tamen oculos ad terram identidem. Tum Africanus ; Sentio, inquit, te sedem etiam nunc hominum ac domum contemplari : quæ si tibi parva, ut est, ita videtur, hæc cœlestia semper spectato : illa humana contemnito. Tu enim quam celebritatem sermonis hominum, aut quam expendam gloriam consequi potes ? vides habitari in terra raris & angustis in locis : & in ipsis quasi maculis, ubi habitatur, vastas solitudines interjectas : hosque qui incolunt terram, non modo interruptos ita esse, ut nihil inter ipsos ab aliis ad alios manare possit ; sed partim obliquos, partim aversos, partim etiam adversos stare vobis : à quibus expectare gloriam certè nullam potestis. Cernis autem eandem terram, quasi quibusdam redimitam & circumdatam cingulis ; è quibus duos maxime inter se diversos, & cœli verticibus ipsis ex utraque parte subnixos, obriguisset pruina vides, medium autem illum, & maximum, solis ardore torreri. Duo sunt habitabiles : quorum australis ille, in quo qui insistant, adversa vobis urgent vestigia, nihil ad vestrum genus : hic autem alter subiectus aquiloni, quem incolitis, cerne, quam tenui vos parte contingat. Omnis enim terra, quæ colitur à vobis, angusta verticibus, lateribus latior, parva quodam insula est, circumfusa illo mari, quod Atlanticum, quod Magnum, quod Oceanum appellatis in terris ; qui tamen tanto nomine, quam sit parvus, vides. Ex his ipsis cultis notisque terris, num aut tuum aut cuiusquam nostrum nomen, vel Caucasum hunc, quem cernis, transcendere potuit, vel illum Gangem transnatare ? quis in reliquis Orientis, aut ob-euntis solis ultimis aut aquilonis, austrive partibus tuum nomen audiet ? quibus amputatis cernis profectò, quantis in angustiis vestra gloria se dilatari velit. Ipsi autem, qui de vobis loquuntur, quamdiu loquentur ? Quinetiam, si cupiat proles illa fu-

Q

turo-

tutorum hominum deinceps laudes uniuscujusque nostrum à patribus acceptas posteris prodere, tamen propter eluviones exustionesque terrarum, quas accidere tempore certo necesse est, non modo æternam, sed ne diuturnam quidem gloriam assequi possumus. Quid autem interest, ab iis, qui postea nascentur, sermonem fore de te, cum ab iis nullus fuerit, qui ante nati sint? qui nec pauciores, & certè meliores fuerunt viri; cum præsertim apud eos ipsos, à quibus audiri nomen nostrum potest, nemo unius anni memoriam consequi possit: homines enim populariter annum tantummodo solis, id est, unius astri reditu metuntur. Cum autem ad idem, unde semel profecta sunt, cuncta astra redierint, eandemque totius anni descriptionem longis intervallis retulerint, tum ille verè vertens annus appellari potest: in quo vix dicere audeo, quam multa sæcula hominum teneantur. Namque, ut olim deficere sol hominibus, exstinguique visus est, cum Romuli animus hæc ipsa in templa penetravit: ita quandoque eadem parte sol, eodemque tempore iterum defecerit, tum signis omnibus ad idem principium stellisque revocatis, expletum annum habeto. Hujus quidem anni nondum vicesimam partem scito esse conversam. Quocirca, si reditum in hunc locum desperaveris, in quo omnia sunt magnis, & præstantibus viris: quanti tandem est ista hominum gloria, quæ pertinere vix ad unius anni partem exiguam potest? Igitur altè spectare si voles, atque hanc sedem, & æternam domum contueri, neque te sermonibus vulgi dederis, nec in præmiis humanis spem posueris rerum tuarum: suis te oportet illecebris ipsa virtus trahat ad verum decus. Quid de te alii loquantur, ipsi videant: sed loquentur tamen. Sermo autem omnis ille & angustiis cingitur iis regionum, quas vides, nec unquam de ullo perennis fuit; & obruitur hominum

minum interitu; & oblivione posteritatis exinguitur. Quæ cum dixisset, Ego verò, inquam, ò Africane, si quidem bene meritis de patria quasi limes ad cœli aditum patet, quamquam à pueritiâ vestigiis ingressus patriis, & tuis, decori vestro non defui: nunc tamen, tanto præmio proposito, enitar multo vigilantius. Et ille, Tu vero enitere, & sic habeto, non esse te mortalem, sed corpus hoc. Nec enim tu es, quem forma ista declarat: sed mens cujusque, is est quisque: non ea figura, quæ digito demonstrari potest. Deum te igitur scito esse: siquidem Deus est, qui viget, qui sentit, qui meminit, qui providet, qui tam regit & moderatur, & movet id corpus, cui præpositus est, quam hunc mundum ille princeps Deus: & ut mundum ex quadam parte mortalem ipse Deus æternus, sic fragile corpus animus sempiternus movet. Nam quod semper movetur, æternum est: quod autem motum adfert alicui, quodque agitur aliunde; quando finem habet motus, vivendi finem habeat necesse est. Solum igitur, quod sese mover, quia numquam deseritur à se, numquam ne moveri quidem desinit: quin etiam ceteris, quæ moventur, hic fons, hoc principium est movendi. Principio autem nulla est origo. Nam ex principio oriuntur omnia: ipsum autem nulla ex re: nec enim esset principium quod gigneretur aliunde: quod si numquam oritur, ne occidit quidem umquam. Nam principium extinctum, nec ipsum ab alio renascetur, nec ex se aliud creabit: siquidem necesse est à principio oriri omnia. Ita fit, ut motus principium ex eo sit, quod ipsum à se movetur: id autem nec nasci potest, nec mori: vel concidat omne cœlum, omnisque natura consistat necesse est, nec vim ullam nanciscatur quæ à primo impulsu moveatur. Cum pateat igitur æternum id esse, quod à seipso moveatur, quis est, qui hanc na-

turam animis esse tributam neget? Inanimum est enim omne, quod impulsu agitur externo: quod autem animal est, id motu cietur interiore, & suo. Nam hæc est natura propria animi atque vis. Quæ si est una ex omnibus, quæ sese moveat, neque nata est certè, & æterna est. Hanc tu exerce in optimis rebus: sunt autem optimæ, curæ de salute patriæ: quibus agitatus & exercitatus animus velocius in hanc sedem & domum suam pervolabit: idque ocyùs faciet, si jam tum, cum erit inclusus in corpore, eminebit foras, & ea, quæ extra erunt, contemplans, quam maximè se à corpore abstrahet. Nam eorum animi, qui se corporis voluptatibus dediderunt, earumque se quasi ministros præbuerunt, impulsuque libidinum voluptatibus obedientium, Deorum & hominum jura violaverunt, corporibus elapsi circum terram ipsam volutantur, nec hunc in locum, nisi multis exagitati sæculis revertuntur. Ille discessit: ego somno solutus sum.

F I N I S.





Index rerum & verborum.

A.

Abstinentia *Africani*, p. 97.
 1. 6. abstinentia benevolentiam multitudinis conciliat, 97. 28
Academia ratio quid à cæteris differat, 69. 10
Accusatio multos illustravit, 85. 28. accusatoris nomen fugiendum, 86. 4. accusare innocentes, impium, 86. 10. accusatio laudem peperit
 L. Crasso adolescenti, 84. 33. accusatio quibus de causis suscipienda, 85. 30
Acta agere, 210. 33
Actio cognitioni anteponenda, 63. 5. actione in omni suscipienda, considerata sunt honestas & efficiendi facultas, 31. 12. & modus, 57. 24
Aljuvare operâ præstantius quàm pecuniâ, 87. 1
Admirabilitas quibus rebus comparetur, 80. 11
Adolescentes quibus è rebus commendationem petere debeant, 84. 2. adolescens aliquid senile habere debet, 163. 22. adolescentia vituperatio,

157. 22. adolescentia ver comparatur, 175. 35. adolescentum petulantia magis est quàm senum, 163. 7. Adolescentia multò plures, quàm senectus, mortis casus habet, 174. 33. adolescentum imbecillitas consilii propria, 48. 29
Adulari, passivè, 38. 10. ab adulatoribus faciliè falluntur omnes, ibid. adulator occultus, 215. 15
Ædes ruinosa & malè materiata, 122. 20
Æginetis pollices præcisi, 119. 22
Ægina propinqua Piræo, ib. 24
Æquitas lucet ipsâ per se, 13. 30
Ætate ut quisque antecellit, ita sententia principatum tenet augurum collegio, 173. 33. ætati cuique sua tempestivitas data est, 162. 1. ætati cuique sua sunt studia, 177. 31. ætatibus corroboratis amicitiæ judicanda sunt, 207. 17
Africani dictum pulcherrimum, 37. 33. *Africanus* prætor anno ante censorem M. Cato-

Index rerum & verborum.

nem, mortuus est, 157. 3
 Agamemnon immolavit Iphigeniam filiam, 139. 15
 Agis rex occisus, 98. 18
 Agraria lex Philippi. 95. 32
 Agri fertiles imitandi, 21. 31
 Agricultura laus, 62. 2
 Agriculorum voluptates, 168. 30
 Agri bene culti laus, 171. 19
 Alexander Macedo, humanitate superatus à patre, 37. 25
 Alexander Pheraus ab uxore interfectus, 76. 3
 Ambitiosi quibus similes, 36. 14
 Amicitia unum facit ex pluribus, 24. 34. amicorum consilium in rebus secundis maxime necessarium, 38. 6. amicitia maxime perturbat officia, 118. 11. amicitia praestat iustitia, ib. amicitia prima lex ut neque rogemus res turpes, neque faciamus rogati, 196. 31. amicitia orta à natura, non ab imbecillitate, 193. 15. 194. 7. amicitiam usque ad extremum vita diem permanere, cur difficile sit, 194. 28. amicitias qui magis quarant 198. 25. amici qui eligendi, 203. 37. amicitia vera difficillime reperiuntur in iis qui in honoribus réque publica versantur, 204. 19. amicus certus in re incerta cernitur, ibid. 26. amicitia fines ac termini, deque iis varia sententia, 206. 29. amici ea qua minus probantur, dissuenda magis, quam discindenda sunt, 208. 14. amicitia inter aequales

magis eluce, 206. 4. amicitia vera sempiterna sunt, 194. 19. amicus tanquam aliter idem, 209. 21. amicorum bene suadentium auctoritas plurimum valere debet, 198. 7. amicitia quid sit, 189. 18. amicorum omnia communia, 23. 11. amare quid sit, 216. 3.
 Animorum natura cur mortalis esse non possit, 178. 30. animo nihil praestantius, 222. 5. animus in custodia corporis, quoad Deo videtur, retinendus, 238. 36. animi generi hominum deorum munere dati, 240. 3. animi opera majora, quam corporis, 84. 15. animorum vis duplex, 42. 11
 Annulus Gygis, 116. 3
 Annus verè vertens multa hominum secula complectitur, 242. 18
 Apellis Venus, 106. 21
 Apollinis Pythii oraculum, 97. 25
 Appetitus rationi lege natura subiectus est, 42. 29
 Aquà haeret, 147. 32
 Aquilius de dolo malo, 124. 30
 Aratus Sicyonis Nicoclem tyrannum occidit, 98. 32
 Arbitrorum formula, 130. 3
 Arganthonius quidam octoginta regnavit annos, centum & viginti vixit, 175. 18
 Aristidis sententia de Themistoclis consilio, 120. 20
 Aristoteles quid de pecuniarum effusionibus sentiat, 88. 29
 ejus opinio de honesto, 115. 13
 Artificia qua liberalia, qua sordida, 61. 15
 Affen-

Affensa
 ven.
 Astuti
 losop
 Atiliu
 Atiliu
 Avari
 us,
 lum
 20.
 pero
 sem
 ava
 cau
 Auspi

Bell
 be
 lun
 Cat
 15
 qu
 Bene
 Bene
 est.
 re.
 Benef
 su
 Bene
 be
 be
 3
 re
 be
 co
 ci
 n
 n
 p
 q

Index rerum & verborum.

Affentatio ab amicitia removen-
 enda, 212. 26
Astutias aliter leges, aliter phi-
 losophi tollunt, 129. 17
Atilius vigilando necatus, 141.
 23
Atilius L. cur sapiens habitus,
 184. 8
Avaritiâ senili nihil absurdi-
 us, 174. 18. avaritiâ nul-
 lum est tetrius vitium, 97.
 20. avaritia populos omnes
 perdit, 97. 28. avari plus
 semper appetunt, 235. 17.
 avaritia injuria præcipua
 causa, 11. 26
Auspicia qua sint optima, 154.
 19

B.

B*ella* cur suscipienda, 16. 10.
 bella i sta qua, 17. 26. bel-
 lum Punicum tertium M.
 Catonis consilio illatum, 33.
 15. belli gloria adolescentibus
 quærenda, 84. 2
Bene agere quid sit, 130. 6
Bene & beatè vivere nihil aliud
 est, nisi honestè & rectè vive-
 re, 222. 20
Benefacta malè locata, malefacta
 sunt, 91. 4
Beneficia citra injuriam esse de-
 bent, 93. 22. benefici & li-
 iberales naturâ sumus, 193.
 33. beneficium qui dat, mo-
 res, non fortunam sequi de-
 bet, 93. 37. beneficia in quos
 conferenda, 90. 31. benefi-
 cia in singulos, 95. 20. be-
 neficia in rempub. 98. 28. be-
 neficia in egentissimos quosque
 præcipuè conferenda, 22. 16.
 qua beneficia omnibus com-

municanda, 23. 20
Benevolentia colligenda præcepta,
 78. 24
Benignitas quas cautiones ha-
 beat, 19. 29. benignitas qua
 sit utilis reipublica, 90. 9.
 benignitate nihil hominis na-
 tura accommodatius, 19. 27
Boni viri qui sint, 130. 7. bo-
 nus nemo miser esse potest,
 223. 31. boni viri definitio,
 132. 5. bonum summum,
 convenienter natura vivere, è
 Stoicorum sententia, 107.
 15. bona ea omnia sunt ha-
 benda, qua secundum natu-
 ram fiunt, 176. 2. bonorum
 æquatio non laudanda, 97.
 37. bonum solum honestum,
 219. 26. bona caduca & in-
 certa, 189. 26

C.

C*æcilius* versus contra senectutem,
 159. 1
Cæsaris largitiones, non libera-
 les sed injusta, 20. 11
Castigatio omnis vacare conta-
 meliâ debet, 37. 2
Catonis senis præcepta quatuor
 ad utilitatem rei familiaris,
 101. 30. Catonis facta, So-
 cratis dicta laudantur, 185.
 14. Cato Censorius Graca-
 rum literarum perstudiosus
 in senectute, 151. 16. Cato
 Uticensis cur se interficere de-
 buerit, 47. 1. Cato cur sapiens
 habitus, 184. 11. è vita dis-
 cedit tanquam ex hospitio,
 non tanquam ex domo, 180.
 38
Cicero, stante repub. plus tempo-
 ris in agendo, quam in scri-
 bendo

Index rerum & verborum.

bendo ponebat, 67. 21. *Cice-*
ronis filii laus in re militari,
 84. 8. *Ciceroni reditum glo-*
riosum inimicorum dedit inju-
ria, non exitum calamitosum,
 227. 28
Civitas quæ dici possit, 226. 3
Civis quis sit, 227. 30
Civitatum rectoribus & conser-
vatoribus patet in cælum adi-
tus, 238. 5
Clementia & placabilitas magnis
viris dignissima, 36. 25
Colendi qui, 61. 1
Communia civibus inter se quæ
sunt, 23. 6
Concordia fundamentum reipub-
lica, 95. 35
Conjugia, societas prima, 24. 7
Consideratio tempus & diligentiam
postulat, 9. 24
Consuetudinis maxima vis est,
 205. 34
Contemptus quos homines sequa-
tur, 80. 25
Contentio plus ad gloriam valet
quam sermo, 85. 2
Convivium melius Latini, quam
Græci nominarunt, 166. 30
Corporis bona externis antepo-
nenda, 101. 23
Crudelitas inimica natura, 119.
 26
Cura optima de salute patria,
 244. 7
Cyrillus quidam lapidibus obru-
tus, 120. 8
Cyrus Persarum rex agriculturæ
maxime oblectatus, 171. 36

D.

Damon & Phintias, 118.
 35
Decorum ab honesto quid diffe-

rat, 39. 19. *Decorum quid*
sit, 40. 21. *Decorum tribus*
in rebus positum est, 52. 6.
Decorum ab honesto separari
non potest, 40. 12
Defensio accusatione laudabilior,
 85. 25. *Defendendi interdum*
etiam nocentes, 86. 15. *de-*
finitio necessaria principio
disputationis, 4. 17
Deliberanda ea non sunt, in
quibus est turpis ipsa delibe-
ratio, 115. 34
Deos non nocere, 70. 29
Deposita non semper reddenda,
 139. 21
Dissimilitudo dissociat amicitias,
 207. 28
Divitias amare, parvi angustiq;
animi est, 29. 21. *divitiæ*
cur expetantur, 11. 29. *di-*
res quis sit, 232. 10
Dolus malus quid, 124. 33
Duodecim tabulæ de tutela, 125.
 6
Dolor, contra naturam, 110. 12

E.

Eloquentia laus, 63. 37. *elo-*
quentia quid, 85. 13
Ennius censet non lugendam es-
se mortem, quam immortalita-
tem consequatur, 177. 3
Epicureorum sententia de Deo,
 142. 4. *Epicuri de bono &*
malo sententia, 220 & 221
Euxaieia, 58. 26
Eutaëia, 58. 14
Exercitatio in omni re necessa-
ria, 30. 12. *exercitatio in*
senibus quid efficiat, 162. 13
Exilium quibus terribile, 223.
 19. *exules qui sunt*, 228. 9

Fabu-

Index rerum & verborum.

F.

- F**abula Platonis utilissima, 116. 3
 Falsum jurare, pejerare non est, 143. 34
 Fides unde dicta, 11. 12. fides ut nobis habeatur, quid faciendum, 79. 8. fides vel hosti data servanda, 16. 30. fides & constantia in amicitia desiderantur, 204. 33
 Finis bonorum & malorum simplex esse debet, 148. 24
 Forma dignitas quomodo tuenda, 53. 58
 Fortis animus duabus in rebus cernitur, 28. 7. fortissimus quisque imperandi cupidissimus, 28. 1. fortitudo sine iustitia in vitio, 27. 28. fortitudinem quomodo definiant Stoici, ibid. 18
 Fortuna magna vis in utramque partem, 73. 17
 Fraus odio digna majore quam vis, 19. 7. fraus vulpecula propria, vis leonis, ibid. 6

G.

- G**emma in vitibus, 169. 29
 Gloriam cupidi homines facile ad res injustas impelluntur, 28. 19. gloriam qui contemnunt, non reprehendendi, 30. 24. gloria tribus è rebus constat, 78. 14. gloria consequenda viam Socrates tradidit, 83. 1. gloriam è rebus bellicis petere adolescentes debent, 84. 2. gloria hominum angustis finibus terminatur, nec diuturna esse

- potest, 236. 77
 Gnathonum multi similes, 213. 28
 Græca cum Latinis conjungenda, 2. 1

H.

- H**æreditas optima quæ, 50. 19. hereditatis spes quid efficiat, 231. 3
 Hercules in celestium numero collocatus, propter beneficia in humanum genus collata, 111. 16
 Homo ceteris animantibus quantum & in quo præstet, 6. 34. homo solus ordinem sentit, 7. 36. homines quidam non re, sed nomine, 44. 13. deos hominibus maxime utiles, 70. 26. hominum studia in nos quomodo excitentur, 73. 14
 Honestum laudabile naturâ, 8. 9. honestum quibus ex rebus confietur, ibid. 6. honestum è quatuor veluti fontibus manat, ibid. 16. honestum nihil, quod iustitiâ vacat, 27. 22. honestas à partibus quatuor manat, 62. 15. per se animos omnium movet, 79. 1. honestum quid sit, è Stoicorum, Peripateticorum, Socraticis sententia, 106. 30. honestum verum in sapientibus solus, 107. 23. honesti vis, 120. 3. honesta naturâ, temporibus fiunt non honesta, 159. 27
 Hostis olim peregrinus, 17. 15
 Humana res fragiles & caducæ, 216. 21

Index rerum & verborum.

I.

Imperia non semper expetenda, 29. 28
 Imperator quis sit, 228. 31
 Impii adversus deos qui sint, 112. 22
 Injuria fit duobus modis, 19. 4
 Injustitia duo genera, 11. 14
 Insipiente fortunato nihil est intolerabilius, 201. 16
 Invisâ Minervâ nihil decet, 46. 20
 Jocandi genus duplex, 43. 15
 Jocandi genus quale esse debeat, 43. 22
 Irasci graviter inimicis non oportet, 36. 23
 Ira nihil rectè fieri patitur, 56. 14
 Judiciorum ratio duplex, 85. 23
 Jura belli, 16. 5
 Jus gentium, & jus civile quomodo differant, 129. 35. juris fons natura, 130. 23. jus jurandum ad adstringendam fidem vinculum arctissimum, 145. 10. justitia fundamentum fides, 11. 7. justitia servanda etiam adversus infimos, 18. 36. justitiâ nullum tempus vacare debet, 28. 10
 justitiâ solâ viri boni nominantur, 81. 8. justitia fruenda causâ reges olim constituti, 82. 13
 Justitia fundamentum est fama, 95. 11. justitia omnium domina & regina virtutum, 112. 29

L.

Largorum duo genera, 88. 11
 largitio, 94. 30

Latronum leges quadam sunt, 81. 37
 Leges cur constituta, 82. 19
 leges civium incolumitatem spectant, 110. 35. lex natura communem utilitatem spectat, 112. 8. 113. 14. 121. 34
 Liberalitatis duo sunt genera, 22. 3. liberalitatis ratio duplex, 86. 34. liberales qui, 88. 17
 Libertas quid sit, 229. 11
 Liber nemo nisi sapiens, ib. 10
 Libidinosa & intemperans adolescentia effatum corpus tradit senectuti, 160. 26. libidinosorum animi, 238. 29
 Lites valde vitanda, 91. 29
 Loci & temporis vis quanta sit, 59. 16
 Ludo & joco quatenus utendum, 43. 6

M.

Mendacium omne in contrahendis rebus tollendum, 125. 16
 Mente nihil divinius, 118. 26
 Mercari quod statim vendas, sordidum, 61. 18
 Mercatura quæ probanda, 61. 33
 Mercede ad amandum adduci, sordidissimum, 74. 13
 Metus omnis servitus est, 231. 23
 Micare in tenebris, 132. 35
 Miles semel dimissus nisi secundo sacramento obligetur, pugnare jure contra hostem non potest, 17. 4
 Modestia quid, 58. 19
 Mores corrumpuntur divitiis, 94. ult.
 Mors

Index rerum & verborum.

Mors servituti, & turpitudini
anteponenda, 33. ult. mors
seni aut planè negligenda,
aut etiam optanda est, 174.
26. mors longè abesse à se-
nectute non potest, 174. 23
mors omni atati communis,
175. 7. mortis adolescentum
& senum discrimen, 176. 6
morti nihil tam simile, quàm
somnus, 179. 26. mortuis
religiosa jura tribuuntur, 186.
26. mors quibus terribilis,
223. 17

Munus perinde est ut accipitur,
149. 3

Mutatio facienda consilii, ubi
nos errasse cognoscimus, 49. 37

N.

Naturam quisque suam potiùs
quàm alienam insequi de-
bet, 46. 15. natura quas
partes corporis texit, eas te-
gere omnes debent, 52. 18.
natura non patitur, ut alteri
detrahamus nostri commodi
causâ, 110. 29. est jus gen-
tium, 110. 31. natura est
lex divina & humana, 111.
1. natura lege una & eadem
omnes continemur, 112. 8.
natura dederat recta & con-
venientia, 115. 5. natura
principia, 121. 34. natura
fons juris, 130. 28. natura
mutari non potest, 194. 18.
similium sui appetens est,
200. 2.

Negligendus nemo in quo sit
aliqua significatio virtutis,
21. 6.

O.

Ojurgationum qui modus,
56. 10

Odisse aperte magis ingenuum
est, quàm fronte occultare
sententiam, 205. 11

Officina nihil habet ingenuum,
61. 23

Officii amplitudo & laus, 3. 13.
de officio quaestio duplex, 51.

Officii divisio, 5. 12. officii
deferendi causa, 12. 31. of-
ficia aliis alia magis debentur,
25. 30. Officiorum

boni ratiocinatores esse de-
bemus, 26. 1. officia splen-
didissima, qua ab animi mag-
nitudine oriuntur, 26. 27.

officium adolescentis, 50. 26.
officia senum, 51. 5. officium

magistratus, ib. 20. officium
privati, ibid. 24. officium

peregrini, ibid. 29. officii
persequendi rationes quinque,
69. 22. officiorum tractatio

in philosophia uberrima, 104.
34. deliberatio triplex, 105.

27. officia media, 107. 29.
officia à quatuor fontibus ho-
nestatis ducta, 139. 33

Onera maxima, senectus & pau-
pertas, 155. 28

Opes cum infamia non utiles,
136. 19

Opinionem hominum de se neg-
ligere, arrogantis est, 41. 22

Orationis vis, 218. 17. oratio-
nis duplex ratio, 14. ult.

orationis vis duplex, 54. 21
Oratoris proprium quid, 2. 19

Oratoris munus, ingenii non
solum est, sed luterum etiam
& virium, 160. 7

Orbi.

Index rerum & verborum.

Orbium caelestium ordo, 234. 7.
concentus, 234. 34. ab ho-
minibus non percipitur, 235.
 18
Ordo quid, 58. 22
Otium languorem affert, 103.
 12

P.

P*ascere bene, prima utilitas
 in re familiari*, 101. 31
*Patris vita cum violatur,
 quam multa peccantur*, 225.
 36
*Pro patria mors appetenda, si
 ita res ferat*, 25. 5. patria
parentibus anteponenda, 138.
 1
*Patroni civitatum & nationum
 qui esse debeant*, 16. 29
Πάτρις, 73. 5
Paupertas, contra naturam,
 110. 11
Peccare, nunquam utile, 126. 9.
peccandum non est amici cau-
sâ, 195. 11. *peccata esse*
aqualia, 224. 3. *peccata non*
rerum eventu, sed vitiis ho-
minum metienda sunt, 224.
 5. *peccare, est tanquam li-*
neas transire, 224. 14. *pec-*
catorum conscientia, dura
servitus, 231. 18
Pecunia cupiditas unde, 12. 1.
pecuniam contemnere mag-
nificum est, 29. 22. *pecuniâ*
corrupti fideles esse non pos-
sunt, 87. 17. *pecunia non so-*
lùm quarendâ, sed etiam
collocandâ, 82. 35. *pecunia*
cupiditas in plerisq; summa
amicitiâ pestis, 19. 54. *pe-*
cunia & gratia comparatio,
 94. 9

Perduellis, 17. 14
*Peregrinos usu urbis prohibere,
 inhumanum*, 119. 32
Periculosarum actionum multi-
plex ratio, 34. 27. *periculis*
sine causa offerre se, stultum
est, 34. 16
*Personis veluti duabus natura
 unumquemque nostrum indu-*
it, 44. 33
Perjurium quid sit, 143. ult.
Phaethon solis filius istu ful-
minis deflagravit, 139. 8
Philosophi in quo peccent, 13. 11.
Philosophorum vita minus
exposita fortuna telis, quàm
eorum, qui rempub. tractant,
 31. 8. *philosophiâ, quando*
& quibus rationibus adductus
operam dare ceperit Cicero,
 67. 9. *philosophia nomen*
quibusdam invisum, 67. 8.
philosophi qui, 68. 5. *philo-*
sophiâ defensio, 68. 12. *phi-*
losophia tota frugifera, &
fructuosa, 104. 32. *philoso-*
phiâ pars de officiis uberri-
ma, 104. 34. *philosophia li-*
beralitatem, justitiarq; conti-
nentiam docet, 111. 7. *phi-*
losophia vitam tranquillam
præstat, 151. 5. *philosopho-*
rum principes, 158. 15
Pietas in patriam, in cælum via
est, 239. 5
Piratis data fides non servanda,
 143. 33
Plato uno & octogesimo anno
scribens mortuus est, 155. 5
Poemata vel minus præclara de-
lectant imperitos, & laudan-
tur, 108. 2
Poeta iners extremum actum
negligit, 152. 9

Præcla-

Index rerum & verborum.

Praeclara omnia rara, 209. 7
Principatum appetere, hominis proprium, 7. 27
Privata nulla, natura: sed occupatione, victoria, lege, patientia, conditione, sorte, 10. 21. *privata vita otiosior, publica fructuosior*, 30. 10. *privata vita quibus concedenda, quibus minus*, 30. 15
Prodigi qui, 88. 13
Promissis quando standum non fit, 14. 33. 139. 28. *promissa non servanda*, 139. 20
Prudentia quid, 62. 29. *prudentia & sapientiae discrimen*, *ibid. prudentia sine iustitia nocet*, 79. 29. *prudentia vera & maxime utilis quae*, 79. 15. *prudentia senectutis est*, 157. 22
Pulchritudinis duo genera, 53. 25
Pythagoreorum mos in exercenda memoria, 163. 30

Q.

Quaestio de honesto & utili, 119. 8. *Quaestiones de officio*, 137. 7. *Quaestus turpes*, 333. 17

R.

Rectum ita iustum, si voluntarium, 13. 14
Recte facta à virtutibus profiscuntur, peccata à vitiis, 225. 7
Referenda gratia nullum officium magis necessarium est, 21. 27
Reges cur instituti, 82. 14

Regnandi cupiditates unde exstant, 115. 23. *regni fides nulla*, 12. 9. *regno iniqui atque infideles multi*, 135. 21
Rei familiaris augenda qui modus, 38. 31. *res familiaris quari debet iis rebus, à quibus abest turpitudine*, 101. 8. *res magna non corporum viribus, sed animi geruntur*, 156. 27
Reipub. praefuturis duo Platonis praecepta necessaria, 35. 20. *respublica maxima per adolescentulos labefactata, senibus sustentata*, 157. 15
Romani viri illustres bellicà laude, 27. 8. *Romanorum mos verecundus*, 53. 18

S.

Sanguinis conjunctio, vinculum charitatis, 24. 16
Sapientiae amor ex cognitione honesti, 8. 12. *sapientia in quo sita*, *ibid. 30. sapientia quid à prudentia differat*, 62. 29. *sapientia princeps virtutum*, *ib. 28. sapientia quid*, 68. 7. *sapientia laus*, *ibid. 16. sapientes septem*, *non tamen omnino sapientes*, 108. 21. *sapientis est habere rationem rei familiaris*, 125. 34. *sapiens, qui sibi non prodest, ne quidquam sapit*, 125. 28. *sapientis cum histione comparatio*, 175. 28. *sapientissimus quisque aequissimo animo moritur, stultissimus iniquissimo*, 180. 18. *sapientum quorundam de amicitia opinio*, 198. 10. *sapientis animus*

Index rerum & verborum.

animus quib. s. rebus munitus, 226. 26
Securitas caput est ad beatè vivendum, 198. 19
Seditionum origo qua, 35. 30.
Senator non est, qui iurejurando hostium tenetur, 141. 12
Senex nemo tam est, qui se annum non puset posse vivere, 158. 27. *senis sermo quietus & remissus decorus est,* 160. 11. *senibus conceditur, ut de se dicant,* 160. 36. *senem maturè fieri, si vis diu esse senex proverb.* 161. 22. *senex is probatur, in quo est aliquid adolescentis* 163. 23. *senili avaritiâ nihil absurdus,* 174. 18. *senectus optatur, eademq; accusatur,* 151. 32. *senectutis arma sunt exercitationes virtutum,* 153. 20. *senectus accusatur, non propter atatem, sed propter mores,* 85. 29. 155. 4. 174. 5. *senectus quatuor de causis misera videtur,* 155. 31. *senectus maximum on s putatur,* 155. 29. *senectutis vitia diligentia compensanda sunt,* 162. 31. *senectutis vituperatio,* 164. 7. *senectus natura loquacior,* 170. 20. *senectutis modica severitas probatur,* 174. 16. *senectutis fructus est, antè partorum bonorum memoria & copia,* 176. 1. *senectus peractio atatis est, tanquam fabula,* 181. 27
Sermo qualis esse debeat, 55. 14. *sermonum suavisas, amicitia condimentum,* 205. 16
Servorum infima conditio, 19.

1. *servis quomodo utendum,* 19. 3
Severitate sublatâ administrari civitas non potest, 36 ult.
Similitud ad amicitiam allicit 199. 36
Simulatum nihil diuturnum, 83. 9. *simulatio, perfidi, improbi, malitiosi hominis est,* 124. 36. *simulatum nihil in amicitia,* 192. 14
Societatis humana vinculum oratio, 22. 31. *societatis humana gradus,* 23. 30. *societas prastantissima, bonorum virorum familiaritas,* 24. 20. *societas inter omnes, major autem ut quisq; proximè accedit,* 189. 5
Solitarium nihil natura amat, 212. 1. *solitudo languorem affert,* 103. 12
Stoicorum oratio, 219. 2
Stulto nemini bene esse potest, 223. 2
Summum jus, summa injuria, 5. 5
Superbia in prosperis rebus fugienda, 37. 19
Sylla largitiones, non liberales, sed iusta, 20. 11

T.

Tabula nova injusta, 29. 34
Temperantia, 39. 13
Turpe mutatur tempore, 109. 11. *turpitudine maximè contra naturam,* 115. 5. *turpe nunquam utile,* 120. 28.
Tyrannorum ferè violenta mors, 75. 7

Vale-

Index rerum & verborum.

V.

Valitudinis tuenda ratio, 101. 3
Vestigalia urbana rusticis anteponenda, 101. 28
Venandi studium honestum, 43 ult
Venditor lege 12. tab. prestabat tantum vitia, quae lingua nuncupata essent, 126. 14
Veri adolescentia comparatur, 175. 35
Verecundia, 39. 11. verecundia sublatâ, nihil rectum aut honestum est, 60. 34. verecundia maximum amicitiae ornamentum, 210. 7
Veri investigatio, hominis propria, 7- 19
Veritas molesta est, 212. 16
Vestitus quae ratio, 54. 2
Veterrima quaeque debent esse suavissima, 205. 27
Veturius hosti deditus, 144. 7
Viam erranti non monstrare. Athenis execrationibus publicis sancitum, 122. 26
Villa locuples abundat porco, bœdo, agno, gallinâ, lacte, casro, melle, 171. 13
Vires celeritati anteponenda, 101. 27
Virgula divina, 64. 20
Virtutes ut quaeque leniores, ita amabiliore, 21. 9. virtutum quarundam simulacra in beluis, 2. 31. virtus omnis tribus in rebus fere vertitur, 72. 37. virtutem unam qui habet, an omnes habeat, 79. 32. virtutem quomodo non-

nulli interpretentur, 189. 33. virtute nihil amabilius, 192. 30. virtus tenera & tractabilis est, 199. 18. virtutis opinio, amicitiae conciliatrix, 196. 6. virtus seipsâ contenta est ad beatè vivendum, 22. 23. virtutes inter se pares, 224. 23. virtus est consentiens cum ratione & perpetua constantia, ibid. 32. virtus pluris aestimanda, quam ulla possessio, aut ulla vis auri & argenti, 234. 16. virtute qui praediti sunt, soli sunt divites, 235. 11. virtus amitti non potest, ibid. 7. vitae finis optimus, 176. 25
Vita deserta ab amicis, iucunda esse non potest, 201. 31
Vitia animi graviora, quam corporis ac fortunae, 111. 35
Vitis naturâ caduca, 169. 20
Ulciscendi modus, 15. 24. 45. 28
Voluptatis appetitum omnes ferè, propter verecundiam occultant, 44. 15. voluptates blandissima domina, 80. 31. voluptas omnis honestati contraria, 148. 17. voluptate nulla pestis capitalior, 164. 15. voluptates agricolarum, 168. 31. voluptas plurimorum patrociniis defenditur, 222. 16
Vox clara & suavis esse debet, 54. 34
Utile ab honesto separari non debet, 69. 33. utilitatum comparatio, 101. 19. utilitas communis secundum naturam, 112. 16. 114. 7

11100137

1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

1772 (2) 1772 (2) 1772 (2)

